

LUCAS TÛ RÁ

¹ Lucas tÛ rá vĕ. Sÿ ā mÿ rán vĕ, Teófilo'. Ũ tÛ hĕn ri ke ag vÿ to jykrén, ag tÛ kāmén jé, ěg tÛ Jesus to nén ki kanhró nÿtĭ ěn ti, Topĕ tÛ ti jĕnĕ ja ěn ti, kÿ ag tóg rán huri.

² Ũ tÛ ti vég mÿ ag tóg ěg mÿ kāmén ja nĭgtĭ, ũ tÛ ti vĭ tó tĭ ag, ũ tÛ ti mré mÿ ja ěn ag. Ěn ag tÛ nén tó rán ag tóg huri, ũ ag.

³ Kÿ sóg vāhā rán to jykrén mÿ gé sir, ha mĕ. Jesus kāme mĕ kån ja inh nĭ ha, ti mur mré hā, kÿ sóg ti tÛ nén han mÿ mĕ kån gé. Hā kÿ sóg ā mÿ Jesus kāme rán mÿ sir. Komĕr hā sóg rán kån sór mÿ.

TÛ ā tóg pā'i mág nĭ, Teófilo'.

⁴ Mĕ ā huri, Jesus kāme ti. Sÿ ā mÿ rán vĕ, ā tÛ ti tÛ ki hā tó ja mĕn jé sir.

João Batista mur ke tó

⁵ Kejĕn Herodes tóg tÛ Israel ag pā'i mág tÛ rei nĭ, ga tÛ Judéia tá. Kÿ Topĕ tÛ ki rĭr tĭ ũ tóg nĭ nĭ, ti jiji hā vÿ: Zacarias, he mÿ. Ti jóg'jóg ve jyjyn hā vÿ: Abias, he mÿ. Arāo krĕ'krĕ ũ vĕ, Abias ti. Semana pir ki tóg Topĕ tÛ ki rĭr tĭgtĭ, Abias ti. Ti semana ki ti krĕ'krĕ tÛ Zacarias ěn tÛ ki rĭr vĕ, ti tÛ tÛ Abias krĕ'krĕ nĭn kÿ.

Prŭ ti nĭ, Zacarias ti, kÿ ti prŭ fi jiji hā vÿ: Isabel, he mÿ. Arāo krĕ'krĕ fi vĕ gé, Isabel fi.

⁶ Ěn fag vÿ vĕnh jykre kuryj han tĭ, kÿ fag jykre vÿ kuryj nÿtĭ, Topĕ mÿ. Ti vĭ ki króm fag tóg tĭ, ěg Senhor vĭn ki. Ti tÛ ěg jyvĕn han fag tóg tĭ, kygnĕ sór tÛ fag tóg nĭgtĭ.

7 Hã ra fag krẽ tóg tũ tĩ. Kurĩ fi tóg nĩ, Isabel fi, hã kỹ fag tóg krẽ tũ nỹtĩ. Krẽ tũ nỹtĩ ki fag tóg kófa nỹtĩ ha.

8 Kejẽn Zacarias tóg ã semana pétẽm mũ sir, ti tỹ Topẽ tũ ki rĩr jé. Kỹ tóg cidade tỹ Jerusalém ra tĩ mũ, Topẽ tũ ki rĩr jé. Tá jun kỹ ag tóg jogar he mũ, ag tỹ ù tỹ Topẽ mỹ ger há pũn ke mũ ẽn ve jé, incenso ẽn ti.

9 Ag jykre vë, ag tỹ to jogar he sór ti. Ag tỹ to jogar hen kỹ tóg tỹ Zacarias nĩ sir, kỹ tóg Topẽ jo ãn kãra rã mũ sir, ti mỹ pũn jé, ger há ẽn ti.

10 Ti tỹ Topẽ jo ãn krẽm pũn kỹ vënh kar tóg re tá nỹtĩ nĩ, Topẽ mré vĩn kỹ. Zacarias tỹ Topẽ mỹ pũn kỹ ag tóg Topẽ mré vĩ nỹtĩ nĩ, re ki, ùn e ẽn ag.

11 Kỹ tóg ti mỹ pũn mũ sir. Kỹ Topẽ tỹ jẽnẽ jafã vỹ ti mỹ vënh ven mũ. Topẽ mỹ ger há pũn jafã vỹ tá jẽ nĩ, ãn kãtã. Mesa ẽn pëgja tá tóg jẽ nĩ, Topẽ tỹ jẽnẽ jafã ti.

12 Zacarias tỹ ti ve kỹ tóg jũrũn ke mũ. Ti mỹ tóg e tĩ, ti tỹ ti ven kỹ.

13 Hã ra tóg ti mré vĩ mũ, Topẽ tỹ jẽnẽ jafã ti. Kỹ tóg ti mỹ: “Zacarias’,” he mũ. “Kamëg tũg nĩ,” he tóg. “Topẽ vỹ ã tỹ ti mỹ nén to vĩ mũ ẽn mẽ, kỹ tóg ã mỹ han ke mũ ha. Fi kufyg jé ã tóg ke mũ, ã prũ fi, Isabel fi. Fi tỹ ti ve kỹ tóg gré nỹnh mũ, ã kósin ti, ha vemnĩ,” he tóg, Topẽ tỹ jẽnẽ jafã ti. “Kỹ ã tỹ ti jyy han kỹ: João, hemnĩ,” he tóg mũ.

14 “Kỹ tóg ã mỹ sér tĩnh mũ. ã fe tóg mrin kenh mũ. ù tỹ hën ri ke ag mỹ tóg há tĩnh mũ, fi tỹ ti ven kỹ.

15 Topẽ vỹ ti tỹ ùn mág han ke mũ. Vinho vóg ke tũ tóg nĩ, goj fa vóg ke tũ tóg nĩ gé. Ti vãkre vë. Topẽ

kuprĩg vỹ tỹ ti jagrẽ nĩnh mũ, fi tỹ ver ti vég tũ ki.

¹⁶ Israel ag mỹ tóg Topẽ vỹ tónh mũ, kỹ ù tỹ hẽn ri ke ag vỹ ti vỹ mẽ kỹ kri fi kỹ ãjag jykre tovãnh ke mũ. Topẽ jykre hã han jé.

¹⁷ Ëg Senhor jo tóg tĩg ke mũ gé. Vãsỹ Topẽ vỹ tó tĩ tỹ Elias jykre han jé tóg ke mũ. Elias vỹ Topẽ kuprĩg tỹ jagrẽ ja nĩgtĩ, kỹ tóg jykre tar han ja nĩgtĩ. Ën jykre han jé tóg ke mũ. ã kósin tag tỹ ag jyvẽn kỹ ag panh tóg ãjag krẽ mré vẽn jykre pir han ke mũ. Û tỹ Topẽ vỹ mranh tĩ ãn tóg vẽn jykre kuryj han sór ke mũ gé, ù tỹ Topẽ vỹ ki króm tĩ ãn ri ke. Hã ki tóg vẽn kar jykre tỹ há' henh ke mũ, ag kugrynh kỹ, ã kósin tag ti. Topẽ mỹ tóg ag jykre tỹ há' henh mũ, Cristo tỹ kãtĩg ken jo, ag tỹ ti jãvãnh jé,” he tóg mũ, Topẽ tỹ jẽnẽ jafã ti, Zacarias mỹ.

¹⁸ Kỹ Zacarias tóg ti mỹ: “hã ra sóg kófa nĩ ha,” he mũ. “Kar inh prũ fi vỹ kófa nĩ gé, inh mré. Kỹ inh hỹn hẽ ri kenh mũ? Inh mỹ tá krỹg mũ vỹ?” he tóg.

¹⁹ Kỹ Topẽ tỹ jẽnẽ jafã tóg ti mỹ: “tỹ sóg Gabriel nĩ,” he mũ. “Topẽ nĩgja tá inh jẽgtĩ. Hã ra tóg inh jẽnẽ, sỹ ã mré vỹ jé, sỹ ã mỹ vẽn vỹ sér tag tó jé,” he tóg.

²⁰ “Ha vé, vỹ vãn nĩ jé ã tóg ke mũ ha, ha vemnĩ. Vỹ vãn nĩ ki ã tóg isỹ ã mỹ nén tó mũ kurã ãn pétẽm ke mũ. ã hã ne tóg sỹ ã mỹ vỹ kri nĩm tũ nĩ'. Ti kurã ki ã tóg venh mũ, sỹ ã mỹ nén tó ja ti. ã tỹ inh vỹ kri fig tũ nĩn kỹ ã tóg vỹ vãn nĩnh mũ ha,” he tóg, Topẽ tỹ jẽnẽ jafã ti.

²¹ Hã ra vẽn kar ãn tóg re tá nỹtĩ nĩ, Zacarias jãvãnh kỹ. Ag mỹ tóg e tĩ, ti kãkutẽ vãn han kỹ, Topẽ jo ãn kãtã.

22 Vãhã tóg kãkutẽ mũ, hã ra tóg sir vĩ vãn h jẽ. Kĩ tóg ag mĩ ven mũ, ã nĩgẽ tỹ. Hã ki ag tóg ki kanhrãn mũ sir, ti tỹ nén nẽ ve ja ên ti, Topẽ jo ãn kãtã.

23 Ti vĩ vãn nĩn ki ti rãnrãj tóg kejẽn tũ' he mũ sir, ti tỹ Topẽ tũ ki rĩr ên ti. Kĩ tóg ã ãn ra tũ mũ sir.

24 Ti tỹ ã ãn tá jun kar kĩ ti prũ fi tóg kejẽn kufyg mũ sir, Isabel fi. Kĩ fi tóg vẽn h péju kĩ nĩ nĩ sir, fi mĩ sér tĩn kĩ. Kysã tỹ 5 (ke) han fi tóg, vẽn h péju kĩ nĩ ki.

25 “Topẽ hã ne inh jagãgtãn’,” he fi tóg mũ. “Inh ve tóg, kĩ tóg inh mĩ'ãg tỹ tũg' hé. Inh kurĩ to fag tóg: “Topẽ hỹn fi to kórég nĩ,” he ja nĩgtĩ. Hã ra tóg fag vĩ tỹ tũg' hé, Topẽ ti,” he fi tóg mũ. Hã kĩ fi tóg kufyg mũ sir, ã kósin vãn h (hã) ra.

Jesus mur ke tó

26 Fi kufy nĩ ki kysã tỹ 6 vẽn sir, kĩ Topẽ vỹ ã tỹ jẽnẽ jafã jẽnẽg mũ, ti tỹ Jesus mur ke tónh tũg jé, Gabriel ên ti. Kĩ tóg ga tỹ Galiléia ra tũ mũ, cidade tỹ Nazaré ra.

27 Tá tátãg ã fi tóg nĩ nĩ. Ûn mén ja tũ fi vẽn. Fi jijin hã vỹ: Maria, he mũ. Fi mén ken hã vỹ: José, he mũ. Davi krẽ'krẽ ã vẽn, José ti, fi mén ke ên ti.

28 Fi hã mĩ tóg vẽn h ven mũ sir, Gabriel ti, kĩ tóg fi mỹ: “ã mĩ há?” he mũ. “Topẽ vỹ ã jagãgtãn, kĩ tóg ã vég mũ,” he tóg mũ.

29 Fi tỹ ti ve kĩ fi tóg jũrũn ke mũ. Ti vĩ tóg fi mỹ e tũ, kĩ fi tóg to jykrén mũ sir, ti vĩ to. “Ti tỹ ne tó nẽ, hỹn?” he fi tóg mũ, to jykrén kĩ.

30 Kĩ Topẽ tỹ jẽnẽ jafã tóg fi mỹ: “kamẽg tũg ra,” he mũ. “Topẽ vỹ ã jagãgtãn mỹr,” he tóg.

31 “Ha vé, kufyg jé ã tóg ke mũ,” he tóg. “Kỹ ã tóg kósin ke mũ. ã tỹ ti jyjyn kỹ ti mỹ: Jesus, hemnĩ,” he tóg, Topê tỹ jêñē jafã ti, fi mỹ.

32 “Tỹn ãn mág jêñh ke mũ, ã kósin tag ti, kỹ ag tóg ti to: ã tỹ kynhmỹ nĩ ên kósin, henh ke mũ. Kỹ êg jóg tỹ Topê vỹ ti tỹ pã'i mág han ke mũ, vãsỹ ti jóg'jóg ve tỹ Davi jêgja kã.

33 Kỹ tóg tỹ pã'i nĩ sir, Jacó krê kar to pã'i. Ti tỹ tỹ pã'i nĩ tag vỹ tũ' henh ke tũ nĩ. Tỹ pã'i han kỹ tóg nĩ nĩ,” he tóg, Gabriel ti.

34 Kỹ fi tóg ti mỹ: “hã ra sóg ã mré nỹ ja tũ nĩ ver,” he mũ. “Kỹ inh hẽ ri kenh mũ?” he fi tóg ti mỹ.

35 Kỹ tóg fi mỹ: “Topê kuprĩg vỹ ã kri tĩnh mũ,” he mũ, “kỹ ti kãnhvég vỹ ã kri tĩnh mũ gé, kỹ tóg ã jykre tỹ ã kósin ti han ke mũ, Topê ti. Hã kỹ ag tóg ti to: Topê tũ, henh ke mũ, ã tỹ ãn venh ke ên to. Topê kósin, he jé ag tóg ke mũ, ti to.

36 Ha vé, ã mré ke fi vỹ kufy nĩ, Isabel fi. ãn gré ve jé fi tóg ke mũ. ã kófa (hã) ra fi tog kufy nĩ. Kysã tỹ 6 (ke) han fi tóg huri, kufy nĩ ki. Fi to ãjag tóg: kurĩ fi tóg nĩ, he tĩ vẽ, hã ra fi tóg kufy nĩ ha.

37 Topê hã ne nén kar han há nĩ', hã kỹ tóg fi mỹ han. Kỹ tóg ã mỹ han ke mũ gé, sỹ ã mỹ tó mũ tag ti,” he tóg, Gabriel ti.

38 Kỹ fi tóg ti mỹ: “há ti nĩ,” he mũ. “Tỹ sóg Topê camarada nĩ mỹr, ti tũ pẽ. Kỹ tóg inh mỹ há tĩ, ã tỹ inh mỹ tó mũ tag ti,” he fi tóg ti mỹ. Kỹ tóg tĩ mũ sir, Topê tỹ jêñē jafã ti.

Maria fi tỹ Isabel fi venh tĩ

39 Ti tĩg kar kũ Maria fi tóg tĩ mũ gé sir, Isabel fi jamã ra. Pãnónh e tá tóg nĩ, fi jamã ti, ga tỹ Judéia tá. Fi tỹ ra tĩg kũ fi tóg fũrũn tĩ mũ.

40 Fi tỹ Zacarias ãn tá jun kũ fi tóg Isabel fi mũ: “ã mũ há?” he mũ.

41 Kũ Isabel fi tóg fi vĩ mẽg mũ, kũ fi kósin tóg vo mũ, fi kãki. Kũ Topẽ kuprĩg vỹ fi krĩn mũ.

42 Kũ fi tóg prẽr mũ. “Topẽ tóg ã ve há han, fag kar kãmĩ tóg ã kuprẽg,” he fi tóg fi mũ. “Kũ Topẽ vỹ ã kósin ve há han mũ gé, ã tỹ ãn venh ke ti.

43 Inh Senhor mũnh fi hã ne tóg inh venh kãtĩ mũ, kũ tóg inh mũ e tĩ,” he fi tóg fi mũ.

44 “Ha vé, isỹ ã vĩ mẽ kũ inh kósin tóg vo ja nĩ, inh kãki. Ti mũ tóg sér tĩ, ã vĩ ti.

45 ã hã ne tóg Topẽ vĩ kri fi', ti tỹ ã mũ vẽn vĩ jẽnẽn kũ. Hã kũ tóg ã ve há han, Topẽ ti. ã tỹ ti vĩ kri nĩm kũ ã tóg venh ke mũ, ti tỹ ã mũ nén tó ja ti,” he fi tóg, Isabel fi, Maria fi mũ.

Maria fi jãn

46 Kũ Maria fi tóg ke mũ gé. “Topẽ mũ sóg vĩ há han sór mũ,” he fi tóg. “Inh mũ tóg tỹ ãn mág nĩ, ãg Senhor ti.

47 Kũ inh fe tóg mrin ke mũ, isỹ tỹ Topẽ tũ nĩn kũ, isỹ tỹ ãg kren han tĩ ãn tũ nĩn kũ.

48 Inh ki tóg ãvãnh mũr. Tỹ sóg ti camarada nĩ. Tỹ sóg ãn sĩ nĩ, hã ra tóg inh ki ãvãnh. Kũ vẽn kar tóg iso: “Topẽ vỹ fi ve há han,” henh ke mũ, inh krẽ'krẽ kar ke gé, ãprã ke krẽ kar ke gé.

49 Topẽ hã ne inh mũ ãg tỹ nén han vãnhan'. Tar ti nĩ, Topẽ ti, hã kũ tóg han, inh mũ. Jykre kuryj ti nĩ, Topẽ ti, kũ ti jiji tóg ãg mũ mẽ há tĩ.

⁵⁰ Ëg jagãgtãn tóg nĩgtĩ, ãg jóg'jóg ve ag ke gé, ãg panh ag ke gé, ãg ke gé, ãg krẽ kar ke gé. Û tỹ ti kamẽg mũ kar jagãgtãn tóg nĩgtĩ mÿr, ha mẽ.

⁵¹ Jykre (ka)mẽ tóg nĩ, kÿ tóg ãg tỹ nén han vãn hyn han tĩ. Û tỹ: “vẽsóg ki inh nén kar han tĩ,” he mũ ãn ag jykre tỹ tóg tũg' henh ke mũ,” he fi tóg.

⁵² “Pã'i mág ag tỹ tóg ãn kãsir han, Topẽ ti. Kÿ tóg ãn kãsir ag tỹ ãn mág han.

⁵³ Ûn jagãgtar ag fónfan tóg mũ, nén ù há tỹ, ù tỹ ti vĩ mẽ sór mũ ag. Ûn rico ag mÿ tóg: “ha mũ jẽg,” hé, kÿ tóg ag mÿ nén ù nĩm tú nĩ, kÿ ag tóg jagãgtar nÿtĩ ha, ù tỹ ti vĩ mẽ jãvãn ãn ag.

⁵⁴ Israel ag jagãgtãn tóg mũ, ã camarada ag, ã tỹ vãsÿ ag jagãgtãn tĩ ãn to jykrén kÿ. Ëg hã vẽ, ãg jagãgtãn tóg.

⁵⁵ Ëg jóg'jóg ve ag mÿ tóg tó ja nĩ, Abraão mÿ, ti krẽ ag mÿ ke gé, ti tỹ ãg jagãgtãn ke ti. Kÿ tóg ã vĩ ãn to jykrén kÿ han, ti tỹ vãsÿ nén tó ja ti. Ti tỹ ãg jagãgtãn ke ãn tóg tũg' he jãvãn nĩ,” he fi tóg, Maria fi. Fi tỹ Topẽ mÿ vĩ há han hã vẽ.

⁵⁶ Kar fi tóg kysã tãgtũ han mũ sir, Isabel fi mré, kÿ fi tóg ã jamã ra vÿn ke mũ sir.

João Batista mur

⁵⁷ Fi tĩg kar Isabel fi vÿ fi kósin venh ke kurã pétẽm mũ sir, kÿ fi tóg vég mũ. Hã ra tóg gré nÿ, fi kósin ti.

⁵⁸ Kÿ fi rã nÿtĩ fag vÿ vég mũ, fi kanhkã fag ke gé. Topẽ tỹ fi jagãgtãn mẽg fag tóg mũ. Kÿ tóg fag mÿ sér tĩ sir, fi mré, fi kósin to.

⁵⁹ Kurã tỹ 8 (ke) ki ag tóg fi tá junjun mũ, ag tỹ ti gré junun fár kym jé. Kÿ ag tóg ti jyjy to jykrén mũ

gé, hã vỹ: Zacarias, he mũ. Ti panh jiji tó sór ag tóg mũ, ti mỹ.

⁶⁰ Hã ra ti mỹnh fi tóg: “vó,” he mũ. “João, he jé tóg ke mũ, ti jyjy ti,” he fi tóg mũ.

⁶¹ Kĩ ag tóg fi mỹ: “ã kankhã jiji tũ vễ hã ra,” he mũ.

⁶² Kĩ ag tóg ti panh ki jẽmẽ sór mũ. ãjag nĩgé tỹ ag tóg ti mỹ: “ti jyjy hỹn hẽ ri kenh mũ'?” he mũ, ti panh mỹ, ag nĩgé tỹ.

⁶³ Kĩ tóg ki rán jafã to vĩ mũ, Zacarias ti, kĩ tóg rán mũ. “Ti jijin hã vỹ: João, he mũ,” he tóg, vễnh rán ki. Kĩ tóg ag mỹ e tĩ sir.

⁶⁴ Kĩ vẫhã ti vĩ tóg punh ke mũ. Ti nũnẽ tóg krónh ke mũ, kĩ tóg vĩ mũ sir, Topẽ mỹ vĩ há han tóg mũ, ti mỹ sér tĩn kĩ.

⁶⁵ Kĩ fag rã nỹtĩ kar vỹ kamẽg mũ. Kĩ vễnh vĩ ẽn tóg vễnh kar kri rũm mũ, ga tỹ Judéia kar mũ hã. Vễnh kar tóg tỹ vễmẽn kãn mũ.

⁶⁶ Kĩ ù tỹ mẽg mũ fag vỹ to jykrén mũ. “Gĩr tag hỹn hẽ ri kenh mũ,” he fag tóg mũ. Topẽ vỹ ti ki rĩr há han, hã kĩ tóg fag mỹ e tĩ.

Zacarias tỹ Topẽ mỹ vĩ há han

⁶⁷ Kĩ Topẽ kuprĩg vỹ ti panh tỹ Zacarias krĩn mũ, kĩ tóg tag tó mũ, ha mẽ.

⁶⁸ “Tỹ ti ùn mág jẽ, ẽg povo tỹ Israel kri, ẽg Senhor ti, hã vỹ: Topẽ, he mũ. Ẽg ki tóg ẽvãnh nĩgtĩ, Topẽ ti, ti tỹ ti tũ ag krenkren han jé. Ẽg hã vỹ tỹ ti tũ nỹtĩ,” he tóg.

⁶⁹ “Ti camarada tỹ Davi krẽ'krẽ ẽn vỹ ẽg krenkren han ke mũ, ẽg tỹ ti vĩ jẽmẽn kĩ. ùn mág pẽ vễ, Davi krẽ'krẽ ẽn ti. Topẽ tỹ ẽg mỹ nén han hã vễ.

⁷⁰ Hã kÿ tóg tó ja nĩ, vãsÿ. Ti vĩ tó tĩ ag vÿ tugtó ja nĩ, vãsÿ, ãg si ag, ti tũ ag.

⁷¹ Û tÿ hên ri ke ag vÿ ãg kato tãgtẽ mũgtĩ, hã ra tóg ãg krenkren han mũ, ag to, ù tÿ ãg to kórég tãvĩ nÿtĩ ag to.

⁷² Ti tÿ ãg jóg'jóg ve ag mÿ tó ja ên han ja tóg nĩ, ãg jagãgtãn kÿ, Topẽ ti. Ag mré jyrén ja tóg nĩ, Topẽ ti. Ên to jyrén ja tóg nĩ, kÿ tóg ki króm ja nĩ sir, Topẽ ti.

⁷³ Ëg jóg'jóg ve tÿ Abraão mÿ tóg vênh vĩ mág han ja nĩ, Topẽ ti.

⁷⁴ Kÿ tóg ti mÿ: “ag krenkren han jé sóg ke mũ, ã krẽ ag, ag kato tãgtẽ mũ ag to, ha vemnĩ,” he ja nĩ. “Sÿ ke há vë. Sÿ ag krenkren han kÿ ag tóg sir jatun mÿ isũ han ke mũ, mũmãg tũ nĩn kÿ,” he ja tóg nĩgtĩ, Topẽ ti.

⁷⁵ “Nén ù vênhmÿ han ke tũ ag tóg nĩgtĩ, kurã kãtĩg ke mũ ên kã. Vênh jykre kuryj tãvĩ han jé ag tóg ke mũ, isũ han kÿ. Ag tÿ ga kri mũn kÿ ag tóg han ke mũ, isũ ti. Kurã kar ki ag tóg sir inh jykre hã han ke mũ,” he ja tóg nĩgtĩ, Topẽ ti, Abraão mÿ,” he tóg, Zacarias ti.

⁷⁶ Kÿ tóg ã kósin mÿ: “ha vé, vÿ,” he mũ. “Sĩ ã tóg nĩ ver. Û tÿ kynhmÿ nĩ ên vĩ tó jé ã tóg ke mũ, kÿ ag tóg ã to: “Topẽ vĩ tó ti tĩ,” henh ke mũ. “Ëg Senhor jo ã tóg tĩnh mũ, ã tÿ ti japry kure ri ke han jé, ã tÿ ti jamĩn kurynh ri ke han jé, ã tÿ vênh kar mÿ Topẽ vĩ tón kÿ,” he tóg.

⁷⁷ “Ag kanhrãn jé ã tóg ke mũ, Topẽ tÿ ãg krenkren han sór ên to. Ëg tÿ ti vĩ mranh tÿ tóg ãg mÿ vênh pãte fón ke mũ, hã ki tóg ãg krenkren han ke mũ, Topẽ ti,” he tóg, Zacarias ti.

78 “Topê tỹ ãg jagãgtãn hã vê, ti tỹ ãg to há tãvĩ nĩn kỹ. ãg ve jé tóg kãtĩg ke mũ, kỹ tóg rã tỹ jun ke ri ke nĩ, Cristo mur ke ti.

79 Kutu ri ke ti nĩ, ãg mũ, ãg tỹ ti ki kagtĩg nỹtĩn kỹ. Ti kãtĩg kỹ tóg ãg mũ kurã ri ke nĩ sir. Kãgter jé ãg tóg ke mũ, kỹ tóg ãg mũ kutu ri ke nỹ sir. Hã ra tóg ãg mũ ã japy ven ke mũ, ã jamĩn ti. Jagma mũn kỹ ãg tóg ti jykre kusa venh ke mũ,” he tóg, Zacarias ti. Ti tỹ ã kósin mũ tón hã vê.

80 Hã kỹ fi tóg João ve ja nĩ, ti han mũ fag tỹ kófa (hã) ra. Kỹ tóg mog mũ sir, kỹ tóg tar jê sir. Krĩ há tóg nĩ gé. Ęmã tũ mũ tóg tĩ mũ ver, ã kurã tỹ tá krỹg ki. Ā kurã ki tóg Israel ag mũ vẽn ven mũ, ag mũ Topê vĩ kãmén jé.

2

Jesus Mur (Mt 1.18-25)

1 João mur kar kỹ ga kri pã'i mág tỹ imperador tỹ Augusto vỹ kejẽn vẽn vỹ jẽnẽg mũ, vẽn kar ag tỹ ãjag jyjy rán mũ jé. Ga kri mũ kar ag mũ tóg vẽn vỹ ẽn jẽnẽg mũ, pã'i mág tỹ Augusto ti.

2 Vẽn jiji rá ve vê, ge han ja tũ ag nỹtĩ. Cirênio vỹ tỹ ga tỹ Síria kri pã'i tỹ governador nĩ, Augusto tỹ vẽn vỹ ẽn jẽnẽg mũn kã. Tỹ tóg Augusto krẽm ke nĩ, Cirênio ti. Ti tỹ tỹ pã'i nĩn kỹ ag tóg sir ãjag jyjy ránrán vén mũ.

3 Kỹ ag tóg mũ kãn mũ, ãjag jóg'jóg ve ag jamã ja ra. Tá ag tóg ãjag jiji rá vịn mũ sir.

4-5 Kỹ José tóg tĩ mũ gé, ã prũnh ke fi mré, hã vỹ: Maria, he mũ. Cidade tỹ Nazaré tá fag tóg pa mũ, ga tỹ Galiléia tá. Kỹ fag tóg ga tỹ Judéia ra mũ mũ,

cidade tỹ Belém ra. Davi krẽ'krẽ vễ, José ti, hã kỹ tóg Belém ra tĩ mũ, ã jyjy rá nĩm jé. Davi jamã ja vễ, Belém ti. Hã kỹ tóg ra tĩ mũ. Kỹ ti prũnh ke fi vỹ ti mré tĩ mũ, hã ra fi tóg kufy jagy nĩ.

⁶ Fag tỹ tá nỹtĩ ki fi tóg ã kurã pětẽm mũ.

⁷ Kỹ fi tóg ã kósin vég mũ sir. Gré ti nỹ, fi kósin ve tag ti. Kỹ fi tóg ti pãg kỹ koso kãkã ti fig mũ. Ĩn vỹ funfór nỹtĩ, hã kỹ fag tóg vễnh mễg jo ĩn krẽm nỹtĩ ja nĩgtĩ.

Mé ki rĩr tĩ ag

⁸ Kỹ ù tỹ mé ki rĩr tĩ ag vỹ tá nỹtĩ gé, carneiro ki rĩr tĩ ag. Ag japỹ ja tá ag nỹtĩ, ãjag mễg ki rĩr jé, kuty ẽn kã.

⁹ Kỹ vãhã Topẽ tỹ jẽnẽ jafã vỹ ag mỹ vễnh ven mũ, kanhkã tá. Topẽ tỹ jẽngrẽ vỹ ag kri rũm ke mũ. Kỹ ag tóg kamễg kỹ jũrũn ke mũ sir.

¹⁰ Kỹ Topẽ tỹ jẽnẽ jafã tóg ag mỹ: “kamễg tũg ra,” he mũ. “Sỹ ãjag mỹ nén ù tónh ke vễ. Vễnh vĩ há tó jé sóg ke mũ, kỹ tóg ãjag mỹ sér tĩnh mũ. Vễnh kar vỹ mễnh mũ, inh vĩ ti, povo kar, kỹ ag fe tóg mrin ke mũ sir.

¹¹ Ājag krenkren han tĩ vỹ ùri mur, hã vỹ: Cristo, he mũ. Ēg Senhor vễ ha mỹr. Davi jamã ja tá tóg mur mũ.

¹² Ha mũ jễg, ãjag tỹ gĩr ẽn ve jé. Koso kãkã tóg pãg kỹ nỹ nĩ. Hã ki ãjag tóg ti ki kanhró nỹtĩnh mũ,” he tóg ag mỹ, Topẽ tỹ jẽnẽ jafã ti.

¹³ Kỹ vãhã ù tỹ hẽn ri ke ag tóg vễnh ven mũ sir. Topẽ tỹ jẽnẽ jafã ag, kanhkã tân ag. Ēn ag vỹ Topẽ mỹ vĩ há han mũ.

¹⁴ “Topẽ vỹ tỹ ùn mág pẽ nĩ,” he ag tóg mũ. “Kynhmỹ ti nĩ, vễnh kar kãfór ti nĩ, kỹ ẽprã ke ag

vỹ jatun mỹ nýtĩ, ãjag krĩ kusa tĩn kỹ, Topẽ tỹ ù tó há ag,” he ag tóg mũ.

¹⁵ Kar ag tóg tũg' he mũ sir, ag tỹ kanhkã ra mũn kỹ.

Ag tỹ tũg' hen kỹ ù tỹ carneiro ki rĩr tĩ ag vỹ jagnẽ mỹ: “mũ nỹ, Belém ra, ãg tỹ ve jé, Topẽ tỹ nén han ja ti, ãg Senhor tỹ ãg mỹ vẽnĩ vĩ jẽnẽ ja ãn ti,” he mũ.

¹⁶ Kỹ ag tóg fũrũnrũn mũ mũ sir. Tá ag tóg junjun mũ. Kỹ ag tóg vég mũ, Maria fi, José ti ke gé, gĩr ti ke gé. Koso kãkã tóg nỹ nĩ, Maria fi kósin ãn ti.

¹⁷ Hã kỹ ag tóg vég mũ. Hã kỹ ag tóg kãmén mũ, vẽnĩ kar mỹ. Topẽ tỹ ag mỹ vẽnĩ vĩ jẽnẽ ja ãn kãmén ag tóg mũ, gĩr ãn to.

¹⁸ Kỹ tóg ù tỹ mẽg mũ ag mỹ e tĩ sir. Û tỹ mé ki rĩr tĩ ag vĩ mẽg ag tóg mũ, kỹ tóg ag mỹ sér tĩ.

¹⁹ Kỹ Maria fi tóg vẽnĩ vĩ tag to jykrén mũ gé sir. Fi pi(jé) kã jatun mũ', ag tỹ nén tó ja ãn ti. To jykrén kỹ fi tóg nĩ nĩ, Maria fi.

²⁰ Kỹ carneiro ki rĩr tĩ ag tóg sir ãjag mẽg to vỹnvỹn ke mũ gé. Topẽ mỹ ag tóg vĩ há han mũ. “Ti hã ne tóg ãg mỹ vẽnĩ vĩ jẽnẽ ja nĩ', ã tỹ jẽgnẽ jafã ag tỹ', kỹ ãg tóg vé,” he ag tóg mũ sir, Topẽ to.

Fag tỹ Jesus jijin

²¹ Kar kurã tỹ 8 (ke) vỹ tũg mũ. Kỹ tóg ti gré junun fár kym ke kurã pètẽm mũ sir, gĩr sĩ ãn ti. Kỹ fag tóg ti jijin kỹ ti mỹ: “Jesus,” he mũ. Topẽ tỹ jẽnẽ jafã vỹ ti jyjy tag tó ja nĩ, ti mỹnh fi tỹ ver ti tỹ kufyg tũ ra. Hã kỹ fag tóg sir tỹ ti jijin mũ.

Fag tỹ Topẽ mỹ Jesus ven

²² Kejẽn fag vãkre tóg tá krỹg mũ, kỹ fag tóg vẽnĩ kykũnh sór mũ. Moisés vỹ tag rán ja nĩ, gĩr mur kar

kỹ fag tỹ vãnh kykũnh ke ti. Judeu ag jykre hã vễ. Fag tỹ vãnh kykũnh jé fag tóg cidade tỹ Jerusalém ra mũ mũ, fi tỹ Topê mỹ ã kósin ven jé, tá. “Ă tũ vễ,” he sór fag tóg mũ, Topê mỹ, fi kósin ên to.

²³ Topê vĩ ki tag vĩ rán kỹ nĩ, hã vĩ: “fi kósin ve tỹ gré nỹn kỹ tóg tỹ êg jóg mág tỹ Topê tũ nỹ,” he mũ, Topê vĩ tỹ rán kỹ nĩ ki.

²⁴ Hã kỹ fag tóg Topê jo ãn ra mũ mũ, Topê mỹ nén ù pũn jé. Rán kỹ tóg nĩ nĩ, êg jóg mág vĩn ki, fag tỹ ne tỹ ti mỹ pũn ke ti, hã vĩ: sórãg régre, ke tũ nĩ kỹ ton régre, he mũ gé. Ên ma fag tóg mũ mũ, fag tỹ Topê mỹ pũn jé. Topê tũ ki rĩr tĩ ag mỹ fag tóg vin tĩ, sórãg ti, kỹ ag tóg tãnh kỹ Topê mỹ pũn tĩ.

²⁵ Kỹ Jerusalém tá ù tóg nĩ nĩ, ti jyjy hã vĩ: Simeão, he mũ. Ûn jykre kuryj vễ, Simeão ti. Topê kamêg tóg tĩgtĩ, Topê kuprĩg tỹ tóg jagrê nĩ. Topê tỹ Israel ag krenkren han mũ ên jãvãnh tóg nĩgtĩ, Simeão ti.

²⁶ Kỹ Topê kuprĩg vĩ ti mỹ: “Cristo ve jé ã tóg ke mũ, ã ter ke to hã, êg Senhor tỹ ti jẽnên kỹ,” he ja nĩgtĩ ti mỹ.

²⁷ Topê kuprĩg tỹ ti krĩn kỹ tóg kejẽn Topê jo ãn kãra tĩ mũ. Kỹ tóg tá jẽ nĩ, hã ra fag tóg Jesus ma kãmũ mũ, fag tỹ Topê mỹ sórãg pũn jé, Moisés tỹ Judeu ag mỹ nén tó ja ti.

²⁸ Ă tỹ Jesus ve kỹ tóg ti vãg mũ sir, kỹ tóg ti to Topê mỹ vĩ há han mũ, Simeão ti.

²⁹ “Êg jóg mág,” he tóg, Topê mỹ. “Vãhã ã tóg inh jé prêr ke mũ, kỹ sóg jatun mỹ tĩg mũ ha,” he tóg. “Ă tỹ inh mỹ nén tó jan han ã tóg huri,” he tóg.

³⁰ “Ve inh huri, ã tỹ êg krenkren han ke mũ ti. Cristo ve inh huri,” he tóg, Simeão ti.

31 “Věnh kar rĩnve ã tóg han, ã tỹ ěg krenkren han ke mũ ti.

32 Kỹ tóg ěg mỹ jěngrě ri ke nĩ, Cristo mur ti. Kỹ povo kar vỹ vég mũ, fóg ag kar, kanhgág ag kar ke gé, ã tỹ ag krenkren han ke mũ ti. Ěg povo tỹ Israel tỹ ã tóg ũn mág han huri, věnh kar rĩnve, Cristo tỹ ěg mré ke nĩn kỹ,” he tóg, Simeão ti, Topě mỹ.

33 Kỹ Jesus jóg vỹ ti vĩ mẽg mũ, Jesus mỹnh fi ke gé, kỹ tóg fag mỹ e tĩ, ti tỹ Jesus to nén tó mũ ěn ti.

34 Kỹ Simeão vỹ fag mỹ věnh vĩ há tó mũ gé. “Topě vỹ ãjag ve há han mũ,” he tóg mũ fag mỹ, Simeão ti. Kỹ tóg Maria fi mỹ: “ha vé,” he mũ. “Israel tỹ hěn ri ke ag vỹ ti tugrĩn mũ há han ke mũ, jāvo ũ tỹ hěn ri ke ag vỹ ti tugnĩn mũ kónãn ke mũ gé. Kỹ ag tóg ti kato vĩnh ke mũ gé, Topě tỹ ti jěně ja ra.

35 Kỹ ã tóg ti tugrĩn vēsỹrěnh kenh ke mũ, jỹ, kỹ tóg rógro tỹ ã fe tỹ gynh ke ri ke nĩnh ke mũ, ã vēsỹrěnh ke ti. Kỹ ěg tóg venh ke mũ, ag tỹ nén to ti to jykrén mũ ti,” he tóg, Maria fi mỹ, Simeão ti.

36 Kỹ ũ fi tóg tá nĩ gé, Topě jo ĩn krěm, fi jiji hã vỹ: Ana, he mũ. Topě vĩ tó tĩ fi vễ gé. Fanuel kósin fi vễ. Kỹ fi jóg'jóg ve vỹ tỹ Aser nĩ. Kófa fi nĩ ha, kófa tăvĩ. ã mén kỹ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar.

37 Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ěn fi vỹ Topě jo ĩn krěm nĩ nĩ, kurã kar ki fi tóg tá nĩ nĩ sir. Tá fi tóg Topě tũ han nĩgtĩ, ti mré vĩ kỹ. Jěg tũ fi nĩgtĩ, fi tỹ Topě mré vĩ jé. Kuty tá fi tóg ke tĩ, kurã tá ke gé.

38 Ěn fi vỹ hora ěn kã Topě jo ĩn krěm jě mũ, Simeão tỹ Jesus ven kỹ. Kỹ fi tóg Jesus vég mũ gé

sir, Ana fi. Ti ve kÿ fi tóg Topě mÿ vÿ há han mÿ. “Inh mÿ tóg há tÿ, sÿ ti ven kÿ,” he fi tóg mÿ, Topě mÿ. Věnh kar mÿ fi tóg tó mÿ, ùn krenkren sór mÿ ag mÿ, Jerusalém tá.

Fag tÿ Nazaré ra vÿn ke

³⁹ Kÿ fag tóg sir Moisés tÿ věnh kykÿnh to nén rán ja ěn han kãn mÿ sir, Jesus mÿnh fi, Topě tÿ Judeu fag mÿ věnh jykre nÿm ja ěn ti. Kar kÿ fag tóg sir cidade tÿ Nazaré ra vÿnvÿn ke mÿ, ga tÿ Galiléia ra, fag jamã ra ke vë sir.

⁴⁰ Kÿ gÿr sÿ ěn tóg mog mÿ sir, koměr hã tóg tar jě sir. Kÿ tóg věnh kanhrãn há han mÿ, kÿ Topě vÿ ti ve há han mÿ gé, hã kÿ tóg věnh kanhrãn mág mÿ sir, ùn sÿ ěn ti.

Jesus tÿ ã pir mÿ Topě jo ïn tá nÿ

⁴¹ Jesus mÿnh fag tóg prÿg kar ki Jerusalém ra mÿ tÿ, fag tÿ festa tÿ Páscoa venh mÿ jé. Fag jykre hã vë.

⁴² Jesus tÿ 12 anos han kÿ tóg fag mré tÿ mÿ gé, fag tÿ festa ěn venh mÿn kÿ, Jerusalém ra.

⁴³ Festa tÿ tÿ ken kÿ fag tóg vÿnvÿn ke mÿ, hã ra Jesus tóg Jerusalém tá nÿ nÿ. Hã ra fag tóg ki kagtÿg nÿtÿ, ti tÿ Jerusalém tá nÿ ěn ki.

⁴⁴ Kÿ fag tóg: “ti hÿn ù tÿ ěg mré kãmÿ mÿ fag mré vyr, ěg jo,” he mÿ. Kÿ fag tóg kurã pir ki mÿ mÿ, fag jamã ra vÿnvÿn ke kÿ. Fag tÿ ãjag mré ke fag tá junjun kÿ fag tóg ti jãvãnh mÿ, ãjag to há kar fag kãmÿ.

⁴⁵ Hã ra fag tóg tá Jesus vég tÿ nÿ. Kÿ fag tóg Jerusalém ra vÿnvÿn ke mãn mÿ gé, ti jãvãnh jé.

⁴⁶ Vãhã fag tóg ti vég mÿ, kurã tãgtÿ tÿ kÿ. Topě jo ïn krēm tóg nÿ nÿ, professor ag mré. Ag vÿ mēg tóg nÿ nÿ, kÿ tóg ag ki jēmēg mÿ gé, “ne nē?” hen kÿ.

47 Û tỹ ti vĩ mẽg mũ ag mỹ tóg e tĩ. To jykrén há han tóg, Jesus ti, kỹ tóg ag mỹ tó há han mũ. Ag tỹ ti vĩ mẽ kỹ tóg ag mỹ e tĩ, professor ag mỹ.

48 Ti mỹnh fag tỹ ti ve kỹ tóg fag mỹ e tĩ gé sir. Kỹ ti mỹnh fi tóg ti mỹ: “inh kósín!,” he mũ. “Ã tỹ tag kã ne han nĩ nẽ? Ã jóg mré sóg ã jãvãnh jagy han. ã jãvãnh to ěg tóg kanẽ jur, ěg tỹ ã vég tũ nĩn kỹ,” he fi tóg ti mỹ.

49 Hã ra tóg fi mỹ: “ã tỹ ne jé inh jãvãnh ja nẽ?” he mũ. “Hẽ ri ken kỹ hỹn’?” he tóg. “Inh panh pẽ ĩn krēm sóg nĩ nĩ mỹr, kỹn mỹ ãjag mỹ vẽnhmỹ?” he tóg, ã mỹnh fag mỹ.

50 Hã ra tóg fag tỹ to jykrén tũ tĩ, fag kósín vĩ to.

51 Kỹ tóg fag mré tĩ mũ, cidade tỹ Nazaré ra. Tá tóg fag mré nĩ nĩ sir, ti tỹ fag vĩ jēmẽn kỹ. Kỹ ti mỹnh fi pi(jé) vẽn vĩ kar tag kã jatun nĩ’.

52 Kỹ Jesus tóg mog mũ sir. Krĩ há tãvĩ tóg nĩ. Topẽ vĩ ti ve há han mũ sir. Kỹ tóg vẽn kar mỹ há tĩ sir, ag tỹ ti jykre ven kỹ.

3

João Batista ti

(Mt 3.1-12; Mc 1.1-8; Jo 1.19-28)

1 Kejẽn tóg Tibério tỹ pã'i mág tỹ imperador nĩ kri 15 anos han mũ. Ti tỹ Roma tá tỹ pã'i mág nĩ ěn kã Pôncio Pilatos vỹ tỹ ga tỹ Judéia kri pã'i tỹ governador nĩ, Tibério krēm. Ěn kã Herodes vỹ tỹ Galiléia kri pã'i tỹ governador nĩ gé, Tibério krēm. Herodes jãvy tỹ Filipe vỹ tỹ ga tỹ Ituréia tá pã'i tỹ governador nĩ gé, ga tỹ Traconites tá ke gé, Tibério krēm. Jãvo Lisânias vỹ tỹ ga tỹ Abilene tá pã'i tỹ governador nĩ, Tibério krēm.

² Ën kã Caifás vỹ tỹ Topẽ tũ ki rĩr tĩ ag pã'i mág nĩ, Anás mré há. Kỹ vãhã Topẽ vỹ João mré vĩ mũ sir, Zacarias kósin ên mré. Êmã tũg ja mũ tóg tĩ mũ, João ti. Kỹ Topẽ tóg ti mỹ: “ha Israel ag mỹ vãnh ven tĩg,” he mũ.

³ Kỹ tóg sir tĩ mũ. Goj tỹ Jordão jagma tóg tĩ mũ. Tĩg kỹ tóg vãnh kar jyvẽn mũ, kỹ tóg ag mỹ: “ã kype jé sóg ke mũ, ã tỹ ã jykre kórég tovãnh sór kỹ, Topẽ tỹ ã tỹ ti vĩ mranh tỹ ã mỹ vãnh pãte fón jé,” he tóg mũ sir, vãnh kar mỹ.

⁴ João tóg rán kỹ nĩ, vãsỹ. Topẽ vĩ tó tĩ tỹ Isaiás vỹ João to tag rán ja nĩ, ha mẽ: “êmã tũg ja tá tóg jẽn h ke mũ, ga kórég tá,” he ja tóg nĩ, Isaiás ti. “Tá tóg ag mỹ tónh ke mũ. “Ëg Senhor kãtĩg ke jo vãnh jãnhkrigkrig nĩ,” he jé tóg ke mũ. “Ëpry kurég ãjag tóg tĩ, êmĩn kurynh ãjag tóg tĩ, ãjag chefe jun ken kỹ. Kỹ tag ri ke han nĩ, ãjag jykre pãno togvãnh kỹ, Ëg Senhor kãtĩg ken jo.

⁵ Ti kãgnó tỹ ãjag tóg kyjer' he tĩ, kar ãjag tóg ãpry sór kar kũm ke tĩ gé, êmĩn sór ti. Ti jonjor kugrynh kãn ãjag tóg tĩ, ti sunsór vãvãm kãn ãjag tóg tĩ gé, ãjag tỹ ãpry han kỹ, êmĩn han kỹ. Kỹ tag ri ke han nĩ, ãjag jykre kórég to.

⁶ Hã kỹ ãprã ke kar vỹ venh ke mũ, Topẽ tỹ Ëg krenkren han ke ti,” he jé tóg ke mũ, kỹ vãnh kar vỹ ti vĩ mẽnh mũ,” he ja tóg nĩ, Isaiás ti, João to.

⁷ Hã kỹ João tóg sir ag jyvẽn mũ sir, ag tỹ ti venh kãmũn kỹ, ti tỹ ag kygpe jé. E tãvĩ ag nỹtĩ, ù tỹ ti venh kãmũ mũ ag. Ag jyvẽn kỹ tóg ag mỹ: “pỹn ri ke ãjag tóg nỹtĩ, ãjag jykre pãno tãvĩ nĩn kỹ,” he mũ. “Û nỹ ãjag mỹ: “Topẽ jũ venh ke tũ ãjag nĩ,” he tĩ’?

⁸ ãjag jykre si togvãnh ra, ãjag tỹ ti jũ ve jãvãnh

tĩn kÿ. Vẽnħ jykre há han ra, ěg tÿ ãjag jykre tãg ve jé. Hã ra ãjag tóg jagně mÿ: “Abraão vÿ tÿ ěg jóg'jóg ve nĩ,” he mũ, “kÿ Topě hÿn ěg to jũnh ke tũ nĩ, ěg tÿ tÿ Abraão krě'krě nÿtĩn tugrĩn,” he ãjag tóg tĩ. Hã tũ vẽn ģã ra. ãjag jykre kórég ěn to ãjag tóg jagtar ke mũ, ha vemnĩ. Topě vÿ Abraão krě'krě hÿn han ki kanhró nĩ, pó tag tÿ mÿr, ti tÿ Abraão krě'krě ve sór kÿ, Topě ti.

⁹ Hã ra tóg ãjag tÿ tũ' henh ke mũ, ãjag tÿ ãjag jykre kórég tovãnh tũ nĩn kÿ,” he tóg, João ti.

“Ěg tÿ ka gÿn ri ke tóg nĩ. Ti kaněn vãnh nĩn kÿ ěg tóg ti gÿn tĩ, tÿ pĩ han jé. Tag ri ke han jé tóg ke mũ, Topě ti, ãjag mÿ, ãjag tÿ vẽnħ jykre há han tũ nĩn kÿ. Kÿ tóg pĩ ki ãjag vãm ke mũ, Topě ti,” he tóg ag mÿ, João ti.

¹⁰ Kÿ ùn e ag tóg ti ki jēmẽnħ kãmũ mũ sir, João ki. Kÿ ag tóg ti mÿ: “kÿ ěg hÿn hẽn ri kenh mũ ha, Topě jykre han jé?” he mũ.

¹¹ Kÿ tóg ag mÿ: “ã kur régre nĩn kÿ ã kur pir nĩmnĩ, ùn kur tũ ěn mÿ,” he mũ. “Ã jẽn tÿ ùn kókĩnkĩr ag mÿ vẽnħ kãpópãm nĩ gé,” he tóg.

¹² Kÿ ù tÿ governo mÿ imposto kaja mãg tĩ ag vÿ João to kãmũ mũ gé, ti tÿ ag kygpe jé. Kÿ ag tóg ti mÿ: “professor,” he mũ. “Ěg hÿn hẽn ri kenh mũ?” he ag tóg mũ gé.

¹³ Kÿ João tóg ag mÿ: “pã'i mág tÿ ãjag mÿ nén tó mũ ěn ģã ri ke mãn nĩ, jãnkamy ti,” he mũ. “Ker ti kãfór mãn sór hẽn,” he tóg ag mÿ.

¹⁴ Kÿ soldado ag vÿ tá junjun mũ gé. “Kÿ ěg hÿn hẽn ri kenh mũ?” he ag tóg mũ gé sir, soldado ag. Kÿ tóg ag mÿ: “ag tũ mãn sór tũg nĩ,” he mũ. “Ag to vãsãn ãjag tóg tĩ, ù to ón ãjag tóg tĩ gé, ãjag tÿ ag

jãnkamy ve jé. Ke tũg nĩ. Ājag rãnrhãj to ãjag tóg jãnkamy vég tĩ. Ti kãfór mãn sór tũg nĩ,” he tóg, João ti, soldado ag mỹ.

¹⁵ Kĩ vènh kar ag tóg ti to jykrén mũ, João to. “Ti mỹ tỹ Cristo tũ nĩ vỹ?” he ag tóg mũ sir ti to. João to ag tóg ke mũ, ag tỹ Cristo kãtĩg jãvãnh kỹ.

¹⁶ Kỹ João tóg ag mỹ: “inh pĩ(jé) tỹ Cristo nĩ,” he mũ. “Goj hã tỹ sóg ãjag kygpég tĩ. Inh nón tóg kãtĩg mũ, Cristo ti, ha mẽ. Inh kãfór ti nĩ. Sỹ tỹ ti camarada nĩnh ke vè vè, sỹ ti pèn né kunũ jé, ti pèn to ró ti. Hã ra sóg tỹ ti krêm pẽ jẽ. Ēn vỹ tóg Topẽ kuprĩg jènènh ke mũ, ti tỹ tỹ ãjag jagrẽ nĩ jé, kỹ tóg pĩ jèngrẽ ri ke nĩ. Ti tỹ ãjag kygpenh ken hã vè,” he tóg, João ti. mũ, ti tỹ tỹ ãjag jagrẽ nĩ jé, kỹ tóg pĩ jèngrẽ ri ke nĩ. Ti tỹ ãjag kygpenh ken hã vè,” he tóg, João ti.

¹⁷ “Ti kãtĩg vỹ tỹ ěg tỹ rãgró rèn ri ke nĩ. Ti rèn kar kỹ ěg tóg ti fár vãm tĩ, ěg tỹ pãjó kuprãg jé. Ti kanẽ há vin han ěg tóg tĩ. Ti fár pũn ěg tóg tĩ. Cristo kãtĩg kỹ tóg ri ke nỹ. Ủ tỹ ã to há ag mỹ tóg: “ha kãmũ jèg,” henh ke mũ. Ủ tỹ ã to kórég ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti.

¹⁸ Hã kỹ tóg vènh kar mỹ Topẽ vĩ sér tó mũ, ag jyvèn kỹ, João ti.

¹⁹ Kỹ tóg pã'i mág tỹ Herodes jyvèn mũ gé, ti prũ fi to, hã vỹ: Herodias fi, he mũ. Tỹ fi ti jãvy prũ ja nĩ, hã ra tóg fi péju kỹ fi tỹ prũg mũ, Herodes ti. Nén ù vènhmỹ e han tóg tĩ, hã kỹ João tóg ti jyvèn mũ.

²⁰ Kar tóg sir nén ù vènhmỹ ù han mãn mũ gé, Herodes ti. João ség tóg mũ, ti tỹ ti jyvèn to.

*João tỹ Jesus kype
(Mt 3.13-17; Mc 1.9-11)*

21 Hã ra tóg kãgmĩ kÿ jẽ tũ nĩ ver, João ti. Kÿ tóg ag kygpe kãn mũ. Kÿ tóg kejẽn Jesus kypég mũ gé. Kÿ Jesus tóg jẽ nĩ, ti tÿ Topẽ mré vãn kÿ, João tÿ ti kype kar kÿ. Kÿ vãhã kanhkã tóg nor' he mũ.

22 Kÿ Topẽ kuprĩg vÿ kanhkã tá kãtére mũ, ti kri. Tÿ sórãg ve ti nĩ, Topẽ kuprĩg ti. Kÿ kanhkã tá vãnh vĩ tóg mẽ há tĩ, kÿ tóg: “tÿ ã inh kósın pir jẽ, tÿ ã tóg inh fe pẽ jęgtĩ,” he mũ, vãnh vĩ ti, Topẽ ti.

Jesus jóg'jóg ve ag
(Mt 1.1-17)

23 Jesus vÿ 30 anos han mũ, ti tÿ vãnh kar mẽ Topẽ kãmén ve ki. “José kósın vễ,” he ag tóg tĩ ti to, hã ra tóg tÿ ti kósın tũ nĩgtĩ. Eli kósın vễ, Jesus ti, kÿ Eli ẽn vÿ tÿ ti vovô nĩ.

24 Eli vÿ tÿ Matate kósın nĩ. Matate vÿ tÿ Levi kósın nĩ. Levi vÿ tÿ Malqui kósın nĩ. Malqui vÿ tÿ Janai kósın nĩ. Janai vÿ tÿ José kósın nĩ.

25 José vÿ tÿ Matatias kósın nĩ. Matatias vÿ tÿ Amós kósın nĩ. Amós vÿ tÿ Naum kósın nĩ. Naum vÿ tÿ Esli kósın nĩ. Esli vÿ tÿ Nagai kósın nĩ.

26 Nagai vÿ tÿ Maate kósın nĩ. Maate vÿ tÿ Matatias kósın nĩ. Matatias vÿ tÿ Semei kósın nĩ. Semei vÿ tÿ José kósın nĩ. José vÿ tÿ Joda kósın nĩ.

27 Joda vÿ tÿ Joanã kósın nĩ. Joanã vÿ tÿ Resa kósın nĩ. Resa vÿ tÿ Zorobabel kósın nĩ. Zorobabel vÿ tÿ Salatıel kósın nĩ. Salatıel vÿ tÿ Neri kósın nĩ.

28 Neri vÿ tÿ Melqui kósın nĩ. Melqui vÿ tÿ Adi kósın nĩ. Adi vÿ tÿ Cosã kósın nĩ. Cosã vÿ tÿ Elmadão kósın nĩ. Elmadão vÿ tÿ Er kósın nĩ.

29 Er vÿ tÿ Josué kósın nĩ. Josué vÿ tÿ Eliézer kósın nĩ. Eliézer vÿ tÿ Jorım kósın nĩ. Jorım vÿ tÿ Matate kósın nĩ. Matate vÿ tÿ Levi kósın nĩ.

³⁰ Levi vỹ tỹ Simeão kósin nĩ. Simeão vỹ tỹ Judá kósin nĩ. Judá vỹ tỹ José kósin nĩ. José vỹ tỹ Jonã kósin nĩ. Jonã vỹ tỹ Eliaquim kósin nĩ.

³¹ Eliaquim vỹ tỹ Meleá kósin nĩ. Meleá vỹ tỹ Mena kósin nĩ. Mena vỹ tỹ Matata kósin nĩ. Matata vỹ tỹ Natã kósin nĩ. Natã vỹ tỹ Davi kósin nĩ.

³² Davi vỹ tỹ Jessé kósin nĩ. Jessé vỹ tỹ Obede kósin nĩ. Obede vỹ tỹ Boaz kósin nĩ. Boaz vỹ tỹ Sala kósin nĩ. Sala vỹ tỹ Nassom kósin nĩ.

³³ Nassom vỹ tỹ Aminadabe kósin nĩ. Aminadabe vỹ tỹ Admim kósin nĩ. Admim vỹ tỹ Arni kósin nĩ. Arni vỹ tỹ Esrom kósin nĩ. Esrom vỹ tỹ Peres kósin nĩ. Peres vỹ tỹ Judá kósin nĩ.

³⁴ Judá vỹ tỹ Jacó kósin nĩ. Jacó vỹ tỹ Isaque kósin nĩ. Isaque vỹ tỹ Abraão kósin nĩ. Abraão vỹ tỹ Tera kósin nĩ. Tera vỹ tỹ Nacor kósin nĩ.

³⁵ Nacor vỹ tỹ Seruque kósin nĩ. Seruque vỹ tỹ Ragaú kósin nĩ. Ragaú vỹ tỹ Faleque kósin nĩ. Faleque vỹ tỹ Éber kósin nĩ. Éber vỹ tỹ Sala kósin nĩ.

³⁶ Sala vỹ tỹ Cainã kósin nĩ. Cainã vỹ tỹ Arfaxade kósin nĩ. Arfaxade vỹ tỹ Sem kósin nĩ. Sem vỹ tỹ Noé kósin nĩ. Noé vỹ tỹ Lameque kósin nĩ.

³⁷ Lameque vỹ tỹ Metusalém kósin nĩ. Metusalém vỹ tỹ Enoque kósin nĩ. Enoque vỹ tỹ Jarete kósin nĩ. Jarete vỹ tỹ Maleleel kósin nĩ. Maleleel vỹ tỹ Cainã kósin nĩ.

³⁸ Cainã vỹ tỹ Enos kósin nĩ. Enos vỹ tỹ Sete kósin nĩ. Sete vỹ tỹ Adão kósin nĩ. Adão vỹ tỹ Topẽ tỹ há nĩ. Jesus jóg'jóg ve ag hã vễ.

*Jesus tỹ Topẽ vĩ mranh tũ
(Mt 4.1-11; Mc 1.12-13)*

¹ Kỹ Topẽ kuprĩg vĩ tỹ Jesus jagrẽ nĩ. Kỹ Jesus vĩ goj tỹ Jordão tá vĩn ke mũ, ã kype kỹ jẽn kỹ. Ti tũg kỹ Topẽ kuprĩg vĩ ti krĩn mũ.

² Kỹ tóg ti tỹ ti krĩn kỹ ẽmã tũg ja ra tĩ mũ sir, ga kórég ra. Tá tóg kurã tỹ 40 (ke) han mũ, ẽmã tũg ja ki. Kỹ Japo vĩ ti tỹ ã jóg vĩ mranh han sór mũ, tá, hã ra Jesus tóg ke tũ nĩ. Ẽmã tũg ja tá nĩn kỹ tóg jẽg tũ nĩ, kurã tỹ 40 ẽn ki. Kar kỹ tóg sir kókĩr mũ.

³ Ti kókĩr nĩn kỹ Japo vĩ ti mỹ vĩ mũ. “Tỹ ã Topẽ kósin nĩ mỹr,” he tóg. “Ã tỹ tỹ Topẽ kósin nĩn kỹ pó tag tỹ ẽmĩ han nĩ, ã tỹ kon jé,” he tóg ti mỹ, Nén-Kórég ẽn ti, Jesus mỹ.

⁴ Kỹ Jesus tóg ti mỹ: “hã ra tag tóg rán kỹ nĩ, ha mẽ,” he mũ. “Ẽmĩ tãvĩ jamẽn kỹ ẽg rĩnrĩr tũ nỹtĩ, Topẽ vĩ jamẽn kỹ ẽg rĩnrĩr nỹtĩ. Hã kỹ tóg sỹ ti vĩ mranh jãvãnh tĩ, ẽmĩ to,” he tóg, Jesus ti, Nén-Kórég ẽn mỹ.

⁵ Kỹ Japo vĩ ti mré tãpry mũ. Kỹ tóg ti mỹ mundo ven kãn mũ, ù tỹ kri ke kar ag ke gé. Ven pir ki tóg ti mỹ ven kãn mũ.

⁶ Kỹ tóg ti mỹ: “isũ vễ mỹr,” he mũ, Japo ti. “Ã mỹ sóg tovãnh kãn sór mũ, ã tỹ tỹ vễnh kar tag ag pã'i jẽ jé. Kỹ ti sĩnvĩ tag kar vĩ tỹ ã tũ nĩnh mũ. Isũ vễ mỹr, ù tỹn han ja ẽn tỹ inh mỹ: “té,” hen kỹ. Kỹ sóg sỹ ùn kuprêg mũ ẽn mỹ vin tĩ sir.

⁷ ã hã mỹ sóg tovãnh sór mũ ha, ã tỹ inh krêm grĩnh ken kỹ, ã tỹ iso: “Topẽ vĩ tỹ ã nĩ,” hen kỹ,” he tóg, Nén-Kórég ti, Jesus mỹ.

⁸ Kỹ Jesus tóg ti mỹ: “tag vĩ rán kỹ nĩ, ha mẽ,” he mũ. “Ẽg pã'i tỹ Topẽ hã krêm ẽg tóg ẽg jakrĩ tỹ krỹ'

he tĩ, ti hã to ãg tóg: Topẽ vễ, he tĩ,” he tóg, Topẽ vĩ tỹ rán kỹ nĩn ki. Hã kỹ sóg mranh jãvãnh nĩ,” he tóg, Jesus ti, Nén-Kórég mỹ.

⁹ Kỹ Japo tóg ti mré tĩg mãn mũ, cidade tỹ Jerusalém ra. Tá tóg ti mỹ: “Topẽ jo ãn kri jẽmnĩ, ti krĩ kri,” he mũ. Kỹ tóg ke mũ. Hã ra kãgnó tóg tá nĩ, Topẽ jo ãn jo. Japo tóg Jesus mỹ: “Topẽ kósin vỹ tỹ ã nĩ,” he mũ. “Kỹ hũm hemnĩ.

¹⁰ Tag vỹ rán kỹ nĩ, ha mẽ: “ã tỹ jẽnẽ jafã ag mỹ tóg tónh mũ, Topẽ ti, kỹ ag tóg ã ki rĩr ke mũ.

¹¹ ãjag nĩgé tỹ ag tóg ã vyn ke mũ, kỹ ã tóg rỹj ke tũ nĩ. ã pẽn vỹ rỹj ke tũ nĩ gé, hã jé ag tóg ã ki rĩr ke mũ,” he tóg, Topẽ vĩ tỹ rán kỹ nĩ ãn ki. Kỹ jatun mỹ hũm nĩ,” he tóg, Nén-Kórég ti, Jesus mỹ.

¹² Kỹ Jesus vỹ ti mỹ ke mũ gé. “Kỹ tag vỹ rán kỹ nĩ gé, ha mẽ,” he tóg. “Topẽ mỹ: ã mỹ ã tỹ nén tó ja ãn han mũ vỹ? he tũg nĩ,” he tóg mũ gé, Topẽ vĩ tỹ rán kỹ nĩ ãn ki. Hã kỹ sóg Topẽ hã tỹ ãn hĩ mỹ nén tó mũ ãn han ke mũ, kỹ sóg hũm ke tũ nĩ, ti tỹ ãn hĩ mỹ tó tũ nĩn kỹ,” he tóg, Jesus ti, Nén-Kórég mỹ.

¹³ Kỹ Japo vỹ ã tỹ nén tónh ke ãn tó kãn ja nĩ, hã kỹ tóg Jesus tovãnh mũ ver, ti tỹ kurã ã kã ti mré vĩ mãn jé, kejẽn, ti tỹ ti mỹ há tĩ ve nĩn kỹ, Japo mỹ.

Jesus tỹ Galiléia tá ag kanhrãn

(Mt 4.12-17; Mc 1.14-15)

¹⁴ Kỹ Jesus tóg tĩ mũ sir, Topẽ kuprĩg tỹ ti krĩn kỹ. Ga tỹ Galiléia ra tóg tĩ mũ. Kỹ vẽn kar ti kãmẽ mẽ kãn mũ sir, ga ãn tá ke kar ag.

¹⁵ Kỹ tóg ag kanhrãn mũ sir, Jesus ti, ag vẽn kanhrãn jafã krẽm. Krẽm ag tóg Topẽ vĩ tó tĩ, Judeu ag. Jesus tỹ ag kanhrãn kỹ tóg ag mỹ e tĩ, ti vĩ ti. Hã kỹ ag tóg ti to vĩ há han mũ sir.

*Jesus tỹ Nazaré ra vỹn ke
(Mt 13.53-58; Mc 6.1-6)*

¹⁶ Kỹ Jesus tóg Nazaré tá jun mũ gé, ã jamã tá. Tá tóg mog ja nĩ, cidade tỹ Nazaré tá. Kỹ tóg ã tỹ nén han tĩ ên han mũ. Ag vãnh kanhrãn jafã ra tóg tĩ mũ, vãnh kán ke kurã ki. Tá tóg sir jěgně mũ, culto ki, ag vãnh mãn kỹ nỹtĩ ên ki. Tĩ tỹ Topě vĩ to ke sór vë, hã kỹ tóg jěgně mũ, Jesus ti.

¹⁷ Tĩ jě kỹ ag tóg ti mỹ livro nĩm mũ, Isaías tỹ rán ja ên ti, vãsỹ Topě vĩ tó tĩ tỹ rán ja ên ti. Kỹ tóg livro tỹ vym ke mũ. Kỹ tóg ã tỹ to ke sór mũ ên vëg mũ, Isaías tỹ tó ja ti, ha mẽ.

¹⁸ “Topě kuprĩg vỹ inh krĩn mũ,” he tóg. “Inh jagrë vë mỹr, hã kỹ tóg inh krĩn mũ. “Ûn jagãgtar ag mỹ inh vĩ tómnĩ,” he tóg inh mỹ. Inh jěněg tóg mũ, isỹ ùn sigse kỹ nỹtĩ ag kygvãn jé, isỹ ùn kyvó ag tỹ êvãnh (há) han jé, isỹ ag tỹ ùn vóg kónãn mũ ag ki rĩr há han jé, ag jatu nỹtĩ jé,

¹⁹ isỹ vãnh kar mỹ: “ũri ěg jóg mág vỹ ěg kren han sór mũ,” he jé,” he tóg, Isaías ti, vãnh rá ki. Hã to ke tóg mũ, Jesus ti.

²⁰ Tag to ke kar kỹ tóg livro ěn kri tỹ tam ke mãn mũ. Livro ki rĩr tĩ ěn mỹ tóg jun mũ, livro ti. Kỹ tóg nĩ mũ sir.

Hã ra vãnh kar ag tóg ti ki êvãnh mũ.

²¹ Kỹ tóg ag mỹ kãmén mũ, kỹ tóg: “vãsỹ rán kỹ nĩ ja tag mẽ ãjag tóg,” he mũ. “Ûri ke vë, ùri ãjag tóg vëg mũ, vãsỹ rán kỹ nĩ ja ên ti,” he tóg. “Inh hã to tóg tag tó ja nĩ, Isaías ti,” he tóg, Jesus ti.

²² Ag tỹ ti vĩ mẽ kỹ tóg ag mỹ e tĩ sir. “Ki hã tóg tó mũ, hã kỹ tóg ěg mỹ e tĩ,” he ag tóg mũ. Kỹ ag tóg ti

to vī mū gé. “José kósin vē mýr, ěg mré ke ěn, hã ra tóg ěg vī kãfór han sór mū,” he ag tóg mū ti to.

²³ Kÿ Jesus tóg ag mÿ: “ãjag hÿn iso jykrén sór mū,” he mū. “Médico mÿ ěg tóg: “kur vēsÿ há' hé, ã tÿ tÿ médico nĩ sór nĩn kÿ,” he tĩ. ãjag hÿn tag tó sór mū inh mÿ. ãjag hÿn inh mÿ: “cidade tÿ Cafarnaum tá ã tóg ag tÿ há' hé, ùn kagyga ag tÿ, kÿ kur tag ki ěg tÿ há' hemnĩ gé, ã jamã tag ki, ã tÿ vēnh kar tÿ há' he sór nĩn kÿ,” he sór ãjag hÿn mū inh mÿ,” he tóg, Jesus ti.

²⁴ Kÿ tóg ag mÿ: “ti jamã tá ke ag ne tóg Topě vī tó tĩ ěn to é he tĩ,” he mū. “Ti tÿ ke há vē. Hã kÿ ãjag tóg iso é he tĩ,” he tóg ag mÿ, Jesus ti.

²⁵⁻²⁶ “Ha mẽ, sÿ nén tó mū ti. Elias to jykrén nĩ. Ti tÿ ga kri tĩ mū kÿ tóg ta kutě vãnh han ja nĩgtĩ, prÿg tâgtũ kri kysã tÿ 6 (ke) ki. Kÿ tóg prÿg tĩ sir, ga ěn mĩ, vējěn tóg tũ' he mū sir. Kÿ Topě tóg Elias mÿ tó, ti tÿ cidade tÿ Sarepta ra tĩg jé, cidade tÿ Sidom kakó ra. Tá fóg fi tóg nĩ nĩ, ùn mén ter ja fi. Fi mré tóg jěg tĩ sir, Elias ti, fi tÿ ti mÿ vējěn tÿ vēnh kãpãm kÿ, prÿg ra. Topě pi(jé) Israel fi to ti jěně ja nĩgtĩ'. Ti pi(jé) ti jamã ra ti jěně ja nĩgtĩ'. Tá fag tóg e nÿtĩ ja nĩgtĩ gé, ùn mén ter ja fag. Hã ra Topě tóg fóg ěn fi to ti jěně ja nĩgtĩ, fi tÿ ti ki rĩr jé,” he tóg, Jesus ti.

²⁷ “Kÿ Eliseu to jykrén nĩ gé, vãsÿ Topě vī tó tĩ ěn to. Ti tÿ ga kri tĩ nĩn kÿ ùn kagyga ag tóg e ja nÿtĩgtĩ gé, ěg povo tÿ Israel kãmĩ, vēnh kaga kren vãnh han mū ag, vēnh kaga tÿ lepra han mū ag. Hã ra ag tóg ti mÿ to vī ja tũ nĩgtĩ, ti tÿ ag tÿ há' hen jé. Kuvar há tá tóg kãtĩg ja nĩgtĩ, fóg ti, Naamã ti, ga tÿ Síria tá ke ěn ti. Kÿ ti hã ne tóg Eliseu mÿ to vĩn kÿ há' he mū sir inhhã. Ti kaga kren vãnh ěn tóg tũ' he mū

sir. Ge ãjag tóg nĩgtĩ iso. Kuvar há tá ke fag vỹ inh ki ge tĩ, jãvo ãjag tóg inh ki ge jãvãnh nỹtĩ, ãjag tỹ tỹ inh jamã tá ke nỹtĩ ra,” he tóg ag mỹ, Jesus ti.

²⁸ Kĩ ù tỹ ti vĩ mẽg mũ ag fe tóg gỹm ke mũ sir, Jesus to, ù tỹ vãnh kanhrãn jafã ên krêm nỹtĩ ag.

²⁹ Jẽgiẽg nẽgnẽ ag tóg mũ sir. Kãpa ag tóg mũ sir. Ti vóg ag tóg mũ sir, pãnónh ra. Nazaré vỹ pãnónh tá nĩ, ag jamã ti. Pãnónh ên to jãpry kĩ ag tóg tá ti kutẽm sór mũ, kãgnó ki ti ter jé.

³⁰ Hã ra Jesus tóg ag ré kĩ tĩ mũ, ag jãmĩ. Ti tỹ hẽ ri ke tũ ag tóg nĩ sir, kĩ tóg ag fĩn rãm kĩ ag ré kĩ tĩ mũ.

Hã ra ag tóg ti vĩ kri fi jãvãnh nỹtĩ, ti jamã tá ke ag.

*Jesus tỹ vãnh jagrẽ kórég kutẽm
(Mc 1.21-28)*

³¹ Kĩ Jesus tóg cidade tỹ Cafarnaum ra tĩ mũ. Ga tỹ Galiléia tá ti nĩ, Cafarnaum ti. Tá jun kĩ tóg ag kanhrãn mũ, vãnh kán ke kurã ki.

³² Kĩ tóg ag mỹ e tĩ, ag tỹ ti vĩ mẽn kĩ. Ti vĩ vỹ vãnh kar vĩ kãfór nĩ, hã kĩ tóg ag mỹ e tĩ.

³³ Kĩ vãnh kanhrãn jafã ên krêm ù tóg nĩ nĩ. Jagrẽ kórég ti nĩ. Kĩ tóg prẽr mũ, kĩ tóg:

³⁴ “ha mẽ, ã tỹ ẽg tỹ hẽ ri kenh ke nẽ, Nazaré tá Jesus'?” he mũ. “Á mỹ ẽg tũg sór mũ?” he tóg. “Á ki kanhró sóg nĩ. Tỹ ã tóg ã pĩr mỹ Topẽ mré ke nĩ, ti tũ pẽ vỹ tỹ ã nĩ,” he tóg, ùn jagrẽ kórég ti.

³⁵ Hã ra Jesus tóg ti mỹ vĩ tar han mũ, kĩ tóg: “vĩ tũg ra,” he mũ. “Tĩ tovãnh ra,” he tóg. Kĩ ti jagrẽ kórég ên tóg ti ter tĩ han mũ, vãnh kar rĩnve, kĩ tóg ti ki kutẽ mũ sir. Ti kókég tũ tóg nĩ, ti jagrẽ kórég ti.

³⁶ Kÿ tóg vĕnh kar mÿ e pĕ tãvĩ tĩ sir. Jagnĕ mÿ ag tóg: “ne nĕ hÿn vé'?” he mũ. “Vĕnh jagrĕ kórég ag mÿ tóg vĩ tĩ, Jesus ti, kÿ ag tóg sir ki króm tĩ, ti vĩ ki, ti kamĕg kÿ, ti tÿ ag pan kÿ. Ti hÿn tÿ ag kri ke nĩ,” he ag tóg mũ sir, Jesus to.

³⁷ Kÿ ti kãme tóg vĕnh kar kri rÿm ke kãn mũ sir, ga ĕn tá.

*Jesus tÿ ùn kagyga e ag tÿ há' he
(Mt 8.14-17; Mc 1.29-34)*

³⁸ Kÿ Jesus tóg vĕnh kanhrãn jafã ĕn ki kutĕ kÿ Simão Ìn ra tĩ mũ. Hã ra Simão prÿ fi mÿnh fi tóg kaga nÿ nĩ. Rÿ jagy fi nÿ nĩ. Kÿ ag tóg Jesus mÿ fi tó mũ.

³⁹ Kÿ tóg fi vĕnh tĩ mũ. Fi krĩ tá jĕ kÿ tóg fi mÿ: “rÿg mãn tũg nĩ,” he mũ. Kÿ fi rÿ ĕn tóg tũ' he mũ sir. Kÿ fi tóg vĕsÿmĕr nĩ nĩ. Ag ki rÿr fi tóg mũ sir, Simão má fi.

⁴⁰ Kÿ tóg sir kutyg mũ, rã tÿ pun ke kÿ. Kÿ ag tóg ùn kagyga ag tatĩn kãmũ kãn mũ. Kÿ tóg ã nĭgé tÿ ag mĕ kãn mũ, Jesus ti, kÿ ag tóg hághá' he kãn mũ.

⁴¹ Vĕnh jagrĕ kórég pan kãn tóg mũ gé, ag to jũ kÿ. Ag panh ke to hã ag tóg prĕr mũ, kÿ ag tóg: “Topĕ kósın vÿ tÿ ã nĩ,” he tĩ. Hã ra tóg ag mÿ: “vĩ tũg ra,” he mũ. Ti ki kanhró ag tóg nÿtĩ, ti tÿ tÿ Cristo nĩ ti. Hã kÿ tóg ag mÿ: “vĩ tũg ra,” he mũ, Jesus ti.

*Jesus tÿ Topĕ vĩ tó
(Mc 1.35-39)*

⁴² Tÿ vaj kÿ Jesus tóg tá kutĕ kÿ ĕmã tũg ja ra tĩ mũ. Kÿ vĕnh kar ag tóg ti jãvãnh kãn mũ. Hã ra ag tóg ti vég mũ. Ti ve kÿ ag tóg ti mÿ: “ĕg ré kÿ tĩ tũg nĩ,” he mũ.

⁴³ Hã ra tóg ag mÿ: “vó,” he mũ. “Cidade ù ra sóg tĩg mũ, sÿ ag mÿ Topẽ vĩ tó jé gé, Topẽ tÿ tÿ ãg pã'i nĩnh ke ti. Hã jé Topẽ tóg inh mÿ: “ha ag mÿ vènh ven,” he ja nĩ,” he tóg ag mÿ, Jesus ti.

⁴⁴ Kÿ tóg tĩ mũ sir. Ga tÿ Judéia mũ tóg tĩ mũ. Vènh kanhrãn jafã krêm tóg ag mÿ Topẽ vĩ tó tĩ mũ sir, Jesus ti.

5

Jesus tÿ Pedro kanhrãn

(Mt 4.18-22; Mc 1.16-20)

¹ Kejẽn Jesus tóg goj nig tÿ Genesaré fyr tá jẽ nĩ, Topẽ vĩ kãmén kÿ. Kÿ vènh kar vÿ ti pénĩn nÿtĩ nĩ, kÿ ag tóg ti kutãn mũ sir, ag e tâvĩ nÿtĩn kÿ, ag tÿ Topẽ vĩ mẽ sór kÿ.

² Ag tÿ ti kutãn kÿ tóg canoa régre vigvég mũ, nig fyr tá. Pirã kugmĩg tĩ ag vÿ tá kãpa kÿ nÿtĩ nĩ. Goj kãki jẽg jẽg kÿ ag tóg pirã kugmĩ jafã kunũnh kÿ kupég nÿtĩ nĩ.

³ Kÿ Jesus tóg canoa kãra rã mũ. Simão tũ vè, canoa ãn ti. Kÿ tóg Simão mÿ: “tĩg sĩ han ra, canoa kãmĩ, goj kaju ra,” he mũ. Kÿ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kÿ tóg ag kanhrãn mũ sir, vènh kar ãn ag, ù tÿ ti kutãn ja ãn ag. Goj fyr tá ag tóg nÿtĩ.

⁴ Ti tÿ ag kanhrãn kãn kÿ tóg Simão mÿ: “goj kaju ra tĩg, ti nig ja ra,” he mũ. “Tã ã rede tÿ goj kãki fón, ã tÿ pirã kugmĩ jé,” he tóg.

⁵ Kÿ Simão tóg ãg Senhor mÿ: “hã ra ãg tóg kuty tag kã goj ki ti fón', fón' he ja nĩgtĩ, fagrĩnh mÿ,” he mũ. “Nén ù kãgmĩg tũ ãg tóg nĩ mÿr,” he tóg. “Hã ra sóg ã vĩ tugrĩn ki fón sór mũ ha,” he tóg, Simão ti.

⁶ Kÿ tóg ke mũ sir. Kÿ tóg kugmĩ mág mũ. Fór tóg nĩ, rede ti, kÿ tóg jaran ke mũ, ti kufy jagy távĩ nĩn kÿ, pirã e tugñĩn.

⁷ Kÿ ag tóg ãjag régre ag mÿ ven mũ, ag tÿ canoa ù kãki kãmũ jé. Ag tÿ tá junjun kÿ ag tóg canoa régre ên fãn mũ, pirã tÿ. Funfór ti nÿtĩ, hã kÿ tóg ki punpun ke kren mũ sir, canoa régre ên ti.

⁸ Kÿ Simão tóg Jesus krêm grĩnh ke mũ. Ti mÿ tóg e tĩ, pirã e ên to, kÿ tóg Jesus krêm grĩnh ke mũ. Kÿ tóg ti mÿ: “Senhor,” he mũ. “Ã hÿn inh ré kÿ tÿg mũ ha. Topẽ vĩ mranh ja inh nĩgtĩ, kÿ inh hÿn ã mÿ kórég nĩ ha,” he tóg, Simão ti, Jesus mÿ.

⁹ Ti mÿ tóg e pẽ távĩ tĩ, ti tÿ pirã e ên ven kÿ, ti tÿ Jesus jykre ven kÿ. Ti mré ke ag mÿ tóg e tĩ gé,

¹⁰ Tiago mÿ ke gé, João mÿ ke gé, Zebedeu krẽ tag ag mÿ. Simão régre ag vë, Zebedeu krẽ tag ag, ti companheiro ag vë.

Kÿ Simão tóg Jesus mÿ: “ã hÿn inh ré kÿ tÿg mũ ha,” he mũ. Hã ra Jesus tóg ti mÿ: “kamẽg tÿg nĩ,” he mũ. “Pirã kugmĩ há ã tóg jë. ã kanhrãn jé sóg ke mũ, ã tÿ ãprã ke ag tÿ inh ki ge han jé,” he tóg, Simão mÿ, Jesus ti.

¹¹ Kÿ ag tóg ãjag canoa vóg mũ, goj fyr ra. Tá junjun kÿ ag tóg ãjag tũ kar ré kÿ mũ mũ sir, Jesus mré.

Jesus tÿ ùn kaga kren vãnh tÿ há' he

(Mt 8.1-4; Mc 1.40-45)

¹² Kÿ tóg kejẽn cidade ù tá nĩ nĩ. Kÿ ù tóg ti tá jun mũ, ù tÿ vënh kaga kren vãnh han kÿ nĩ ti, vënh kaga tÿ lepra he mũ ên. Ti kri tóg rũm ke kãn ja nĩ, vënh kaga ti. Ên tóg Jesus tá jun kÿ ti krêm mũg ke mũ, kÿ tóg ti mÿ: “Senhor,” he mũ. “Ã mÿ isÿ há'

he sór tũ nĩ'?" he tóg. "Ã hã tóg isỹ há' henh mũ, ã tỹ isỹ há' he sór kỹ," he tóg ti mỹ.

¹³ Kỹ Jesus tóg ã nĩgé tỹ ti mēg mũ, kỹ tóg ti mỹ: "hej," he mũ. "To sóg há nĩ, há' he ja há ã tóg nĩ," he tóg ti mỹ. Kỹ tóg ti kaga kren vãnh tỹ há' he mũ sir vēsỹmér. Jãnhkri' he tóg mũ, ti fár ti.

¹⁴ Kỹ Jesus tóg ti mỹ ke mũ, ti tỹ ù mỹ tó tũg jé, ti tỹ há' he tag ti. "Ha tĩg," he tóg. "Topē tũ ki rĩr tĩ to tĩg. Ti hã mỹ tómnĩ, kỹ ti mỹ nén ù nĩm nĩ, ti tỹ Topē mỹ pũn jé, Moisés tỹ vāsỹ ěg mỹ nén tó ja ěn ti, ã jãnhkri to. Hã tũgrĩn vãnh kar vỹ ã tỹ há' he mũ tag ki kanhrãn mũ," he tóg ti mỹ, Jesus ti.

¹⁵ Ge ra ti kãme tóg vãnh kar kri rũm ke mũ, kỹ ù tỹ hẽn ri ke ag tóg vãnh mãn mũ sir. Ag tỹ ti vĩ mẽ sór vễ, ag tỹ ãjag tỹ há' he ěn ve sór vễ gé. Hã jé ag tóg sir vãnh mãn mũ.

¹⁶ Hã ra Jesus tóg ěmã tũg ja ra tĩ mũ, Topē mré vēmén jé.

*Jesus tỹ ùn tĩg vãnh tỹ há' he
(Mt 9.1-8; Mc 2.1-12)*

¹⁷ Kejẽn tóg ag kanhrãn rãn mãn mũ. Kỹ Fariseu ù ag tóg ti vĩ mẽgmēg mũ gé sir, Topē vĩ to professor ag mré hã. Kór há tá ag tóg kãmũ ja nĩ, ga tỹ Galiléia tá, ga tỹ Judéia tá ke gé, cidade tỹ Jerusalém tá ke gé. Jesus pénĩn ag tóg nĩgnĩ kỹ nỹtĩ nĩ. Hã ra Topē tóg ti tar han ja nĩ, hã kỹ tóg ù tỹ hẽn ri ke ag tỹ há' he mũ, ùn kagyga ag tỹ, Jesus ti.

¹⁸ Kỹ vãnh ù ag tóg tá junjun mũ gé. Û va ag tóg kãmũ jēg, kur kã, ùn kãnhgrĩ, ùn kónhgrĩ. Ag tỹ Jesus mỹ ti ven sór vễ, ag tỹ ti krēm ti fi sór vễ.

¹⁹ Hã ra tóg fór tãvĩ nĩ, tá, kỹ ag tóg ti tá junjun tũ nĩ sir, Jesus tá. Kỹ ag tóg ãn to jãpry kỹ ti kri ãn

kunũg mũ. Ti nor ẽn ki ag tóg ti térem mũ, Jesus jẽ ẽn kukãm.

²⁰ Kĩ Jesus tóg ag tỹ ti ki ge kũ nỹtĩ tag vég mũ. Hã kũ tóg ãn kãnhgrĩ mỹ: “ã tỹ Topẽ vĩ mranh ja ẽn tỹ tũ' he vễ ha, vỹ,” he mũ.

²¹ Hã ra ti vĩ tag tóg Topẽ vĩ to professor ag mỹ e tĩ, Fariseu ag mỹ ke gé. Kĩ ag tóg ti vĩ tag to jykrén kónãn mũ. “Ti tỹ ne tó nẽ hỹn'?” he ag tóg mũ. “Topẽ to vĩ kónãn vễ mỹr, ti vĩ tag to,” he ag tóg. “Topẽ hã ne ã pin kũ Topẽ vĩ mranh ẽn tỹ tũg' he há nĩnh mũ!, kũ ti tỹ vễsỹ tỹ Topẽ han vễ sir, ti mỹ vễnh pãte fón sór kũ,” he ag tóg mũ, to jykrén kónãn kũ.

²² Hã ra Jesus tóg ag tỹ nén to jykrén mũ vég mũ. Kũ tóg ag mỹ: “ãjag tỹ ne jé to jykrén kónãn nẽ?” he mũ.

²³ “Ne nỹ ãjag mỹ vễnhmỹ nỹ?” he tóg. “Ûn tĩg vãnh mỹ sóg: “ã tỹ Topẽ vĩ mranh ja ẽn tỹ tũ' he vễ ha,” hé. Kỹn mỹ ãjag mỹ vễnhmỹ?” he tóg. “Sỹ ti mỹ: “nĩ ra, tĩg ra,” henh ke vễ gé. Kỹn mỹ ãjag mỹ vễnhmỹ ke gé?” he tóg, tag to.

²⁴ “Hã ra sỹ ãjag mỹ inh jykre ven sór vễ ha. Tỹ sóg ẽprã ke fi kósin nĩ. Tá sóg krỹg ke mũ, Topẽ vĩ mranh tỹ vễnh pãte fón ke tá. Sỹ tá krỹg mũ ven jé sóg ke mũ ãjag mỹ,” he tóg. Hã kũ tóg ãn kónhgrĩ mỹ: “nĩ ra, ã kur gég tĩg, ã ãn ra,” he mũ, Jesus ti.

²⁵ Kũ tóg vễsỹmér jẽgnẽ mũ sir. Æ kur gég tóg mũ vãnhã, ag rĩnve. Æ ãn ra tóg tĩ mũ, Topẽ mỹ vĩ há han kũ, ãn kãnhgrĩ ja ẽn ti.

²⁶ Kũ tóg vễnh kar mỹ e tãvĩ tĩ. Topẽ mỹ ag tóg vĩ há han mũ gé, ti to: “ẽg kãfór ti nĩ,” hen kũ. “Ge ve

ja tũ ãg nýtĩ, kýt ãg týt ne to jykren ke tóg tũ tĩ,” he ag tóg mũ sir, Jesus týt ãn kãnhgrĩ ja ãn týt há' hen kýt.

Jesus týt Levi jé prẽr
(Mt 9.9-13; Mc 2.13-17)

²⁷ Kar kýt Jesus tóg tĩg mãn mũ. Kýt tóg ã týt governo mýt jãnkamy mãg tĩ ã vég mũ, imposto mãg tĩ ãn ti. Ti jijin hã výt: Levi, he mũ. ã rãnhraj han kýt tóg nĩ nĩ, ti rãnhraj jafã krẽm, Jesus týt ti ve kýt. Kýt tóg ti mýt: “inh mré kãtĩg,” he mũ.

²⁸ Kýt tóg jẽgnẽ mũ sir. Ti mré tóg tĩ mũ sir, ã tũ kar ré kýt.

²⁹ Kýt Levi tóg ti mýt festa mág han mũ, ti ãn tá. Kýt ti týt festa to ãn jé prẽr mũ ag výt týt ã týt hẽn ri ke nýtĩ, festa venh kãmũ mũ ãn ag. Governo mýt jãnkamy mãg tĩ ã ag vẽ, ag mré ke ã ag mré hã. Jesus mré ag tóg jẽg mũ.

³⁰ Kýt Fariseu ag tóg vég mũ, Topẽ vỹ to professor ag ke gé, kýt tóg ag mýt kórég tĩ. Kýt ag tóg ã týt Jesus mré mũ tĩ ag to vỹ mũ gé. Ag mýt ag tóg: “ãjag hã ne tóg governo mýt jãnkamy mãg tĩ ag mré jẽg mũ,” he mũ. “Topẽ vỹ mranh tĩ ag mré ãjag tóg jẽg mũ,” he ag tóg, ã týt Jesus mré mũ tĩ ag mýt.

³¹ Hã ra Jesus tóg ag mýt kãmén mũ. “Hýt, ag mré sóg jẽg mũ,” he tóg. “Hã ra ãn kagyga tũ ag výt médico venh mũ tũ nĩgtĩ,” he tóg mũ. “Ûn kagyga ag hã výt ti venh mũ tĩ,” he tóg.

³² “Inh pi(jé) ã týt vẽn h jykre kuryj han mũ ag mýt: “ãjag jykre tovãnh ra,” he sór tĩ'. Û týt Topẽ vỹ mranh ja ãn ag hã mýt sóg: “ãjag jykre kórég tovãnh ra,” he sór tĩ. Hã jé sóg ãjag mýt vẽn ven,” he tóg, Jesus ti.

Vākre
(Mt 9.14-17; Mc 2.18-22)

³³ Kÿ Fariseu ag tóg ti mÿ ke mǎn mǔ. “João mré mǔ tĩ ag vÿ vākre (ka)mẽ nÿtĩgtĩ, vĕjĕn ki, kÿ ag tóg Topĕ mré vĩ (ka)mẽ han tĩ gé, ag vākre kÿ. Kÿ Fariseu mré ke ag tóg ge nÿtĩgtĩ gé. Hã ra ã mré mǔ tĩ ag tóg ge tũ nÿtĩ. Jĕg ag tóg mũgtĩ, kurã kar ki. Vākre vǎnh ag nÿtĩ, ĕg vākre kurã ki,” he ag tóg mǔ sir, Jesus mÿ.

³⁴ Kÿ tóg ag mÿ: “hÿ,” he mǔ. “Hã ra vĕnh prũg tÿ festa to kǎmũ ag pi(jé) vākreg tĩ,” he tóg. “Festa vĕ mÿr, vĕnh prũg ti, kÿ ti mré ke ag tóg ãn prũg mǔ ĕn venh kǎmũ tĩ. Hã ra sóg tÿ ãn prũg mǔ ĕn ri ke nĩ, hã kÿ tóg inh mré mǔ tĩ ag mÿ sér tĩ,” he tóg.

³⁵ “Vǎhã tóg jun mǔ, inh kurã ti. ĕn kǎ ag tóg inh pére mũnh mǔ. ĕn kǎ hã ag tóg ãjag vākrenh ke venh mǔ, kurã ĕn kǎ, inh mré mǔ tĩ ag,” he tóg, Jesus ti.

³⁶ Kÿ tóg ag mÿ comparação han mǔ, kÿ tóg: “inh jykre tǎg vÿ ge nÿnh mǔ,” he mǔ. “ĕg pi(jé) ĕg kur tǎg kókég tĩ', ĕg tÿ ĕg kur si jar kǎ nĩm jé,” he tóg. “Ke tũ nĩ mǔ ra ĕg tóg ĕg kur há ĕn kókég mǔ, hã ra tóg ĕg kur si ĕn ki par tũ nĩgtĩ gé, ãn há ti. Kÿ ĕg kur tóg kórég kar nÿtĩ nĩ sir,” he tóg. Ti tÿ ã jykre tǎg tó vĕ, hã ra tóg kur tǎg ri ke nĩ.

³⁷ Kÿ tóg ag mÿ: “vinho vÿ ge nĩgtĩ gé,” he mǔ gé. “ĕg pi(jé) vinho kajǎg mǔ tÿ ti fár si tÿ saco ki kujĕg tĩ', vinho tǎg ĕn ti'. Ke tũ nĩ mǔ ra tóg kunǎnh kÿ jar mǔ. Kÿ vinho ĕn tóg tũ' he mǔ, bolsa ke gé sir.

³⁸ Vinho kajǎg mǔ tÿ ti fár tǎg tÿ bolsa ki kujĕn ke vĕ mÿr,” he tóg. Ti tÿ ã jykre tǎg tó vĕ, hã ra tóg vinho kajǎg mǔ ri ke nĩ.

³⁹ Kĩ tóg ag mĩ: “ĕg pi(jé) vinho si kron kũ ãn kajãg kron sór tĩ', ãn tãg ĕn ti',” he mũ gé. “Ti si hã tóg ĕg mĩ há nĩ,” he ĕg tóg tĩ,” he tóg, Jesus ti. Ti tỹ ã jykre tãg tó vĕ, hã ra ag jykre si tóg ag mĩ há tĩ, ã tỹ ti vĩ mẽg mũ ag mĩ.

6

Vĕnhkán ke kurã ki vĕnh jykre (Mt 12.1-8; Mc 2.23-28)

¹ Kejĕn tóg vĕnhkán ke kurã tá krỹg mũ. Kỹ Jesus tóg ĕpỹ mũ tĩ mũ, trigo jo ĕpỹ mũ. Ti mré mũ tĩ ag tóg ti mré mũ mũ. Hã ra ag tóg sir trigo mó ĕn tỹ kam ke mũ sir. Ājag nĩgé tỹ ag tóg rynhranh mũ, ag tỹ ti kanĕ ko jé.

² Hã ra Fariseu ã ag tóg ag vĕg mũ. Ag mĩ vĕnh rãnrãj vĕ, ag tỹ trigo rynhranh mũ ti. Hã ki ag tóg ag mĩ Topĕ vĩ mranh mũ, ag tỹ vĕnhkán ke kurã ki rãnrãj kũ. Hã kũ ag tóg ag mĩ: “ãjag ne tóg nĕn han ke tũ han mũ nĩ', vĕnhkán ke kurã ki',” he mũ. “Vĕnh rãnrãj vĕ mỹr', ãjag tỹ nĕn han mũ ti,” he ag tóg, Jesus mré mũ tĩ ag mĩ.

³ Hã ra Jesus tóg ag mĩ: “vó,” he mũ. “Ag kókĩnkĩr vĕ mỹr,” he tóg. “Davi to jykrĕn nĩ, ti mré mũ tĩ ag to ke gé. Ti kókĩr kũ tóg ã tỹ nĕn han ke tũ han gé, hã ra Topĕ pi(jé) ti to jũ mũ',” he tóg.

⁴ “Topĕ jo ĩn kã ra tóg rã, Davi ti. Tá tóg Topĕ jamĩ ĕn kó. Ti tỹ konh ke tũ vĕ vĕ, Topĕ tũ ki rĩr tĩ ag hã tỹ konh ke vĕ vĕ. Hã ra tóg kó, ã mrĕ mũ tĩ ag mĩ tóg vĕnh kãpópãm gé, Davi ti. Rán kũ tóg nĩ nĩ mỹr,” he tóg, Jesus ti.

⁵ Kÿ tóg ag mÿ: “tÿ sóg vënhkán ke kurã to pã'i nÿ mÿr,” he mÿ. “Tÿ sóg ëprã ke fi kósin nÿ,” he tóg ag mÿ, Jesus ti.

*Jesus tÿ vënhkán ke kurã kã ù tÿ há' he
(Mt 12.9-14; Mc 3.1-6)*

⁶ Vënhkán ke kurã ù kã Jesus tóg Israel ag tÿ vënh kanhrãn jafã kãra rã mÿ, ag kanhrãn jé. Tá ù tóg jë nÿ. Ti nÿgé vÿ tóg ja nÿ.

⁷ Kÿ Topë vÿ to professor ag tóg Jesus tugnÿm mÿ, Fariseu ag ke gé, ag tÿ ti tÿ há' he mÿ ãn ven jé. “Ti mÿ ti tÿ há' he sór tÿ, tÿ ëg vënhkán ke kurã (hã) ra?” he ag tóg. “Ti tÿ ti tÿ há' he kÿ ëg tóg ti kãmén mÿ, pã'i ag mÿ, ti tÿ vënhkán ke kurã kã rãnrãj mÿ ti,” he ag tóg. Hã kÿ ag tóg ti tugnÿm mÿ.

⁸ Hã ra Jesus tóg ag tÿ nén to jykrén vég jë nÿ. Kÿ tóg ùn nÿgé tóg ãn mÿ: “kunÿg,” he mÿ. “Tag kã jënh nÿ,” he tóg ti mÿ. Kÿ tóg kãtÿg kÿ kã jë mÿ sir.

⁹ Kÿ tóg ag mÿ: “sÿ ãjag ki jëmënh há tóg tÿ,” he mÿ. “Vënhkán ke kurã ki ëg hÿn ne han mÿ?” he tóg, “ëg tÿ Topë vÿ ki króm jé?” he tóg. “Ëg mÿ nén ù há han mÿ? Ëg tÿ ù tÿ kókén kÿn mÿ kórég tÿ nÿnh mÿ hÿn?” he tóg. “Ëg mÿ ù kren han mÿ hÿn? Ëg tÿ ù tén kÿn mÿ kórég tÿ nÿnh mÿ hÿn?” he tóg. Hã ra ag tóg ti mÿ nén ù tó tÿ nÿ.

¹⁰ Kÿ tóg ag ki ëvãnh kãn kÿ ùn nÿgé tóg ãn mÿ: “ã nÿgé tÿ krÿg hé,” he mÿ. Kÿ tóg tÿ krÿg he mÿ sir. Ti tÿ tÿ krÿg he kÿ tóg há' he mÿ, ti nÿgé tóg ãn ti.

¹¹ Kÿ tóg vënh kar mÿ e tÿ. Ag fe tóg gÿm ke mÿ, kÿ ag tóg jagnë mré vëmén mÿ. “Ëg hÿn ti tÿ hë ri kenh mÿ hÿn', ti kãgmÿnh mÿ vó?” he ag tóg, Jesus to. Hã ra tóg ùn nÿgé tóg ãn tÿ há' he ja nÿ sir.

*Jesus tỹ apóstolo ag kuprẽg
(Mt 10.1-4; Mc 3.13-19)*

¹² Ën kã Jesus tóg kejẽn pãnónh ra tĩ mũ, ti tỹ Topẽ mré vēmén jé. Kuty ãn kã tóg Topẽ mré vĩ nĩ ki kurãg mũ.

¹³ Tỹ vaj kỹ tóg ã mré mũ tĩ ag jé prẽr kãn mũ, kỹ tóg ag kãmĩ ù tỹ 12 (ke) ãn ag kuprẽg mũ. Ag to tóg: “sỹ ùn vin mũ ãn ag,” he mũ, hã vỹ: apóstolo, he mũ.

¹⁴ Ag hã vẽ, ha mẽ: Simão, Jesus tỹ ti jyjy ù hã vỹ: Pedro, he mũ, ti jãvy tỹ André ke gé, Tiago ke gé, ti jãvy tỹ João mré, Filipe ke gé, Bartolomeu ke gé,

¹⁵ Mateus ke gé, Tomé ke gé, Tiago ke gé, Alfeu kósin tag ti, Simão ke gé, ag tỹ ù to: Zelote, he mũ tag ti,

¹⁶ Judas ke gé, Tiago kósin tag ti, Judas Iscariotes ke gé, ù tỹ Jesus vatánh tá pã'i ag mỹ ti kãmén ke tag ti.

*Jesus tỹ ùn e ag ki rĩr
(Mt 4.23-25)*

¹⁷ Kỹ Jesus tóg ag mré pãnónh ãn to tére mũ sir, kỹ tóg kyjer tá jẽ nĩ. Kỹ ti mré mũ tỹ hẽn ri ke ag vỹ tá nỹtĩ gé. Û tỹ hẽn ri ke ag vỹ ti ki junjun ja nĩgtĩ, ga tỹ Judéia tá kãmũ kỹ, cidade tỹ Jerusalém tá ke gé, goj kafã tũ fyr tá ke gé, hã vỹ: cidade tỹ Tiro, he mũ, cidade tỹ Sidom, he mũ gé. Ën kar vỹ ti ki junjun ja nĩgtĩ, ti tỹ ag tỹ há' he jé. Kỹ tóg fór pẽ nĩ, tá, ag tỹ e pẽ tãvĩ nỹtĩn kỹ.

¹⁸ Ûn jagrẽ kórég ag tỹ tóg há' he mũ gé, ag jagrẽ pan tóg mũ, Jesus ti, fag mré hã.

¹⁹ Kỹ vẽn kar vỹ ti kã krỹ' he sór mũ sir, hã jé ag tóg ti ki junjun mũ. Kỹ ù tỹ ti kã krỹ' he mũ ãn ag vỹ há' he kãn mũ, ti tỹ ã jykre tar tỹ ag tỹ hághá'

hen kÿ. Hã jé ag tóg vënh mǎn ja nĩ. Hã kÿ ag tóg ti pënĩn e tĩ sir.

Jesus tÿ ag kanhrǎn

(Mt 5.1-12)

²⁰ Kÿ tóg ã mré mũ tĩ ag ki ëvǎnh mũ, kÿ tóg ag mÿ kǎmén mũ, Jesus ti, kÿ tóg: “Topë vÿ ãjag ve há han mũ, ãjag tÿ: “kórég eg tóg nÿtĩ,” hen kÿ,” he mũ. “Kÿ ãjag tóg Topë tÿ tÿ ëg pǎ'i nĩ venh ke mũ,” he tóg.

²¹ “Topë vÿ ãjag ve há han mũ, ãjag tÿ: “inh kókĩr ri ke tóg tĩ, sÿ vënh jykre kuryj ve sór tĩ ën ti,” hen kÿ. Kÿ ãjag tóg venh ke mũ,” he tóg. “Topë vÿ ãjag ve há han mũ, ãjag vësÿrénh mũn kÿ, ëprǎ. ãjag mÿ sér nĩ jé tóg ke mũ, tá,” he tóg.

²² “Topë vÿ ãjag ve há han mũ, ag tÿ ãjag to kórég nÿtĩn kÿ isugnĩn, ag tÿ ãjag mÿ: “ha mũ jëg,” hen kÿ, isugrĩn. Ag tÿ isugnĩn ãjag mÿ vĩ kónǎn kÿ tóg há tĩ, ag tÿ ón kÿ ãjag jykre kórég tó kÿ. Tÿ sóg ëprǎ ke fi kósin nĩ mÿr,” he tóg, Jesus ti.

²³ “Mÿ sér nÿtĩmnĩ, ãjag fe tÿ mrin kennĩ, ag tÿ isugrĩn ãjag vóg kónǎn mũ ra. Kÿ ãjag tóg kanhkǎ tá nén ù há kar venh ke mũ, vënh kaja jé, isugnĩn. Ge ja ag tóg nÿtĩ ja nĩgtĩ, ù tÿ ãjag vóg mũ ag jóg'jóg ag, vǎsÿ Topë vĩ tó tĩ ag mÿ. Ag vóg kónǎn ja ag tóg nĩ gé. Vǎsÿ Topë vĩ tó tĩ ën ag ri ke ãjag tóg nÿtĩ, ag krë'krë tÿ ãjag vóg kónǎn kÿ,” he tóg, Jesus ti.

²⁴ “Hã ra Topë vÿ ãjag ve kónǎn mũ, ãjag tÿ: “há ëg tóg nÿtĩ,” hen kÿ. Ga kri mũn kÿ ãjag tóg nén ù há vég tĩ, kÿ ãjag tóg kanhkǎ tá jun ke tũ nĩ,” he tóg.

²⁵ “Topë vÿ ãjag ve kónǎn mũ, ãjag tÿ vënh jykre kuryj ve sór tũ nÿtĩn kÿ, ti tÿ ãjag mÿ ãjag kókĩnkĩr ri ke tũ nĩn kÿ, ëprǎ. Kÿ ãjag tóg venh ke tũ nĩ. Kÿ tóg ãjag kókĩnkĩr ri ke tĩnh mũ, tá,” he tóg. “Topë vÿ ãjag

ve kónãñ mũ, ti tỹ ãjag mỹ sér tĩn kỹ, ěprã. Věsỹrénh jé ãjag tóg ke mũ, kygfỹ jé ãjag tóg ke mũ, tá,” he tóg.

26 “Topě vỹ ãjag ve kónãñ mũ, věnh kar tỹ ãjag to vỹ há han mũn kỹ. Ājag mỹ ti há tĩ, věnh kar tỹ ãjag to vỹ há han mũn kỹ, hã ra tóg Topě mỹ kórég nĩ. Ge ja ag tóg nỹtĩgtĩ, ũ tỹ ãjag mỹ vỹ há han mũ ěn jóg'jóg ag, ón kỹ Topě vỹ tó (ka)mě ěn ag mỹ, vãsỹ. Ag mỹ ag tóg vỹ há han ja nĩ gé. Ag ri ke ãjag tóg nỹtĩ, ón kỹ Topě vỹ tó (ka)mě ěn ri ke ãjag tóg nỹtĩ, věnh kar tỹ ãjag mỹ vỹ há han kỹ. Hã kỹ tóg ãjag ve kónãñ mũ, Topě ti,” he tóg, Jesus ti, ag mỹ.

*Ěg tỹ ěg kato tẽ mũ ag to há nỹtĩnh ke
(Mt 5.38-48)*

27 “Ājag jyvěn sóg mũ, ãjag tỹ inh vỹ jěměn kỹ, ha mẽ. Ũ tỹ ãjag kato vãsãnsãn mũ ěn ag to fe nỹtĩmnĩ jãvo. Ũ tỹ ãjag to jũ mũ ag mỹ něn ũ há han nĩ jãvo.

28 Ũ tỹ ãjag mỹ vỹ kónãñ mũ ag mỹ vỹ há han nĩ gé. Ũ tỹ ãjag mỹ fěfěn mũ ag to Topě mré vĩmnĩ gé.

29 Ũ ag tỹ ãjag jamě ki tãnh kỹ ag mỹ ãjag jamě ũ ti ven nĩ gé, ag tỹ ãjag mỹ ki tãnh jé gé. Ũ ag tỹ ãjag capa mãn sór mũ ěn ag mỹ ãjag camisa nĩm nĩ gé.

30 Ũ ag tỹ ãjag mỹ něn ũ to: “inh mỹ nĩm,” he kỹ ag mỹ nĩmnĩ. Ũ ag tỹ ãjag tỹ něn ũ mãn kỹ ag mỹ: “inh mỹ isũ nĩm,” he tũg nĩ.

31 Ājag tỹ ãjag mré ke ũ to: “ti tỹ ěg mỹ tag han há tóg tĩ vē,” he mũ ra ěg hã tóg ti mỹ han ke mũ,” he tóg.

32 “Ũ ag tóg ãjag to há nỹtĩ. Ājag tỹ tag ag hã to há nỹtĩn kỹ tóg tỹ něn ũ tũ tĩ ver. Věnh kar ag vỹ ge nỹtĩ gé. Ũ tỹ ãjag to há nỹtĩ ěn ag to ag tóg há nỹtĩ

gé, vėnh kato, ũ tỹ Topẽ vĩ mranh mũ ag vĩ tag han tĩ. Tag vĩ há nĩ, hã ra tóg tỹ nén ũ tũ nĩ ver.

³³ Ũ ag tóg ãjag mỹ vĩ há han tĩ. ãjag tỹ ẽn ag hã mỹ vĩ há han kỹ tóg tỹ nén ũ tũ nĩ ver. Ge ag tóg nỹtĩ gé, Topẽ vĩ mranh tĩ ag. ãjag tỹ ag mỹ vĩ há han kỹ ag tóg ãjag mỹ vĩ há han mũ gé, vėnh kato. Há ti nĩ, hã ra tóg tỹ nén ũ tũ nĩ ver.

³⁴ Ũ ag vĩ, ãjag tỹ ag mỹ prestar hen kỹ ag tóg ãjag mỹ nĩm măn mũ, ãjag tũ ti. ãjag tỹ ag hã mỹ prestar he măn kỹ tóg tỹ nén ũ tũ nĩ ver. Topẽ vĩ mranh tĩ ag vĩ ge nỹtĩ gé. ãjag tỹ ag mỹ nĩm măn kỹ ag tóg ãjag mỹ prestar he măn mũ sir, ãjag tũ ti. Há ti nĩ, hã ra tóg tỹ nén ũ tũ nĩ ver.

³⁵ Ag jãvo ũ tỹ ãjag kato vãsãnsãn mũ ag to há nỹtĩmnĩ, ha mẽ. Vėnh kar mỹ vĩ há han kãn nĩ. Vėnh kar mỹ prestar he kãn nĩ, ag tỹ ãjag mỹ ãjag tũ nĩm tũ (hã) ra. Kỹ ãjag tóg kanhkã tá venh ke mũ, ãjag tỹ ũri nén han mũ tag ri ke ti. Hã ki ãjag tóg tỹ ũ tỹ kynhmỹ nĩ ẽn krẽ nỹtĩ, ãjag tỹ ti ri ke han kỹ. Ti hã ne vėnh kar mỹ vĩ há han kãn tĩ ver', ũn jykre kórég kar ag mré hã, ag tỹ ti mỹ: “ẽg mỹ tóg há tĩ,” he tũ (hã) ra, ag tỹ vėnh hã ki rĩr há han mũ (hã) ra tóg ag mỹ vĩ há han tĩ ver, Topẽ ti.

³⁶ Vėnh kar jagãgtãn kãn nĩ, ẽg jóg ri ke. Ẽg jóg tỹ vėnh kar jagãgtãn kóm vėnh kar jagãgtãn nĩ gé,” he tóg, Jesus ti.

*Ẽg tỹ kãnhmar ũ to vĩ kónãn ke tũ
(Mt 7.1-5)*

³⁷ “Kãnhmar ũ to vĩ kónãn tũg nĩ, kỹ Topẽ vĩ ãjag to vĩ kónãn ke tũ nĩ gé. Kãnhmar ũ to: “kórég ti nĩ,” he tũg nĩ, kỹ Topẽ vĩ ãjag to: “kórég ti nĩ,” henh ke

tũ nĩ gé. Věnh kar mÿ věnh pãte fón nĩ, ke tũ nĩ mũ ra Topě vÿ ãjag mÿ věnh pãte fón ke tũ nĩ gé.

³⁸ Ag mÿ nén ũ há kar nĩmnĩ, kÿ Topě vÿ ãjag mÿ nén ũ há kar nĩm ke mũ gé sir, hã ra tóg ãjag mÿ ěn kãfór nĩm ke mũ. Ājag mÿ nĩm mág han jé tóg ke mũ, Topě ti. Nĩm mág pě han jé tóg ke mũ, nén ũ há kar tÿ. Hÿ, ge ti nĩ. Ājag tÿ ag mÿ nén ũ há han kÿ Topě vÿ ãjag mÿ nén ũ há han ke mũ gé. Ājag tÿ ag mÿ nén ũ kórég han kÿ tóg ãjag mÿ hã ri ke han ke mũ gé,” he tóg, Jesus ti.

³⁹ Kÿ tóg ag mÿ: “ũ tÿ ki kagtĩg ra tÿ ãjag pã'i nÿtĩ sór mũ tag vÿ ge nÿnh mũ, ha mẽ,” he mũ gé. Kÿ tóg: “ũn kyvó tÿ ũn kyvó ũ mÿ: “sÿ ã pére tĩg ke vē,” hen kÿ ag tóg ag mũn kÿ kãgnó ki vár kãn ke mũ. Ge ag tóg tĩ, ãjag pã'i ag. Ājag tÿ ũn ki kagtĩg ag mré mũn kÿ ãjag tóg mũ kónãn kãn ke mũ.

⁴⁰ Aluno pi(jé) ã professor kãfór nĩnh mũ'. Ti tÿ kanhrãn há han kÿ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ'.

⁴¹ Jykre kórég mág ãjag tóg nÿtĩ, hã ra ãjag régre jykre pãno sĩ ěn ãjag mÿ kórég nÿ'.

⁴² Kÿ ãjag hã ne tóg ãjag régre ag mÿ: “sÿ ã mÿ ã jykre kórég kuryňh há tóg tĩ,” he tĩ', ãjag tÿ ãjag jykre pãno tãvĩ ěn kuryňh jãvãnh (hã) ra. Ke tũg ra mÿr, ke tũ nĩ mũ ra ãjag tóg jykre régre nÿtĩ. Ājag jykre kuryňh vén nĩ, kar ãjag tóg ãjag régre ag jykre kuryňh há han mũ,” he tóg, Jesus ti.

Ka to comparação

(Mt 7.16-20; 12.33-35)

⁴³ “Ha vé, ka há pi(jé) kaně kórég han tĩ'. Kÿ ka kórég pi(jé) kaně há han tĩ gé'.

44 Ëg tỹ ti kaně ve kỹ ãg tóg: “ũn kaně ko há ja vē,” henh ke mũ, ke tũ nĩn kỹ ãg tóg: “ũn kaně ko vãnħ ja vē,” henh ke mũ. Sónħ to ãg tóg pẽnva vég tũ nĩgtĩ mỹr', kar ãg tóg vãnħ tỹ jóhó to uva vég tũ nĩgtĩ gé, ha mẽ.

45 Ge tóg nỹgtĩ, ãprã ke ag jykre ti. Ûn jykre há vỹ nén ù há kar to jykrén tĩ, ti jykre kuryj nĩn kỹ. Kỹ tóg ãg mỹ tó há han tĩ gé sir. Kỹ ùn jykre kórég vỹ ù kórég kar to jykrén tĩ, ti jykre pãno nĩn kỹ. Kỹ tóg ãg mỹ tó kónãn tĩ gé sir. Hỹ, ge ti nỹgtĩ. Ëg tỹ nén to jykrén tĩ ěn kãmén ãg tóg tĩ mỹr," he tóg, Jesus ti.

Ïn to comparação (Mt 7.24-27)

46 “Ãjag ne tóg inh mỹ: “Senhor', Senhor'," he tĩ'. Hã ra ãjag tóg isỹ ãjag mỹ nén tó mũ ěn han vãnħ nỹtĩgtĩ. Kỹ tóg vẽnħmỹ nỹ.

47 Inh ki ge kỹ ãjag nỹtĩ. Inh vĩ ki kanhró ãjag tóg nỹtĩ. ãjag tỹ ki króm kỹ ãjag tóg sir tag ri ke nỹtĩnh mũ, ha mẽ.

48 Ïn han mũ ri ke vē. Û tóg, ti tỹ Ïn han jé tóg kũm tĩ, kã há tá. Kũm kỹ tóg pãró kri Ïn han mũ sir, pãró kri tóg ti nũna gunħgunħ mũ sir. Kỹ vãnħã goj tóg var mũ, kỹ tóg Ïn kri rũm ke mũ, goj var ti. Hã ra Ïn tóg jẽ nĩ. Ti kókég tũ tóg nĩ, goj var ti. Ti tỹ pãró kri jẽ hã kỹ tóg tar jẽ. Ge ti nĩ, ãjag tỹ inh vĩ ki króm kỹ.

49 ãjag tỹ inh vĩ ki króm tũ nĩn kỹ ãjag tóg sir tag ri ke nỹtĩnh mũ, ha mẽ. Û tóg Ïn han mũ gé, hã ra tóg jo kũm tũ nĩ, ti nũna vỹ jãvo krĩgmỹ nỹtĩ. Kỹ vãnħã goj var vỹ Ïn kri rũm ke mũ sir, kỹ tóg kutẽ mũ sir, Ïn ti. Kỹ tóg mráj mũ sir, ha mẽ, ti nũna tỹ krĩgmỹ

nýtĩn kỹ. Ge ti nĩ, ù tỹ inh vĩ jẽmẽ jãvãnh ẽn ti,” he tóg, Jesus ti.

7

Fóg tỹ capitão tỹ Jesus ki rã (Mt 8.5-13)

¹ Jesus tỹ ag kar kanhrãn kãn kar tóg cidade tỹ Cafarnaum ra tĩ mũ.

² Tá fóg tỹ capitão tóg nĩ nĩ. Ti camarada tóg kaga nỹ nĩ. Vẽnhmỹ tóg nỹ, kỹ capitão tóg: “ti hỹn ter mũ ha,” he mũ. Hã ra tóg ti mỹ ti fe ri ke nĩ, ti camarada ti, capitão ẽn mỹ.

³ Hã kỹ tóg Jesus kãme mẽ kỹ Israel kófa ag jẽgnẽg mũ, Jesus to, ag tỹ ti mỹ: “ti venh kãtĩg,” he jé. Jesus tỹ ti camarada tỹ há' he jé tóg ti mỹ vẽn vĩ jẽnẽg mũ, fóg tỹ capitão ẽn ti.

⁴ Kỹ ag tóg Jesus tá junjun mũ, Israel kófa ẽn ag. Kỹ ag tóg Jesus mỹ tó mũ. “Ã mỹ ti venh tĩg ke tũ nĩ?” he ag tóg mũ, Jesus mỹ. “Ủn há vẽ.

⁵ Ëg povo to tóg há tãvĩ nĩ, ti tỹ tỹ fóg (hã) ra. Ëg mỹ tóg ỉn han ja nĩ, ẽg tỹ krẽm Topẽ vĩ tó jafã ti, ti tỹ tỹ fóg (hã) ra,” he ag tóg mũ, Jesus mỹ, fóg tỹ capitão ẽn to.

⁶ Kỹ Jesus tóg: “hej,” he mũ. Kỹ tóg ag mré tĩ mũ. Kỹ tóg ti ỉn kakó ki jun mũ. Kỹ capitão tóg ti mỹ vẽn vĩ jẽnẽ mãn mũ gé. ã mré ke ag jẽgnẽg tóg mũ, Jesus to. Kỹ ag tóg ti mỹ: “Senhor’,” he mũ. “Ti venh kãrãnh ke tũ ã nẽji nĩ, ti tỹ tỹ fóg nĩn kỹ,” he ag tóg. “Ã mỹn hỹn jagy nỹ, ã tỹ fóg ỉn kãki sãn ken kỹ, Judeu ag tỹ fóg ỉn sãn jãvãnh nýtĩn kỹ,” he ag tóg.

⁷ “Hã kỹ ti nẽji ã venh kãtĩg tũ nĩ gé, hã ra tóg ã mỹ vẽn vĩ jẽnẽg mũ. ã vĩ pir ki ti camarada nẽji

há' henh mũ, ã tỹ ã vĩ tỹ ti tỹ há' henh há nĩn kỹ," he ag tóg.

⁸ “Ha vé, tỹn ji pã'i krēm ke nĩ gé, kỹ soldado ag nēji tỹ ti krēm ke nỹtĩ gé. Hã kỹn ji tóg pã'i jykre ki kanhró nĩ. Ti tỹ soldado ù mỹ: “kutĩg,” hen kỹn ji tĩ mũ, ti tỹ ti mỹ: “kunĩg,” hen kỹn ji kãtĩ mũ gé. Ti tỹ ã camarada mỹ: “tag han ra,” hen kỹn ji han mũ. Ti vĩ tỹn ji ag jēgnēg tĩ. Hã kỹn ji ki kanhró nĩ. ã vĩ tỹ ã nēji ti camarada tỹ há' he há nĩ,” he ag tóg mũ, Jesus mỹ, capitão mré ke ag.

⁹ Kỹ tóg Jesus mỹ e tĩ, ti vĩ tag ti. Kỹ tóg ã mré mũ tĩ ag mỹ ke mũ, ùn a ag mỹ, ti nón kãmũ ěn ag mỹ. Kỹ tóg ag mỹ: “Israel ù pi(jé) ti ri ke nĩ', ti tỹ tỹ fóg (hã) ra',” he mũ. “Ki kanhró tóg nĩ mỹr, kỹ tóg inh ki rã kỹ jē. Ge ve ja tũ sóg nĩ. Há' he kỹ ti nĩ ha, ti camarada ti,” he tóg, Jesus ti.

¹⁰ Kỹ ag tóg vỹnvỹn ke mũ, capitão ĩn ra, capitão tỹ ùn jēgnēg mũ ag. Hã ra ti camarada ěn tóg há' he ja nĩ sir, ag tỹ tá junjun mũ ra.

Jesus tỹ ùn ter mũ rĩn mãn

¹¹ Kãnhmar Jesus tóg tĩ mũ gé sir, ěn ki. Kỹ tóg cidade tỹ Naim ra tĩ mũ. Ti mré mũ tĩ ag tóg ti mré mũ mũ, ùn e a g ke gé. Ti nón ag tóg mũ mũ.

¹² Kỹ tóg cidade ěn fyr ki jun mũ, cidade to ró jãnkã ki. Kỹ ag tóg vēsẽr va kãmũ nĩ, ha mẽ. Ti mỹnh fi kósĩn pir vẽ mỹr. Tĩ panh tóg ter ja nĩ. Kỹ ù tỹ hẽn ri ke fag vỹ fi mré mũ nĩ, cidade tá kãmũn kỹ. ag tỹ ti péjunh mũ vẽ, vẽnẽh kej tá.

¹³ Kỹ Jesus tóg fi vэг mũ, kỹ fi tóg ti mỹ jagtar nĩ. Kỹ tóg fi mỹ: “fỹ tũg nĩ,” he mũ.

¹⁴ Kỹ tóg vēsẽr venh tĩ mũ, kỹ tóg tá jun kỹ ti mễg mũ. Kỹ ù tỹ ti va mũ ěn ag vỹ krỹg'krỹg' he mũ. Kỹ

Jesus tóg vēser mǎ: “kyrũ!,” he mũ. “Nĩ ra, he sóg mũ ã mǎ,” he tóg mũ, vēser mǎ, Jesus ti.

¹⁵ Kǎ tóg nĩ mũ (mǎr) sir, ha mẽ, vēser ěn ti, kǎ tóg vĩ mũ sir, ũn ter ja ěn ti. Kǎ Jesus tóg ti mǎnh fĩ mǎ ti fĕg mũ.

¹⁶ Kǎ tóg vēnh kar mǎ e tĩ, kǎ ag tóg Topĕ to vĩ há han mũ sir. “Topĕ vĩ tó tĩ kǎfór vỹ ěg ki jun,” he ag tóg mũ, “Topĕ vỹ ěg ve há han, hã kǎ tóg ti jĕnĕ,” he ag tóg mũ, Jesus to.

¹⁷ Kǎ ti vēme tóg vēnh kar kri rũm ke mũ sir, ga tỹ Judĕia kar tá, ga kar ěn kǎmĩ ke gé, Jesus tỹ ũn ter ja ěn rĩn mǎn ja ti.

*João Batista tỹ Jesus mǎ vēnh vĩ jĕnĕ
(Mt 11.2-19)*

¹⁸ Ěn kǎ João vỹ se kǎ jĕ nĩ, João Batista ti, ũ tỹ ag kygpĕg tĩ ti. Kǎ João mré mũ tĩ ag tóg ti mǎ tó kǎn mũ sir, Jesus tỹ nĕn han mũ ti.

¹⁹ Kǎ tóg ti mǎ e tĩ. Kǎ tóg Jesus to: “Topĕ tỹ ũn jĕnĕg mũ hã mǎ vỹ?” he mũ. Hã kǎ tóg ã mré mũ tĩ régre ag jĕgnĕg mũ, ag tỹ Jesus venh mũ jé, ag tỹ ti ki jĕmĕ jé, ti mǎ: “ã hã mǎ'?” he jé. “Ěg tỹ ũn jǎvǎnh mũ mǎ tỹ ã nĩ? Topĕ tỹ ũn jĕnĕg mũ hã mǎ tỹ ã nĩ? Ěg mǎ ũ jǎvǎnh mǎn ke tũ nĩ ha', ã pǎte?” he sór ag tóg mũ, Jesus mǎ.

²⁰ Kǎ ag tóg Jesus tá junjun mũ. Kǎ ag tóg ti mǎ: “João Batista vỹ ěg jĕgnĕ, ěg tỹ ã ki jĕmĕ jé,” he mũ. “Ā hã mǎ'?” he tóg. Ěg tỹ ũn jǎvǎnh mũ ěn hã mǎ tỹ ã nĩ? Ěg mǎ ũ jǎvǎnh mǎn ke tũ nĩ ha', ã pǎte? he tóg, João ti, ã mǎ,” he ag tóg mũ, Jesus mǎ.

²¹ Hã ra Jesus tóg ũn kaga ag tỹ há! he mũ, ag tỹ ti mré vĩnh kǎmũ kǎ. Vĕnh jagrĕ kórĕg pan tóg mũ

gé, kurã ên kã. Ûn kyvó ag tỹ há' he tóg mũ gé, ag kanẽ tỹ.

²² Kỹ tóg João mré mũ ti ag mỹ: “Ha João mỹ tag tómnĩ, ha mẽ,” he mũ. “Ajag tỹ nén vég mũ ta g tómnĩ, ajag tỹ nén mẽg mũ ti ke gé,” he tóg. “Tag han inh tĩ, ha mẽ: ùn kyvó ag vỹ isugrĩn êvãnh há nỹtĩ ha. Ûn kãnhgrĩ ag vỹ mũ há han mũ ha, ùn kónhgrĩ ên ag. Û tỹ vãnh kaga kren vãnh han mũ ag krenkren han inh tĩ, ù tỹ lepra han mũ ag. Ûn kutu ag vỹ êmẽ há nỹtĩ ha. Ûn kãgter mũ ag vỹ rĩnrĩr mãn gé. Ûn jagãgtar e ag vỹ Topẽ vỹ sér mẽg mũ ha ke gé, Topẽ tỹ tỹ êg pã'i nĩnh ke to.

²³ Kỹ tóg ti tỹ iso jykrén kónãn tũ nĩn kỹ há' he mũ. Kỹ Topẽ tóg ti ve há han mũ sir. Tag tómnĩ, João mỹ,” he tóg, Jesus ti.

²⁴ Kỹ João tỹ ùn jẽgnẽg mũ ag tóg mũ mũ sir, João mỹ tó jé, mỹr, ha mẽ.

João tỹ ùn jẽgnẽg mũ ên ag mũ kar kỹ Jesus tóg ùn e ên ag kanhrãn mũ sir, kỹ tóg ag mỹ João kãmén mũ. “Êmã tũ ja ra ajag tóg mũ ja nĩgtĩ, João ve jé,” he tóg. “Kỹ ti jykre hỹn ne ri ke nĩ, ajag mỹ? Kejẽn kãka tóg goj jagma krã tỹ man man ke tĩ. João jykre mỹ ajag mỹ tag ri ke tũ nĩ? Hỹ, ri ke tũ ti nĩ.

²⁵ Kỹ ti jykre hỹn ne ri ke nĩ ajag mỹ? Ti mỹ ajag mỹ ùn kur sĩnvĩ ag jykre ri ke nĩ? Vó. Ûn kur sĩnvĩ ag vỹ cidade mág tá nỹtĩ, pã'i mág ãn krêm, ùn jẽn mág mũ ag. Ag pi(jé) êmã tũg ja mũ mũ tĩ'.

²⁶ Kỹ ti jykre hỹn ne ri ke nĩ ajag mỹ? Ti jykre mỹ ajag mỹ Topẽ vỹ tó tĩ ag jykre ri ke nĩ? Hỹ, ri ke ti nĩ. Topẽ vỹ tó tĩ vẽ mỹr, hã ra tóg Topẽ vỹ tó tĩ ag kãfór kar nĩ, João ti.

27 Topě vỹ João jěnh, ti tỹ ijo tĩg jé. Hã kỹ tag tóg ti to rán kỹ nĩ, Topě vỹ ki, ha mẽ. “Ha vé, ã jo sóg ũ jěnh mũ, ti tỹ vėnh kar tỹ há' he jé, ã tĩg ken jo. Ag jyvėn jé tóg ke mũ, kỹ tóg ěpry kure ri ke nĩ, ěmĩn kurynh ri ke,” he tóg, Topě vỹ tỹ rán kỹ nĩ ki, João to, ti tỹ ijo tĩg ke tag to,” he tóg, Jesus ti, ag mỹ.

28 “Ki hã sóg tó mũ, hã kỹ sóg ke mũ, ha mũ. Ěprã ke ag kãfór kar ti nĩ, João ti, Topě vỹ tón ki. Ũ tỹ ga kri mũ kãfór kar ti nĩ. Hã ra ũ tỹ hėn ri ke ag tóg Topě tỹ tỹ ěg pã'i nĩ venh ke mũ mỹr. Ag tỹ venh ke mũ (hã) ra ag tóg kãsir nỹtĩ. Kỹ ũn kãsir ěn ag tỹ ěgno pẽ ěn tóg João mág kãfór nĩnh mũ hã ra,” he tóg, Jesus ti, João to.

29 “Jo João vỹ mẽg mũ e ěn ag tóg João vỹ mẽ há han ja nĩgtĩ, hã kỹ ag tóg Topě vỹ tag ti to: “ki hã ã tóg tó mũ,” he ja nĩgtĩ, João tỹ ag mỹ nén tó ja to. Hã kỹ tóg ag kygpe ja nĩgtĩ, João ti, ũ tỹ governo mỹ imposto tỹ jãnkamy mãg tĩ ag mré hã.

30 Hã ra Fariseu ag tóg João vỹ jěmẽ jãvãnh ja nỹtĩgtĩ, Topě vỹ to professor ag ke gé. Hã kỹ ag tóg Topě tỹ ag mỹ nén han sór mũ ěn tỹ ti mỹ nenh ja nĩgtĩ gé. Hã kỹ João tóg ag kygpe ja tũ nĩgtĩ gé,” he tóg, Jesus ti.

31 “Ũri ke ag vỹ ge nỹtĩ gé, ha mẽ.

32 Gĩr ag ri ke ag tóg nỹtĩ. Gĩr ag vỹ jagně mré kanhinnhir mũgtĩ. Kỹ ag tóg ajag mré ke ag jé prěr tĩgtĩ, ag mré kanhinnhir jé. Kỹ ag tóg kejėn jũ tĩ. “Ajag mỹ ěg tóg vãkyn, kanhinnhir kỹ, hã ra ajag ne tóg vėnh gringrén jãvãnh nỹtĩ’,” he ag tóg tĩ, gĩr ag, jagně mỹ. “Ajag tỹ vėnh gringrén jãvãnh nỹtĩn kỹ ěg tóg ón kỹ vėsýrėnh mũ sir, ěg kanhinnhir kỹ, hã ra

ãjag ne tóg ěg mré fy jãvãnh nýtĩgtĩ gé," he ag tóg tĩ gé, ón ky jagně to jũ ky, gĩr ag.

³³ Gĩr tag ag ri ke ãjag tóg nýtĩ, João to, iso ke gé," he tóg, Jesus ti. "João vỹ vãkre ja nĩgtĩ, jẽn mág tũ, kron tũ. Ky ãjag tóg ti to: "jagrě kórég tóg nĩ," he ja nĩgtĩ, ti vãkre to.

³⁴ Ti jãvo sóg vãkrég tũ nĩgtĩ. Jěg sóg nĩgtĩ, kron sóg nĩgtĩ. Ky ãjag tóg iso: "ti hã ne jẽn mág tĩ'," he tĩ. "Ti hã ne kronkron tĩ', ti hã ne governo mỹ imposto tỹ jãnkamy mãg tĩ ag to há nĩ', ti hã ne Topě vỹ mranh tĩ ag to há nĩ'," he ãjag tóg tĩ iso, ěprã ke fi kósin to. Ky João jykre tóg ãjag mỹ kórég nĩ, ti vãkre to, jãvo inh jykre tóg ãjag mỹ kórég nĩ gé, inh vãkrég tũ to.

³⁵ Hã ra ěg tỹ ũ jykre tugnỹm ky ěg tóg ti jykre há ěn ki kanhró nýtĩ sir. Ky tóg tỹ Topě krě nĩ sir, ky ěg tóg ti ki Topě jykre ki kanhró nýtĩ sir, ti jykre há ěn tugrĩn," he tóg, Jesus ti. Ti tỹ ag mỹ João kãmén hã vě.

Jesus tỹ Simão ĩn krēm jěg

³⁶ Kejẽn Fariseu ũ tóg Jesus mỹ tó mũ, ti tỹ ti mré jẽn jé. Ky tóg tĩ mũ, Fariseu ěn ĩn ra. Tá tóg ti mré jěg mũ sir.

³⁷ Ti tỹ mré jěg nĩ ra ũ fi tóg ti ki jun mũ, cidade tá ke ũ fi. Hã ra fi tóg mén ja e nĩ, Topě vỹ mranh ky. Jesus tỹ Fariseu ěn ĩn krēm jě męg fi tóg mũ, hã ky fi tóg garrafa va kãtĩ mũ. Garrafa kãki tóg ěg tãg jafã nĩ, nén ger há tỹ. Pó kupri tỹ tóg han ky nĩ nĩ, garrafa ěn, pó tãnjã tỹ.

³⁸ ěn va kãtĩg ky fi tóg ti pěn to jě nĩ sir. Hã ra Jesus tóg cama kri nỹ ky jěg mũ. Ag jykre vě, ag tỹ nỹ ky jẽn ke mũ ěn ti. Ky fi tóg ti pěn to jě ky fy mũ.

Fi tỹ Topẽ vĩ mranh ja ẽn tugrĩn fi tóg fỹ mũ. Kỹ fi tóg ã kanẽ var tỹ ti pẽn kupég mũ, kỹ fi tóg ã gãnh tỹ ti pẽn kykũg mũ gé. Ti pẽn ki nhun ke fi tóg mũ gé. Kỹ fi tóg ti pẽn tâg mũ sir, garrafa ki jẽ ẽn tỹ.

³⁹ Kỹ Fariseu ẽn tóg vég mũ, ù tỹ Jesus mỹ: “inh mré jẽn kãtĩg,” he ja ẽn ti. Kỹ tóg to jykrén mũ, ùn tỹtã fi to, Jesus to ke gé. “Ti tỹ tỹ Topẽ vĩ tó tĩ nĩ ra tóg fi ki kanhró nĩnh mũ vẽ,” he tóg. “Hã ra tóg ki kagtĩg nĩ ve nĩ. Ûn mén ja e fi vẽ mỹr, Topẽ vĩ mranh fi tóg tũgtĩ mỹr, hã ra tóg fi tỹ ã pẽn mẽ ẽn kamég tũ nĩ, Jesus i,” he tóg, to jykrén kỹ, Fariseu ẽn ti.

⁴⁰ Hã ra Jesus tóg ki kanhró nĩ. Kỹ tóg ti mỹ: “Simão’,” he mũ. “Sỹ ã mré vēmén ke vẽ,” he tóg. Kỹ tóg ti mỹ: “ha tó,” he mũ sir, Jesus mỹ.

⁴¹ Kỹ tóg: “kejẽn patrão ù tóg nĩgtĩ,” he mũ. “Ti camarada régre ag tóg ti mỹ név(e) nỹtĩ. Ûn név(e) ẽn vỹ tỹ 500 (ke) nĩ, kar ùn név(e) vỹ tỹ 50 (ke) nĩ gé.

⁴² Hã ra ag tỹ ne tỹ kajãm ke tóg tũ tĩ, kỹ tóg ag mỹ tỹ tũg’ he mũ, ag név(e) tỹ, ag patrão ti. Kỹ ti camarada tỹ hẽ nỹ hỹn ti to há kãfór nĩ?” he tóg, Jesus ti, ti tỹ Simão ki jẽmẽn kỹ.

⁴³ Kỹ Simão tóg ti mỹ: “ùn név(e) mág ja ẽn hỹn tóg ti to há kãfór nĩ,” he mũ. Kỹ Jesus tóg ti mỹ: “ki hã ã tóg tó mũ,” he mũ.

⁴⁴ Kỹ tóg fi jé vĩrĩn ke mũ sir, ùn tỹtã kórég ẽn fi jé, kỹ tóg Simão mỹ: “ã mỹ fi vég mũ?” he mũ. “Ã kanẽ var tỹ fi tóg inh pẽn kugpég mũ, kar fi tóg ã gãnh tỹ inh pẽn kykũg mũ gé,” he tóg. “Fi jãvó ã tóg inh mỹ goj ven tũ nĩ, isỹ inh pẽn kugpe jé, sỹ ã ãn kãra rã kỹ,” he tóg.

⁴⁵ “Inh ki nhun ke ja tũ ã tóg nĩ, ã jãvo fi tóg inh pẽn ki nhun ke mũ, to fi krónh ke tũ nĩ jãvo,” he tóg.

46 “Ă pi(jé) inh gãnh tãg ja nĩ', ã jãvo fi tóg inh pẽn tãg,” he tóg.

47 “Hã kÿ sóg ã mÿ tó mũ. Topẽ vĩ mranh tÿ hẽn ri ke han fi tóg. Hã ra tóg fi mÿ vẽn pãte fón kãn mũ sir, Topẽ ti, fi tÿ iso há tãvĩ nĩn kÿ, sÿ tÿ fi fe nĩn kÿ. Ủ mÿ tóg kejẽn vẽn pãte fón pir han tĩ, Topẽ ti, ù tÿ patrão ki név(e) sĩ ên ri ke mÿ. Kÿ ên tóg ti to há sĩ nĩ gé sir, fi tÿ iso há tãvĩ jãvo,” he tóg.

48 Kÿ tóg fi mÿ: “ã tÿ Topẽ vĩ mranh ja ên tÿ sóg vẽn pãte fón mũ,” he mũ, Jesus ti.

49 Kÿ ti mré jẽg mũ ag tóg to jykrén mũ sir, ti vĩ to. Kÿ ag tóg jagnẽ mÿ ke mũ. “Ti hã mÿ êg tÿ Topẽ vĩ mranh kÿ vẽn pãte fón ke mũ vÿ?” he ag tóg mũ. “Topẽ hã ne vẽn pãte fón há nĩ', hã kÿ tóg êg mÿ vẽn mÿ tĩ,” he ag tóg.

50 Hã ra Jesus tóg fi mÿ ke mãn mũ. “Ă tÿ inh ki rã kÿ sóg ã kren han mũ,” he tóg. “Ha jatun mÿ tĩg,” he tóg, Jesus ti, ùn tÿtã kórég ja ên fi mÿ.

8

Ủn tÿtã fag tÿ Jesus ki rĩr

¹ Tag pãte Jesus vÿ cidade kar mũ tĩg kãn mũ, êmã kãsir mũ ke gé. Topẽ vĩ tó tóg tĩ mũ. Ag mÿ tóg: “Topẽ tÿ tÿ ajag pã'i nĩ sór vẽ,” he mũ. Kÿ ù tÿ 12 (ke) ag tóg ti mré mũ mũ.

² Kÿ ùn tÿtã fag tóg ti mré mũ mũ gé sir. Jesus tóg fag tÿ há' he ja nĩ. Ủ fag tóg kaga ja nÿtĩgtĩ, kÿ ù fag tóg jagrẽ kórég ja nÿtĩgtĩ gé. Hã ra Jesus tóg fag tÿ hághá' he kãn ja nĩ. Ủ fi vÿ tÿ Maria fi nĩ, Madalena he mũ tag fi. Jesus vÿ fi jagrẽ kórég pan ja nĩ, ù tÿ 7 (ke) vẽ, ha mẽ, fi jagrẽ kórég ag.

³ Kar ũ fi vỹ tỹ Joana fi nĩ gé, Cuza prũ fi vễ, pã'i mág tỹ Herodes tũ vég nĩ ẽn prũ fi vễ. Kar ũ fi vỹ tỹ Suzana fi nĩ gé. Kar ũ fag vỹ ti mré mũ mũ gé, ti mỹ vễjẽn han jé. Ājag tũ tỹ fag tóg ti mỹ vễjẽn han tĩ, kar ti mré mũ tĩ ag mré hã.

Nén fy to comparaçãõ

(Mt 13.1-9; Mc 4.1-9)

⁴ Kejẽn ũn e ag vỹ vễnh mãn mũ sir, ẽmã tỹ hẽn ri ke tá kãmũ kỹ. Jesus to ag tóg vễnh mãn mũ. Kỹ tóg ag kanhrãnrãn kỹ ag mỹ: “ũ tỹ Topẽ vĩ tó tĩ vỹ ge nỹnh mũ, ha mẽ,” he mũ.

⁵ “Kejẽn ũ tóg trigo fy vãvãm tĩ mũ. Ti tỹ vãvãm kỹ ti fy ũ tóg ẽpry kri, ẽmĩn kri vár mũ, kỹ ag tóg ti sãn mũ, kỹ sễsĩ ag vỹ ko mũ gé sir, jễsĩ tóg tỹ tũg' ke mũ sir.

⁶ Ti fy ũ tóg pãró kri vár mũ. Kỹ tóg mur mũ vễ, hã ra tóg tóg mũ sir. Ga tỹ sĩ nĩn kỹ tóg goj ve ja tũ nĩ, hã kỹ tóg tóg mũ sir.

⁷ Ti fy ũ tóg sónh kãki vár mũ. Kỹ sónh tóg ti mré mur mũ, ti kri tóg rũm ke mũ sir. Kỹ tóg ter mũ sir, sónh kãki.

⁸ Ti fy ũ tóg ga há kri vár mũ. Kỹ tóg mur há han mũ, kanẽ há ke gé. Kanẽ tỹ 100 (ke) han tóg mũ sir, ga há kri,” he tóg, Jesus ti. Kỹ tóg tag tó kar kỹ prěr mũ. “!..Ũ nĩgrẽg nỹtĩ ag tỹ ki ẽmẽn jé..!” he tóg, prěr kỹ, Jesus ti.

Jesus tỹ nén fy to comparaçãõ kãmén

(Mt 13.10-23; Mc 4.10-20)

⁹ Kỹ ti mré mũ tĩ ag tóg ti ki jẽmẽg mũ. “Ne to ke nẽ, trigo fy kãme tag ti?” he ag tóg mũ, Jesus mỹ.

¹⁰ Kỹ tóg ag mỹ: “ãjag hã mỹ sóg Topẽ tỹ tỹ ẽg pã'i nĩ ẽn kãmén há han ke mũ, ijo tó ja tũ ẽn ti,” he mũ.

“Hã ra sóg ù ag mỹ comparação tãvĩ han mũ. Ag mỹ sóg tó há han ke tũ nĩ, ù tỹ ón kỹ mễg mũ ag mỹ, kỹ ag tóg ãjag tỹ vég mũ ra ki kagtĩg nỹtĩ, ãjag tỹ mễg mũ ra ag tóg to jykrén tũ nỹtĩ, kỹ tóg ag tỹ to jykrén ke tũ tĩ,” he tóg.

¹¹ Kỹ tóg ag mỹ kãmén mũ. “Nén fy kãme vỹ ge nỹnh mũ, ha mẽ,” he tóg. “Topẽ vỹ vỹ trigo fy ri ke nĩ.

¹² Û ag tóg Topẽ vỹ jẽmễg tĩ. Jẽmễ kar kỹ Japo tóg ag mỹ tỹ tũg' he tĩ, Topẽ vỹ tỹ. Kỹ ag tóg sir ti ki ge tũ nĩgtĩ, krenkren ke tũ ag nĩgtĩ sir. Kỹ tóg ẽpry ẽn, ẽmĩn kri vár mũ ẽn ri ke nĩ, ẽn ti.

¹³ Kar ù ag tóg pãró kri vár mũ ẽn ri ke nỹtĩ gé. Mễg ag tóg tĩ vễ, Topẽ vỹ ti. Kỹ ag tóg: “hej,” he mũ. Ag mỹ tóg sér tĩ sir. Hã ra ag tóg tỹ nén kré jãre tũ ri ke nỹtĩ mỹr, ha mẽ. Mũ sĩ han ag tóg mũ, Topẽ mré. Nén ù jagy kutẽ kỹ ag tóg Topẽ tovãnh mũ sir, ag tỹ Topẽ vỹ mranh sór kỹ.

¹⁴ Kar ti tỹ sónh kãki vár mũ vỹ ge nỹtĩgtĩ gé. Topẽ vỹ mễg ag tóg tĩ gé. Hã ra ag tóg mũ mũ sir, ãjag rãnrãj nón. Ón kỹ ag tóg rico nỹtĩ sór mũ, ãjag rãnrãj to. Hã to ag tóg krĩ kufy nỹtĩ. Nén kar to ẽn ag tóg tĩ, kỹ tag hã ne ag mỹ há tĩ'. Hã kỹ ag tóg Topẽ vỹ to jykrén mãn tũ nĩgtĩ sir. Hã kỹ ag tóg kanẽ há han tũ nĩ gé sir.

¹⁵ Kar ga há kri vár mũ vỹ ge nĩ gé. Jẽmễg ag tóg tĩ gé, Topẽ vỹ ti. Kỹ ag tóg ãjag fe tỹ ti ki rãg mũ sir, ag tỹ ti vỹ ki króm jé. Kỹ ag tóg kanẽ há han mũ sir. Komẽr hã ag tóg kanẽ há han', han', he mũ, ag tỹ nén ù jagy vég mũ ra,” he tóg. Ti tỹ ag mỹ ẽg tỹ Topẽ tovãnh ke tũ kãmén hã vễ, Jesus ti.

Lampião to comparação

(Mc 4.21-25)

¹⁶ Kĩ tóg ag mĩ: ãg tỹ lâmpião grug kũ ãg pi(jé) kěj krêm fêg tĩ,” he mũ. “Ëg pi(jé) cama krêm fêg tĩ gé’, néj gru ti. Ti fêg jafã kri ãg tóg ti fêg tĩ. Kũ vênh kar tóg vég mũ sir, ag tỹ ãg ãn kãra kãgen kũ.

¹⁷ Ge ti nỹ, sỹ ãjag mỹ nén tó mũ kar ti. Ver ãjag tóg to jykrén tũ nĩgtĩ. ãjag tỹ vãhã to jykrén kãn ke vë. Ver ãjag tóg ki kagtĩg nỹtĩ. ãjag tỹ vãhã ki kanhrãn kãn ke vë,” he tóg.

¹⁸ “Hã kũ jêmẽ há han nĩ. Û tỹ to jykrén há han kũ tóg ù to jykrén mãn’, ù to jykrén mãn’, henh ke mũ. Û tỹ inh vĩ to jykrén há han tũ nĩn kũ tóg ti mỹ tũg’ he kãn mũ, ti tỹ nén ù to jykrén mũ kar ên mré hã,” he tóg. Ti tỹ ag mỹ ãg tỹ ti vĩ to jykrén há han ke kãmén hã vë, Jesus ti.

Jesus mré ke pẽ fag

(Mt 12.46-50; Mc 3.31-35)

¹⁹ Kejên Jesus mỹnh fi vỹ ti venh kãtĩ mũ, ti jãvy ag mré. Hã ra fag tóg ti ki junjun tũ nĩ. Ti pênĩn tóg fór tãvĩ tĩ, hã kũ ag tóg ti ki junjun tũ nĩ, ti mỹnh fi mré hã.

²⁰ Kũ ù tóg ti mỹ: “ã mỹnh fi vỹ re tá jẽ, ã jãvy ag mré,” he mũ. “Fag tỹ ã venh kãmũ vë,” he tóg, Jesus mỹ.

²¹ Hã ra Jesus tóg ti mỹ: “mẽ’,” he mũ. “Hã ra ù tỹ Topẽ vĩ jêmẽg mũ fag vỹ inh mỹnh pẽ ri ke nỹtĩ, inh jãvy pẽ ri ke ke gé, ù tỹ Topẽ vĩ ki króm mũ ag,” he tóg, Jesus ti.

Jesus tỹ kóho tỹ tũg’ he

(Mt 8.23-27; Mc 4.35-41)

²² Kejĕn tóg canoa kãra rã mũ, ti mré mũ tĩ ag mré. Kĩ tóg ag mĩ: “mũ nỹ, goj nig kafã ù ra,” he mũ. Kĩ ag tóg mũ mũ, canoa kãmĩ.

²³ Ag mũn ki Jesus tóg nũr mũ sir. Kĩ vãhã kóho jũ tóg kraug he mũ sir. Króg ke tóg mũ sir, kóho ti. Kĩ goj tóg canoa kãki krém ke mũ. Ti fãn sór tóg mũ sir. Kĩ tóg ag mĩ ag kãgter ha mẽ tĩ.

²⁴ Kĩ ag tóg ti rĩn mũ mũ. Ti mĩ ag tóg: “Senhor', Senhor',” he mũ. “Ëg mĩ ãg kãgter ha mẽ tóg tĩ,” he ag tóg ti mĩ. Kĩ tóg rĩr mũ sir. Kĩ tóg kóho mĩ vĩ mũ, goj mĩ ke gé, goj vóg nén ěn mĩ. Kĩ tóg krỹg' he mũ sir, kóho ti. Katy' he tóg mũ sir.

²⁵ Kĩ tóg ag mĩ ke mũ. “Ajag tỹ ne jé inh ki ge há han tũ nĩ nẽ?” he tóg. Kĩ ag tóg kanẽ jur nỹtĩ nĩ. Ag mĩ tóg e tĩ, kĩ ag tóg jagnẽ mĩ: “ti jykre tóg ãg mĩ e tĩ,” he mũ. “Kóho mĩ tóg vĩ mũ, Kĩ tóg ki hã ke mũ, kóho ti, goj ti ke gé,” he ag tóg mũ, jagnẽ mĩ.

*Jesus tỹ ùn jagrẽ kórég tỹ há' he
(Mt 8.28-34; Mc 5.1-20)*

²⁶ Kóho tỹ tũg' hen kỹ ag tóg Gerasa ag jamã tá junjun mũ sir. Goj nig kafã ù tá tóg nĩ, ga tỹ Galiléia to hã.

²⁷ Kĩ tóg canoa kãki kãkutẽ mũ, Jesus ti. Kĩ ù tóg ti kato tẽ mũ, cidade tá ke ù, hã ra tóg jagrẽ kórég tỹ hẽn ri ke nĩ. Si há tóg tĩ ha, ti jagrẽ e nĩ ti. Kĩ tóg kur tũ nĩ. Kato r tóg nĩ. Ìn tũ ti nĩ gé. Vẽnh kej tá tóg jẽgtĩ, pãró tỹ vẽn h kej tá.

²⁸ Ën tóg Jesus kato tẽ mũ. Kĩ tóg ti krém mũg ke mũ. Prẽr kỹ tóg: “!..ã isỹ hẽ ri kenh mũ, Jesus'..!” he mũ. “!..Kynhmỹ Topẽ kósin'..!” he tóg. “!..Ã mỹ sóg to vĩnh mũ, ã tỹ inh vóg kónãn tũ nĩ jé..!” he tóg, prẽr kỹ, ùn jagrẽ kórég ěn ti.

²⁹ Hã ra Jesus tóg Nén-Kórég mÿ: “ti ki pa jëg,” he ja nĩ, hã kÿ tóg prêr mũ. Ti ki vĩrĩn ke', ti ki vĩrĩn ke' tÿ hên ri ke han ja ag tóg nĩgtĩ, Nén-Kórég ag. Kÿ ti mré ke ag tóg ti se ja nĩgtĩ gé, ti mrĩnh kÿ, ferro tÿ, ti nĩgé, ti pên ke gé. Hã ra tóg ã se ja kykym kãn ja nĩgtĩ. Kÿ Nén-Kórég ag tóg êmã tũg ja ra ti tĩn ja nĩgtĩ. Hã kÿ tóg vênh kej mĩ tĩgtĩ, ùn jagrê kórég ên ti.

³⁰ Kÿ Jesus tóg ti mÿ: “ã jiji hê ri ke tĩ?” he mũ. Kÿ tóg: “Mil,” he mũ. Nén-Kórég tÿ hên ri ke ag tÿ tóg jagrê nĩ, hã kÿ tóg: “Mil,” he mũ.

³¹ Kÿ ag tóg Jesus mÿ to vĩ mũ, Nén-Kórég ag, ti tÿ nũgme ra ag jëgnëg tũ nĩ jé, inferno ra.

³² Hã ra porco tÿ hên ri ke tóg tá jëg nÿtĩ nĩ, pãnónh tá. Kÿ Nén-Kórég ag tóg Jesus mÿ to vĩ e han, ti tÿ ag mÿ: “ha porco ki ge jëg, ge kÿ,” he jé. Kÿ tóg ag mÿ ke mũ.

³³ Kÿ ag tóg ên ki kãpa mũ sir, Nén-Kórég ag. Porco ag ki ag tóg ge mũ sir. Kÿ porco ag tóg mer ki re mũ, rán ki, goj nig ra. Goj ki ag tóg vár mũ sir. Nãgnãr kÿ ag tóg tũ' he kãn mũ sir.

³⁴ Kÿ ù tÿ porco ki rĩr tĩ ag tóg vég mũ. Kÿ ag tóg pétê mũ, cidade ra. Tá ag tóg kãmén mũ, êmã kãsir mĩ hã ke gé.

³⁵ Kÿ tá ke ag tóg ra mũ kãn mũ, ag vĩ mëg mũ ag. Ag tÿ nén ên ve sór vë. Ra mũ kÿ ag tóg Jesus tá junjun mũ. Kÿ ag tóg ti vég mũ sir, ùn jagrê kórég ja ti. Nĩ tóg mũ ha, Jesus rã hã. Kur tóg nĩ ha, krĩ há tóg nĩ ha. Kÿ ag fe tóg jürũn ke mũ sir.

³⁶ Û tÿ Jesus tÿ ti tÿ há' he mũ vég mũ ên ag tóg kãmén kãn mũ sir, ù tÿ ùri ti venh kãmũ mũ ên ag mÿ. Ûn jagrê kórég tó ag tóg mũ, ag mÿ, Jesus tÿ ti han ja ti, porco kãgter ja ti ke gé.

³⁷ Kÿ tá ke ag tóg ti mÿ to vÿ mÿ, Jesus mÿ, ti tÿ tá kãkutẽ jé. Gerasa tá ke kar ag tóg kanẽ jur nÿtÿ, hã kÿ ag tóg ti mÿ: “ã tÿg kÿ tóg ãg mÿ há tÿnh mÿ,” he mÿ. Kÿ tóg canoa kãra rã kÿ tÿg sór mÿ, ti mré mÿ tÿ ag mré.

³⁸ Kÿ ãn jagrẽ kórég ja tóg ti mÿ to vÿ e han mÿ, “nhÿ ã mré tÿg mÿ,” hen kÿ, Jesus mÿ. Hã ra Jesus tóg ti pẽre tÿg jãvãnh nÿ.

³⁹ “Ã jamã ra vÿn ké,” he tóg ti mÿ. “Tá ag mÿ kãmén nÿ, Topẽ tÿ ã tÿ há' he ja tag ti,” he tóg, Jesus ti. Kÿ tóg tÿ mÿ sir, ãn jagrẽ kórég ja ti. Cidade kar mÿ tóg tÿ mÿ. Ag mÿ tóg kãmén mÿ sir, Jesus tÿ ti tÿ há' he ja ãn ti.

*Jesus tÿ Jairo kósin fi rÿn mãn
(Mt 9.18-26; Mc 5.21-43)*

⁴⁰ Kÿ Jesus tóg vÿn ke mÿ, nig kafã ã ra. Kÿ tóg vẽnh e ãn mÿ sér tÿ, ag tÿ ti ven kÿ. Ti jãvãnh ja ag tóg nÿ, hã kÿ tóg ag mÿ sér tÿ, ag tÿ ti ven kÿ.

⁴¹ Kÿ vãhã ã tóg ti ki jun mÿ, Jesus ki. Israel ag vẽnh kanhrãn jafã to pã'i vẽ, ti jÿjÿn hã vÿ: Jairo, he mÿ. ãn tóg Jesus krẽm mÿg ke mÿ, ã jakrÿ tÿ tóg jẽ mÿ, kÿ tóg ti mÿ vÿ mÿ, ti tÿ ti ãn ra tÿg jé, Jesus ti.

⁴² Ti kósin pir fi vÿ kaga tãvÿ nÿ, kÿ fi kaga tãvÿ ãn vÿ fi tén sór mÿ. Kri prÿg tÿ 12 (ke) fi nÿ, Jairo kósin pir ãn fi. Kÿ tóg ti mré tÿ mÿ, Jesus ti.

Ti tÿg kÿ ãn e ag tóg ti nón mÿ mÿ.

⁴³ Kÿ ag kã ã fi tóg ag pètẽm mÿ. Kyvénh krÿg tÿ han kÿ fi tóg nÿ, prÿg tÿ 12 (ke) ki. Hã ra ag tóg fi kaga tÿ hẽ ri ke ja tÿ nÿ, ag tÿ fi kygtãg mÿ ra, médico ag.

⁴⁴ ãn fi tóg ti nón ti kur mráj vóg mÿ. Kÿ vêsÿmér fi kyvénh tóg tÿ' he mÿ.

45 Kÿ Jesus tóg: “ũ nÿ inh kur vóg?” he mũ. Hã ra vãnh kar tóg: “inh hã tũ vễ, inh hã tũ vễ,” he mũ. Kÿ Pedro tóg ti mÿ vĩ mũ, Jesus mré mũ tĩ ag kar ke gé. Ti mÿ ag tóg: “ã kur mẽ kãn êg tóg, hã ra ã tóg: “ũ nÿ inh kur vóg?” he mũ,” he tóg, Pedro ti, Jesus mÿ.

46 Hã ra Jesus tóg: “vó,” he mũ. “Û tóg inh kur vóg,” he tóg. “Inh kuprĩg tóg inh ki kãtére, hã kÿ sóg ki kanhrãn mũ,” he tóg.

47 Kÿ ãn tÿtá ên fi tóg to jykrén mũ sir. “Ti hÿn tóg inh vé,” he fi tóg. Hã kÿ fi tóg jÿrÿn ke kÿ kãtĩ mũ. Jesus krêm fi tóg mÿg ke mũ. Kÿ fi tóg ti mÿ tó kãn mũ, vãnh kar rĩnve. Ti mÿ fi tóg ã kaga ja ên kãmén kãn mũ, fi tÿ ti kur vóg ja ên ti ke gé, fi tÿ há' he ja ti ke gé. “Isÿ ã kur vóg kÿ sóg vễsÿmér há' hé,” he fi tóg, Jesus mÿ.

48 Kÿ tóg fi mÿ vĩ há han mũ, Jesus ti. “Inh kósin',” he tóg. “Ã tÿ inh ki rã kÿ ã tóg há' hé. Ha tĩg, jatun mÿ. Há ã tóg nĩ ha,” he tóg fi mÿ, fi han kar kÿ, Jesus ti.

49 Ti tÿ ver fi mré vēmén jẽ ra ù tóg jun mũ, pã'i tÿ Jairo ên ãn tá. “Ã kósin fi hur ter,” he tóg, pã'i mÿ. “Tũg ja fi tóg nĩ ha,” he tóg, Jairon mÿ. “Hã kÿ ti mÿ: kunĩg, he mãn tũg nĩ, ti kutãn mãn tũg nĩ,” he tóg.

50 Hã ra Jesus tóg mẽg mũ, kÿ tóg ti mÿ: “mũmẽg tũg nĩ,” he mũ. “Inh vĩ hã kri fimnĩ, kÿ ã kósin fi tóg há' henh mũ,” he tóg.

51 Kÿ ag tóg mũ kÿ ti ãn tá junjun mũ sir, Jairo ãn tá. Kÿ Jesus tóg ag tÿ ãn kãra ge kamẽg mũ. “Pedro vĩ ãn ra rãnh mũ, inh mré, João ke gé, João kãke tÿ Tiago ke gé, gĩr fi panh ke gé, fi mÿnh fi ke gé,” he tóg, Jesus ti.

52 Hã ra ãn e fag vĩ tá nÿtĩ nĩ gé, kygfÿ fag nÿtĩ nĩ,

vēsyrénh ký, Ký Jesus tóg fag mý: “kygfý tũg ra,” he mũ. “Fi pi(jé) ter mũ'. Fi nũr vễ,” he tóg.

⁵³ Hã ra fag tóg ti nyg mũ. Fi ter ki kanhró fag tóg nýtĩ, hã ký fag tóg ti nyg mũ. Hã ra Jesus tóg fag mý: “ha mũjẽg,” he mũ.

⁵⁴ Fag mũn kar ký Jesus tóg fi nĩgé kãgmĩg mũ, ký tóg prěr mũ sir. “!..Nĩ ra, já..!” he tóg, jamã hár(a).

⁵⁵ Ký fi kuprĩg tóg fi to vỹn ke mũ. Nĩ fi tóg mũ sir, mýr, ha mẽ, ùn ter mũ ẽn fi. Ký Jesus tóg fag mý tó mũ, fag tỹ fi mý vễjẽn ven jé.

⁵⁶ Ký tóg fi han mũ fag mý e tãvĩ tĩ sir. Hã ra Jesus tóg fag mý tó mũ, fag tỹ ù mý tó tũg jé, fi rĩr mãn ja tag ti. Hã ra tóg fi ter mũ ra fi rĩn, Jesus ti.

9

Jesus tỹ ã mré mũ tĩ ag jẽgnẽ

(Mt 10.5-15; Mc 6.7-13)

¹ Ký Jesus tóg ù tỹ 12 (ke) ag jé prěr mũ, ti tỹ ùn vin mũ ẽn ag, ag vễnh mãn jé. Ag vễnh mãn ký tóg ag tar han mũ sir, ag tỹ vễnh jagrẽ kórég pan jé, ag tỹ ùn kagyga ag tỹ há' he jé gé.

² Ký tóg ag jẽgnẽg mũ sir, ag tỹ Topẽ tỹ tỹ ẽg pã'i nĩ ẽn kãmén jé, vễnh kar mý, ag tỹ ùn kagyga ag tỹ há' he kãn jé gé.

³ Hã ký tóg ag mý ke mũ sir. “Ãjag mũn ký nén ù ma mũ tũg nĩ, vátó va mũ tũg nĩ, sacon ke gé, bolsa ẽn, pão ke gé, jãnkamy ke gé. Kur régre rĩnh tũg nĩ gé,” he tóg.

⁴ “Ãjag tỹ ĩn ra ge mũ hã ki nũgnũr' hemnĩ, hã ki ãjag tỹ kurã ki kãpanh ke tá krỹg nĩ,” he tóg.

⁵ “Ag tỹ ãjag mý: “kãge jẽg ra,” he jãvãnh nĩn ký tá kãpamnĩ. Tá kãpa ký ãjag pẽn hã kykũnhkũnh nĩ, ag

tỹ to ki kanhró nỹtĩ jé sir, Topẽ tỹ ag tovãnh ken ki,” he tóg, Jesus ti.

⁶ Ti tỹ ag jëgnën kỹ ag tóg mũ sir, ù tỹ 12 (ke) ag. Ëmã kar mũ ag tóg mũ sir. Topẽ kãmén ag tóg mũ mũ sir. Ûn kagyga ag tỹ há' he kãn ag tóg mũ gé sir, fag ke gé.

*Jesus kãme tỹ pã'i tỹ Herodes mỹ e
(Mt 14.1-12; Mc 6.14-29)*

⁷ Kỹ pã'i mág tỹ governador tỹ Herodes vỹ mễg mũ sir, Jesus tỹ nén han mũ ti. Kỹ tóg ti mỹ e tĩ. Kỹ ti tỹ ne to jykrén ke tóg tũ tĩ. Hã ra ù ag tóg Jesus to: “João Batista vễ,” he tĩ. “João hỹn tóg ã ter kỹ rĩr mãn,” he ag tóg tĩ, Jesus to.

⁸ Jo ù ag tóg ti to: “Elias vễ,” he tĩ gé. “Ti hỹn vễnh ven mãn, vãsỹ Topẽ vĩ tó tĩ ãn, Elias ti,” he ag tóg tĩ gé, Jesus to. Kỹ ù ag tóg ti to: “vãsỹ Topẽ vĩ tó tĩ ù hỹn rĩr mãn,” he tĩ gé.

⁹ Hã jëmẽ tóg, Herodes ti, kỹ tóg to jykrén kỹ: “João mỹ vó?” he mũ, Jesus to. “Hã ra sóg João krĩ kym, kỹ tóg tũ' he mũ. Kỹ ù nễ, hỹn'?” he tóg. “Nén han vãnh tỹ hěn ri ke hyn han tóg huri. Û nễ, hỹn'?” he tóg. Herodes ti. Kỹ tóg kejẽn ti ve sór mũ, ti tỹ ti mỹ e tĩn kỹ, hã ra Jesus vỹ ti venh tĩ tũ nĩ.

*Jesus tỹ ù tỹ 5 mil (ke) ag jẽn
(Mt 14.13-21; Mc 6.30-44; Jo 6.1-14)*

¹⁰ Kejẽn Jesus tỹ ùn vin mũ ag vỹ Jesus to vỹnvỹn ke mũ, ti tỹ ag jëgnê ja ãn tá. Ti mỹ ag tóg kãmén mũ sir, ag tỹ nén han ja ãn kar ti. Kỹ tóg ag mré vễnh péju kỹ tĩ mũ, ãmã tỹ Betsaida ra, vyr mỹ ag mré vễmén jé.

11 Hã ra ùn e ãn ag tóg mēg mũ, Jesus tīg ti, kỹ ag tóg ti nón mũ mũ. Ag tỹ ti pětēm kỹ tóg ag mỹ vĩ há han mũ, Jesus ti. Ag mỹ tóg kãmén mũ, Topē tỹ tỹ ěg pã'i nĩ sór ti. Ag kãmĩ ùn kagyga tỹ há' he tóg mũ gé, fag mré hã.

12 Ti tỹ ag ag mỹ tó jē ki tóg rãké nỹ sir, kỹ ù tỹ 12 (ke) ag tóg Jesus to kãmũ mũ. Ti mỹ ag tóg: “ã tỹ ag jēgnēnh há tóg tĩ,” he mũ, “ag tỹ ěmã kar mũ mũ jé, pão comprar he jé, tá nũgnũr jé ke gé. Tag ki tóg ěmã tũ nĩ,” he ag tóg, Jesus mỹ.

13 Hã ra Jesus tóg ag mỹ: “vó,” he mũ. “Ha inhhã ag jēn,” he tóg. Kỹ ag tóg ti mỹ: “hã ra vējēn tóg ěg mỹ tũ tĩ,” he mũ. “Pão tỹ 5 (ke) hã vĩ ki nỹtĩ, pirã régre mré ke gé. ěg mỹ ag jo comprar henh mũ vĩ, vējēn ti?” he ag tóg, Jesus mỹ.

14 ù tỹ mil tỹ 5 (ke) ag vế, ag tãvĩ, fag mré tó tũ ra. Hã ra fag tóg tá e nỹtĩ gé, gĩr mré ke gé.

Ag tỹ ti mỹ ke kỹ Jesus tóg ã mré mũ tĩ ag mỹ: “ag mỹ tugtó, ag nĩgnĩ jé,” he mũ, “ag tỹ vēnh nĩkrén jé, ù tỹ 50 (ke) pãte ù tỹ 50 (ke) ù pãte nĩgnĩ jé,” he tóg, Jesus ti, ã mré mũ tĩ ag mỹ.

15 Kỹ ag tóg ke mũ sir. Kỹ vēnh kar tóg nĩgnĩ mũ sir.

16 Kỹ tóg pão tỹ 5 (ke) in gég mũ, pirã régre ěn mré. Kỹ tóg kanhkã ki ěvãnh mũ, kỹ tóg Topē mré vĩ mũ sir. Kỹ tóg pão vēnh kãpópãm mũ sir. Kỹ tóg ã mré mũ tĩ ag mỹ vin mũ, ag tỹ ùn e ěn mỹ vēnh kãpópãm jé, pirã ěn mré hã.

17 Kỹ vēnh kar tóg ko kãn kỹ funfór mũ sir. Kỹ ag tóg ti ke ěn gég mũ. Kēj tỹ 12 (ke) fãn tóg, vējēn mru ěn ti. Hã kỹ Jesus tóg pão tỹ 5 (ke) tỹ ùn e ag fónfãn ja nĩgtĩ.

Pedro tỹ Jesus tó
(Mt 16.13-19; Mc 8.27-29)

18 Kejẽn Jesus tóg Topẽ mré vỹ mũ, ã pin kỹ. Hã ra ti mré mũ tĩ ag tóg ti mré nỹtĩ nĩ. Kỹ tóg ag mỹ ke mũ. “Ag iso hẽ ri ke tĩ?” he tóg ag mỹ, Jesus ti.

19 Kỹ ag tóg ti mỹ: “ũ ag vỹ: João Batista vẽ, he tĩ, jãvo ù ag vỹ: Elias vẽ, he tĩ gé, jãvo ù ag vỹ: vãsỹ Topẽ vỹ tó tĩ ù vỹ rĩr mãn, he tĩ gé, ã to,” he ag tóg, Jesus mỹ.

20 Kỹ tóg ag mỹ: “ag jãvo ãjag hẽ ri ke tĩ, iso?” he mũ. Kỹ Pedro vỹ ti mỹ kãmén mũ. “Tỹ ã Cristo nĩ, Topẽ tỹ ẽg mỹ ùn jẽnẽg mũ ẽn vỹ tỹ ã nĩ,” he tóg, Pedro ti, Jesus mỹ.

21 Kỹ tóg ti mỹ vỹ tar han mũ, Jesus ti, ag tỹ ù mỹ tó tũ nĩ jé ver, ti tỹ tỹ Cristo nĩ ẽn.

Jesus tỹ ã jagtar ke tó vén
(Mt 16.20-28; Mc 8.30-9.1)

22 Kỹ tóg ag mỹ kãmén mũ. “Tỹ sóg ẽprã ke fi kósin ẽn nĩ,” he tóg. “Ijagtar jagy han ke vẽ,” he tóg. “Kófa ag tỹ iso: kórég ti nĩ, henh ke vẽ, Topẽ tũ ki rĩr tĩ to pã'i ag ke gé, Topẽ vỹ to professor ag ke gé. Ag tỹ isén ke vẽ. Kurã tâgtũ tũg mũ ra sóg rĩr mãn mũ hã ra,” he tóg, Jesus ti.

23 Kỹ Jesus tóg vẽn kar mỹ tó mũ. “Ãjag tỹ inh mré kãmũ kỹ tóg há tĩnh mũ,” he tóg. “Kỹ ãjag jykre tovãnh nĩ, ãjag tỹ isũ tãvĩ han jé. Ha vé, ag tỹ inh cruz tỹ inh kri fi kỹ sóg tũg ke mũ, ag tỹ to isa kỹ isén jé, ha vemnĩ. Vẽn nenh ke tũ sóg nĩ. Isỹ tag han ri ke han nĩ, kurã kar ki, ãjag tỹ inh mré mũ sór nỹtĩn kỹ,” he tóg.

24 “Ājag tỹ ājag jykre hã han sór kỹ ājag tỹ nũgme ki vár ke vễ. Jãvo ājag tỹ isugrĩn ājag jykre tovãnh kỹ ājag krenkren ke vễ, ājag kãgter ke mũ (hã) ra.

25 Ājag tỹ ga kri mũn kỹ ājag tóg nén kar ganhar he sór mũ. Kỹ ājag kuprĩg vỹ vãfor ke mũ. Kỹ tóg kórég nỹ sir, ājag rico tãvĩ nỹtĩ ra. Ganho há venh ke tũ ājag tóg ke mũ, gen kỹ.

26 Iso mỹ'ãg tũg nĩ, inh vĩ to. Ājag tỹ ũri iso mỹ'ãg kỹ sóg ājag to mỹ'ãg ke mũ gé, inh kãtĩg mãn ken kỹ. Tỹ sóg ěprã ke fi kósin ěn nĩ. Sĩnvĩ ti nĩnh mũ, inh kãtĩg mãn kỹ, inh jóg tỹ inh jẽnẽn kỹ, ti tỹ isỹ ũn mág han kỹ. Kỹ ti tỹ jẽgnẽ jafã ag vỹ inh mré kãmũnh mũ gé, Topẽ tũ ag. Ěn kã sóg ājag to mỹ'ãg ke mũ, ājag tỹ ũri iso mỹ'ãg kỹ,” he tóg.

27 “Ki hã sóg tó mũ, ha mẽ. Ājag kãmĩ ũ ag vỹ Topẽ tỹ tỹ ěg pã'i nĩ venh ke mũ, ag ter ke to hã, tag ki ěg mré nỹtĩ ũ ag,” he tóg, Jesus ti.

Jesus tỹ vễnh ven ũ han

(Mt 17.1-13; Mc 9.2-8)

28 Jesus tỹ tag tó kar kỹ kurã tỹ 8 (ke) vỹ tũg mũ. Kỹ tóg kejẽn ag mỹ: “mũ nỹ, vyrmỹ,” he mũ. Pedro mỹ tóg ke mũ, João mỹ ke gé, Tiago mỹ ke gé. Ag hã mré tóg tĩ mũ, pãnónh ra, Topẽ mré vễmẻn jẻ.

29 Tá jun kỹ tóg Topẽ mrẻ vĩ mũ sir. Kỹ tóg vãhã vễnh ven ũ han mũ, vễnh ven kupri han tóg mũ. Ti kur tóg kóprẻj nĩ, kókov tóg nĩ, ti kur ěn ti.

30 Kỹ ũn rẻgre ag tóg vãhã tá vễnh ven mũ sir. Kỹ ag tóg Jesus mrẻ vễmẻn mũ sir. Moisés vễ, Elias mrẻ hã, ũn rẻgre ěn ag.

31 Ag ve vỹ ti ve ri ke nĩ gé, Moisés mrẻ Elias ti. Jesus mrẻ ag tóg vễmẻn mũ, ti ter ken kãmẻn ag tóg mũ sir, ti tỹ Jerusalẻm tá ter ke mũ ěn ti.

³² Pedro ag mÿ tóg nÿr há tãvĩ tĩ, ge ra ag tóg ag vég mũ sir, ag mÿ nÿgnÿr há (hã) ra. Hã ký ag tóg Jesus tÿ ag mÿ vênh ven ù han mũ ên vég mũ sir, ti kókov ên ti, ti mré vémén mũ ag ke gé.

³³ Ký ù tÿ Jesus mré vémén ký nÿtĩ ag tóg mũ sór mũ sir. Ký Pedro tóg Jesus mÿ: “Senhor,” he mũ. “Tag ki tóg há nĩ,” he tóg. “Ëg tÿ tag ki pãjó tãgtũ han kÿn hÿn há nĩnh mũ, ã mÿ, Moisés mÿ, Elias mÿ ke gé,” he tóg, Pedro ti. Hã ra tóg krĩ tũ nĩ, hã ký tóg pãjó tó mũ.

³⁴ Pedro tÿ ver ti mÿ vémén ký kanhkã góg vÿ ag kri rÿm ke mũ sir. Ký ag tóg kamëgmëg mũ, kanhkã góg ên ti.

³⁵ Ký vênh vĩ tóg mẽ há' he mũ, kanhkã góg ên kãtã, ký tóg: “inh kósin hã vë,” he mũ. “Inh fe pë hã vë,” he tóg. “Ti vĩ jëmë ra,” he tóg, vênh vĩ ti, Topë ti.

³⁶ Ag tÿ tag mẽ kar ký Jesus tóg ã pir mÿ tá jë nĩ sir. Ti mré vémén ja ên ag ve mãn tũ ag tóg nĩ sir, Pedro ag. Ký ag tóg mũ mũ. Hã ra ag tóg ù mÿ tó tũ nĩ ver, ag tÿ nèn ve ja ti. Tÿ vémén tũ ag tóg nĩ ver, ag tÿ kanhkã tá vênh jykre ve ja ên ti.

Jesus tÿ kyrũ jagrë kórég kutëm

(Mt 17.14-21; Mc 9.14-29)

³⁷ Tÿ vaj ký ag tóg pãnónh ên tá kãre mũ, Jesus mré. Ký ag tóg ù tÿ hên ri ke ag vigvég mũ sir. Jesus kato ag tóg kãmũ mũ.

³⁸ Ký vãhã ù tóg ag kãmĩ prër mũ, ha mẽ. “!..Senhor..!” he tóg. “!..Inh kósin ve ra..! Inh kósin pir vë.

³⁹ Jagrë kórég ti nĩ, ha mẽ. Ký tóg kejën ti kã vyryn ke tĩ, ký tóg prër tĩ, ký tóg ti ter tĩ han tĩ gé, ký tóg jãrãn mũ. Jãrãn ký tóg jũrũn' jũrũn' ke tĩ gé, ký tóg kejën ti tovãnh mũ sir, komër hã, ti rÿj kar ký.

40 Æ mré mũ tĩ ag mĩ sóg to vĩ mũ vễ, ag tỹ ti jagrẽ kórég tag kutêm jé, hã ra ag tóg ti tỹ hẽ ri ke tũ nĩ,” he tóg, ti panh ti, Jesus mĩ.

41 Kĩ Jesus tóg ti mĩ: “ãjag ne tóg inh ki ge há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tỹ hẽn ri ke ki inh hỹn ãjag mré tĩ nĩ? Kysã tỹ hẽn ri ke ki inh hỹn ãjag to fe tĩg nĩ?” he tóg. “Inh mĩ ti pére kãtĩg nĩ,” he tóg, Jesus ti, ti panh mĩ.

42 Kĩ ag tóg ti pére kãmũ mũ. Ti jun kĩ ti jagrẽ tóg ti kã vyryn ke mũ. Ti tỹ jũrũn', jũrũn' ke han tóg mũ sir. Kĩ Jesus tóg ti jagrẽ mĩ vĩ jũ han mũ, ti tỹ ti ki kãkutê jé. Hã ki tóg kyrũ ên tỹ há' he mũ sir. Kĩ tóg ti panh mĩ: “té,” he mũ sir.

43 Kĩ tóg vênh kar mĩ e tãvĩ tĩ. “Topẽ ne tóg tỹ ãn mág tãvĩ nĩ', ti jykre tóg há tãvĩ nĩ,” he ag tóg mũ sir, ag tỹ Jesus tỹ nén han mũ to jykrén kĩ.

Jesus tỹ ã jagtar ke tó mãn

(Mt 17.22-23; Mc 9.30-32)

Kĩ Jesus tóg ã mré mũ tĩ ag mĩ:

44 “ha mẽ há han,” he mũ. “Ëprã ke fi kósın ên vỹ jagtar nĩnh ke mũ. Inh hã vễ,” he tóg. “Ëprã ke ag vỹ ãjag tỹ inh ki nén han sór mũ ên han ke mũ,” he tóg, Jesus ti.

45 Hã ra tóg ag tỹ ti tỹ ã ter ke kãmén tag to jykrén tũ nĩgtĩ. Ag tỹ to jykrén mũ ra ag tóg ki kagtĩg nỹtĩ. Kĩ ag tóg ãjag tỹ ti ki jẽmẽ sór mũ ra ti kamẽg mũ gé, hã kĩ ag tóg ti mĩ: “ã tỹ ne tó nẽ?” he tũ nĩ, Jesus mĩ.

Ûn mág

(Mt 18.1-5; Mc 9.33-37)

46 Kejĕn Jesus mré mũ ag vỹ jagnĕ mỹ vĩ jũ han mũ. “Ĕg kã ù tỹ hĕ nỹ jagnĕ kãfór nĩ?” he ag tóg jagnĕ mỹ. Tag to ag tóg jagnĕ mỹ vĩ jũ han mũ.

47 Hã ra Jesus tóg vég mũ, ag tỹ nén to jykrén mũ ti. Kỹ tóg gĩr jé prĕr mũ, ti tỹ ti mré jĕ jé.

48 Kỹ tóg ag mỹ tag tó mũ, ha mẽ. “Gĩr tỹ ge jĕ'ỹn nĩ, ti to há nỹtĩmnĩ, isugnĩn,” he tóg. “Ājag tỹ isugrĩn ti to há nỹtĩn kỹ ājag tóg iso há nỹtĩ gé sir. Ājag tỹ iso há nỹtĩn kỹ ājag tóg ù tỹ inh jĕnĕg mũ to há nỹtĩ gé sir. Kỹ ājag tỹ ĕgno kar vỹ tỹ ājag mág kãfór kar nĩnh mũ, ha mẽ, ājag tỹ tỹ ùn mág nỹtĩ sór kỹ. Tag to jykrén nĩ,” he tóg, Jesus ti, ag mỹ.

*Ũ tỹ ĕg kato tĕ tũ ag
(Mc 9.38-40)*

49 Kỹ João tóg Jesus mỹ: “Senhor’,” he mũ. “Ũ ve ĕg tóg vĕnh jagrĕ pan tĩ, ã jiji tó kỹ, ĕg tỹ ùn vég mũ ĕn ti,” he tóg, Jesus mỹ. “Hã ra tóg ĕg mré tĩ tũ nĩgtĩ, hã kỹ ĕg tóg ti mỹ: “vĕnh jagrĕ kórég pan sór tũg nĩ,” hé,” he tóg, João ti, Jesus mỹ.

50 Kỹ Jesus tóg ti mỹ: “ũ mỹ: “vĕnh jagrĕ kórég pan tũg nĩ,” he tũg nĩ,” he mũ. “Ũ tỹ ĕg kato tĕ tũ nĩn kỹ ĕg mré ke vĕ sir,” he tóg, Jesus ti, João mỹ.

Samaria tá ke ag tỹ Jesus mỹ: “kãrã ra,” he sór tũ

51 Kejĕn Jesus ter ke kurã tóg kakó nĩ sir. Kỹ tóg to jykrén kỹ Jerusalém ra tĩg sór mũ, ag tỹ tá ti tén jé. Kỹ tóg tĩg kỹ ù ag jĕgnĕg mũ, vĕnh jo, ag tỹ ti jun ke tó jé, cidade kãsir tá.

52 Kỹ ag tóg mũ mũ, ag tỹ tón jé. Kỹ ag tóg cidade sĩ ù ki jun mũ. Samaria tá ke ag jamã ù vĕ. Tá ag tóg ti nũr ke ve sór mũ.

53 Hã ra tá ke ag tóg ag mÿ nenh mũ. Ag mÿ ag tóg: “ãjag tÿ hẽ ra mũ nẽ?” he mũ. Kÿ ag tóg: “Jerusalém ra,” he mũ. Kÿ tóg ag mÿ kórég nĩ, hã kÿ ag tóg ag mÿ cama ven sór tũ nĩ.

54 Kÿ Tiago tóg jũ mũ, João ke gé, Jesus mré mũ tĩ ag. Kÿ ag tóg Jesus mÿ: “Senhor’,” he mũ. “Ëg mÿ tóg há nÿnh mũ, ãg tÿ Topẽ mÿ: “kanhkã tá pĩ tÿ ag pũn nĩ,” hen kÿ. Mÿ ã mÿ há nÿnh mũ?” he ag tóg. “Ëg tÿ Elias tÿ nén han ja ãn han há tóg tĩ,” he ag tóg, Jesus mÿ.

55 Hã ra Jesus tóg ag jé vĩrĩn ke kÿ ag mÿ: “vĩ tũg ra,” he mũ. “Topẽ jykre pijé’, ãjag tÿ nén han sór mũ tag ti. Inh pi(jé) ag tũg sór mũ’. Isÿ ag kren han sór vẽ jãvo, hã jé sóg kãtĩ mũ, inh, hã vÿ: tÿ sóg ãprã ke fi kósın ãn nĩ, he mũ,” he tóg, Jesus ti, ag mÿ.

56 Kÿ ag tóg cidade ã ra mũ mũ, tá nũgnũr jé sir.

*Ëg tÿ Jesus mré mũnh ke
(Mt 8.18-22)*

57 Ag mũn kÿ ã tóg Jesus mÿ: “sÿ ã mré tĩg há tóg tĩ,” he mũ. “Ã tÿ hẽn ra tĩg kÿ sóg ã mré tĩg ke mũ,” he tóg.

58 Kÿ Jesus tóg ti mÿ: “hã ra tóg jagy tĩ,” he mũ. “Ĩn tũ sóg nĩ. Mĩg vÿ kré nÿtĩgtĩ, jẽsĩ vÿ jagfe nÿtĩgtĩ gé, ag jãvo isÿ hẽ tá nũr ke tóg tũ tĩ. Tÿ sóg ãprã ke fi kósın ãn nĩ,” he tóg, Jesus ti.

59 Kÿ Jesus tóg kejẽn ã mÿ: “mũ nÿ, inh mré,” he mũ. Hã ra tóg ti mÿ: “inh hÿn ver tĩg mũ ha, sÿ inh panh ter kÿ ga ki ti fón jé ver,” he mũ.

60 Hã ra Jesus tóg ti mÿ: “vó,” he mũ. “Inh ki ge tũ ag vÿ ã panh kej han mũnh mũ. ã tÿ inhhã inh mré

tĩg há tóg tĩ, ã tỹ Topẽ tỹ tỹ ãg pã'i nĩnh ke ãn kãmén jé," he tóg ti mỹ, Jesus ti.

⁶¹ Kĩ ù tóg ti mỹ ke mũ gé sir, Jesus mỹ. "Sỹ ã mré tĩg há tóg tĩ," he tóg. "Hã ra sóg inh jamã ra tĩg sór mũ ver, sỹ inh mré ke fag mỹ isĩg ke tó jé," he tóg, Jesus mỹ.

⁶² Kĩ Jesus tóg ti mỹ: "vó," he mũ gé. "Ëg tỹ arado tỹ ga kũm kỹ ãg pi(jé) vēsujãm ãvãnh tĩ," he tóg. "Ge ti nĩ, ã tỹ inh mré tĩg sór kỹ. Inh mré ã tóg tĩg mũ. ã tỹ ã tũ han sór tĩn kỹ ã tóg Topẽ tỹ tỹ ãg pã'i nĩ tá krỹg ke tũ nĩ," he tóg, Jesus ti, ù tỹ ti mré tĩg sór mũ mỹ.

10

Û tỹ 70 (ke) ag tỹ Jesus vĩ kãmén mũ

¹ Kĩ Jesus tóg ù ag vin mũ gé sir, ù tỹ 70 (ke) ag. Kĩ tóg ag jẽgnẽg mũ sir, ag tỹ ti jo mũ jé. Ûn régre tĩn', ùn régre tĩn' he tóg. Ag mỹ tóg ke mũ, ag tỹ ãmã kar mũ Topẽ kãmén mũn jé, cidade kar mũ ke gé. Ag nón tóg ra tĩg sór mũ gé, Jesus ti.

² Kĩ tóg ag mỹ: "inh mỹ ag tóg ãkré ri ke nỹtĩ, ãjag tỹ ùn mỹ tónh ke mũ ag," he mũ. "Kejẽn ãg jakré tóg éhé nỹgtĩ, hã ra ag pipir nỹtĩ, ù tỹ krenh ke mũ ag. Kĩ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ûn e ag tóg inh ki ge sór mũ nĩ, hã ra ù tỹ ag mỹ tónh ke tóg tũ tĩ," he tóg. "Hã kỹ Topẽ mré vĩmnĩ, ti tỹ ù ag jẽgnẽn jé, ag tỹ ag mỹ tugtón jé, ti vĩ ti," he tóg, Jesus ti, ã mré mũ tĩ ag mỹ.

³ "Ha mũjẽg. Ha vé, carneiro krẽ vỹ vẽnh jy nĩgãn ki kagtĩg nỹtĩ, mĩg tỹ ag mãn sór kỹ. Mé krẽ ãn ri ke ãjag nỹtĩ, hã ra sóg ãjag jẽgnẽg mũ, kỹ Topẽ vỹ ãjag jy nĩgãn mũ," he tóg.

4 “Kỹ ãjag mũn kỹ sacco ma mũ tũg nĩ, bolso ên, jãnkamy tũ ke gé, pẽn né vẽnh kafã gé(g) mũ tũg nĩ gé, pẽn to ró ên. Kỹ ãjag tỹ ù ven kỹ ti mỹ: “ã mỹ há?” he tũg nĩ gé. Jatun mỹ mũmnĩ,” he tóg.

5 “Kejẽn ãjag tóg êmã ù tá junjun ke mũ. Kỹ ãjag tỹ ãn ù ra ge kỹ tá ke fag mỹ: “Topẽ jé ãjag ki rĩr, kỹ ãjag jé jatun mỹ nỹtĩ nĩ,” hemnĩ fag mỹ,” he tóg, Jesus ti, ag mỹ.

6 “Kỹ tá ke ù tỹ inh ki rã kỹ tóg jatu' he mũ sir, ti tỹ tỹ Topẽ kósin nĩn kỹ. Tá ke ù tỹ inh ki rã jãvãnh nĩn kỹ tóg jatu' he tũ nĩ sir. Ti jãvo ãjag tóg jatu' he mũ sir inhhã.

7 ãn ên krẽm nũgnũrmnĩ, ãjag tỹ kãra ge ja ên krẽm. Fag tỹ ãjag mỹ nẽn nĩm mũ ên komnĩ gé. ãn rãnrãj han mũ ên tóg ti kaja venh ke mũ, ti rãnrãj kaja ti, hã kỹ ag tóg ãjag jẽn ke mũ sir, vẽnh kaja jé. ãn ù kãra ge tũg nĩ, êmã ên tá.

8 ãjag tỹ êmã ù tá junjun kỹ ãn pir krẽm nỹtĩmnĩ, tá ke ag tỹ ãjag mỹ: “kãge ra,” hen kỹ. Ag vẽnjẽn hã komnĩ.

9 ãn kagyga ag tỹ há' hemnĩ. Ag mỹ: “Topẽ vỹ tỹ ãjag pã'i nĩnh mũ, ùn ri,” hemnĩ.

10 Kejẽn êmã ù tá ke ag tóg ãjag mỹ: “kãge ra,” he jãvãnh nỹtĩnh mũ. Kỹ êmã ên fĩn rãm kỹ ag mỹ tag tómnĩ, ha mẽ:

11 “ha vé, êg pẽn nug hã kykũnh êg tóg mũ, ãjag tỹ êg kavénh tũ nĩ jé,” hemnĩ. “Ge ra êg tóg ãjag mỹ tó mũ, êg tỹ ãjag mỹ nẽn tónh kãmũ jan ki, hã vỹ: “Topẽ vỹ tỹ êg pã'i nĩnh mũ, ùn ri,” he mũ,” hemnĩ ag mỹ,” he tóg, Jesus ti.

12 “Ha mẽ, kurã tỹ êgno ki ag tóg vẽnsỹrénh ke mũ, ag tỹ ãjag vỹ mẽ jãvãnh kỹ. Cidade tỹ Sodoma tá ke

ag vēs̄rēnh k̄āfór han jé ag tóg ke m̄ũ, kurā ēn k̄ā, ha vemnī,” he tóg, Jesus ti, ag m̄ỹ.

Jesus t̄ỹ ũ ag m̄ỹ vī kónān
(Mt 11.20-24)

¹³ K̄ỹ tóg: “s̄ỹ cidade t̄ỹ Corazim ki ke ag m̄ỹ tag tó sór m̄ũ, ha mē,” he m̄ũ. “Kórég ve jé ājag tóg ke m̄ũ,” he tóg. “S̄ỹ cidade t̄ỹ Betsaida ki ke ag m̄ỹ tag tó sór m̄ũ gé, ha mē. Kórég ve jé ājag tóg ke m̄ũ gé,” he tóg. “Ēg t̄ỹ nén han vānh t̄ỹ hēn ri ke hyn han isóg ājag m̄ỹ, milagre t̄ỹ hēn ri ke, hā ra ājag tóg ājag jykre tovānh sór t̄ũ n̄ĩgtī,” he tóg. “Cidade t̄ỹ Tiro tá, cidade t̄ỹ Sidom tá sóg ēg t̄ỹ nén han vānh ēn hyn han t̄ũ n̄ĩ. S̄ỹ tá milagre hyn han m̄ũ ra ag tóg ājag jykre kórég tovānh m̄ũ vē, vās̄ỹ,” he tóg. “Ājag jykre pāno to ag jykrén ke m̄ũ vē, kygf̄ỹ ag m̄ũ vē, ag m̄ỹ ti e t̄ĩnh m̄ũ vē, s̄ỹ ag m̄ỹ tó m̄ũ ra. Ag jāvo ājag tóg tovānh sór t̄ũ n̄ĩ, to jykrén sór t̄ũ pē n̄ĩ,” he tóg, Jesus ti.

¹⁴ “Tiro tá ke ag v̄ỹ vēs̄rēnh k̄ān ke m̄ũ, kurā t̄ỹ ēgno ēn ki, Sidom tá ke ag ke gé, ag jykre pāno to. Ag vēs̄rēnh k̄āfór han jé ājag tóg ke m̄ũ jāvo, ha mē,” he tóg, Corazim tá ke ag to, Betsaida tá ke ag to ke gé.

¹⁵ K̄ỹ tóg: “s̄ỹ cidade t̄ỹ Cafarnaum ki ke ag m̄ỹ tag tó sór vē, ha mē,” he m̄ũ. “Ūri tóg ver ājag m̄ỹ sér t̄ĩ,” he tóg. “Kanhk̄ā ve jé ēg tóg ke m̄ũ,” he ājag tóg t̄ĩ, ón k̄ỹ. Hā ra ājag tóg n̄ũgme ki vār ke m̄ũ jāvo, inferno ki,” he tóg, Jesus ti. Tī t̄ỹ ā vī jēmē jāvānh m̄ũ ag m̄ỹ vī kónān hā vē.

¹⁶ K̄ỹ tóg ā mré ke ag m̄ỹ tag tó m̄ũ. “Ū tóg ājag vī mē sór m̄ũ, ha vemnī,” he tóg. “K̄ỹ tóg sir inh vī mēg m̄ũ gé, ti t̄ỹ ājag vī mēn k̄ỹ. Ū tóg ājag vī mē sór

tũ nĩ, ha vemnĩ. Kĩ tóg inh vĩ mēnh ke tũ nĩ gé. Ti tỹ inh vĩ mēnh ke tũ nĩn kũ tóg ù tỹ inh jēnēg mũ ěn vĩ mēnh ke tũ nĩ gé sir, Topě vĩ ti,” he tóg, Jesus ti. Ti tỹ ã mré mũ tĩ ag mỹ tón hã vĕ, ag tỹ ti vĩ kãmén mũ jé, kór há mũ, kuvar há mũ.

Kỹ ag tóg sir mũ mũ, ù tỹ 70 (ke) ěn ag.

Ů tỹ 70 (ke) ag tỹ Jesus to vỹnvỹn ke

¹⁷ Kejĕn ag tóg ti to vỹnvỹn ke mũ, kũ ag tóg ti mỹ vĩ sér han mũ sir. “Senhor,” he ag tóg mũ. “Vĕnh jagrĕ kórég ag vỹ ěg vĩ ki han tĩ. Ā jiji tó kũ ěg tóg ag mỹ vĩ tĩ, kũ ag tóg ki hã han tĩ,” he ag tóg mũ, Jesus mỹ.

¹⁸ Kũ tóg ag mỹ: “vãsỹ inh Japo vé, ti tỹ kanhkã tá kãtére kũ,” he mũ. “Ti fĩn rãm sóg, hã kũ sóg ti fón. Ta tỹ kómkóm ke ri ke nĩ ja ti nĩ, ti kutĕ ja ěn ti.

¹⁹ Ti kri ke vỹ tỹ inh nĩ. Ha vé, ājag to sóg vãsãn mũ, pỹn tỹ ājag kókén tũ nĩ jé, ājag tỹ ti sãn mũ ra, pỹn kakrã ke gé, Nén-Kórég kar ag ke gé. Ů vỹ ājag kókén ke tũ pĕ nĩ gé.

²⁰ Hã ra tag to mỹ há nỹtĩ tũg nĩ ver. Tag vỹ tỹ nén ù tũ nĩ ver. Vĕnh jagrĕ kórég vỹ ājag vĩ han, vĕnh kuprĩg ke gé. Hã ra tag to mỹ sér nỹtĩ tũg nĩ. Nén ù vỹ há pĕ nĩ, kũ tag hã to mỹ sér nỹtĩmnĩ. Ājag jyjy vỹ ránrán kũ nỹtĩ, Topě livron ki, kanhkã tá, ājag tỹ kanhkã tá junjun jé. Kũ tag hã to mỹ sér nỹtĩmnĩ,” he tóg, Jesus ti.

*Jesus tỹ ùn kãsir ag to há
(Mt 11.25-27; 13.16-17)*

²¹ Kũ tóg Jesus mỹ sér tĩ, hora ěn kã. Topě kuprĩg tỹ ti krĩn kũ tóg ti mỹ sér tĩ: “jóg,” he mũ. “Tỹ ã tóg kanhkã tãn ag kãfór kar nĩ, kar ã tóg tỹ ěprã ke ag

kāfór nĩ gé,” he tóg. “Inh mǎ tóg há tĩ, ã tỹ nén han mũ ti. Ũ tỹ: “ki kanhró mág inh nĩ,” he mũ ag mǎ ã tóg ã jykre ven ja tũ nĩ. Ag mǎ ã tóg kāmén ja tũ nĩ. Ũ tỹ gĩr ri ke ki kagtĩg ag hã mǎ ã tóg ven ja nĩ, ã jykre ti,” he tóg. “Hỹ, hã vē. ã tỹ nén to jykrén mũn hã vē, hã kỹ ã tóg ag hã mǎ ã jykre ti nĩm. Hã ra tóg há tãvĩ nĩ, jóg’,” he tóg, Jesus ti.

²² Kỹ tóg ã mré mũ tĩ ag mǎ: “inh jóg tóg inh mǎ tovãnh kãn, ã tỹ nén han ja kar ti,” he mũ. “Kỹ ũ pi(jé) ti kósin ki kanhró nĩ'. Inh jóg ne inh ki kanhró nĩ'. Kỹ ũ pi(jé) inh jóg ki kanhró nĩ gé'. Inh hã ne ti ki kanhró nĩ', isỹ tỹ ti kósin nĩn kỹ. Hã ra sóg ãjag mǎ ti kāmén jé kãtĩ mũ, inh jóg ti. Isỹ tag to ũn kuprēg mũ ag hã mǎ sóg ti kāmén tĩ, inh jóg ti,” he tóg, Jesus ti.

²³ Kỹ tóg ã mré mũ tĩ ag mǎ nén ũ kāmén mũ gé. Vyr mǎ tóg ag mǎ ke mũ, kỹ tóg: “ãjag hã ne vég mũ', Topē jykre ti, hã kỹ Topē tóg ãjag ve há han mũ,” he mũ. “Sér pē ti tĩ, ũ tỹ ti jykre vég mũ ag mǎ,” he tóg, Jesus ti.

²⁴ “Ki hã sóg tó mũ, ha mē. Ũ tỹ hēn ri ke ag vỹ inh ve sór tãvĩ ja nỹtĩgtĩ, vãsỹ, ãjag tỹ ũri nén vég mũ tag ti. Hã ra ag tóg inh mur ken jo kãgter kãn. Topē vĩ tó tĩ ag ja vē, pã'i mág ag ja vē, hã kỹ ag tóg ãjag tỹ nén vég mũ ve sór tãvĩ ja nỹtĩgtĩ. Hã ra ag tóg ve ja tũ nĩ, mē ja tũ ag tóg nĩ gé, ãjag tỹ ũri nén mēg mũ ti. ãjag hã ne mēg mũ inhhã',” he tóg, Jesus ti, ti mré mũ tĩ ag mǎ.

Samaria tá ke to comparação

²⁵ Kỹ vãhã Topē vĩ to professor ũ vỹ ag kãmĩ jēgnē mũ, kỹ tóg Jesus ki jēmē sór mũ. Ti tỹ ón kỹ ti vĩ mē sór vē, hã kỹ tóg ti mǎ: “Senhor’,” he mũ. “Inh hỹn

hẽ ri kenh mũ, isỹ rĩr krỹg ja tũ ve jé?” he tóg, Jesus mỹ.

²⁶ Kỹ Jesus tóg ti mỹ: “ne nỹ hỹn rán kỹ nĩ, Topẽ vĩ ki?” he mũ. “Topẽ jykre tỹ ne han jé ã ke mũ hỹn’?” he tóg. “To ke há ã tóg nĩ, ha inh mỹ tó,” he tóg.

²⁷ Kỹ tóg ti mỹ: “Topẽ vĩ tỹ ã kri ke nĩ, kỹ ti hã to há nĩmnĩ, ti ki rã há han nĩ, ti to jykre pir nĩmnĩ, ti to tar nĩmnĩ, ti mỹ ã tỹ nén han mũ kar ẽn han nĩ, ha mẽ. Kỹ ã régre kar ki rĩr nĩmnĩ gé, ã tỹ vẽn ki rĩr há han ri ke. Topẽ tỹ nén tón hã vẽn,” he tóg, Topẽ vĩ to professor ti.

²⁸ Kỹ Jesus tóg: “hỹ,” he mũ. “Ki hã ã tóg tó mũ,” he tóg. “Tag han ra, kỹ ã tóg rĩr krỹg ja tũ venh ke mũ,” he tóg.

²⁹ Hã ra tóg ti mỹ há tũ nĩ, Jesus vĩ tag ti, hã kỹ tóg ti mỹ: “kỹ ù nỹ tỹ inh régre nĩ?” he mũ.

³⁰ Kỹ Jesus tóg ti mỹ tag tó mũ, ha mẽ. “Kejẽn ù tóg nĩgtĩ. Hã ra tóg Jerusalém tá kãtĩg kỹ Jericó ra tĩ mũ. Ēpry jagma, ẽmĩn jagma ùn jykre kórég ag tóg ti jo vãyig mũ, bandido ag. Kỹ ag tóg ti kãgmĩ kỹ ti kur kunũg mũ. Ti mrãnmrãn ag tóg mũ. Ti tén kren ag tóg mũ, kỹ ag tóg hã ki ti tovãnh kar mũ mũ sir, ti tũ mãn kãn kỹ. Kỹ tóg tá nỹ nĩ sir.

³¹ Ti tỹ tá nỹ ra ù tóg ěpry ẽn jagma kãtĩ mũ gé. Topẽ tũ ki rĩr tĩ ù vẽn. Ti vég tóg mũ, ùn vẽnỹrénh kỹ nỹ ẽn ti, hã ra tóg ti venh rã tũ nĩ. Ēmĩn jagma tóg tĩ mũ.

³² Kỹ vãhã Levi krẽ ù tóg ěpry jagma kãtĩ mũ gé. Tá jun kỹ tóg ti vég mũ gé, hã ra tóg ti venh rã tũ nĩ gé. Ēmĩn jagma tóg tĩ mũ gé sir.

³³ Kỹ vãhã Samaria tá ke ù tóg ěpry jagma kãtĩ mũ gé. Kỹ tóg tá jun mũ, kỹ tóg ti vég mũ.

34 Kÿ tóg ti venh rã mũ inhhã. Ti kygtãg tóg mũ sir, azeite tỹ, vinho tỹ ke gé, ti mỹ to tĩn kỹ. Ấ kur tỹ tóg ti pãg mũ sir. Kÿ tóg ã mễg kri ti nĩm mũ, ã tỹ ti ma tĩg jé. Hã kÿ tóg ag tỹ ãn krêm nũr jafã tá jun mũ sir. Kÿ tóg tá ti ki rĩr mũ.

35 Tỹ vaj kÿ tóg tĩg mãn sór mũ, hã kÿ tóg ù tỹ ãn ki rĩr mũ ẽn mỹ jãnkamy régre vin mũ, kÿ tóg ti mỹ: “ti ki rĩr há han,” he mũ. “Jãnkamy tag tỹ ã mỹ tá krỹg tũn kÿ sóg ã mỹ kajãm mãn mũ, sỹ vỹn ken kÿ,” he tóg. “Kajãm kãn jé sóg ke mũ, sỹ vỹn ken kÿ,” he tóg, Samaria tá ke ẽn ti. Ti tỹ ùn kaga ki rĩr mũn hã vễ,” he tóg, Jesus ti.

36 Kÿ tóg: “kÿ ùn tãgtũ ag vỹ ti ve ja nĩ. Ag kã ù tỹ hẽ nỹ tỹ ti régre ja nĩ, ag tỹ ùn vóg kónãn ja ẽn régre? Ha to jykrén (ke)ma’,” he tóg, Jesus ti, Topẽ vĩ to professor ẽn mỹ.

37 Kÿ ù tỹ ti ki jẽmễg mũ ẽn tóg ti mỹ: “ù tỹ ti jagãgtãn mũ ẽn vỹ tỹ ti régre ja nĩ,” he mũ.

Kÿ Jesus tóg ti mỹ: “hỹ, tó há han ã,” he mũ. “Kÿ ẽn ri ke han nĩ. ùn vễsỹrénh mũ ag jagãgtãn kãn nĩ, ti ri kén,” he tóg, Jesus ti. Ti tỹ ù tỹ ón kÿ ti ki jẽmễg mũ mỹ tón hã vễ.

Jesus tỹ Maria mré Marta fag venh tĩg

38 Kejẽn ag tóg mũ mũ, Jesus ag, kÿ ag tóg ẽmã sĩ ù ki junjun mũ. Tá ù fi tóg nĩ nĩ, fi jijin hã vỹ: Marta, he mũ. Ẽn fi vỹ Jesus mỹ: “inh ãn kãra ge jẽg, ãjag tỹ ẽg mré nỹtĩ jé,” he mũ.

39 Kÿ fi jãvy fi vỹ nĩ gé, hã vỹ: Maria, he mũ. Kÿ Maria fi vỹ Jesus mré nĩ nĩ, ti vĩ jẽmễ jé.

40 Hã ra Marta fi vỹ rãnrãj (ka)mễ nĩ, Jesus ag mỹ vễjẽn han jé. Jãvo Maria fi tóg nĩ nĩ.

Kỹ Marta fi tóg Jesus mý: “Senhor’,” he mũ. “Rãnrãj mág han tí sóg nĩ, hã ra fi tóg nĩ nĩ. Fi mý ké, fi tỹ inh mré vėjẽn ki rĩr jé,” he fi tóg mũ.

⁴¹ Hã ra Jesus tóg fi mý: “krĩ kufy ã tóg nĩ, nén ù tũ to, hã ra fi tóg inh vĩ jẽmẽg nĩ nĩ,” he mũ, Marta fi mý. “Vėjẽn to vẽnũ kutãn tũg nĩ.

⁴² Nén ù pir hã ne há nĩ’, hã vĩ: inh vĩ, he mũ. Maria fi vĩ inh vĩ hã jẽmẽ sór mũ, kỹ sóg fi mý: “ha nén ù han,” he jãvãn nĩ. Nén ù há kuprẽg fi tóg, fi tỹ inh vĩ mẽ sór kỹ,” he tóg, Jesus ti, Marta fi mý.

11

Ëg tỹ Topẽ mré vẽnẽn (Mt 6.9-15; 7.7-11)

¹ Kejẽn tóg Topẽ mré vĩ mũ, Jesus ti, ẽmã ù tá nĩ kỹ. Ti tỹ Topẽ mré vẽnẽn kar kỹ ti mré mũ tí ag tóg ti mré vĩnh kãmũ mũ. Kỹ ag tóg ti mý: “Senhor’,” he mũ. “Ëg kanhrãn nĩ, ẽg tỹ Topẽ mré vĩ há han jé. João vĩ ã mré mũ tí ag kanhrãn. Ge ki ẽg kanhrãn nĩ gé,” he ag tóg, Jesus mý.

² Kỹ tóg ag kanhrãn kỹ ag mý:

“Topẽ mré vĩ kỹ tag tómnĩ, ha mẽ,” he mũ.

“Ëg jóg mág, ã jyjy tó ẽg tóg tĩ.

Kỹ vẽnũ kar jé ã tỹ tỹ ùn mág nĩ vé.

Ëg jé kãnũmar ã tỹ tỹ ẽg pã'i nĩ vé.

³ Ëg mý ẽg jẽn ti nĩm, kurã kar ki, ẽg tỹ kurã kar ki ko tĩ ẽn.

⁴ Kỹ ẽg mý vẽnũ pãte fón nĩ, ẽg tỹ ã vĩ mranh ja ti, hã jé ẽg tóg ẽg tỹ jagnẽ to jũ tỹ jagnẽ mý vẽnũ pãte fón ke mũ gé.

Kỹ ẽg tỹ ã vĩ mranh sór kỹ ẽg kren han nĩ, ẽg tỹ mranh tũ nĩ jé,” hemnĩ,” he tóg, Jesus ti.

⁵ Kÿ tóg ag mÿ ěg tÿ Topě mré vēmén tĩ ěn kāmén mǎn mũ. Kÿ tóg ag mÿ: “kejĕn ũ tóg nĭgtĩ,” he mũ. “Kuty si há tá tóg ā régre ĩn ki jun mũ. Kÿ tóg ti mÿ: “régre’,” he mũ. “Inh mÿ ěmĩ tǎgtũ nĭm, sÿ kar ā mÿ ti ri kén kÿ nĭm jé,” he tóg.

⁶ “Inh mré ke ũ vÿ jun. Kór há tá tóg kǎtĭg, kuvar há tá. Hǎ ra sÿ ti mÿ ne han ke tóg tũ tĩ,” he tóg, ā régre mÿ.

⁷ Kÿ ti régre tóg ti mÿ: “hǎ ra sóg nŭr nÿ nĩ,” he mũ. “Kar inh krĕ tóg inh mré nŭgnŭr nÿtĩ gé. Jǎnkǎ vÿ nĭfénh kÿ jĕ nĩ. Hǎ kÿ tóg inh mÿ vĕnhmÿ tĩ, inh nĭnh ke mũ ra, sÿ ā mÿ ěmĩ nĭm jé. Ũ ki jǎvǎnh,” he tóg ti mÿ.

⁸ Hǎ ra tóg sir to vĩ mǎn', to vĩ mǎn' he mũ. Hǎ kÿ tóg nĩ kÿ ti mÿ nĭm mũ sir, ti tÿ ti mÿ ěmĩ to vĩ mũ ti. Ti régre vĕ, ũ tÿ ti mÿ to vĭnh kǎtĩ mũ ti. Ge ra tóg ti mÿ nĭm ke tũ nĩ vĕ, ti tÿ tÿ ti régre ra. Ti tÿ ti mÿ to vĩ mǎn', to vĩ mǎn' he tugrĭn tóg sir ti mÿ nĭm mũ jǎvo. ěg tÿ Topě mré vĩ ri ken hǎ vĕ,” he tóg, Jesus ti.

⁹ “Ha mĕ, sÿ ājag mÿ nén tó mũ tag ti. Topě mÿ nén kar to vĭmnĩ, kÿ tóg ājag mÿ han mũ sir. Ājag tÿ ti mÿ nén ũ to vĩ mũ ěn jǎvǎnh nĩ, kÿ ājag tóg venh ke mũ sir. Ti mré vĩ kÿ ěg tÿ ti jǎnkǎ tÿ tórón tórón ke ri ke han nĩ, kÿ tóg ājag mÿ ti róm ri ke han mũ, ti tÿ ājag mÿ ājag tÿ nén to vĩ mũ ěn han kÿ.

¹⁰ Hÿ, hǎ vĕ. Ājag tÿ ti mÿ nén to vĭn kÿ tóg ājag mÿ han mũ. Ājag tÿ ti jǎvǎnh kÿ ājag tóg venh ke mũ. Ājag tÿ ěg tÿ jǎnkǎ tÿ tórón tórón ke ri ke han kÿ tóg ājag mÿ ti róm ri ke han mũ.

¹¹ Kejĕn ājag kósin tóg ājag mÿ pirǎ to vĩ mũ. Kÿ ājag pi(jé) ti mÿ pÿn nĭm ke mũ'. Pirǎ hǎ nĭm jé ājag

tóg ke mũ.

¹² Kejen tóg ãjag mũ garĩnh ovo to vĩ mũ, ãjag kósin ti. Kĩ ãjag pi(jé) ti mũ p̃yn kakrã nĩm ke mũ'. Garĩnh ovo hã nĩm jé ãjag tóg ke mũ.

¹³ Jykre pãno ãjag ñtĩ. ãjag jykre pãno (hã) ra ãjag tóg ãjag krẽ mũ nén ù há nĩm tĩ. Ge ti nĩ gé, ãjag tỹ Topẽ mũ nén ù to vĩn kĩ. Nén ù há hã nĩm jé tóg ke mũ. Hã ra tóg ãjag kãfór han tĩ, ãg jóg tỹ kanhkã tá nĩ ti. ãjag tỹ ti mũ to vĩn kĩ tóg ã kuprĩg tỹ ãjag jagrẽ han ke mũ mũr, Topẽ ti,” he tóg, Jesus ti.

*Jesus tỹ Topẽ jykre hã han kĩ tar nĩ
(Mt 12.22-30; Mc 3.20-27)*

¹⁴ Kejen tóg ùn jagrẽ kórég mũ ti jagrẽ kutẽm mũ. Ti vĩ vãnhan ja tóg nĩ, ti jagrẽ ti. Jesus tỹ ti kutẽm kar tóg vĩ há nĩ sir. Kĩ tóg vẽnhan kar mũ e tĩ sir, ag mũ tóg sér tĩ sir.

¹⁵ Hã ra ù ag tóg ti to: “jagrẽ kórég ti nĩ,” he mũ. “Nén-Kórég ag pã'i vỹ tỹ ti jagrẽ nĩ, Satanás ẽn, Belzebu he mũ ẽn,” he ag tóg mũ, ón kĩ. “Hã kĩ tóg Nén-Kórég ag pan tĩ, ag jagrẽ kórég ag. Nén-Kórég ag pã'i jykre tỹ tóg ag pan tĩ,” he ag tóg ón kĩ, Jesus to.

¹⁶ Hã ra ù ag tóg ón kĩ ti jykre ve sór mũ gé, kĩ ag tóg ti tỹ ãg tỹ nén han vãnhan mũ ve sór mũ sir, ti tỹ ag mũ kanhkã jykre ven jé.

¹⁷ Hã ra Jesus tóg ki kanhró nĩ, ag tỹ nén to jykrén mũn ki. Hã kĩ tóg ag mũ: “pã'i pĩr krẽm ke ag tỹ jagnẽ kato tẽn kĩ ag tóg jagnẽ kãgtén kãn ke mũ,” he mũ. “In pĩr krẽm ke fag tỹ jagnẽ kato tẽn kĩ fag tóg jagnẽ kãgtén kãn ke mũ gé sir.

¹⁸ Ge ti nĩ, Nén-Kórég ag jykre ti. Nén-Kórég ag tỹ jagnẽ kato tẽn kĩ ag tóg jagnẽ tỹ tũ' henh mũ gé vẽ,

Satanás ag. Hã kÿ tóg vënhmÿ nÿ, ãjag vÿ ti, ãjag tÿ iso: “Satanás jykre tÿ, Belzebu ên jykre tÿ tóg Nén-Kórég ag pan tÿ,” he mÿ ti. Ag tÿ jagnë kato tëgtë to ken hã vë sir, ha mẽ,” he tóg, Jesus ti.

19 “Belzebu jykre tÿ tóg ag pan mÿ, Nén-Kórég ag,” he ãjag tóg tÿ iso. ãjag mré ke ag to jykrén nÿ. Nén-Kórég ag pan ag tóg tÿ gé, ãjag mré ke ag. Ag pi(jé) Satanás jykre ki ag pan tÿ'. Topë jykre ki ag tóg ag pan tÿ (mÿr') ãjag tÿ tag to jykrén kÿ ãjag tóg inh jykre há ki kanhrân ke mÿ vë,” he tóg ag mÿ, Jesus ti.

20 “Topë kuprÿg jykre tÿ sóg Japo ag pan tÿ mÿr, ha mẽ. Topë kuprÿg tÿ Japo ag pan kãn kÿ Topë tóg tÿ êg pã'i nÿ vë, mÿr. Tag to jykrén nÿ,” he tóg, Jesus ti.

21 “Û tÿ é he (ka)më ag tóg ãjag tÿ ki rÿr há han ti. Ag rógro vÿ jëgtÿ, kÿ ag tóg ãjag ïn ki rÿr tÿ sir, ù tÿ ag tÿ mäg tÿ nÿn jé. Kÿ ù tóg ag tÿ vóg ke tÿ nÿ gé, ag tÿ ki rÿr há han kÿ.

22 Kejën ù tóg ù tóg ù tÿ é he (ka)më ên in tá jun mÿ, ù tÿ ti tar kãfór nÿ ti. Ti rará kãfór nÿn kÿ tóg ti tÿ hën ri kenh mÿ sir. Kÿ tóg ti rógro väg mÿ. Ti tÿ ùn kãgtén jafã väg tóg mÿ, kÿ tóg ti tÿ mãn kãn mÿ gé sir. Ge ti nÿ, isÿ nén han mÿ ên ti. Û tÿ é he (ka)më ri ke ti nÿ, Japo ti, hã ra sóg ùn tar ên ri ke nÿ,” he tóg.

23 “ãjag tÿ tÿ inh mré ke tÿ nÿtÿn hã kÿ ãjag tóg inh kato tëgtë mÿ. ãjag tÿ inh mré êprã ke ag tÿ Topë to kãmÿ han tÿ nÿn kÿ ãjag tóg ag kãmÿ kamëg mÿ,” he tóg.

*Věnh jagrě kórég vŷn kenh ke
(Mt 12.43-45)*

²⁴ “Kejěn sóg věnh jagrě kórég ũ kutēm mŷ. Kŷ tóg ga kórég mŷ tŷ mŷ, ti jagrě ěn ti. Goj venh ke tŷ tóg nŷ, tá. Věnhkán ke tŷ tóg nŷ gé, ti tŷ hē ri ken kŷ věnhkán ke tŷ tŷn kŷ. Kŷ tóg vāhā to jykrén mŷ sir. “Inh hŷn ěn ra tŷg mǎn ha, sŷ ũ tá kākutē ja ěn ra. Inh mŷ tóg tŷ ĩn ri ke ja nŷ, kŷ inh jé hŷn ti kāra rǎ mǎn ha,” he tóg mŷ, ti jagrě ěn ti.

²⁵ Kŷ tóg ti venh kātŷ mŷ. Hā ra tóg sir krŷ há nŷ. Kŷ tóg ti mŷ ĩn há ri ke nŷ sir, ĩn prur, ĩn sŷnvŷ ri ke.

²⁶ Kŷ tóg Nén-Kórég tŷ 7 (ke) ag mŷ tónh tŷ mŷ sir. “Ha kāmŷ jĕg,” he jé tóg ke mŷ. Hā ra ag jykre pāno tóg ti jykre pāno kǎfór nŷ. Kŷ ag tóg sir ũ ěn kǎge ge mŷ, tŷ ag tóg ti jagrě nŷtŷ sir, isŷ ũn mŷ ti jagrě pir kutēm ja ěn ti. Hā kŷ tóg kórég tǎvŷ nŷ sir. Ti jagrě kórég pir kutēm inh nŷ vē, hā ra ũ tŷ 8 (ke) ag tóg tŷ ti jagrě nŷtŷ, ti tŷ inh ki rǎ tŷ nŷn kŷ,” he tóg, Jesus ti. Ti tŷ ag mŷ věnh jagrě jykre tón hā vē.

Topē tŷ ěg ve há han ke

²⁷ Kŷ ũ tŷ ti vŷ mĕg mŷ ũ fi tóg prēr mŷ sir, fi tŷ ti vŷ tag mĕ kŷ. Ũn e ěn kāmŷ fi tóg jĕ nŷ, kŷ fi tóg ti mŷ ke mŷ. “!..Topē vŷ ā mŷnh fi ve há han, fi tŷ ā han tugrŷn, fi tŷ ā pafām tugnen..!” he fi tóg, prēr kŷ.

²⁸ Kŷ Jesus tóg fi mŷ: “hŷ,” he mŷ. “Hā ra Topē vŷ ā ve há han ke mŷ gé, ā tŷ ti vŷ jĕmĕn kŷ. Hā kŷ ā tŷ ti vŷ mĕ kŷ ke króm nŷ, kŷ tóg ā ve há tǎvŷ han ke mŷ,” he tóg, Jesus ti, ũ tŷ prēr mŷ ěn fi mŷ.

*Jesus tŷ ón kŷ milagre han ke tŷ
(Mt 12.38-42)*

²⁹ Hā ra ũ tŷ hĕn ri ke ag tóg sir tá junjun mŷ, ti vŷ mĕ jé. Kŷ tóg fór tǎvŷ tŷ. Kŷ Jesus tóg ag mŷ: “kórég

ãjag nýtĩ,” he mũ. “Ón kýtãjag tóg nén han vãnh ve sór mũ. Venh ke tũ ãjag tóg nĩ. Nén ù pir hã ve jé ãjag tóg ke mũ, hã vỹ: Jonas tỹ nén ve ja ên ri ke, he mũ,” he tóg.

³⁰ “Jonas vỹ cidade tỹ Nínive tá ke ag mýt Topẽ vỹ tó ja nĩ, kýtãg tóg ti vỹ mẽ há han ja nĩ. Ên ri ke han jé sóg ke mũ, ãjag mýt. Tỹ sóg êprã ke fi kósin ên nĩ,” he tóg.

³¹ “Kýt pã'i mág ên fi, kanhkã tâpér tỹ sul tá kãtĩg ja ên fi, tâ tá kãtĩg ja ên fi vỹ nĩnh ke mũ gé, kurã tỹ êgno ki, sỹ vãnh kar jykre venh ke kurã ên ki. ãjag mré fi tóg jẽnh mũ, kýt Topẽ tóg ãjag mýt vỹ kónãn ke mũ, fi ve kýt. Kanhkã fyr ja tá fi tóg kãtĩg ja nĩ, vãsỹ, fi tỹ pã'i mág tỹ Salomão vỹ mẽ jé. Salomão kãfór vỹ tỹ inh nĩ, hã ra ãjag tóg inh vỹ mẽ jãvãnh nýtĩ fi jãvo,” he tóg.

³² “Kýt Topẽ vỹ Nínive tá ke ag ve kýtãjag mýt vỹ kónãn ke mũ gé, kurã tỹ êgno ên ki, ha vemnĩ. Nínive tá ke ag tỹ Jonas vỹ mẽ kýtãg tóg ãjag jykre togvãnh ja nĩ. Tỹ sóg Jonas kãfór nĩ, hã ra ãjag tóg ãjag jykre tovãnh jãvãnh nýtĩ, sỹ ãjag mýt tó tĩ (hã) ra,” he tóg, Jesus ti.

Jẽngrẽ ri ke êg nýtĩ
(Mt 5.15; 6.22-23)

³³ “Êg tỹ lampião grug kýt êg pi(jé) ãn krẽm péju kýt fẽg tĩ', êg pi(jé) kěj krẽm fẽg tĩ'. Ti fẽg jafã kri êg tóg fẽg tĩ, lampião gru ti. Kýt êg tóg ti gru tỹ ve há jẽgtĩ, êg tỹ ãn kãtã kãmũ kýt,” he tóg, Jesus ti.

³⁴ “Êg kanẽ hã tóg tỹ êg tỹ ve jafã nĩ. Kýt tóg êg jo kurã han tĩ, êg kanẽ ti, ti há nĩnh kýt. Kýt tóg êg jo kurã kar nĩ sir, êg kanẽ há nĩnh kýt. Êg kanẽ kórég nĩnh kýt

tóg ěg jo kuty ke kãn mũ sir. Kÿ tóg ge nĩ, ěg jykre kórég ti. Ěg kaně kórég ri ke ti nĩ, ěg jo kuty han tóg tĩ.

³⁵ Kÿ věnh kanhrãn nĩ. Ke tũ nĩ mũ ra tóg ãjag jo kuty ri ke nĩ. Věnh jykre kórég hã vē. Kÿ věnh jykre kórég han sór tũg nĩ.

³⁶ Ājag jo kurã nĩn kÿ tóg há tãvĩ nĩ, ãjag jo kuty tũ nĩn kÿ, ãjag jo kuty sĩ tũ nĩn kÿ ke gé. Ājag jykre há tãvĩ nĩn kÿ tóg ãjag jo kurã ri ke nĩ. Kÿ ãjag tóg sir lampião gru ri ke nÿtĩ gé. Lampião gru mág nĩn kÿ tóg kómkom ke tĩ, ěg kaně jo, kÿ tóg ěg mÿ jěngrě há han tĩ. Ge ěg nÿtĩ, ěg jykre há tãvĩ nĩn kÿ, ti kórég sĩ tũ nĩn kÿ,” he tóg, Jesus ti. Ti tÿ ag mÿ Topě jykre há tón hã vē.

*Jesus tÿ ũn jykre régre ag mÿ vĩ kónãn
(Mt 23.1-36; Mc 12.38-40)*

³⁷ Ti tÿ ag mré vēmén kar Fariseu ũ tóg ti mÿ: “inh mré jěn kãtĩg,” he mũ. Kÿ tóg ti mré tĩ mũ, ti mré jěn jé, Jesus ti.

³⁸ Hã ra Jesus tóg Judeu ag jykre han ja tũ nĩ, ag jěn jé ag tóg věnh nĩgpég tĩ. Kÿ tóg Fariseu ěn mÿ e tĩ. Kÿ tóg to jykrén kónãn mũ sir.

³⁹ Kÿ Jesus tóg ki kanhró nĩ, kÿ tóg ti mÿ kãmén mũ. “Fariseu vÿ tÿ ãjag nÿtĩ,” he tóg. “Kÿ ãjag tóg copo ven ja kugpég tĩ, pénky ven ja ke gé, hã ra ti kãtã ke tóg kavěj nĩ. Kÿ ãjag jykre vÿ ge nÿtĩ gé. Jykre há nĩ ve ãjag tóg nÿtĩ, hã ra ãjag tóg věnh jykre pãno han tĩ, hã vÿ: jãnkamy to ag lograr he tĩ, he mũ, ãjag prũ tũ fag mré nÿ, he mũ gé.

⁴⁰ Krĩ tũ pě ãjag nÿtĩ. Ũ tÿ ěg ven ja han mũ vÿ ěg jykre han mũ gé mÿr. Ěg jykre há nĩn kÿ ěg ven ja vÿ há nĩ gé.

41 Û jagãgtãn ra, ãjag tỹ nén ù tỹ. Vẽnh jykre há kar han ra, kỹ tóg ãjag tỹ nén ù kar jãnhkri nĩ ri ke nĩ sir,” he tóg.

42 “Fariseu’, Topẽ vỹ ãjag ve kónãn. Ón kỹ ãjag tóg Topẽ mỹ ãjag jakré tỹ dízimo han kãn tĩ. ãjag jakré tỹ hortelã tỹ 10 (ke) nĩn kỹ ãjag tóg Topẽ mỹ ùn pir nĩm tĩ, dízimo han kỹ. ãjag jakré tỹ arruda tỹ ãjag tóg dízimo nĩm tĩ gé, ãjag jakré tỹ vẽn kagta kar tỹ mỹr, ãjag tỹ nén ù kar mré hã. Nén ù kar tỹ ãjag tóg dízimo vin tĩ, Topẽ mỹ. Hã ra ãjag tóg vẽn jykre kuryj han tũ nĩ jãvo. Topẽ to há tũ ãjag tóg nỹtĩ, ti vĩ jẽmẽ jãvãnh ãjag tóg nỹtĩ. ãjag tỹ ti tỹ ẽg jyvẽn ki króm mré hã ãjag jakré tỹ dízimo vin ra tóg há tãvĩ nĩnh mũ vẽn, ha mẽ. Hã ra ãjag tóg ki króm sór tũ nĩgtĩ,” he tóg.

43 “Fariseu’, Topẽ vỹ ãjag ve kónãn. Vẽn kanhrãn jafã krẽm ãjag tóg vẽn kãpãm kỹ nỹtĩ, vẽn kar tỹ ãjag ve jé. Cidade kuju tá ãjag tóg mũgtĩ, kỹ vẽn kar tỹ ãjag mỹ: “Senhor, ã mỹ há?” hen kỹ tóg ãjag mỹ sér tĩ.

44 Topẽ vỹ ãjag ve kónãn mỹr. Vẽn kej si ri ke ãjag nỹtĩ, vẽn kej to ró tũ ri ke. Kri mũ ag tóg tĩ, vẽn kar, kỹ ag tóg ki kagtũg nỹtĩ, ti tỹ tỹ vẽn kej nĩ ti. Kỹ ag tóg vẽn vatánh tá vẽn kavẻnh tĩ. Tag ri ke ãjag tóg nỹtĩ. Kỹ ãjag krẽm ke ag vỹ Topẽ vĩ mranh tĩ, ãjag ven kỹ,” he tóg, Jesus ti, Fariseu ag mỹ.

45 Kỹ Topẽ vĩ to professor ù tóg Jesus mỹ: “ã tỹ Fariseu ag mỹ tag tó kỹ ã tóg ẽg to vĩ kónãn tĩ nĩ gé, ag mré,” he mũ, ẽg Senhor mỹ.

46 Kỹ tóg: “ón kỹ Topẽ vĩ to professor’,” he mũ. “Hỹ, Topẽ vỹ ãjag ve kónãn gé,” he tóg. “Vẽn kar mỹ ãjag tóg vẽn jykre kufy nĩm tĩ. Kufy jagy ti nỹ,

vēnh jykre ēn ti, kŷ ājag tóg han sór tũ nŷgtĩ. Ge ra ājag tóg ag mŷ: “ha ki króm,” he tĩ.

⁴⁷ Topē vŷ ājag ve kónān mŷr. Ājag jóg'jóg ve ag vŷ Topē vŷ tó tĩ ag kāgtén. Jāvo ājag tóg ag kej ki rĩr há han tĩ.

⁴⁸ Hā ki ājag tóg ājag jóg'jóg ve ag tŷ ag kāgtén to: “há ti nĩ,” he tĩ. Hā ki tóg ājag mŷ há nĩ mŷr, ag tŷ ag kāgtén ja tigrĩn. Ag hā vŷ ag kāgtén ja nĩ, kŷ ājag hā nŷ ag kej ki rĩr há han tĩ,” he tóg.

⁴⁹ “Hā kŷ Topē vŷ ājag to vŷ ja nĩ. Ki kanhró ti nĩ, Topē ti, hā kŷ tóg ājag to vŷ kónān ja nĩ, ha mē. “Inh vŷ tó tĩ ag jēgnē jé sóg ke mũ ag mŷ, isŷ ūn vin mũ ag ke gé, ag tŷ ag mŷ inh vŷ tó jé. Hā ra ag tóg ag vóg kónān ke mũ, ag kāgtén jé ag tóg ke mũ,” he ja tóg nĩ, Topē ti.

⁵⁰ Ājag jóg'jóg ve ag vŷ ag kygrēn kãn, hā ra tóg ājag mŷ há tĩ, hā kŷ Topē vŷ to ājag vóg kónān ke mũ. Ū tŷ hēn ri ke ag kygrēn ag tóg, ājag jóg'jóg ve ag, Topē tŷ ēprā ke ag han kar kŷ.

⁵¹ Ti kāke tóg Abel tén. Ti nón ke ag kāgtén ja ag tóg nĩ gé, ājag jóg'jóg ve ag, Zacarias mré hā. Topē ĩn jānkā krēm ag tóg ti tãnh, Topē mŷ nén ū pũn jafā ēn ki, Zacarias ti. Topē tŷ jēgnēg mũ ag kāgtén tovãnh tũ pē ag nŷtĩ, ājag jóg'jóg ve ag. Hā ra tóg ājag mŷ há tĩ. Ājag tŷ ag kygrēn kãn ri ke ti nĩ. Ūn kãgter mũ tag jagfy kajãm kãn jé ājag tóg ke mũ, ha vemnĩ. Ājag mŷ sóg tó mũ mŷr,” he tóg, Jesus ti.

⁵² “Ōn kŷ Topē vŷ to professor', Topē vŷ ājag ve kónān. Topē vŷ tŷ ēg kanhrãn mũ ēn ki ge jāvãnh ājag tóg nŷtĩ mŷr'. Kŷ ū tŷ ki rã sór mũn kŷ ājag tóg ti mŷ tó kónān tĩ, ti tŷ ki vēnh fón tũ nĩn jé. Kŷ tóg ēg tŷ ū jo ĩn nĩfenh ēn ri ke nĩ, ājag tŷ ag tŷ Topē ki ge

kamêg ti,” he tóg, Jesus ti. Ti tỹ ù tỹ ón kỹ Topê vỹ to professor ag mỹ vỹ kónãn hã vễ.

⁵³ Ti tỹ tag tó kar kỹ tóg hên ra tĩ mũ sir. Tag pãte Topê vỹ to professor ag tóg ti mré mũ kỹ ti tugnỹm tĩ, Fariseu ag ke gé. Ag tỹ ti vỹ to ti se sór vễ. Hã kỹ ag tóg ón kỹ ti ki jēmêgmễg mũ.

⁵⁴ Ón kỹ ag tóg ti vỹ jēmêg tĩ gé sir, ag tỹ ti vỹ to ti kãgmĩn jé.

12

*Ủn jykre régre ag
(Mt 10.26-27)*

¹ Hã ra ù tỹ hên ri ke ag vỹ vễnh mãn kỹ nỹtĩ nĩ. E tãvĩ ag tóg tĩ ha, mil tỹ hên ri ke ag. Kỹ ag tóg jagnê sãnsãn mũ sir, ag e nỹtĩn kỹ. Kỹ Jesus tóg ag kanhrãn rãn mũ. Ả mré mũ tĩ ag kanhrãn vén tóg mũ, kỹ tóg ag mỹ: “Fariseu ag jykre han sór tũg nĩ,” he mũ. “Pão jějgia jafã ri ke ti nĩ, ag jykre ti, hã kỹ tóg Topê mỹ kórég nĩ. Ag jykre hã vễ, ha mẽ: jykre régre ag nỹtĩ. Kỹ tag tóg Topê mỹ kórég tãvĩ nĩ,” he tóg.

² “Ĕg tỹ péju kỹ nén han mũ vỹ vễnh ven kãn ke mũ, ĩg tỹ vễnh kar vatánh tá nén to jykren mũ vỹ vễnh ven kãn ke mũ, kurã tỹ ĩgno ki,” he tóg.

³ “Ăjag tỹ vễnh kar vatánh tá vēmén ja ĩn mẽ kãn jé ag tóg ke mũ, vễnh kar. Ăjag tỹ kékén kỹ nén tó ja ĩn tó kãn jé ag tóg ke mũ, jamã hár(a), ăjag tỹ ĩn kãtá nén tó ja ĩn. Hã kỹ vễnh jykre régre han tũg nĩ,” he tóg.

*Ĕg tỹ ĩprã pã'i ag kamêg ke tũ
(Mt 10.28-31)*

4 “Ha mẽ, iso há ãjag nýtĩ. Ag kamẽg tũg nĩ, ù tỹ ãg tén tĩ ag, pã'i ag. Ag tỹ ãg tén kar ký ag tóg ãg tỹ hẽ ri kenh ke tũ nĩ sir. Hã ký ag kamẽg tũg nĩ.

5 ãjag mẽ sóg tónh mũ ha, ãjag tỹ ùn kamẽg ke ti, hã vỹ: Topẽ, he mũ. Ti hã ne ãg tén kar nũgme ki ãg vãm ki kanhró nĩ', mỹr ha mẽ'. Ký ti hã kamẽg nĩ.

6 Sēsĩ vãm ag tóg tĩ, jãnkamy kato, ãg tỹ ko jé. Jēsĩ tỹ 5 (ke) kato ãg tóg jãnkamy pir mãng tĩ. Hã ra Topẽ pi(jé) ag kã jatun mũ'. Ag ki rĩr nĩ tóg nĩ, sēsĩ ãn ag ki.

7 ãg ki rĩr tóg nĩ gé, Topẽ ti. ãg tỹ nén vég mũ kar ki kanhró tóg nĩ. Hã ký tóg ãg gãnh ki kanhró nĩ gé. Nĩkrén kãn ja tóg nĩ, Topẽ ti, ãg gãnh ti. Jēsĩ kãfór ãjag tóg nýtĩ, Topẽ mẽ. ãjag kãmĩ ùn pir tóg sēsĩ e kãfór nĩ, ti mẽ. Hã ký ag kamẽg tũg nĩ, ù tỹ ãg tén sór mũ ag,” he tóg.

ãg tỹ Jesus kãmén ke

(Mt 10.32-33; 12.32; 10.19-20)

8 “Hã ký sóg ãjag mẽ tag tó mũ. ãprã ke ag mẽ: “tỹ sóg ti mré ke nĩ,” hemnĩ, iso. Ag kamẽg tũg nĩ. Ký sóg ãjag tónh ke mũ gé, Topẽ tỹ jẽnẽ jafã ag mẽ, kurã ãn kã, ãjag tỹ tỹ inh mré ke nýtĩ ti. Tỹ sóg ãprã ke fi kósĩn ãn nĩ, ha mẽ.

9 ãjag tỹ ãprã ke ag mẽ inh kãmén tũ nĩn ký sóg ãjag tónh ke tũ nĩ gé, Topẽ tỹ jẽnẽ jafã ag mẽ, ãjag tỹ iso: “ti ki kagtĩg sóg nĩ,” hen ký,” he tóg.

10 “Tỹ sóg ãprã ke fi kósĩn ãn nĩ. Ag tỹ iso vẽme jũ han ký sóg ag mẽ vẽnẽ pãte fón sór mũ. Ag tỹ hã ra Topẽ kuprĩg to vẽme jũ han ký Topẽ tóg ag mẽ vẽnẽ pãte fón mãn ke tũ nĩ ha,” he tóg.

11 “Ājag vin jé ag tóg ke mũ, pã'i ag mỹ, governador ag mỹ ke gé, ag tỹ ājag sigse jé. Ēg vėnh kanhrãn jafã krēm ag tóg ājag ki jēmē sór ke mũ, ājag tỹ inh ki ge kỹ nỹtĩ ti, ha vemnĩ. Hã ra to krĩ kufy han tũg nĩ, ājag tỹ ag mỹ inh kãmén ke ěn to.

12 Topẽ kuprĩg hã ne ājag kanhrãn ke mũ', kurã ěn kã. Hã kỹ ājag tóg tónh ke mũ sir,” he tóg, Jesus ti, ã mré mũ tĩ ag mỹ.

Ēg tỹ nén ũ to én ke tũ

13 Kỹ ũn e ag kãmĩ ũ tóg Jesus mỹ: “Senhor’,” he mũ. “Inh jo inh kãke mré vĩmnĩ, ěg tỹ ěg panh ter ja tỹ nén kar vėnh kãpãm jé, ti kuge ti,” he tóg, Jesus mỹ.

14 Hã ra Jesus tóg ti mỹ: “vó,” he mũ. “Isũ pijé’,” he tóg. “Inh pi(jé) ã mỹ ã kuge ve sór mũ'. Inh pi(jé) ã tũ tỹ vėnh kãpãm sór mũ’,” he tóg.

15 Kỹ tóg ag kar mỹ: “ker nén ũ to én hẽ’,” he mũ. “Ēg tỹ nén kar pi(jé) ěg rĩr han ke mũ'. Ēg tũ mág nĩ ra ěg pi(jé) mũ há han ke mũ’,” he tóg.

16 Kỹ tóg ag mỹ: “vėnh jykre há vỹ ge nỹnh mũ, ha mẽ,” he mũ. “Ũn rico tóg nĩ ja nĩgtĩ mỹr,” he tóg. “Ti japỹ vỹ nén kar kanẽ e han ja nĩgtĩ.

17 Kỹ tóg to jykrén mũ sir, ũn rico ti. “Inh hỹn ne han mũ ha?” he tóg. “Inh pãjó mág vó, inh pãjó kãsa vó, sỹ krēm isũ kar rãg jé?” he tóg.

18 “Inh pãjó kókén jé sóg ke mũ, sỹ ti jẽgja ki ũn mág han jé, kỹ sóg krēm isũ kar vin mũ, inh jakré kanẽ kar ti,” he tóg mũ, to jykrén kỹ.

19 “Kỹ sóg jatu nĩ sir. Isũ vỹ prỹg tỹ hėn ri ke pétēm mũ, kỹ sóg rãnrãj mãn ke tũ nĩ ha. Jatun mỹ sóg jẽg nĩnh ke mũ, kron nĩ jé inh ke mũ gé. Inh

mÿn sér tĩ sir, sÿ jatu nĩn kÿ,” he tóg, to jykrén kÿ, ùn rico ti.

²⁰ Hã ra Topẽ tóg ti mÿ vĩ mũ. “Krĩ tũ ã nĩ,” he tóg ti mÿ. “Kuty tag kã ã tóg ter ke mũ ha, kÿ ã tũ mág tag tÿ tÿ ù tũ nĩnh ke mũ ha ke gé. Ma tĩg ke tũ ã tóg nĩ. ã ter ke vễ,” he tóg ti mÿ, Topẽ ti,” he tóg, Jesus ti, ù tÿ ã panh tũ mãn sór mũ ên mÿ.

²¹ “Ge tóg tĩ, êg tÿ ga kri nén ù há ve sór kÿ, êg tÿ kanhkã tá tÿ nén ù tũ nĩn kÿ, Topẽ mré. Êg pi(jé) ga kri êg tũ mág ên ma mũnh mũ! Êg tÿ kanhkã tá tũ mág nÿtĩn kÿ tag hã tóg há nĩ,” he tóg, Jesus ti.

*Êg tÿ nén ù to krĩ kufy han ke tũ
(Mt 6.25-34)*

²² Kÿ tóg ã mré mũ tĩ ag mÿ: “ha vé,” he mũ. “Vějẽn to jykrén kÿ krĩ kufyg tũg nĩ,” he tóg. “Inh hÿn ùri ne konh mũ? Inh hÿn ne tunh mũ?” he tũg nĩ.

²³ Topẽ tÿ êg han ja vễ, êg tÿ ga kri mũ jé. Hã kÿ tóg êg jẽn ki rĩr ke mũ gé, êg kur ki ke gé.

²⁴ Sēsĩ to jykrén nĩ. Ag mÿ êkrãn tĩ? Vó. Ag mÿ ãjag jakré kunũg tĩ? Vó. Ag mÿ pãjó han tĩ? Vó, ke tũ ag tóg nĩgtĩ, ge ra Topẽ tóg ag jẽn tĩ. Jēsĩ kãfór ãjag tóg nÿtĩ, Topẽ mÿ, hã kÿ tóg ãjag jẽn ke mũ gé.

²⁵ Kÿ, Topẽ tÿ êg jé prěr kÿ êg tóg mũnh mũ gé. Êg pi(jé) mũnh ke tũ nĩ, ti tÿ êg jé prěr kÿ! Êg tÿ to krĩ kufy han mũ ra êg tóg tĩg mũ.

²⁶ Êg pi(jé) êg krĩ kufy tugrĩn, êg krĩ há tugnĩn mũnh ke tũ nĩ. Mũ jé êg tóg ke mũ, ti tÿ êg jé prěr kÿ. Hã kÿ nén ù ù to krĩ kufy han tũg nĩ.

²⁷ Ka fej to jykrén nĩ gé. Jatun mÿ tóg mog tĩ. Rãnrãj tũ tóg nĩgtĩ, kur han tũ tóg nĩgtĩ. Hã ra tóg

sĩnvĩ nỹtĩgtĩ, ka fej ti, kỹ pã'i mág tỹ Salomão ẽn kur tóg ri ke tũ nỹtĩ ja nĩgtĩ, ti sĩnvĩ ja ra, vẽnh kar kur sĩnvĩ kãfór ti nĩ, Salomão kur ti. Ki hã sóg tó mũ mỹr.

28 Topẽ hã ne ka fej sĩnvĩ han tĩ'. Hã ra tóg kãnhmar kãgter tĩ, ka fej ti, ti sĩnvĩ ra. Ủri tóg há nỹtĩ, tỹ vaj kỹ tóg kógungun tĩ. Topẽ tỹ ka fej sĩnvĩ han kỹ tóg ãjag kur ki rĩr ke mũ gé, ha vemnĩ. Kỹ ti to: “ti mỹ ẽg mỹ kur nĩm mũ vỹ?” he tũg nĩ.

29 “Inh hỹn ne konh mũ', ũri?” he tũg nĩ gé. To krĩ kufy han tũg nĩ.

30 Topẽ ki ge tũ ag vỹ tag to jykrén mág tĩ. Hã ra ẽg jóg tỹ Topẽ vỹ ẽg ki kanhró nĩ, ẽg tỹ nén konh ke mũ ti, ẽg kur ti ke gé. Kỹ to krĩ kufy han tũg nĩ.

31 Topẽ tỹ tỹ ẽg pã'i nĩ ẽn hã ve jé vãsãnsãn nĩ. Kỹ tag hã to jykrén nĩ. Kỹ Topẽ vỹ ãjag mỹ ãjag tỹ nén ve sór mág ẽn vin ke mũ sir,” he tóg, Jesus ti.

Kanhkã tá ẽg tũ

(Mt 6.19-21)

32 “Kamẽg tũg nĩ, ãjag pipir nỹtĩ ra. Ẽg jóg tỹ Topẽ vỹ ãjag to há nĩ, hã kỹ tóg ãjag mỹ kanhkã ti ven sór mũ, ha mẽ.

33 Ẽjag tỹ nén kar vin nĩ, ùn vēsỹrénh mũ ag mỹ. Hã kỹ ãjag tóg kanhkã tá tỹ nén ù mág nỹtĩnh mũ. Tá ãjag kuge tóg tũ' henh ke tũ nĩ. Tag ki ẽg tóg ẽg jãnkamy fón tĩ, nén ù kar to. Tá tóg tũ' he jãvãnh nĩ, ẽg kuge ti. Tá ù tóg péjunh kãtĩg ke tũ nĩ gé, tá ti ga tóg kaggranh ke tũ nĩ gé. Kanhkã tá ẽg tũ vỹ ge nĩ. Tũg jãvãnh ti nĩ.

34 Ẽjag tỹ ga kri tỹ nén ù mág nỹtĩnh kỹ ãjag tóg ga kri mũ mág sór mũ. Ẽjag tỹ hã ra kanhkã tá tỹ nén

ũ mág nýtĩn kŷ ājag tóg kanhkā ra mũ sór mũ, kŷ tag há ne há nĩ,” he tóg, Jesus ti.

Ĕg tŷ Jesus kătĩg măn jāvānh ke

³⁵ “Ĕg kur tŷ Ĕg tóg vēsógfĩg tĩ, Ĕg tŷ rānrāj há han jé. Ĕg lampiāo grug Ĕg tóg tĩ, kuty kā, Ĕg tŷ ve há han jé. Ĕn ri ke han nĩ, ājag tŷ inh kătĩg măn ke jāvānh kŷ.

³⁶ Kŷ ājag tóg ũn camarada ri ke nýtĩ. Kejĕn ag patrāo vŷ hĕn ra tĩg mũ, ā prŷ ke festa mág han jé. Kŷ ti camarada ag vŷ ti tŷ tá vŷn ke jāvānh nýtĩ. Ag tŷ ti jāvānh há han kŷ tóg há tĩ, ag nŷgnŷr tũ nĩn kŷ. Kŷ ag tóg kānhmar ti tŷ jānkā tŷ tórón tórón ke kŷ mĕnh mũ, kŷ ag tóg ti mŷ róm ke mũ sir, ti jun kŷ.

³⁷ Kŷ tóg kejĕn jun mũ sir, ag patrāo ti. Kŷ tóg sér tĩ, ti camarada ag tŷ ti jāvānh nýtĩn kŷ. Kŷ tóg ag mŷ vĩ há han ke mũ sir. Kŷ tóg vēsóg fĩn kŷ ag mŷ: “nĩgnĩ ra ver, mesa to,” hĕnh ke mũ sir. Kŷ tóg ag mŷ vĕjĕn ven ke mũ. Ag patrāo há ne ā camarada ag mŷ vĕjĕn ven ke mũ, ha vemnĩ. Ki há sóg tó mũ,” he tóg, Jesus ti.

³⁸ “Hĕn ri ke mũn tóg meia noite ki jun ke mũ, hĕn ri ke mũn tóg galó kyr mũ ra jun ke mũ. Ti camarada ag tŷ ti jāvānh kŷ nýtĩn kŷ tóg ag mŷ vĩ há tāvĩ han ke mũ sir, ha vemnĩ,” he tóg, Jesus ti.

³⁹ “Kŷ tag to jykrén nĩ, ha mẽ. Inh kătĩg măn ke vŷ ũ tŷ nén ũ pigju(g) tĩ kătĩg ri ke nĩnh mũ. Ũ tŷ ti ĩn krĕm nĩ ĕn pi(jé) ki kanhró nĩ, hora kā ti kătĩg ke mũ ti. Ũ tŷ ti tŷ nén ũ péju sór mũ tóg ĕn ge nĩ, ha mẽ. Ti tŷ ti kătĩg ke hora ki kanhró nĩ (hã) ra tóg ā kanĕ fān mũ vĕ, ti tŷ ti ĩn kāra rā tũ nĩ jé. Hã ra tóg ki kagtĩg nĩ.

40 Ge ti nĩ, inh kãtĩg mãn ke ti. Vẽnh ki rĩr, vẽnhi ki ãmẽ. Ëprã ke fi kósin vỹ kãtĩg ke mũ, ãjag tỹ ti kãtĩg ke to jykrén tũ (hã) ra,” he tóg, Jesus tí.

Ûn camarada to comparaçãu
(Mt 24.45-51)

41 Kĩ Pedro vỹ ti mỹ: “Senhor,” he mũ. “Ã tỹ ù mỹ ke nẽ, ã tỹ tó ja tag tí? ã tỹ ù tỹ ã ki ge tũ ag mỹ ke mỹ, ãg mỹ ke mỹ vó?” he tóg, Pedro tí, Jesus mỹ.

42 Kĩ ãg Senhor tóg ti mỹ: “hỹ,” he mũ. “Kejẽn patrãu tóg hẽn ra tĩg sór mũ, kũ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Û tỹ ã rãnrãj ki rĩr há han tí ãn kuprẽg tóg mũ, ti tỹ ag mỹ vỹjẽn ven jé, vỹjẽn ke horan ki.

43 Ti tỹ ag ki rĩr há han kũ ti patrãu vỹ ti mỹ vĩ há han ke mũ, ti kãtĩg mãn kũ, ù tỹ ag ki rĩr há han mũ ãn mỹ.

44 Tỹ pã'i mág han jé tóg ke mũ, ti tỹ ti tũ ki rĩr kãn jé sir. Ki hã sóg ke mũ, ha mẽ.

45 Ti camarada ãn jykre kórẽg nĩn kũ tóg vẽnhi mỹ nĩ jãvo, ha mẽ. To jykrén kũ tóg: “ãg patrãu vỹ kãtĩg vãnh han mũ,” he mũ. Kũ tóg ã mré camarada ag vóg kónãn kũ ag mrãnmrãn mũ sir, fag ke gé. Kũ tóg jatun mỹ jẽn mág han mũ, ùn kronkron tí ag mré tóg kronkron kũ pãpãv tí nĩ gé sir.

46 Kũ ti patrãu vỹ ti kãnhmỹ jun ke mũ, ha vemnĩ, ti tỹ ti jun ke kurã ki kagtĩg nĩn kũ, ti hora ti ke gé, kũ tóg ti vóg kónãn ke mũ gé sir, ti patrãu tí, kũ tóg tí fón ke mũ, Topẽ vỹ mranh tí ag mré hã,” he tóg.

47 “Topẽ camarada ù vỹ ã patrãu kãtĩg ken jo ki rĩr há han tũ nĩgtĩ, ti patrãu tỹ ti mỹ tó mũ ra. ã

patrão vī ki króm tũ ti nĩgtĩ. Ti mrãnmrãn mág jé tóg ke mũ, ti patrão ti, Topẽ ti.

48 Û tóg ã tỹ nén han ke mẽ ja tũ nĩ, ti patrão vī ti, ti camarada ù ti. Hã ra tóg kórég han mũ gé. Kỹ ti patrão tóg ti mrãnmrãn ke mũ gé. Ti mrãnmrãn sĩ han jé tóg ke mũ jãvo. Û tóg vènh kanhrãn mág han tĩ. Kỹ Topẽ tóg vènh jykre há tãvĩ ve sór mũ sir, ti tỹ ki kanhrãn mág han mũ ãn to. Û mỹ ti vĩ mág tĩ, Topẽ ti, kỹ tóg ti tỹ ki króm há han ve sór mũ gé sir,” he tóg, Jesus ti.

*Û tỹ Jesus tugrĩn ãg kato tẽnħ ke
(Mt 10.34-36)*

49 “Ga kri inh mur, isỹ re pũr tĩg ri ke han jé, hã vỹ: ùn e tỹ inh ki ge mũ, he mũ. Sỹ re pũr tĩg ri ke ãn venh há tóg tĩ, hã ra tóg ver gru tũ nĩ.

50 Ti grug to hã sóg vèsỹrénh ke mũ. Iser ke vè, kỹ tóg inh mỹ e tĩ. Sỹ ve jãvãnh tóg tĩ, inh vèsỹrénh ke ti,” he tóg, Jesus ti.

51 “Ãjag hỹn iso: “vènh kar tỹ jagnẽ to há han jé tóg ke mũ,” he tĩ. Hã tũ vè. Û tỹ hẽn ri ke tỹ jagnẽ kato tẽ han jé sóg ke mũ, ha vemnĩ.

52 Ha vé, ãn pir krêm ke fag vỹ jagnẽ kato tẽnħ ke mũ. Ûn tãgtũ fag vỹ ùn régre fag kato tẽgtẽnħ mũ ha. Kar ùn régre ãn fag vỹ ùn tãgtũ fag kato tẽgtẽnħ mũ gé sir.

53 Jagnẽ kato fag jagnẽ to jũgũnh mũ. Û tóg ã kósın kato tẽnħ ke mũ, kỹ ù tóg kejẽn ã panh kato tẽnħ ke mũ gé. Û fi vỹ ã kósın fi kato tẽnħ ke mũ, kỹ fi vỹ ã mỹnh fi kato tẽnħ ke mũ gé. Kỹ ù tóg ã má fi kato tẽnħ ke mũ, kỹ fi tóg ã jamré kato tẽnħ ke mũ gé sir. Ge ti nĩgtĩ,” he tóg, Jesus ti.

*Jesus jykre ki kanhrãn
(Mt 16.2-3)*

⁵⁴ Kÿ tóg vënh kar mÿ tó mãn mÿ gé, kÿ tóg ag mÿ: “kanhkã ve kÿ ãjag tóg ta ki kanhró nÿtĩ,” he mÿ. “Kanhkã góg tÿ tãtã kãtĩn kÿ ãjag tóg: “ta vÿ kutënh mÿ,” he tĩ. Ki kanhró ãjag tóg nÿtĩgtĩ.

⁵⁵ Kar ãjag tóg kãka ki kanhró nÿtĩ gé. “Tag tán kãtĩ mÿ, kãka ti, kÿn hÿn jÿ jagy nÿnh mÿ, ha vemnĩ,” he ãjag tóg tĩ gé.

⁵⁶ Ki kanhró ãjag tóg nÿtĩ, ta jykre ti, kãka jykre ti, ga jykre ti ke gé. Hã ra ãjag tóg inh jykre ki kanhrãnrãn sór tũ nĩ, sÿ ùri ãjag mÿ tó mÿ tag ti. Kutu ãjag nÿtĩ, ha mẽ, hã kÿ ãjag tóg ki kanhrãnrãn sór tũ nĩ,” he tóg, Jesus ti.

*Ëg tÿ jagnë mÿ vënh pãte fón
(Mt 5.25-26)*

⁵⁷ “Kÿ ãjag tóg vënh jykre kuryj to jykrén tũ nĩ gé, ãjag tÿ jagnë mÿ vënh pãte fón jé, ãjag tÿ ver ga kri mÿn kÿ.

⁵⁸ Kejën ãjag tóg jagnë mÿ vënh jykre vënhmÿ tó tĩ. Kÿ ãjag tóg pã'i mÿ tónh mÿ sir. ã tÿ ù to jÿ mÿ ãn vÿ ã tónh tÿg sór mÿ. Ti tÿ pã'i tá jun ke to hã ti mré vÿmñ. Ti mÿ: “inh mÿ vënh pãte fón,” hemnĩ. Ke tũ nĩ mÿ ra pã'i vÿ ã jykre pãno venh ke mÿ, kÿ tóg polícia mÿ: “ti se ra,” henh ke mÿ. Kÿ tóg ã senh ke mÿ sir.

⁵⁹ Ha mẽ, tá ã kãnhmar kãkutë mãn ke tũ nĩ. ã tÿ kajãm kãn kar kÿ ã hën ri ke mÿn tá kãkutë mãn ke mÿ sir,” he tóg. Jesus tÿ ãg tÿ jagnë mÿ vënh pãte fón kãmén hã vë.

13

Ĕg tỹ ěg jykre tovānh ke

¹ Kejĕn ũ ag tóg Jesus tá junjun mũ, hã ra ag tóg ti vỹ mẽ kỹ nỹtĩ. Kurã ěn kã ũ ag tóg ti mỹ Galilėia tá ke ag tóg ja nĩ, fóg tỹ pã'i tỹ Pilatos tỹ ũn kãgtén ja ěn ag. Topĕ mỹ ag tóg ājag mĕg tãnh ja nĩ, ti mỹ pũn jé, hã ki Pilatos tóg ag kygrĕn ja nĩ, hã kỹ ag kyvénh tóg ājag mĕg kyvénh mré kutĕ ja nĩ. Hã kãmén ag tóg, Jesus mỹ, ti tỹ ag mỹ e tĩn kỹ, ag tỹ ũn kãgter mũ ag to: “ag hỹn Topĕ vỹ mranh mág,” hen kỹ.

² Kỹ Jesus tóg ag mỹ: “ājag hỹn Galilėia tá ke ěn to jykrén sór mũ, ũn kãgter mũ ěn ag to,” he mũ. “Topĕ vỹ mranh mág tĩ ag vĕ,” he ājag tóg mũ ag to. “Ag hỹn vĕnh jykre pãno han mũ nĩ, ag hỹn Galilėia tá ke ag jykre pãno kãfór han mũ nĩ, hã kỹ Topĕ hỹn tóg ag vóg kónãn mág,” he ājag tóg tĩ ag to.

³ Ke tũ vĕ hã ra. Ājag ri ke ag tóg nỹtĩ, mỹr, ha mẽ. Ājag tỹ ājag jykre tovānh tũ nĩn kỹ ājag tóg nũgme ki vár ke mũ, ha vemnĩ,” he tóg.

⁴ “Ũ tỹ 18 (ke) ěn ag to jykrén nĩ, ũ tỹ goj tỹ Siloé tá kãgter mũ ěn ag. Īn téj ěn tóg ag kri kutĕ, ĩn vag jĕ ěn ti, hã kỹ ag kãgter mũ. Jerusalém tá ke kar ag jykre ri ke ja ag tóg nỹtĩ. Ag pi(jé) ag jykre pãno ěn kãfór ja nỹtĩ'. Ag ri ke han ja ag nỹtĩ, ha mẽ.

⁵ Kỹ sóg ājag mỹ ke mũ. Ājag tỹ ājag jykre pãno tovānh tũn kỹ ājag tóg nũgme ki vár ke mũ,” he tóg, Jesus ti.

Ka tỹ figueira to comparação

⁶ Kỹ tóg ag mỹ: “ũ tỹ Topĕ jykre han sór tũ ag vỹ ge nỹtĩnh mũ, ha mẽ,” he mũ. “Kejĕn ũ tóg nĩgtĩ. Ka há krãn ja tóg nĩgtĩ, ka tỹ figueira. Ka kanĕ ũ vĕ, ko

há ti jě. Ěn krān ja tóg nĩ. Uva kāmĩ tóg ti krān ja nĩ. Kĩ tóg kejěn ti kaně ko sór mũ, kĩ tóg venh kātĩ mũ. Hã ra tóg kaněn ja tũ nĩ.

⁷ Kĩ tóg uva ki rĩr tĩ mĩ: “ti gỹn ra,” he mũ. “Prỹg tãgtũ tóg nĩ ha, sỹ ti kaně vég tũ ki. Kaněn vānh ti hỹn jě. Ti gỹn ra, ti tỹ ga kókég tũ nĩn jé,” he tóg.

⁸ Hã ra tóg ã patrão mĩ: “ti tovānh ra ver,” he mũ, uva ki rĩr tĩ ti. “Ti pénĩn sóg kũm mũ ver, sỹ ti krēm ga jěgja han jé ver.

⁹ Hěn ri ke mũn tóg kaně há hyn han ke mũ ha. Ke tũ nĩn kĩ sóg ã mĩ ti gỹn ke mũ vāhã,” he tóg mũ, uva ki rĩr tĩ ti,” he tóg, Jesus ti. Ti tỹ ũ tỹ ã jykre kórég tovānh sór tũ tón hã vē.

Jesus tỹ vēnhkán ke kurã ki ũn kaga tỹ há' he

¹⁰ Kejěn tóg ag vēnh kanhrān jafã krēm ag kanhrān mũ, Jesus ti, vēnhkán ke kurã ki.

¹¹ Kĩ ũ fi tóg tá jě nĩ. Jagrě kórég fi nĩ, hã kĩ fi tóg pānh ke kĩ jě nĩ. Vēnh ra hã jě kórég fi tóg nĩ, fi jagrě tugnĩn. Prỹg tỹ 18 (ke) han fi tóg, fi jagrě tỹ fi kagãg tĩ ki.

¹² Kĩ Jesus tóg fi vég mũ, kĩ tóg fi jé prěr mũ. “Kunĩg, jỹ,” he tóg. “Ā kaga tỹ sóg tũ' henh mũ,” he tóg fi mĩ.

¹³ Kĩ tóg ã nĩgé tỹ fi kri fig mũ. Kĩ fi tóg vēnh ra hã jěg há han mũ, ha mẽ. Kĩ fi tóg Topě to vĩ há han mũ sir.

¹⁴ Hã ra vēnh kanhrān jafã to pã'i tóg Jesus to jũ mũ, ti tỹ vēnhkán ke kurã ki fi tỹ há' hen kĩ. Ti mĩ tóg tỹ vēnh rānrāj nĩ, fi tỹ há' he mũ tag ti, hã kĩ tóg Jesus to jũ mũ. Kĩ tóg vĩ mũ sir. Vēnh kar jyvěn kĩ tóg ag mĩ: “kurã tỹ 6 (ke) hã ki ěg tóg rānrāj ke mũ ha,” he mũ. “Hã kĩ kurã tỹ 6 (ke) ěn ki kāmũmnĩ, ti

tỹ ãjag tỹ há' hen jé. Věnhkán ke kurã ki věnh kygtãg kãmũ tũg nĩ,” he tóg mũ, pã'i ti.

15 Hã ra Jesus tóg ti vĩ kãfãn mũ, kỹ tóg: “jykre régre ã nĩ (mỹr),” he mũ. “Věnhkán ke kurã kã ãjag tóg ãjag mễg ki rĩr tĩ gé, monh ki, cavalo ki ke gé, ha mẽ. ãjag mễg kygvãn ãjag tóg tĩ, ãjag tỹ ti kron mũn jé, ti tỹ ãn kãkã se kỹ jẽ kỹ, cocho to.

16 Kỹ tag fi vĩ se kỹ jẽ ẽn ri ke jẽ ja nĩ gé, ha mẽ. Satanás hã vĩ fi sé', prỹg tỹ 18 (ke) ki. Ęg jóg'jóg ve tỹ Abraão kósin ũ fi vễ, ẽn mễg kãfór fi tóg jẽ, hã ra ã tóg jũ sór mũ, isỹ vễnh kán ke kurã ki fi tỹ há' hen kỹ, isỹ fi kavãn ri ke han kỹ. Věnh jykre vễnhmỹ han sór ã tóg nĩ,” he tóg, Jesus ti, pã'i ti mỹ.

17 Ti vĩ tag to ag tóg mỹ'ãg'ãg mũ sir, ti kato tẽ mũ ag. Hã ra tóg vễnh e ẽn mỹ sér tĩ sir. Ag mỹ tóg nén ũ kar há han tĩ, hã kỹ tóg ag mỹ sér tĩ sir.

Mostarda fy to comparação

(Mt 13.31-32; Mc 4.30-32)

18 Kỹ Jesus tóg ag mỹ: “Topẽ tỹ tỹ ẽn pã'i nĩnh ke vĩ ge nĩ, ha mẽ,” he mũ.

19 “Vãnh tỹ mostarda fy ri ke ti nĩ. Sĩ ti nĩ, ti fy ti. Ęg japỹ ki ẽn tóg krãn tĩ, kỹ tóg mog tĩ. Kỹ tóg ka ri ke nĩ, ti tỹ pẽ téj nĩn kỹ. Hã kỹ sêsĩ tóg kri jagfẻnh ke mũ, ti pẽ kri, ti pẽ mág nĩn kỹ. Topẽ tỹ tỹ ẽn pã'i nĩ kãmẽ tỹ vễnh kar kri rũm ke to ken hã vễ,” he tóg, Jesus ti.

Fermento to comparação

(Mt 13.33)

20 Kỹ tóg ag mỹ: “Topẽ tỹ tỹ ẽn pã'i nĩn kỹ tóg tag ri ke nĩnh mũ, ha mẽ,” he mãn mũ.

21 “Ûn týtá fag vỹ pão han tĩ, farĩnh tỹ. Pão han jé fag tóg pão jégja jafã tỹ fermento ěn tỹ farĩnh mré jégjãg tĩ. Kejěn ũ fi tóg farĩnh e kãki ti jãgja jafã pir tỹ kãki vãm ja nĩ, hã ra tóg tỹ sòn ke kãn,” he tóg, Jesus ti. Ti vỹ tỹ věnh kar kri rũm ke kãměn hã vě.

Jãnkã sĩ to comparação
(Mt 7.13-14, 21-23)

22 Kỹ Jesus tóg tĩ mũ. Cidade e fĩn rãm tóg mũ, ěmã kãsir fĩn ke gé. Tĩg kỹ tóg ag kanhrãnrãn mũ sir. Ge kỹ tóg koměr hã cidade tỹ Jerusalém kukãm tĩ mũ.

23 Kỹ ũ tóg ti mỹ: “Senhor’,” he mũ. “Ûn krenkren mũ ag mỹ pipir nýtĩ, e nýtĩ vó?” he tóg ti mỹ. Kỹ tóg ti mỹ:

24 “hỹ,” he mũ. “Inh ki rã vỹ jãnkã sĩ ra rã ri ke nĩ,” he tóg. “Vãsãn nĩ, ã tỹ ra rã jé. Kejěn ũ tóg ra rã mãn ke tũ nĩ ha. ěn kã ũ tỹ hěn ri ke ag vỹ ra ge sór mũ, hã ra ag tóg tỹ hě ri kenh ke tũ nĩ ha sir.

25 ĩn ki rĩr tĩ ěn tỹ nĩfénh ja vě mỹr, hã kỹ ag tóg ĩn kãra genh ke tũ nĩ ha. Kanhkã to ken hã vě, ĩn ti. ĩn ki rĩr tĩ ěn hã ne nĩfénh ke mũ’, kỹ ãjag tóg sir re tá nýtĩnh kỹ tỹ tórón’ tórón’ kenh ke mũ. “Senhor’, ěg mỹ róm, ěg mỹ nón, jãnkã ti,” he jé ãjag tóg ke mũ. Hã ra tóg sir ãjag mỹ: “ãjag ki kagtĩg sóg nĩ,” henh ke mũ, ĩn ki rĩr tĩ ti. “Ãjag tỹ ũ nýtĩ?” he jé tóg ke mũ.

26 Kỹ ãjag tóg ti mỹ: “ã mỹ ěg ki kagtĩg?” henh ke mũ. “ěg hã vỹ ã mré jěn ja nĩ, ěg hã vỹ ã mré kron ja nĩ, ěg kanhrãn ja ã tóg nĩ, ěg jamã tá. ěg hã vě,” he jé ãjag tóg ke mũ, ãjag tỹ re tá nýtĩn kỹ.

27 Hã ra tóg ãjag mỹ: “inh pi(jé) ãjag ki kanhró nĩ’,” henh ke mũ. “Ãjag pi(jé) tỹ inh mré ke nýtĩ’. Ha

mũjĕg. Vĕnh jykre pãno han ãjag tóg mũgtĩ,” he jé tóg ke mũ, ãn ki rĩr tĩ ti, ãjag mũ.

28 ãjag tỹ ra mũnh ke tá ãjag tóg vĕsỹrénh ke mũ, tá ãjag jã tóg gyngyn ke mũ, gangan ke jé ãjag tóg ke mũ, tá. Kór há tá ãjag tóg Abraão venh ke mũ, tá, Isaque ke gé, Jacó ke gé, Topĕ vĩ tó tĩ ag kar ke gé. Ĕn ag kar vĩ Topĕ tỹ tỹ ĕg pã'i nĩ venh mũ sir, ãjag jãvo.

29 Ĕn kã Topĕ ki ge kỹ nỹtĩ kar ag tóg kãmũnh mũ, rã jur ja tá, rã pur ja tá, kanhkã fyr tá, rã krĕm tĩg ja tá. Kãmũ kỹ ag tóg Topĕ tỹ tỹ ĕg pã'i nĩ venh ke mũ, ti tỹ ag ki rĩr nĩ ti, kỹ ag tóg tá jĕg nỹtĩnh mũ ãjag jãvo.

30 Kỹ tag ki ãn kãsir ù ag tóg mág nỹtĩnh mũ, tá pã'i nỹtĩnh mũ. Kỹ tag ki ãn mág ù ag tóg kãsir nỹtĩnh mũ gé, tá, tére kỹ,” he tóg, Jesus ti.

*Jesus tỹ Jerusalém tá ke ag to há nĩ
(Mt 23.37-39)*

31 Kurã ĕn kã Fariseu ù ag tóg tá junjun mũ, Jesus mré vĕmén jé. Ti mũ ag tóg: “ha mẽ,” he mũ. “Pã'i mág tỹ Herodes vĩ ã tén sór mũ. Hã kỹ vĕnh péju tĩg, ĕmã ù ra,” he ag tóg mũ sir, Jesus mũ.

32 Kỹ tóg ag mũ: “mĩg sĩ ri ke ti nĩ, Herodes ti,” he mũ. “Hã kỹ tóg ke mũ. Ver sóg vĕnh jagrĕ kórĕg pan mũ, ãn kagyga ag tỹ há' he jé sóg ke mũ, ùri, vaj kỹ ke gé, kurã tỹ hĕn ri ke ki. Kãnhmar sóg ter ke mũ, inh kurã ki, ha vemnĩ.

33 Ũri sóg ver tĩg mũ, vaj kỹ ke gé, vaj ãn kỹ ke gé. Iser ken kỹ sóg Jerusalém tá ter ke mũ. Tag ki ke pijé'. Topĕ vĩ tó tĩ vĩ tỹ inh nĩ, jo Jerusalém tá ke ag tóg ag kãgtén tĩ, Topĕ vĩ tó tĩ ag. Hã kỹ sóg Jerusalém

tá ter tīg ke mũ gé. Tag tómni, Herodes mǎ,” he tóg, Jesus ti.

³⁴ Kǎ tóg Jerusalém ki ke ag to vēmén mũ. Fe kaj han tóg, ag to, kǎ tóg: “Jerusalém tá ke ag mǎ sóg tag tó sór mũ, ha mǎ,” he mũ. “Topē vĩ tó tĩ ag kǎgtén ag tóg tĩ. Topē tǎ ag mǎ ùn jěgněg tĩ ag pin ag tóg tĩ, pó tǎ, ag tǎ ag kǎgtén jé. Isǎ ag vėnh mǎn há tóg tĩ vė, isǎ ag ki rĩr jé, Jerusalém tá ke ag, hǎ kǎ sóg ag jé prěr tǎ hėn ri ke han mũ. Garĩnh fi jykre ri ke han sór isóg mũ vė, ag mǎ. Garĩnh fi vĩ ǎ krė kri jě nĩ, fi tǎ ag vėsǎrėnh tũ nĩ jé ke vė. Ĕn ri ke han sór sóg mũ vė, hǎ ra ag tóg ke jǎvǎnh nǎtĩ.

³⁵ Hǎ kǎ ag tóg ag jamǎ pũn kǎn ke mũ, kǎ vǎpũr vė sir. Ũ vĩ kǎnhmar tá nĩg mǎn ke tũ nĩ ha, ag tǎ cidade kókén ja tá. Hǎ kǎ sóg ag mǎ ke mũ. Inh ve mǎn ke tũ ag nĩ ha (mǎr). Kejėn ag tóg iso: “Topē tǎ ti jėnė ja vė,” henh ke mũ. “Topē vĩ ti ve há han, ti tǎ ti jiji tó kǎtĩg kǎ,” he jé ag tóg ke mũ iso. Ĕn hǎ kǎ ag tóg inh ve mǎn ke mũ,” he tóg, Jesus ti.

14

Jesus tǎ vėnhkán ke kurǎ ki ù tǎ há' he

¹ Kejėn tóg vėnhkán ke kurǎ tá krǎg mũ. Kǎ tóg pǎ'i ù ĩn krėm nĩ nĩ. Fariseu ag pǎ'i vė. Ti tǎ ti ĩn krėm jėn ke vė. Hǎ ra ag tóg tá ti tǎ rĩr mũ, “ti mǎ vėnhkán ke kurǎ ki rǎnhrǎj ke tũ?” he ag tóg mũ.

² Hǎ ra ù tóg tá nĩ gé, ùn kaga ù. Kǎnhpar kǎn kǎ tóg jė. Jesus rĩn ja tá tóg jė nĩ.

³ Kǎ Jesus tóg Topē vĩ to professor ag mǎ ke mũ, Fariseu ag mǎ ke gé. Ag mǎ tóg: “ėg tǎ vėnhkán ke kurǎ kǎ ù tǎ há' hen mǎ há nĩ, mǎ kórėg nĩ vó?” he mũ.

4 Hã ra ag tóg ti mý nén ù tó tũ nĩ. Kĩ Jesus tóg ùn kaga ên kri ã nĩgé fi kũ ti tỹ há' he mũ sir. Kĩ tóg ti mý: “ha tĩg ge,” he mũ.

5 Kĩ tóg ag mý: “kejẽn ãjag kósin ù tóg goj ki kutẽnh mũ,” he mũ, “goj nig ki, ke tũ nĩn kũ ãjag mẽg tỹ monh. Vẽnhkán ke kurã ki tóg goj ki kutẽnh mũ, hẽn ri ke mũn. Kĩ ãjag tóg ti kunũg tĩ gé, ti tỹ vẽnkhán ke kurã kã ki kutẽn kũ. Kĩ ãjag tỹ ne jé iso jũ sór nẽ?” he tóg.

6 Kĩ tóg ag tỹ ti mý nén tónh ke tóg tũ tĩ sir.

Festa to comparaçã

7 Kĩ Jesus tóg vẽn kar kanhrãn jé tag tó mũ sir, ha mẽ. Ti mré jẽgjẽn kũ nỹtĩ ag mý tóg kãmén mũ. Ag jẽn vén sór vẽ, ag tỹ tỹ ùn mág nỹtĩ jé. Hã vég tóg mũ, hã kũ tóg ag kanhrãn rãn sór mũ, Jesus ti.

8 Kĩ tóg ag mý: “kejẽn ù tóg ãjag mý: “kurã ên kã sóg vẽn prũg ke to festa han ke mũ. Ha inh mré jẽn kãtĩg,” henh ke mũ. Kĩ ti festa kã jẽn vén sór tũg nĩ. Hẽn ri ke mũn ã kãfór nĩ ù tóg ki jun mũ.

9 Kĩ festa ki rĩr mũ tóg ã mý: “toreg ver’,” henh ke mũ. “Ti jẽn kar kũ ã tóg jẽn ke mũ. Mẽ kũ jẽ nĩ ver,” he jé tóg ke mũ ã mý, ù tỹ festa ki rĩr tĩ ti. Kĩ tóg ã mý'a tĩnh mũ sir, ha mẽ.

10 Kĩ ã tỹ festa venh tĩg kũ mẽ kũ nĩmnĩ ver, vẽn jãvãnh kũ. Kĩ festa ki rĩr mũ vỹ ã mý: “ha jẽn vén, fag mré,” henh ke mũ. Kĩ ã pi(jé) mý'ãg ke mũ,” he tóg ag mý, Jesus ti.

11 “Hã kũ tóg ù tỹ ag kãfór nĩ sór mũ térem ke mũ, vẽn sũkã, Topẽ ti, ha vemnĩ. Jãvo tóg ù tỹ: “tỹ inh ùn sũ nĩ,” he mũ ên jãnfyn ke mũ, ha vemnĩ,” he tóg, Jesus ti.

Ëg tỹ ùn jagtar ag jagãgtãn

12 Kĩ tóg ù tỹ ã kógfyn mũ ên mỹ kãmén mũ gé. Ti mỹ tóg: “ã tỹ festa han sór kỹ ùn rico ag mỹ tó sór tũg nĩ, ã mré ke fag mỹ, ã kãke ag mỹ, ã jãvy ag mỹ, ã rã nỹtĩ ag mỹ tó tũg nĩ gé,” he mũ. “Ã tỹ ùn rico ag mỹ tó mũ ra ag tóg vãnh kaja jé ã mỹ festa han sór mũ gé. Kỹ ã tóg ã festa kaja ti vég mũ sir, êprã.

13 Æ tỹ festa han sór kỹ ùn kaga kỹ rãnhraj vãnh ag mỹ tómnĩ, ùn kãnhgrĩ ag mỹ, ùn kyvó ag mỹ.

14 Æ tỹ tag han kỹ Topẽ vỹ ã ve há han ke mũ, ha vemnĩ. Æ mỹ ag tóg festa han ke tũ nĩ, ag tỹ nén ù tũ nĩn kỹ. Kỹ ã tóg ã rĩr mãn ken kỹ ti kaja venh ke mũ, Topẽ tỹ ùn jykre kuryj kar rĩnrĩr mãn ke kurã ên kã,” he tóg, Jesus ti.

*Festa mág to comparação
(Mt 22.1-10)*

15 Kĩ tóg tá nĩ ù mỹ mẽ há tĩ, Jesus vĩ tag ti. Tá nĩg kỹ tóg ag mré jêg mũ gé, hã kỹ tóg Jesus vĩ mẽg mũ. Kỹ tóg ti mỹ: “ũ tỹ Topẽ tỹ tỹ êg pã'i nĩ vég mũ mỹn hỹn sér pẽ tĩnh mũ, ù tỹ tá festa vég mũ ên mỹ,” he mũ.

16 Kỹ Jesus tóg ti kanhrãn kỹ ti mỹ: “kanhkã tá festa vỹ ge nĩnh mũ, ha mẽ,” he mũ. “Kejên ù tóg nĩgtĩ. Festa mág han sór tóg mũ, kỹ tóg ù tỹ hên ri ke ag mỹ tó ja nĩ, ti tỹ festa han ke to hã.

17 Ti festa kurãn kã tóg ã camarada jênêg mũ, ti tỹ ùn kógfyn kỹ nỹtĩ ag mỹ: “ha kãmũjêg,” he jé. “Kar kỹ tóg nĩ ha, inh festa ti,” hemnĩ,” he tóg, ã camarada mỹ. Kỹ tóg ag mỹ tónh tĩ mũ sir.

18 Hã ra ag tóg ve sór tũ nĩ, ag kar ti, hã kỹ ag tóg ti mỹ vĩ mũ. Û tóg ti mỹ: “ga kajãm inh,” he mũ. “Hã kỹ sóg ijapỹ venh tĩ mũ ver. Ûri tóg inh mỹ vẽnhmỹ

tĩ. Sỹ festa venh tĩg ke vễ vễ, hã ra tóg vễnhmỹ tĩ,” he tóg mũ.

¹⁹ Kĩ ù tóg ti mỹ: “monh génh sóg, monh tỹ 5 (ke) régre,” he mũ gé. “Kỹ sóg ag venh tĩ mũ ver. Sỹ festa venh tĩg ke vễ vễ, hã ra tóg vễnhmỹ ti,” he tóg mũ gé sir, ù ti.

²⁰ Kĩ ù tóg ti mỹ: “ũri sóg prũg mũ ha, hã kĩ tóg vễnhmỹ tĩ,” he mũ gé.

²¹ Kĩ ti camarada tóg ti mỹ tónh kãtĩ mũ, ã patrão mỹ. Kĩ tóg jũ mũ. Ti mỹ tóg: “ẽpry ra tĩg, ẽmĩn mág ra, ẽpry kãsir ra ke gé, ẽmã kar ki,” he mũ. “Kỹ ùn jagtar ag tatĩ kãtĩg, ùn kónhgrĩ ag, ùn kyvó ag, ùn tĩg vãnh ag ke gé,” he tóg. ã camarada mỹ tóg ke mũ.

²² Kĩ tóg tĩg mãn mũ, ti camarada ti. Kĩ tóg tá vỹn ke kĩ ã patrão mỹ: “ke kãn inh huri,” he mũ. “Ag tatĩ kãtĩg inh huri, hã ra tóg fór tũ nĩ ver, festa jo ãn ti,” he tóg mũ, ti camarada ti, ti patrão mỹ.

²³ Kĩ ti patrão tóg ti mỹ: “vễsỹkã tĩg mãn ge,” he mũ. “Vãnh kãmĩ tĩg, ẽmã kãsir pẽ kãmĩ ke gé, ẽpry ra, ẽmĩn jagma,” he tóg. “Tá ag mỹ tugtónh tĩg. Ag kutãn nĩ, ag kãmũ jé, festa jo ãn fór jé,” he tóg, patrão ti, ã camarada mỹ,” he tóg, Jesus ti.

²⁴ “Hã kĩ sóg ãjag mỹ ke mũ,” he tóg. “Ủ mỹ sóg tó vén ja nĩ, hã ra ag tóg inh festa venh ke tũ pẽ nĩ, sỹ ù mỹ tó vén ja ag,” he tóg. Jesus tỹ Fariseu ag mré jẽn kĩ ag mỹ kãmén hã vễ.

*Êg tỹ ẽg jykre tovãnh
(Mt 10.37-38)*

²⁵ Kejẽn ùn e ag tóg Jesus nón mũ mũ. Kĩ tóg ag jé vĩrĩn ke kĩ ag mỹ:

²⁶ “ha mẽ,” he mũ. “Ủ tỹ inh mré tĩg pẽ han sór mũ jé inh hã to há kãfór nĩ, ã han mũ fag kri, ti prũ

fi kri, ti krē kri, ti kãke ag kri, ti jãvy ag kri, ti ve fag kri, vėnh kri ke gé, mÿr, ha mẽ,” he tóg. “Ke tũ nĩ mũ ra tóg inh mré kãtĩg ke tũ nĩ, kÿ tóg tÿ inh mré ke nĩnh ke tũ nĩ gé.

²⁷ Ha vé, ag tÿ inh cruz tÿ inh kri fi kÿ sóg tĩg ke mũ, ag tÿ to isa kÿ isén jé, ha vemnĩ. Vėnh nenh ke tũ sóg nĩ. Û tÿ inh ri ke han sór tũ nĩn kÿ tóg inh mré kãtĩg ke tũ nĩ, kÿ tóg tÿ inh mré ke nĩnh ke tũ nĩ gé,” he tóg, Jesus ti,

²⁸ “To jykrén, ù tÿ ĩn téj han sór mũ ĩn to. Ti tÿ ĩn téj han sór kÿ tóg ã jãnkamy nĩkrén vén ke mũ. Kÿ tóg ĩn kaja to jykrén ke mũ gé sir. Kar kÿ tóg ĩn han sór ke mũ vãhã.

²⁹ Ti tÿ to hã to jykrén há han tũ ra tóg vėnhmÿ tĩ. Kÿ tóg ĩn jėg ken ki kũm kÿ ti króggróg han ke mũ sir. Ti króggróg han kÿ ti jãnkamy tóg tũ' henh ke mũ, kÿ tóg tovãnh ke mũ sir, ti tÿ ĩn han ti. Kÿ ti mré ke ag tóg ti to vĩ kÿ ti nynh mũ sir.

³⁰ Ti to ag tóg: “ha mẽ, ĩn téj han sór tóg mũ vė, hã ra tóg to jykrén há han ja tũ nĩ, hã kÿ tóg kar tũ nĩ,” henh ke mũ, ti régre ag,” he tóg.

³¹ “Kar pã'i mág to jykrén nĩ gé. Pã'i ù tÿ ti mré vėnh génh sór kÿ tóg ã krēm ke ag nĩkrén ke mũ gé sir, vėnh génh ke to hã. “10 mil (ke) ěg nÿtĩ,” he jé tóg ke mũ. “Ĕg mÿ ag tÿ hėn ri kenh mũ vÿ?” he jé tóg ke mũ. “20 mil (ke) ag nÿtĩ. Ag mÿ ěg tÿ tũ' he kãn ke tũ nĩ vÿ? Ĕg kãfór ag tóg nÿtĩ. Ĕg hÿn hė ri kenh mũ, ag tÿ ěg tovãnh jé?” he jé tóg ke mũ, pã'i ti.

³² Ti tÿ tag to jykrén kÿ tóg pã'i ù ĩn mÿ vėnh vĩ jėnėnh mũ, ti tÿ kór há tá nĩ (hã) ra, kuvar há tá. Ti mÿ vėnh vĩ jėnėn kÿ tóg ti mÿ: “ã mÿ ěg tovãnh ke

tũ nĩ'?" he mũ. "Inh ã mỹ ne nĩm mũ, ã tỹ isovãnh jé?" he jé tóg ke mũ, pã'i ên mỹ," he tóg, Jesus ti.

³³ "Hã kỹ to jykrén nĩ, ãjag tỹ inh mré mũ pẽ han ke to. Iso há kãfór nỹtĩmnĩ, ãjag tũ kar kri. Ke tũ nĩ mũ ra ãjag pi(jé) inh mré mũ pẽ han mũ'," he tóg, Jesus ti.

Sa to comparação

(Mt 5.13; Mc 9.50)

³⁴ "Sa vỹ há nĩ. Hã ra sa kãhór tĩn kỹ ãg tỹ ne tỹ ti tỹ kajã' henh ke tóg tũ tĩ, tỹ sa' he mãn ke tũ tóg tĩ," he tóg.

³⁵ "Ti kãhór tĩn kỹ tóg kórég nĩ, kỹ ãg tóg fón tĩ. Ëg pi(jé) ãg japỹ ki ti fón tĩ', ti tỹ ãg jakré tỹ há' he tũ nĩn kỹ, sa kãhór ti. Ti fón pẽ han jé ãg tóg ke mũ. Ri ke ãjag nỹtĩ, ãjag tỹ inh mré mũ pẽ han tũ nĩn kỹ. Jẽmẽ há han nĩ, sỹ ãjag mỹ nén tó mũ tag ti," he tóg, Jesus ti.

15

Ovelha vãfor to comparação

(Mt 18.12-14)

¹ Kejẽn ù tỹ imposto mãg tĩ ag tóg ti to kãmũ mũ, Topẽ vỹ mranh tĩ ag ke gé. Ag tỹ ti vỹ mẽ sór vỹ.

² Kỹ tóg Fariseu ag mỹ kórég nỹ, Topẽ vỹ to professor ag mỹ ke gé. Kỹ ag tóg ti to vỹ vỹ he mũ sir. "Topẽ vỹ mranh tĩ ag to tóg há nĩgtĩ, tag ti," he ag tóg mũ. "Ag mré tóg jẽg tĩ mỹr," he ag tóg mũ, Jesus to.

³ Kỹ tóg ag kanhrãn jé ag mỹ: "ũ tỹ Topẽ vỹ mranh mũ tỹ ã jykre kórég tovãnh kỹ tóg ge nỹnh mũ, ha mẽ," he mũ.

4 “Û tóg nĩ ja nĩgtĩ,” he tóg. “Ti mēg tỹ mé vỹ tỹ 100 (ke) nỹtĩ, ti mēg tỹ ovelha ti. Kỹ ti mēg pir tóg vãfor mũ. Hã ra tóg ti kanēg tĩ mũ, ti jãvãnh tĩ tóg mũ, ha mẽ. Ûn e ãn tovãnh kỹ tóg ãn pir ãn nón tĩ mũ. Ga kórég tá ag nỹtĩ, ti mēg kar ãn ag. Ag togvãnh kỹ tóg ãn pir ãn nón tĩ mũ, ha mẽ.

5 Kỹ tóg ti vэг mũ sir, ti mēg vãfor ja ãn ti. Kỹ tóg ã nunh kri ti fi kỹ ma tĩ mũ. Ti fe tóg mrin ke mũ sir.

6 Kỹ tóg ã ãn tá jun mũ. Tá tóg ã kanhkã fag jé prěr mũ, ti rã hã nỹtĩ fag kar. Kỹ tóg fag mỹ tó mũ. “Inh mré ti to mỹ sér,” he tóg. “Inh mēg vỹ vãfor ja nĩ, hã ra sóg ti ve mãn mũ ha,” he tóg mũ, ã mēg to,” he tóg, Jesus ti.

7 “Hã ra tóg ge nĩ, ha mẽ. Û tỹ 99 (ke) ag tỹ vãnh jykre kuryj han kỹ tóg há tĩ sir, kỹ tóg mỹ sér tĩ sir, kanhkã tá ke ag mỹ. Hã ra tóg mỹ sér kãfór tĩ, ãn pir tỹ ã jykre kórég tovãnh kỹ, ti tỹ ã tỹ Topẽ vĩ mranh mũ ãn tovãnh kỹ, ha mẽ. Kỹ isũ ag vỹ e nỹtĩ,” he tóg, Jesus ti.

Jãnkamy vãfor to comparação

8 “Kỹ ãn tỹtã to vême vỹ ge nĩ, ha mẽ,” he tóg. “Jãnkamy tỹ 10 (ke) tỹ fi tũ nĩ, jãnkamy tỹ por dia kaja tỹ 10 (ke) tỹ. Kejẽn ãn pir tóg fi mỹ vãfor mũ, kỹ fi tóg lampião grub mũ sir. Fi ãn kãmĩ fi tóg prun kãn mũ. Ve há han fi tóg mũ, jãnkamy ãn kanēg jé, ãn péno kar mũ hã.

9 Vãhã fi tóg kejẽn ve mãn mũ sir. Kỹ fi tóg ã mré ke kar fag jé prěr mũ, fi rã hã nỹtĩ fag kar ke gé. Kỹ fi tóg fag mỹ: “inh mré to mỹ sér,” he mũ. “Inh jãnkamy vỹ vãfor ja nĩ, hã ra sóg ve mãn mũ ha,” he fi tóg mũ.

10 Hã ra tóg ge nĩ, kanhkã tá, ha mẽ. Topẽ tỹ jẽnẽ jafã ag mỹ tóg sér tãvĩ tĩ, ù tỹ ã jykre kórég to jũn kỹ, ti tỹ ã tỹ Topẽ vĩ mranh ên tovãnh kỹ, ha mẽ,” he tóg, Jesus ti.

Ûn kósin vãfor to comparaçã

11 Kỹ tóg ag mỹ tag tó mũ gé sir, ha mẽ. “Û vĩ tóg kósin régre ja nĩgtĩ,” he tóg.

12 “Kỹ ti kósin tỹ êgno tóg ã panh mỹ: “panh’,” he mũ. “Inh mỹ ùri isũ nĩm, ã tỹ inh mỹ nén nĩm ke mũ ên ti,” he tóg, ã panh mỹ. Ti tỹ to vĩnh ke tũ vễ vễ, hã ra tóg to vĩ mũ. Ge ra ti panh tóg ã krẽ mỹ ã tũ vễnh kãpãm mũ sir.

13 Kãnhmar ti kósin kyrũ tóg ã tũ mãn kỹ kór há ra, kuvar há ra tĩ mũ, ga ù ra. Tá tóg ã tũ vãm kãn mũ, nén ù kórég kar to.

14 Vãm kãn ja tóg nĩgtĩ, ti jãnkamy ti. Kỹ tóg kejẽn tá prỹg han mũ sir, ga ên tá. Kỹ kyrũ ên tóg kókĩr mũ gé.

15 Kỹ tóg tá ke ù mré vēmén tĩ mũ, ti tỹ ti mỹ vễnh rãnrãj nĩm jé. Kỹ tóg ti jẽnêg mũ, ti tỹ ti porco ki rĩr jé sir, ti safra tá.

16 Kỹ tóg porco jẽn ko sór mũ, ti kókĩr nĩn kỹ. Hã ra ag tóg ti mỹ nén ù nĩm tũg mũ, ti tỹ ko jé. Hã kỹ tóg kókĩr tãvĩ nĩ sir.

17 Kỹ tóg kejẽn krĩ há han mũ. To jykrén tóg mũ sir. “Inh panh mỹ rãnrãj tĩ ag vĩ pão mág ko tĩ. Ag mỹ tóg kén tĩ, ag jén tĩ. Jo sóg kókĩr kỹ ter ke mũ,” he tóg, kyrũ ti, ã pir mỹ nĩn kỹ.

18 “Inh jé hỹn inh panh kukãm tĩg ha,” he tóg. “Kỹ sóg ti mỹ: “panh’,” henh ke mũ. “Kanhkã tá nĩ ên vĩ mranh inh, ã vĩ ti ke gé.

19 Kÿ sóg vënhmÿ tÿ ã kósín tũ nĩ. Sÿ tÿ ã camarada nĩnh há tóg tĩ,” he jé sóg ke mũ, inh panh mÿ,” he tóg mũ, kyrũ ti.

20 Kÿ tóg tĩ mũ sir, ã panh kukãm.

Hã ra ti panh tóg kór há tá, kuvar há tá ti vég mũ, kÿ tóg ti kato tẽ mũ. Ti kato tẽ kÿ tóg ti ki póm ke mũ sir, ti ki nhun ke tóg mũ gé sir.

21 Kÿ ti kósín tóg ti mÿ: “panh’,” he mũ. “Kanhkã tá nĩ ên vĩ mranh inh, ã vĩ ke gé. Hã kÿ sóg vënhmÿ tÿ ã kósín tũ nĩ ha,” he tóg, ti panh mÿ.

22 Hã ra ti panh tóg ti mÿ: “vó, vënh pãte fón kÿ tóg nĩ,” he mũ. Kÿ tóg ã camarada ag mÿ: “kur há tâvĩ ên ma kãmũjêg,” he mũ, “ti tÿ kur tâg ra rã jé. Ti mÿ nĩgé kãnĩm ja nĩm gé. Pẽn né ên tÿ, pẽn to ró ên tÿ ti mÿ jun gé.

23 Monh tăgy ên venh mũjêg. Ti tânhrã, êg tÿ ko jé, êg fe tÿ mrin ke jé.

24 Inh kósín vÿ inh mÿ ter ja ri ke han, hã ra tóg rĩr mãn ri ke han. Vãfor ti vë vë, hã ra tóg kãtĩg mãn huri,” he tóg, ti panh ti. Kÿ tóg ag mÿ sér tĩ sir, ag tÿ festa han kÿ.

25 Hã ra ti kósín sanh tóg ti japÿ tá rãnrãj jê. Kÿ tóg vãhã tá kãtĩg kÿ ã ãn tá jun mũ. Tá jun kÿ tóg vãkyr mēg mũ, fag vënh gringrén ên ti.

26 Kÿ tóg ã camarada jé prêr mũ. Ti mÿ tóg: “festa tÿ ne nê?” he mũ.

27 Kÿ tóg ti mÿ: “ã jãvy vÿ jun, kÿ ã panh vÿ monh tăgy ên tânhrã,” he mũ. “Ti mÿ tóg sér tĩ, ti tÿ ti ve mãn kÿ. Kaga tũ tóg jê, há tóg jê, hã kÿ tóg ã panh mÿ sér tĩ,” he tóg, ti camarada ti.

28 Kÿ tóg jũ mũ sir. Kÿ tóg ãn kãra rã tũg mũ, jũ kÿ.

Kỹ ti panh tóg ti mré vēmén tĩ mũ. Ti mỹ tóg: “ĕg mré festa venh kãrã,” he mũ.

²⁹ Hã ra tóg ti mỹ: “vó,” he mũ. “Prÿg tỹ hën ri ke ki sóg ã rãnrãj ti han, ha mẽ. Inh pi(jé) ã vĩ mranh ja nĩgtĩ¹. Ge ra ã tóg inh mỹ nén ù nĩm ja tũ nĩ. Ấ pi(jé) inh mỹ cabrito fĕg tĩ¹, sỹ inh mré ke ag mỹ festa han jé.

³⁰ Hã ra ã kósin ĕn tóg jun mũ sir, jo ã tóg ti mỹ monh tăgy ĕn tãnh. Kórég ti nĩ, ã kósin ĕn ti. Ấ tũ fón kãn tóg mÿr, ùn tÿtã kórég fag to, hã ra ã tóg festa mág han mũ, ti kãtĩg kÿ,” he tóg, ti kósin sanh ti, ã panh mỹ.

³¹ Hã ra ti panh tóg ti mỹ: “vó,” he mũ. “Inh mré ã tóg jĕ nĩ, kÿ tóg inh mỹ sér tĩ. Kÿ isũ kar vỹ tỹ ã tũ nÿtĩ, mÿr, ha mẽ.

³² Hã ra festa tag vỹ há nĩ, ha mẽ. Ĕg mỹ tóg sér tăvĩ tĩ. Ấ jãvy vỹ inh mỹ ter ja ri ke han, hã ra tóg rĩr mãn ri ke han. Vãfor ti vĕ vĕ, hã ra tóg kãtĩg mãn huri,” he tóg, ti panh ti, ã kósin sanh mÿ,” he tóg, Jesus ti. Ti tÿ Topĕ kãmén hã vĕ.

16

Ĕg tỹ ĕg tũ vĕnh kãpãm ke

¹ Kÿ Jesus tóg ã mré mũ tĩ ag mỹ tag tó mũ, ha mẽ. “Kejĕn ĕprã ke ù tóg nĩgtĩ, ùn rico. Kÿ ti tũ ki rĩr tĩ tóg nĩgtĩ gé. Ti patrão mÿ név(e) nÿtĩ ag vég ti tĩ, ti mÿ, ti tũ ki rĩr tĩ ti. Kejĕn ag tóg ti camarada ĕn to vĩ mũ, ti tũ ki rĩr tĩ ĕn to. Ti lograr ke (ka) mẽ ti nĕji nĩ, ti tũ to, ti camarada ti.

² Kÿ tóg ti jé prĕr mũ, kÿ tóg ti mỹ: “ã tỹ han mũ mẽ inh,” he mũ. “Sỹ ã rãnrãj tugnÿm ke vĕ. Ki rĩr mãn ke tũ ã tóg nĩ ha,” he tóg mũ ti mÿ.

³ Kÿ tóg to jykrén mũ sir, ti camarada ti. “Inh hÿn hẽ ri kenh mũ ha?” he tóg mũ. “Inh patrão vÿ inh kutẽm, inh rãnrãj ki. Kÿ inh hÿn ne konh ke mũ ha? Inh ẽpÿ jé sóg krój nĩ. Kÿ sóg vẽn h kar mÿ: “inh mÿ nén ù nĩm, inh mÿ jãnkamy nĩm,” he sór tũ nĩ gé. Inh mÿ a tóg tĩ, sÿ ag mÿ tónh ke ti,” he tóg.

⁴ Kejẽn tóg: “ũri hã sóg ki kanhró nĩ ha, sÿ nén han ke ti,” he mũ. “Sÿ tag han kÿ ag tóg iso há nÿtĩnh mũ, kÿ ag tóg inh mÿ: “inh mré nĩnh kãtĩg,” henh ke mũ, inh patrão tÿ inh fón kar kÿ,” he tóg mũ, ti camarada kórég ti.

⁵ Kÿ tóg ù tÿ ã patrão mÿ név(e) nÿtĩ ẽn ag jé prẽr kãn mũ sir. Kÿ tóg ù mÿ: “ã név(e) hẽ ri ke nĩ?” he mũ.

⁶ Kÿ tóg ti mÿ: “azeite tÿ lata tÿ 100 (ke) ki inh név(e) jẽ,” he mũ. Kÿ tóg ti mÿ: “hÿn, ã vẽn rán ti, sÿ ã mÿ ã név(e) térem kÿ 50 (ke) rán jé,” he mũ. Kÿ tóg rán mũ sir.

⁷ Kÿ tóg ù ù mÿ: “jo ã?” he mũ gé. “Ã név(e) hẽ ri ke nĩ?” he tóg mũ gé. Kÿ tóg ti mÿ: “trigo tÿ sacco tÿ 100 (ke) ki inh név(e) jẽ,” he mũ. Kÿ tóg ti mÿ: “hÿn, ã vẽn rán ti, sÿ ã mÿ ã név(e) térem kÿ 80 (ke) rán jé,” he mũ gé. Kÿ tóg rán mũ gé sir.

⁸ Kÿ ti patrão tóg mẽg mũ, ti camarada tÿ nén han mũ ti. Kÿ tóg ti mÿ: “jykre (ka)mẽ ã tóg nĩ, kÿ ã tóg ù tÿ hẽn ri ke tÿ ã to há nĩ han, ã tÿ ag mÿ ag név(e) rem kÿ,” he mũ, ti patrão ti,” he tóg, Jesus ti.

“Kÿ hã vẽ. Û tÿ inh ki ge tũ ag vÿ ãjag tũ to jykrén há han tĩ, inhhã, ha mẽ. ãjag krĩ há kãfór han ag tóg tĩ ag tũ to jykrén ki. ãjag tÿ inh ki ge mũ ra ag tóg ãjag krĩ há kãfór han tĩ. Tÿ ag ẽprã ke nÿtĩ, hã kÿ ag tóg tag ki nén to jykrén há han tĩ,” he tóg.

9 “Hã kỹ sóg ãjag mỹ tó mũ. Ti camarada ên ri ke han nĩ, ãjag tũ tỹ ùn mỹ vãnh kãpãm nĩ, ãjag tỹ ga kri mũn kỹ. Kỹ ag tóg ãjag to há nỹtĩnh mũ. Kejên ãjag tóg ãjag tũ ré kỹ mũnh mũ. Ên kã ãjag tóg mũ há han ke mũ gé. Kỹ ãjag tóg kanhkã tá junjun ke mũ sir, ãjag tỹ ag mỹ ãjag tũ tỹ vãnh kãpãm kỹ.

10 Ủ tỹ nén ù sĩ ki rĩr há han kỹ tóg nén ù ki rĩr há han kãn ke mũ gé. Jãvo ù tỹ nén ù sĩ ki rĩr kónãn kỹ tóg nén ù ki rĩr kónãn kãn ke mũ gé sir.

11 Êg tỹ ga kri nén vég mũ vỹ kãnhmar tũ' he mũ. ãjag tỹ hã ra ga kri ãjag tũ ki rĩr há han tũ kỹ ãjag tóg kanhkã tá tỹ nén ùn tũ nỹtĩnh mũ gé.

12 ãjag tỹ êprã nén vég mũ vỹ tỹ Topẽ tũ nĩ. Ti hã mỹ ãjag tóg ki rĩr ke mũ. ãjag tỹ ti tũ ki rĩr há han tũ kỹ tóg sir ãjag mỹ ãjag tũ pẽ ên nĩm ke tũ nĩ gé, kanhkã tá,” he tóg.

13 “Ã jagrẽ régre nĩn kỹ tóg vẽnhmỹ tĩ. Ã tỹ Topẽ hã tỹ jagrẽ nĩn kỹ jãnkamy tân ên tỹ jagrẽ nĩ sór tũg nĩ. Ã tỹ jãnkamy e ve sór kỹ ti hã mĩ êkrén kỹ ti hã vỹ tỹ ã jagrẽ nĩnh mũ. Kỹ êg tóg Topẽ tỹ êg mỹ nén tó mũ ên to jykrén há han ke tũ nĩgtĩ. Ã tỹ Topẽ to há nĩn kỹ ã tóg sir ga kri rico to vãsãn sór ke tũ nĩ. Ã tỹ ga kri rico nĩ sór kỹ ã tóg Topẽ mĩ êkrég tũ nĩ, ha vemnĩ,” he tóg, Jesus ti. Ti tỹ êg tỹ ti tũ hã to jykrén há to jykrén há han ke tón hã vẽ.

Topẽ jykre

(Mt 11.12-13; 5.31-32; Mc 10.11-12)

14 Hã ra Fariseu ag tóg mềg mũ, ti tỹ nén tó mũ ti. Jãnkamy mág hã to ag tóg há nỹtĩ, rico ke sór ag nỹtĩ, Fariseu ag. Kỹ ag tóg Jesus vỹ tag mẽ kỹ ag tóg ti to é he mũ.

15 Hã ra Jesus tóg ag mÿ: “ẽprã ke ag mÿ ãjag tóg há nÿtĩ ve nÿtĩ,” he mũ. “Hã ra Topẽ vÿ ãjag tÿ nén to jykrén mũ ẽn vég nĩ. Ón kÿ ãjag tóg há nÿtĩ. Ẽprã ke kãmĩ ãjag tóg tÿ ùn mág nÿtĩ. Topẽ mÿ ãjag tóg kórég nÿtĩ jãvo, ti mÿ kavéj ãjag tóg nÿtĩ,” he tóg.

16 “Moisés tÿ ẽg mÿ Topẽ vĩ tó ja ẽn vÿ João tá krÿg, vãsÿ Topẽ vĩ tó tĩ ag tÿ ẽg mÿ nén tó ja kar ẽn ti. João tá ti krÿg, ẽg kygpég tĩ ẽn tá. João tá jun kÿ vènh ù tÿ hèn ri ke ag tóg vãsãnsãn tĩ, ag tÿ ve jé.

17 Hã ra Topẽ jykre si ẽn tóg tũ' henh ke tũ nĩ gé, Moisés tÿ ẽg mÿ nén tó mũ ẽn ti. Ga vÿ tũ' henh ke tũ nĩ. Ki króm kãn kÿ tóg nĩnh mũ,” he tóg.

18 “Ẽg prÿg kÿ tóg ge nĩ, ha mẽ. Ẽ tÿ ã prÿ fi fón kar kÿ ù fi tÿ prÿg mãn kÿ ã prÿ tũ fi vè sir. Kÿ fi mén tÿ fi fón kÿ ù tÿ fi tÿ prÿg mãn kÿ fi mén tũ vè gé sir,” he tóg, Jesus ti. Tĩ tÿ Topẽ jykre kãmén hã vè.

Û tÿ Topẽ vĩ mẽ jãvãnh ag tÿ nũgme ki vár

19 Kÿ Jesus tóg ag mÿ: “kejèn ù tóg nĩgtĩ, ùn rico pẽ,” he mũ. “Kur kaja e tu ti tĩgtĩ, ùn tánh sá, kur ha pẽ. Kurã kar ki tóg vèjèn há ko tĩ. Festa ri ke han tóg tĩ, kurã kar ki.

20 Kÿ ùn jagtar tóg nĩgtĩ gé. Ti jiji hã vÿ: Lázaro, he mũ. Vènh kaga fugfo han vãnh han tóg tĩ, kÿ tóg nÿ nĩ, ùn rico jãnkã ki.

21 Ẽn vÿ kókĩr tĩgtĩ, ã kaga to. Kÿ tóg ùn rico jèn vár ko sór tĩgtĩ, ti jèn mru, hã ra tóg ti mÿ nĩm tũg tĩ. Cachorro hã ne ti pénĩn e nÿtĩ. Vènh fugfo han vãnh ẽn tugmãn ag tóg tĩ.

22 Kejèn tóg ter mũ, ùn jagtar ẽn ti. Kÿ Topẽ tÿ jènẽ jafã ag vÿ ti va mũ mũ, ti kuprĩg ti, kanhkã ra.

Tá Abraão tóg nĩ nĩ, ěg jóg' jóg ve ti, kŷ tóg ti mré nĩ nĩ sir, ti tŷ tŷ ti krě'krě nĩn kŷ.

Kar ũn rico tóg ter mũ gé sir. Kŷ ag tóg ga kátá ti péju(g) mũ.

²³ Hã ra tóg nũgme ki kutě mũ, ti kuprĩg ti. Inferno tá ti vėsŷrénh jagy han mũ sir. Kejěn tóg kanhkã ki ěvãnh mũ, kŷ tóg tá Abraão vég mũ, Lázaro ke gé, ti tŷ Abraão mré nĩn kŷ, kuvar há tá.

²⁴ Kŷ tóg ag mŷ prěr mũ. Kŷ tóg Abraão mŷ: “!..Ijóg'..!” he mũ. “!..Abraão..!” he tóg “!..Ijagãgtãn ra..!” he tóg. “Lázaro jěně ra, ti tŷ ã nĩ(gé) juja junun mrãn kŷ inh nũně mrãn sĩ han jé. Inh mŷ tóg rŷjgy tãvĩ tĩ, pĩ kãki,” he tóg, Abraão mŷ, ũn rico ja ěn ti.

²⁵ Kŷ Abraão tóg ti mŷ: “inh kósin,” he mũ. “Ă tŷ ga kri tĩg ja ěn ki ěkré. Tá ã tóg há tĩ ja nĩgtĩ, jãvo Lázaro tóg jagtar ja nĩgtĩ. Kŷ tóg tag ki há han tĩ nĩ, jo ã tóg vėsŷrénh jě nĩ, ã tŷ ti jagãgtãn ja tũ nĩn kŷ.

²⁶ Kŷ ěg kaju ki tóg tŷ kãgnó nĩ, kŷ ũ tóg pãte rãnh ke tũ nĩ. Tag ki ke pi(jé) ěn ra tĩg mũ!, ěn tá ke pi(jé) tag ra kãtĩg mũ gé!, kãgnó tag tugrĩn’,” he tóg, Abraão ti, ũn rico ja ěn mŷ.

²⁷ Kŷ ũn rico ja tóg ã jóg tŷ Abraão mŷ: “kŷ sóg ã mŷ nén ũ tó sór mũ, ha mẽ,” he mũ. “Ă mŷ inh jóg ĩn ra ti jěněnh ke tũ? Tá inh mré ke ag vŷ nŷtĩ.

²⁸ 5(ke) ag nŷtĩ, inh mré pafa ja ag. Ti tŷ ag mŷ tónh tĩg jé, ag tŷ tag ki junjun tũ nĩ jé, ag tŷ inh mré vėsŷrénh tũ nĩn jé,” he tóg, ũn rico ja ti, Abraão mŷ.

²⁹ Kŷ Abraão tóg ti mŷ: “tá ag tóg Moisés tŷ ěg mŷ nén tó ja ěn mẽnh mũ, Topě vĩ tó tĩ kar ag vĩ ke gé. Hã kŷ ag tóg Topě vĩ jěmėnh mũ, ag tŷ mẽ sór kŷ,” he tóg.

³⁰ Hã ra tóg ã jóg tỹ Abraão ti mỹ: “vó” he mũ. “Vẽser tỹ ag tá jun mũ ra ag jẽmẽ há han ke mũ vễ, kỹ ag tóg ãjag jykre pãno ẽn tovãnh ke mũ vễ, vẽser tỹ ag mỹ tó mũ ẽn ti,” he tóg.

³¹ Hã ra tóg: “vó,” he mũ gé. “Ag tỹ Moisés vĩ jẽmẽ sór tũ nĩn kỹ ag tóg vẽser vĩ mẽnh ke tũ nĩ gé, ag tỹ Topẽ vĩ tó tĩ ag vĩ mẽ jãvãnh nỹtĩn kỹ,” he tóg, Abraão ti, ùn rico ja ẽn mỹ,” he tóg, Jesus ti. Ti tỹ ag mỹ ẽg tỹ Topẽ vĩ jẽmẽ jãvãnh nỹtĩn kỹ vễsỹrẻnh ke ẽn tón hã vễ.

17

*Topẽ vĩ mranh tỹ jagy nĩ
(Mt 18.6-7, 21-22; Mc 9.42)*

¹ Kỹ Jesus tóg ã mrẻ mũ tĩ ag mỹ: “ũ tỹ hẻn ri ke ag vỹ ù tỹ iso há ẽn tỹ isovãnh han sór mũ, ha mẽ,” he mũ. “Vễsỹrẻnh tãvĩn mũ jẻ ag tóg ke mũ, tag to. Topẽ vỹ ag ve kónãn tãvĩn mũ, ag tỹ ùn krĩn kónãn mũ tag to.

² ù tỹ ag krĩn kónãn mũ mỹ tóg há nỹnh mũ vễ, ẽg tỹ pỏ tỹ kra mág tỹ ag nunh to sa kỹ goj nig kuju ki ag vãm jẻ. Tag vỹ ag mỹ jagy tĩ vễ. Hã ra ag tóg ti jagy tag kãfỏr venh ke mũ, ag tỹ ùn sĩ tỹ inh ki rã kỹ nĩ (hã) ra ti tỹ inh vĩ mranh han sỏr kỹ.

³ To jykẻn, vẻnh ki rĩr kỹ.

Kejẻn ã rẻgre vỹ Topẽ vĩ mranh mũ. Kỹ ti mỹ tỏmnĩ, ti tỹ kygnẻ ti. Tĩ tỹ tovãnh sỏr kỹ ti mỹ vẻnh pãte fỏn nĩ.

⁴ Hẻn ri ke mũn tóg ã tỹ Topẽ vĩ mranh han sỏr mũ han mãn', han mãn' he mũ, kejẻn. Kurã pir ki tóg ã jũ tỹ hẻn ri ke han sỏr mũ, hẻn ri ke mũn. Hã ra tóg ã jũ han kar kỹ: “inh pi(jẻ) ke mãn mũ

ha," henh ke mũ gé. ã jũn kÿ tóg tónh kãtĩg mãn', tónh kãtĩg mãn' he mũ gé. Kÿ ti mÿ vãnh pãte fón to krónh ke tũg nĩ," he tóg, Jesus ti.

Ëg tÿ Topẽ ki rã há han ke

⁵ Kÿ Jesus tÿ ùn vin mũ ag tóg ti mÿ: "ëg tÿ Topẽ ki rã há pẽ han há tóg tĩ," he mũ. "Kÿ to ëg tar han nĩ," he ag tóg, Jesus mÿ.

⁶ Kÿ tóg ag mÿ: "ãjag tÿ Topẽ ki rã kÿ tóg há tĩ," he mũ. "Ka tÿ mostarda fy mĩ ëkrén nĩ," he tóg. "Sĩ ti nĩ, hã ra tóg mog tĩ. Tag ri ke han nĩ, Topẽ ki rã kÿ. Ti ki rã kÿ ãjag tóg nén ù kar to tar nÿtĩnh mũ. Ka tag ve ra, ka krén tag ti. ãjag tÿ ti mÿ: "ã jãre tÿ ga tá kãkutẽ, kÿ goj nig ki vãnh krãn," hen kÿ tóg kenh mũ, ãjag tÿ Topẽ ki rãn kÿ," he tóg, Jesus ti.

Tÿ ëg Topẽ camarada nÿtĩ

⁷ "ãjag camarada jykre to jykrén nĩ," he tóg. "ãjag japÿ ki tóg rĩr tĩ, ga tÿ vĩrĩn ken kÿ, ke tũ nĩn kÿ tóg ãjag mẽg ki rĩr tĩ gé. Rãkãnh kÿ tóg ã rãnrãj ja tá kãtĩ tĩ. Kÿ ãjag pi(jé) ti mÿ: "kunĩg, jẽn jé," he tĩ'.

⁸ Ti mÿ ãjag tóg: "inh mÿ vễjẽn han, ijẽn jé," he tĩ. "Kuri ã kur tãnfyn kÿ tógfĩn, ã tÿ inh mÿ vễjẽn jun jé, ijẽn jé, kron jé, kar kÿ ã tóg jẽn ke mũ gé sir, kron ke mũ gé sir, ijẽn kar kÿ," he ãjag tóg tĩ, ãjag camarada mÿ.

⁹ Kÿ ãjag tóg ti mÿ vĩ há han tũ nĩ gé, ti tÿ ãjag vĩ ki króm mũ ra. ãjag camarada vễ mÿr, ti rãnrãj vễ, hã kÿ tóg ãjag vĩ ẽn han ke mũ.

¹⁰ Kÿ ãjag camarada ag ri ke han nĩ, Topẽ mÿ, ha mẽ. ãjag tÿ Topẽ vĩ ki króm kãn kÿ jagnẽ mÿ: "ti camarada vÿ tÿ ëg nÿtĩ," hemnĩ. "Ti tÿ ëg mÿ nén tó mũn hã han ëg tóg, kÿ tóg tÿ nén ù tũ nĩ," hemnĩ

jagně mǵ. “Ti vř han kǎn tugarřn ěg tóg há nřtř,” he tũg nř,” he tóg, Jesus ti.

Jesus tř ũn kaga tř 10 (ke) ag tř há' he

¹¹ Kř Jesus tóg Jerusalém ra třg sór mũ. Hǎ kř tóg ga tř Samaria fyr mř tř mũ. Ga tř Galilėja mrė ti fyr vė.

¹² Tá tóg ěmǎ ũ ki rǎ mũ, kř ũ tř 10 (ke) ag tóg ti kato tėgtė mũ sir. Vėnh kaga kren vǎnh hyn han ag tóg mũ, lepra han kř. Hǎ kř ag tóg kór há tá nřtř, kuvar há tá.

¹³ Jamǎ hár(a) ag tóg prėnprėr mũ, kř ag tóg: “!..Jesus'..!” he mũ. “!..Senhor'..!” he ag tóg mũ. “!..Ěg jagǎgtǎn ra..!” he ag tóg mũ.

¹⁴ Kř tóg ag ki ěvǎnh mũ, kř tóg ag mř: “Topė tũ ki rřr tř ag mř vėnh ven mũjėg,” he mũ. Kř ag tóg mũ mũ.

Ag mũn kǎ ag tóg jǎnhkri' he mũ sir, ag fár ti, tá junjun to hǎ. Hǎghǎ' he ag tóg mũ sir.

¹⁵ Kř ag kǎmř ũn pir tóg kyrǎ mũ, Jesus to. Topė mř tóg vř há han mũ, ě tř há' hen kř. Kř vėnh kar vř ti vř mėg mũ.

¹⁶ Ti tř Jesus tá jun kř tóg ti krėm mũg ke mũ. Ti mř tóg: “řnh mř tóg há tř, ě tř isř há' hen kř,” he mũ. Samaria tá fóg ũ vė, Jesus to ũn kyrǎ mũ ěn ti.

¹⁷ Kř Jesus tóg: “ũ tř 10 (ke) tũ mř', hǎ vř: há', he mũ?” he mũ. “Hǎ ra ũn pir ne kǎtřg ja nř'. Hřn, ũ ag, ũ tř 9 (ke) ěn ag?” he tóg.

¹⁸ “Fóg tag hǎ vř ě pir mř kyrǎ, Topė to: “ũn mǎg vř tř ti nř,” he jė,” he tóg, Jesus ti.

¹⁹ Kř tóg fóg ěn mř: “jėgnė ra,” he mũ. “Ha třg,” he tóg. “Ā tř řnh ki rǎ kř, hǎ kř ě tóg há' he mũ,” he tóg, Jesus ti.

*Topě tỹ tỹ ěg pã'i nĩ to věnh jykre
(Mt 24.23-28, 37-41)*

²⁰ Kejĕn Fariseu ag tóg ti ki jĕmĕnh kãmũ mũ. “Topě tỹ tỹ ěg pã'i nĩ ěn mỹ ver kór gy nĩ, mỹ kuvar gy?” he ag tóg ti mỹ. Kỹ tóg ag mỹ kãmén mũ sir. “Ti vég tũ ěg tóg nĩ, ěg kaně tỹ, Topě tỹ tỹ ěg pã'i nĩ ti,” he tóg.

²¹ “Hã kỹ ěg tóg to: “tag kã ti nĩ, tãtã ti nĩ,” henh ke tũ nĩ gé. Ha mẽ, ãjag kãmĩ ti huri věnh ven, ti tỹ tỹ ěg pã'i nĩ ti, ãjag tỹ ti vég tũ (hã) ra,” he tóg.

²² Kỹ tóg ã mré mũ tĩ ag mỹ: “tỹ sóg ěprã ke fi kósin nĩ,” he mũ. “Kejĕn tóg ãjag tỹ Topě tỹ tỹ ěg pã'i nĩ venh ha pĕ tĩnh mũ. Ti tỹ kurã pir ki věnh ven mũ vỹ ãjag mỹ há tĩnh mũ vĕ, hã ra ãjag tóg venh ke tũ nĩ ver,” he tóg.

²³ “Kỹ ag tóg ãjag mỹ: “tag ki ti jun ja nĩ,” henh ke mũ. “Ěn tá tóg jĕ nĩ,” he jé ag tóg ke mũ gé. Kỹ venh mũ tũg nĩ hã ra. Ag vĩ jĕmĕ sór tũg nĩ.

²⁴ Inh kãtĩg mãn ke vỹ ta tỹ kóm kóm ke ri ke nĩ. Ti tỹ kóm kóm ke kỹ ěg tóg nĕn kar vég tĩ, kanhkã krĕm. Kỹ věnh kar vỹ ti tỹ kóm kóm ke ěn vég tĩ gé. Inh kãtĩg mãn ke vỹ ri ke nĩnh mũ, inh kurã ěn kã. Vĕnh kar vỹ inh ve kãn mũ. Tỹ sóg ěprã ke fi kósin nĩ,” he tóg.

²⁵ “Inh kãtĩg mãn ke to hã sóg hã ra vĕsỹrĕnh mág han ke mũ ver. Ůri ke ag vỹ iso é henh ke mũ ver,” he tóg.

²⁶ “Kỹ inh kãtĩg mãn ke kurã ěn kã ěprã ke ag tóg han kãn ke mũ, ag tỹ Noé tỹ ga mĩ tĩ mũ kã nĕn han ja ěn ti.

²⁷ Ta kutĕ to hã ag tóg jĕn ja nĩgtĩ, jĕn kar kỹ ag tóg kron ja nĩgtĩ gé, věnh prũ kutĕm ja ag nĩgtĩ gé.

Ën kã Noé tóg kejën barco tỹ ïn kãra rã ja nĩ. Ti tỹ kãra rã kar kỹ ta tóg sir kutě ja nĩ, kỹ ag tóg goj var ki kãgter kãn ja nĩ.

²⁸ Kỹ tóg ri ke pě ja nĩ gé, Ló tỹ ga mĩ tĩg ki. Ën kã ag tóg jën ja nĩgtĩ gé, jën kar kỹ ag tóg kronkron ja nĩgtĩ gé. Vender ke mũ ja ag nĩgtĩ gé, kygjãm ke mũ ja ag nĩgtĩ gé. Ëkrãn ja ag nĩgtĩ gé, ïn hyn han ja ag nĩgtĩ gé.

²⁹ Ën kã Ló tóg kejën cidade tỹ Sodoma tá kãkutě ja nĩ, kỹ pĩ tóg kanhkã tá kãtère ja nĩ, cidade kri, pó tỹ enxofre nĩa ãn ke gé. Kỹ ãn tóg ag kãgtén kãn ja nĩ. Topě tỹ ag vóg kónãn ke to jykrén sór tũ ja ag nỹtĩgtĩ.

³⁰ Ge ti nĩnh mũ gé, ěprã ke fi kósin tỹ vėnh ven mãn ke kurã ãn kã. Mĩ ěkrén ke tũ ag nĩgtĩ gé, ti to há tũ ag.

³¹ Ů tỹ kurã ãn kã ã ïn rã hã tĩn kỹn jé ã tũ mãn rã sór tũg, ti tũ tỹ ti ïn krēm nỹtĩ ti. Ů tỹ ěpỹ tá tĩ ãn jé ã tũ to vỹn ke tũg.

³² Ló prũ fi to jykrén.

³³ Ājag tỹ ājag jykre hã han sór kỹ ājag nũgme ki vár ke mũ, ha vemnĩ. Ājag tỹ isugrĩn ājag jykre fi mãn kỹ ājag krenkren ke vė, ha vemnĩ,” he tóg.

³⁴ “Hã kỹ sóg tag tó mũ, ha mẽ. Kuty ãn kã, ïnh kãtĩg mãn ke kuty ãn kã ũn régre ag vỹ jagně mré nũgnũr nỹtĩnh mũ. Ag kãmĩ ũn pir jé prěr sóg ke mũ, kỹ tóg ïnh mré tĩnh mũ, jãvo ti régre vỹ kã nỹnh mũ, ha vemnĩ.

³⁵ Ůn régre fag vỹ ěgtynyn nỹtĩnh mũ, jagně mré, ãn kã. Kỹ sóg ũn pir fi jé prěr ke mũ, kỹ fi tóg ïnh mré tĩnh mũ, jãvo fi régre fi vỹ kã jěnh mũ, ha vemnĩ.

³⁶ Ûn régre ag vỹ ěpỹ ki rãnrãj mũnh mũ, ěn kã. Kỹ sóg ùn pir jé prěr ke mũ, kỹ tóg inh mré tĩnh mũ. Jãvo tí régre vỹ tá tĩnh mũ gé, ha vemní,” he tóg, Jesus tí.

³⁷ Kĩ tí mré mũ tí ag tóg ěg Senhor mỹ: “tag hẽ tá ke nĩnh mũ hỹn'?” he mũ. Kĩ tóg ag mỹ: “kurã ěn kã ãjag ki kanhró nỹtĩnh mũ,” he mũ. “Nén ù ter nỹg ja ri ke tí nĩ. Hã tá tóg vẽn ĩn tĩ, jãtã tí, he ěg tóg tĩ. Tag ri ke tí nĩnh mũ, ha vemní,” he tóg, Jesus tí. Tí tỹ ã kãtĩg ĩn ke tón hã vẽ.

18

Ěg tỹ Topẽ mré vỹ to krónh ke tũ

¹ Kĩ Jesus tóg ag mỹ: “ãjag tỹ Topẽ mré vẽnén ke vỹ ge nỹnh mũ, ha mẽ,” he mũ. Ěg tỹ kurã kar ki Topẽ mré vẽnén kỹ tóg há tĩnh mũ, ěg tỹ to krónh ke tũ nĩn kỹ. Tag tỹ tóg ag kanhrãnrãn sór mũ, ã mré mũ tí ag, hã kỹ tóg tag tó mũ, ha mẽ.

² “Kejẽn pã'i tóg nĩgtĩ, ěmã ù tá,” he tóg. “Ag tỹ jagnẽ to jũ vég tí tĩ. Tí rãnrãj hã vẽ. Hã ra tóg Topẽ kamẽg vãn ĩn, tí jykre pãno nĩn kỹ. Kĩ tóg ã mré ke ag kamẽg vãn ĩn pẽ nĩgtĩ gé. Kórég pẽ tí nĩgtĩ.

³ Tí jamã tá ù fi tóg nĩgtĩ gé, ùn mén ter ja fi. ěn fi vỹ kejẽn tí to kãtĩg kỹ tí mré vẽnén mũ. Kĩ fi tóg tí mỹ: “inh lograr ke sór mũ ěn ag jo inh vemní,” he mũ.

⁴ Hã ra tóg mẽ jãvãn ĩn. Jatu tóg nĩ nĩ, kysã tỹ hẽn ri ke ki. Kĩ fi tóg tí tá jun tỹ hẽn ri ke han mũ, to krónh ke tũ fi nĩ. Kĩ tóg kejẽn to jykrén mũ. “Topẽ kamẽg vãn ĩn nĩgtĩ,” he tóg. “Û kamẽg vãn ĩn nĩgtĩ gé.

⁵ Hã ra fi tóg isovãnh tũ pẽ nĩ, ãn mén ter ja ên fi. Kurã kar ki fi tóg inh mỹ to vĩnh kãtĩ tĩ. Kĩ inh hỹn fi jy rãnh mũ ha, ke tũ nĩ mũ ra fi tóg ijũ han ke mũ, fi tỹ inh venh kãtĩ to krónh ke tũ nĩn kỹ, ha vemnĩ,” he tóg, pã'i kórég ti,” he tóg, êg Senhor tỹ Jesus ti.

⁶ Kĩ tóg ag mỹ: “ti vĩ jẽmẽ ra,” he mũ. “Jykre pãno ti nĩ, pã'i kórég ên ti, hã ra tóg fi tỹ ti mỹ vĩ e ên to fi kren han sór mũ,” he tóg.

⁷ “Hã kĩ Topẽ vĩ ãjag krenkren han ke mũ gé. ãjag kuprẽg ja tóg nĩ mỹr, kĩ ti mré vẽmén nĩ. Kurã ki ti mỹ vĩmnĩ, kuty tá ke gé. ãjag kren han vãnh nĩ ve ti nĩ, kejẽn.

⁸ Hã ra tóg ãjag krenkren han ke mũ, kãnhmar, ha vemnĩ. Ki hã sóg tó mũ,” he tóg. “Hã ra êprã ke fi kósín ên tỹ kãtĩg mãn kĩ ag mỹ ti ki ge sór mũ vĩ?” he tóg, Jesus ti.

Êg tỹ: “tỹ inh ãn há nĩ,” henh ke tũ

⁹ Kĩ Jesus tóg ag kanhrãn mãn mũ gé. ã tóg ã tỹ ti vĩ mẽg mũ ên ag kãmĩ nỹtĩ, hã ra ag tóg vẽso: “tỹ êg tóg ãn há nỹtĩ,” he tĩ. “Kórég tũ êg nỹtĩ, jo ã ag ne kórég nỹtĩ,” he ag tóg tĩ, vẽso, Jesus vĩ mẽg mũ ã ag. Ên ag kanhrãnran sór tóg mũ, Jesus ti. Kĩ tóg ag mỹ: “ãjag jykre vĩ ge nỹnh mũ, ha mẽ,” he mũ.

¹⁰ “Kejẽn Fariseu ã tóg nĩgtĩ. Topẽ jo ãn ra tóg tĩ mũ, tá Topẽ mré vĩ jé. Ti mré ã tóg ra tĩ mũ gé, ã tỹ governo mỹ jãnkamy mãg tĩ ti. Topẽ mré vĩ sór tóg mũ gé.

¹¹ Kĩ Fariseu tóg Topẽ mré vẽmén jẽ nĩ. “Topẽ,” he tóg. “Inh mỹ tóg há tĩ, isỹ jykre kórég tũ nĩn kỹ, ag jãvo. ã ag tóg nén ã péju(g) tĩ, hã ra sóg han tũ nĩgtĩ. ã ag tóg nén ã vẽnhmỹ han tĩ inhhã, jãvo inh

pi(jé) han tĩ'. Ājag prũ tũ fag mré ag tóg nỹgtĩ inhhã. Kỹ governo mỹ jãnkamy mǎg tĩ tag ti vỹ kórég nĩ gé inhhã.

¹² Ag jãvo sóg vãnh jykre há han tĩ. Semana kar ki sóg vǎkre régre han tĩ, jëg mẽ tĩ ki. Hã ki sóg ã jykre ki króm tĩ. Isũ tỹ sóg dízimo kajãm tĩ, ã mỹ. Sỹ nén ù tỹ 10 (ke) ki sóg ùn pir nĩm tĩ, ã mỹ dízimo han kỹ," he tóg, Fariseu ti, Topé mỹ.

¹³ Hã ra governo mỹ jãnkamy mǎg tĩ ẽn tóg kór há tá jë nĩ, kuvar há tá, mỹ'ãg kỹ. Kỹ tóg kanhkã ki ẽvãnh tũ nĩ gé. Ā fe kri tóg kãgmĩg mũ, ti tỹ mỹ'ãg mág kỹ. Kỹ tóg Topẽ mré vĩ mũ. "Topẽ," he tóg mũ gé. "Ā vĩ mranh inh mỹr," he tóg. "Ā mỹ inh jagãgtãn ke tũ hã ra," he tóg, Topẽ vĩ mranh tĩ ẽn ti," he tóg, Jesus ti.

¹⁴ "Ha mẽ, Topẽ vỹ ti mỹ vãnh pãte fón, hã kỹ tóg jatun mỹ vyr. Jãvo tóg Fariseu ẽn mỹ vãnh pãte fón tũ nĩ. Ge ti nĩgtĩ. Ēg tỹ vëso: "há inh nĩ," hen kỹ Topẽ tóg ẽg to kórég nĩ. Kỹ tóg ẽg térem mũ sir. Ēg tỹ hã ra vëso: "kórég inh nĩ," hen kỹ Topẽ vỹ ẽg to há nĩ, kỹ tóg ẽg tỹ ùn mág han ke mũ gé sir," he tóg, Jesus ti.

*Jesus tỹ ùn kãsir ag to há
(Mt 19.13-15; Mc 10.13-16)*

¹⁵ Kỹ fag tóg gĩr tatĩ kãmũ mũ ti to, ti tỹ gĩr kri ã nĩgé fi jé. Hã ra ti mré mũ tĩ ag tóg vég mũ, kỹ ag tóg fag to jũ mũ, ù tỹ ag tatĩ kãmũ mũ fag to.

¹⁶ Hã ra Jesus tóg fag jé prër kỹ ag mỹ: "vĩ tũg nĩ, gĩr ag mỹ," he mũ. "Gĩr ag tỹ iso kãmũ kamëg tũg nĩ," he tóg. "Ũ tỹ ge hã vỹ ẽg Senhor tỹ Topẽ krëm nỹtĩnh mũ," he tóg.

17 “Sỹ ke há vễ, hã kỹ sóg tó mũ. Gĩr ag vỹ iso há pẽ nỹtĩ. Ûn kāsir tag ag ri ke nỹtĩmnĩ, ke tũ nĩ mũ ra ãjag tóg Topẽ tỹ tỹ ẽg pã'i nĩ venh ke tũ nĩ mỹr,” he tóg, Jesus ti.

Ûn rico ag

(Mt 19.16-30; Mc 10.17-31)

18 Kỹ kejẽn ù tóg Jesus ki jẽmẽnh kãtĩ mũ, pã'i ù. Kỹ tóg ti mỹ: “Senhor',” he mũ. “Há ã tóg nĩ,” he tóg. “Sỹ rĩr krỹg ja tũ venh há tóg tĩ. Sỹ ti ve jé inh hỹn vẽn h jykre há tỹ ne han ke mũ?” he tóg.

19 Kỹ Jesus tóg ti mỹ: “iso: “há ã nĩ,” he sór tũg nĩ,” he mũ. “Ëg pi(jé) há nỹtĩ’,” he tóg. “Topẽ hã ne ã pir mỹ há nĩ’,” he tóg.

20 “Topẽ tỹ nẽn ù to ẽg jyvẽn ja ẽn ki kanhró ã tóg nĩ, hã vỹ: ã prũ tũ fi mré nỹ tũg nĩ, he mũ, ù tén tũg nĩ, he mũ, nẽn ù péju(g) tũg nĩ, he mũ, ù to ón tũg nĩ, he mũ, ã nỹ mré ã jóg kamẽg nĩ, he mũ,” he tóg ti mỹ, Jesus ti.

21 Hã ra tóg: “ki króm kãn sóg, isĩn kã,” he mũ.

22 Kỹ Jesus tóg ti mỹ: “nẽn ù pir vỹ tũ nĩ ver,” he mũ. “Á tũ vãm kãn nĩ, ã tỹ ùn vėsỹrẻnh mũ ag mỹ vin jé, jãnkamy ti. Kỹ ã tóg kankã tá tũ mág nĩ sir. Kar kãtĩg nĩ, ã tỹ inh mré tĩg jé,” he tóg ti mỹ, Jesus ti.

23 Kỹ tóg ti mỹ vẽnhmỹ tĩ, Jesus vĩ ti, ti rico pẽ nĩn kỹ.

24 Hã ra Jesus tóg ti mỹ vẽnhmỹ ẽn ki kanhrãn mũ. Kỹ tóg ã mré mũ tĩ ag mỹ: “jagy ti nỹ, ùn rico tỹ Topẽ tỹ tỹ ẽg pã'i nĩ venh ke ti,” he mũ.

25 “Cavalo pãnĩ sór vỹ préj nor fĩn rãm ke tũ nĩ,” he tóg. “Ti tỹ fĩn rãm ke ra tóg jagy tĩ vễ, ùn rico tỹ Topẽ tỹ tỹ ẽg pã'i nĩ venh ke ti,” he tóg.

26 Kÿ ti vĩ mẽg mũ ag tóg to vēmén mũ. “Kÿ ù hÿn kren ke tũ pẽ nĩ,” he ag tóg.

27 Kÿ Jesus tóg ag mÿ: “ĕprã ke ag vÿ tá junjun ke tũ nĩ vễ,” he mũ. “Hã ra Topẽ hã tóg ĕg tÿ tá junjun han ke mũ,” he tóg.

28 Kÿ Pedro vÿ: “ha vé,” he mũ. “Ĕg tÿ nén ù kar ré jé ĕg tóg mũ mũ, ĕg tÿ ã mré mũ jé,” he tóg.

29 Kÿ Jesus tóg ag mÿ: “sÿ ke há vễ, hã kÿ sóg tó mũ,” he mũ. “Ũ tóg kejĕn ã jamã ré kÿ tĩ mũ, ti prũ fi, ti kãke, ti jãvy, ti han mũ fag, ti krĕ ré kÿ tóg tĩ mũ, Topẽ tÿ tÿ ĕg pã'i nĩ tigrĩn, ti tÿ ti vĩ ki króm jé,” he tóg.

30 “Ĕn vÿ tóg sir vĕnh kaja jé nén kar ĕn tÿ ùn e venh ke mũ, ag jĕgja kã, ga kri, kar kÿ tóg vãhã sir ĕg rĩr krÿg ja tũ venh ke mũ gé sir, kanhkã tá,” he tóg, Jesus ti.

Jesus tÿ ã ter ke tó mãn

(Mt 20.17-19; Mc 10.32-34)

31 Kÿ tóg ù tÿ 12 (ke) ag jé prĕr mũ, vyrmÿ, ag mÿ kãmén jé. “Ha vé,” he tóg. “Jerusalém ra ĕg mũ mũ, kÿ sóg tá ve kãn ke mũ, vãsÿ Topẽ vĩ tó tĩ ag tÿ iso nén rán ja ĕn ti,” he tóg. “Tÿ sóg ĕprã ke fi kósin ĕn nĩ, hã kÿ ag tóg inh kãmén ja nĩ, Topẽ vĩ ki.

32 Fóg ag mÿ ag tóg inh fĕg ke mũ, pã'i ag, Jerusalém tá, ha vemnĩ, ag tÿ iso é he jé, ag tÿ inh vóg kónãn jé, ag tÿ iso sug ke jé gé,

33 ag tÿ inh mrãnmrãn jé. Ag tÿ isén ke vễ. Hã ra sóg kurã tăgtũ tũg kÿ rĩr mãn ke mũ, ha vemnĩ,” he tóg, ti mré mũ tĩ ag mÿ, Jesus ti.

34 Hã ra ag tóg ti vĩ tag to jykrén tũ nĩ, ù tÿ 12 (ke) ĕn ag. Ti vĩ tóg ag mÿ vĕnhmÿ tĩ. Kÿ ag tóg ki kagtĩg nÿtĩ. “Ti tÿ ne tó nĕ hÿn'?” he ag tóg mũ sir.

*Jesus tỹ ãn kyvó tỹ há' he
(Mt 20.29-34; Mc 10.46-52)*

³⁵ Ag mũn kỹ ag tóg Jericó to hã mũ mũ. Tá ãn kyvó vỹ ěpry kri nĩ nĩ, ěmĩn kri. “Inh mỹ jãnkamy nĩm,” he tóg tĩ, vẽn h kar mỹ, ti kyvó nĩn kỹ.

³⁶ Ěn vỹ vẽn h kar tỹ ěpry jagma mũ mễg tĩ. Kỹ tóg ag mỹ: “ũ nễ?” he mũ.

³⁷ Kỹ ag tóg ti mỹ: “Jesus vễ, Nazaré tá ke ěn vễ,” he mũ.

³⁸ Kỹ tóg prěr mũ sir. “!..Jesus'..., Davi kósin'..., ijagãgtãn ra..!” he tóg mũ, prěr kỹ.

³⁹ Kỹ Jesus jo mũ ag vỹ ti mỹ vĩ jũ han mũ. “Ěmễ kã nĩ nĩ,” he ag tóg ti mỹ. Hã ra tóg prěr mãn', prěr mãn' he mũ. “!..Davi kósin'..., ijagãgtãn ra..!” he tóg.

⁴⁰ Kỹ Jesus tóg krỹg he mũ, kỹ tóg: “ti jé prěr,” he mũ. Kỹ ag tóg ti pére kãmũ mũ. Ti ki jun kỹ tóg ti mỹ:

⁴¹ “inh ã tỹ hễ ri kenh ke?” he mũ. Kỹ tóg ěg Senhor mỹ: “sỹ venh há tóg tĩ,” he mũ.

⁴² Kỹ Jesus tóg ti mỹ: “kỹ tỹ vé,” he mũ. “Ã tỹ inh ki rã kỹ ã há' henh ke mũ,” he tóg.

⁴³ Kỹ tóg vễsỹmér ěvãnh há' he mũ sir. Kỹ tóg ti mré tĩ mũ. Topễ mỹ tóg vĩ há han mũ. Kỹ tóg vẽn h kar mỹ há tĩ, ag tỹ ti tỹ há' he mũ ěn ven kỹ. Kỹ ag tóg Topễ mỹ vĩ há han mũ gé sir.

19

Jesus tỹ Zaqueu venh tĩg

¹ Kỹ Jesus tóg cidade tỹ Jericó ki rã mũ sir, kỹ tóg fĩn rãm kỹ tĩg sór mũ.

² Hã ra ù tóg tá nĩ nĩ, ti jyjy hã vỹ: Zaqueu, he mũ. Governo mỹ jãnkamy mãng tĩ ag pã'i vễ. Rico pẽ ti nĩ, rico tãvĩ.

³ Ën tóg Jesus ve sór mũ, ti tỹ Jericó fĩn rãm kỹ. Hã ra tóg rur jẽ, hã kỹ tóg ti vég tũ nĩ, vễnh e ag tỹ ti pẽnĩn mũn kỹ.

⁴ Hã kỹ tóg ti jo vễnhvãg tĩ mũ, kỹ tóg ka tỹ krén to tãpry mũ, ti tỹ Jesus ve jé, ti tỹ jagma tĩg kỹ.

⁵ Kỹ Jesus tóg ka ãn tá jun mũ. Hã ra tóg krĩg mỹ ẽvãnh kỹ ka kri ti vég mũ. Kỹ tóg ti mỹ: “Zaqueu’,” he mũ. “Kur kãtére to fũrũn ké. Isỹ ã ãn krẽm nũr ke vễ,” he tóg, Jesus ti.

⁶ Kỹ tóg tere tỹ mrãnh ke mũ sir. Jesus mỹ tóg: “mũ jé ha,” he mũ. Ti mỹ tóg sér tĩ, Jesus tỹ ti ãn krẽm nũr sór kỹ.

⁷ Hã ra vễnh e ãn tóg Jesus to vĩ mũ sir, ti to jũ kỹ. “Topẽ vĩ mranh tĩ vễ, ãn ti, hã ra tóg ti ãn krẽm nũr sór mũ, vễnh jykre pãno han tĩ ãn mré,” he ag tóg mũ.

⁸ Kỹ Jesus tóg ti ãn krẽm nĩ nĩ. Kỹ Zaqueu vỹ ti mỹ vễnh kãmén kãtĩ mũ, ã jykre to jykrén kỹ. Kỹ tóg ẽg Senhor mỹ: “ha vé,” he mũ. “Isũ kuju vin jé sóg ke mũ, ãn jagtar ag mỹ. Û ag lograr he ja sóg nĩgtĩ, ag tũ ki, hã ra sóg ag mỹ ti kãfór nĩm sór mũ ha. Sỹ jãnkamy pir ki ù lograr he jan ki sóg ti mỹ ù tỹ 4 (ke) vin sór mũ,” he tóg, Zaqueu ti.

⁹ Kỹ Jesus tóg ti mỹ: “há ti nĩ,” he mũ. “Ûri ã tóg kren mũ, ã mré ke fag mré hã,” he tóg. “Abraão kósin vỹ tỹ ã nĩ gé,” he tóg.

¹⁰ “Tỹ sóg ẽprã ke fi kósin nĩ. Ûn vãfor mũ ãn jãvãnh jé sóg kãtĩg, sỹ ag krenkren han jé, ãn jykre pãno han mũ ãn,” he tóg, Jesus ti.

Jãnkamy to comparaçãu
(Mt 25.14-30)

¹¹ Hã ra ag tóg ti vĩ mẽ há han mũ, kỹ tóg ag mỹ Topê tỹ tỹ êg pã'i nĩnh ke ti kãmén sór mũ. Jerusalém to hã tóg nĩ, hã kỹ ag tóg ti to: “Topê tỹ tỹ êg pã'i nĩ hỹn vẽn ven ke mũ, ti tỹ tá jun kỹ,” he mũ.

¹² Kỹ Jesus tóg ag mỹ kãmén mũ, Topê tỹ tỹ êg pã'i nĩnh ke tỹ ver vẽn ven ke tũ nĩ. Kỹ tóg tag tó mũ, ha mẽ. “Kejẽn pã'i tóg nĩgtĩ,” he tóg. “Ën tóg ga ù ra tũg sór mũ, tá ã tũ ve jé, ga ên tá ã tũ han jé. Tag han kar tóg tá vĩn ke sór mũ.

¹³ Pã'i ên vĩ ã camarada tỹ 10 (ke) ag jé prêr mũ, kỹ tóg ag mỹ jãnkamy prestar he mũ sir. Ag kar mỹ tóg ti kãmur pir nĩm mũ, jãnkamy tỹ, ù tỹ 10 (ke) ag mỹ. Kỹ tóg ag mỹ: “ha inh mỹ tỹ rãnrãj,” he mũ. “Kejẽn sóg vĩn kenh ke mũ, kỹ sóg tugnỹm ke mũ, ãjag rãnrãj ti,” he tóg. Kar tóg tĩ mũ sir.

¹⁴ Hã ra ti krêm ke ù ag vĩ ti to há tũ nỹtĩ, kỹ ag tóg ti nón vẽn vĩ jẽnêg mũ. Kỹ ag tóg: “ã tỹ êg kri tỹ pã'i nĩn kỹ tóg vẽnhmỹ nĩ,” he mũ, “êg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vẽn vĩ jẽnêg mũn kã.

¹⁵ Hã ra tóg tỹ pã'i nĩn kỹ kějẽn vĩn ke mũ, ga ên ve kar kỹ, tá ti rãnrãj han kãn kar. Kỹ tóg tỹ pã'i mág jê. Vỹn ke kỹ tóg ã camarada ag jé prêr mũ sir, ti tỹ ùn mỹ jãnkamy vin ja ên ag. Ti tỹ ag rãnrãj tugnỹm sór vẽn, ag ganho ve sór vẽn gé.

¹⁶ Kỹ ù tóg ti tá jun kỹ ti mỹ: “pã'i,” he mũ. “Ti kãmur pir nĩm ã tóg mỹr. Hã ra sóg kri ù tỹ 10 (ke) ganhar ké,” he tóg.

¹⁷ Kỹ ti patrãu tóg ã camarada mỹ: “jykre há tãvĩ ã tóg nĩ,” he mũ. “Nén sĩ ki rĩr há han ã tóg, hã kỹ ã

tóg cidade tỹ 10 (ke) ki rĩr mũ ha,” he tóg, pã'i ti, ã camarada mỹ.

18 Kỹ ù tóg ti tá jun mũ gé. Kỹ tóg ti mỹ: “pã'i,” he mũ gé. “Ti kãmur pir nĩm ã tóg mỹr. Hã ra sóg kri ù tỹ 5 (ke) ganhar ké,” he tóg.

19 Kỹ ti patrão tóg ti mỹ: “cidade tỹ 5 (ke) ki rĩr jé ã tóg ke mũ ha,” he mũ gé.

20 Kỹ ù tóg tá jun mũ gé. Kỹ tóg ti mỹ: “pã'i,” he mũ gé. “Ha vé, ã tũ ti,” he tóg. “Inh krĩ pãgja ki sóg tógfĩn kỹ nĩm han.

21 ã kamẽg ja inh nĩ, ã vĩ tar to. ã tỹ nén vin ja tũ ãn mãn sór ã tóg tĩ, ã tỹ nén krãn ja tũ kunũnh sór ã tóg tĩ,” he tóg, ti camarada ti, pã'i ti mỹ.

22 Kỹ ti patrão tóg ti mỹ: “ã vĩ tóg ã jykre pãno han mũ, ha mẽ,” he mũ. “Inh mỹ vĩ tar han tí? Inh mỹ sỹ nén vin ja tũ mãn sór tí? Inh mỹ sỹ nén krãn ja tũ kunũnh sór tí? Hã ki kanhró ã mỹ nĩ?”

23 Kỹ ã tỹ ne jé inh jãnkamy tỹ banco ki rãnrãj tí ag mỹ vin ja tũ nĩ nẽ? ã tỹ ag mỹ vin mũ ra sóg ti juro venh mũ vễ, kỹ sóg isũ kãfór mãn ke mũ vễ,” he tóg, ti patrão ti, ã camarada mỹ.

24 Kỹ tóg tá nỹtĩ ag mỹ: “ti nĩgã ti tũ mã,” he mũ. “Ủ tỹ ti kãmur tỹ 10 (ke) mãn ja ãn mỹ nĩm, ti tũ pir ti,” he tóg mũ sir.

25 Kỹ ag tóg ti mỹ: “pã'i,” he mũ. “Ti kãmur tỹ 10 (ke) vỹ tỹ ti tũ nỹtĩ. Tũ mág ve ti huri,” he ag tóg, pã'i mỹ.

26 Kỹ tóg: “hỹ,” he mũ. “Hã kỹ sóg tó mũ. Ủn tũ mág vỹ mãn mãn ke mũ. Ủ tỹ tũ sĩ nĩ ãn tũ kunũnh kãn jé ag tóg ke mũ gé,” he tóg.

27 “Kỹ inh kato tẽ mũ ag pére kãmũmĩ, ù tỹ iso: “ti tỹ ẽg kri tỹ pã'i jẽn kỹ tóg ẽg mỹ kórég nĩ,” he mũ

ẽn ag. Ag kãgtén ra, inh rĩnve,” he tóg, pã'i ti,” he tóg, Jesus ti. Ti tỹ ẽg tỹ ti rãnrãj ki rĩr há han ke kãmén hã vẽ.

²⁸ Tag tó kãn kỹ tóg tá kãkutẽ mũ sir, kỹ tóg cidade tỹ Jerusalém ra tĩ mũ.

Jesus tỹ Jerusalém tá jun

(Mt 21.1-11; Mc 11.1-11; Jo 12.12-19)

²⁹ Ti tỹ Jerusalém ra tĩg kỹ tóg ẽmã tỹ Betfagé to hã jun mũ, ẽmã tỹ Betânia tá, pãnónh tỹ Oliveiras he mũ ẽn tá. Tá jun kỹ tóg ã mré mũ tĩ régre ag jẽnẽg mũ, ag tỹ ti mỹ ag mẽg tỹ burrica ve jé.

³⁰ Hã kỹ tóg ag mỹ: “ẽmã ẽn ra mũmnĩ, ẽg jo ẽmã ẽn ra,” he mũ. “Tá junjun kỹ ãjag tóg burrica fi kósin venh mũ. Kri nĩ ja tũ ja tóg jẽ ver. Ẽn kavãn kỹ ti pére kãmũmnĩ, ti kyvãn kỹ,” he tóg.

³¹ “Hẽn ri ke mũn ag tóg ãjag mỹ: “ãjag tỹ ne jé ti kavãn nẽ?” henh mũ. Kỹ ag mỹ: “ẽg Senhor vỹ ti ve sór mũ,” hemnĩ,” he tóg, Jesus ti.

³² Kỹ ag tóg mũ mũ, Jesus tỹ ag jẽnẽn kỹ. Ti tỹ ag mỹ tó mũ ve kãn ag tóg mũ sir.

³³ Kỹ ag tóg ti kyvãg mũ. Kỹ ti tỹ tỹ ãn mẽg mũ ag tóg ag mỹ vĩ mũ. “Ãjag tỹ ne jé burrica kósin tag kavãn nẽ?” he ag tóg.

³⁴ Kỹ ag tóg: “ẽg Senhor vỹ ti ve sór mũ,” he mũ.

³⁵ Kỹ ag tóg Jesus mỹ ti pére kãmũ mũ. ãjag kur kugjén ag tóg mũ sir ti kri. Kỹ Jesus tóg kri nĩ mũ sir.

³⁶ Kỹ tóg tĩ mũ. Kỹ ag tóg ãjag kur kugjén mũ sir, ẽpry jagma, ẽmĩn jagma.

³⁷ Ge kỹ ag tóg Jerusalém to hã junjun mũ sir, pãnónh tỹ Oliveiras to re kỹ.

Ag tỹ pãnonh ãn to re kỹ vãhã ag kar ãn tóg Topẽ mỹ vĩ há han mũ sir, Jesus mré mũ kar ãn ag. Ag mỹ tóg sér tĩ. Jesus tỹ nén han mũ ve ja ag tóg nĩgtĩ, ti tỹ nén han vãnh hyn han mũ ti. ãn mũ ãkrén kỹ ag tóg Topẽ mỹ vĩ há han mũ, jamã hár(a).

³⁸ Kỹ ag tóg: “!..sér tóg tĩ ãg mỹ..!” he mũ. “!..ãg Senhor vĩ ãg ki jun..., ãg jóg mág tỹ ti jẽnẽn kỹ..!” he ag tóg. “!..Kanhkã tá ke ag tóg jatu nỹtĩ..! Topẽ mỹ ãg tóg vĩ há han sór mũ, kynhmỹ nĩ ãn mỹ..!” he ag tóg, prẽnprẽn kỹ.

³⁹ Hã ra Fariseu ã ag tóg tá nỹtĩ gé, vẽnh e ãn kãmĩ. Kỹ ag tóg Jesus mỹ: “Senhor’,” he mũ. “ã mré mũ tĩ ag mỹ: “prẽnprẽn tũg ra,” hé,” he ag tóg, Jesus mỹ.

⁴⁰ Hã ra Jesus tóg ag mỹ: “vó,” he mũ. “Ha mẽ, ag prẽnprẽn tũ nĩ ra pó hỹn prẽnprẽn mũ vẽn, ag mỹ sinsér mũ vẽn,” he tóg ag mỹ.

Jesus tỹ Jerusalém to fỹ

⁴¹ Ge kỹ ag tóg cidade tá junjun mũ sir. Cidade ãn ve kỹ tóg to fỹ mũ, Jesus ti.

⁴² “Jerusalém tá ke ag vĩ ki kanhrãnrãn sór tũ nỹtĩ,” he tóg. “Ag tỹ ãri ki kanhrãnrãn há tóg tĩ vẽn, hã ra ag tóg ke jãvãnh nỹtĩ. ãjag tỹ ki kanhrãnrãn’ he mũ ra ãjag tóg jatu kenh ke mũ vẽn, mỹr, ha mẽ, hã ra ãjag tóg jẽmẽ sór tũ nĩ. Kutu ãjag tóg nỹtĩ.

⁴³ Hã kỹ ãjag tóg vãhã kurã kórég pẽn venh ke mũ. ãjag kato tẽgtẽ mũ ag vĩ ãjag to ráránh ke mũ. Kũm’kũm ke jé ag tóg ke mũ, ãjag cidade jy ró pẽnĩn. Komẽr hã ag tóg ãjag to grẽngrẽn kenh ke mũ, kỹ ag tóg ãjag mãn vỹrỹn kenh ke mũ sir.

⁴⁴ ãjag tỹ tũg’ he kãn jé ag tóg ke mũ, ãjag krẽ ke gé. ãjag ãn kókén kãn jé ag tóg ke mũ gé. Kỹ ãn tỹ pó

pi(jé) jagně kri nýtĩnh mũ'. Kurã há ki ãjag tóg Topě vĩ mẽ jãvãnh nýtĩ, ũri. Topě vĩ ũri ãjag mẽ vĩ há han mũ ver, hã ra ãjag tóg mẽ jãvãnh nýtĩ. Hã kỹ ãjag tóg ti kórég venh ke mũ,” he tóg, Jesus ti. Fỹ pẽ han kỹ tóg tó mũ, cidade mẽ tĩg kỹ.

Jesus tỹ Topě jo ĩn tá jun

(Mt 21.12-17; Mc 11.15-19; Jo 2.13-22)

⁴⁵ Kỹ tóg Topě jo ĩn tá jun kỹ kãra rã mũ sir. Kỹ tóg ũ tỹ tá nén ũ vender he tĩ ag pan mũ sir.

⁴⁶ Ag mẽ tóg tag tó mũ, ha mẽ. “Topě vĩ rá to jykrén nĩ,” he tóg. “Tag vĩ rán kỹ nĩ, ha mẽ. Inh ĩn jiji vĩ tỹ Topě mré vĩ jafã nĩ, he tóg, Topě vĩ tỹ rán kỹ nĩ ki. Hã ra ãjag tóg Topě mré vĩ jafã tag krēm nén kar pigju mũgtĩ, kỹ tóg bandido ag jamã ri ke nĩ sir,” he tóg, Jesus ti. Ag pan kỹ tóg ag mẽ tó mũ.

⁴⁷ Hã ki tóg kurã kar ki ag kanhrãnrãn mũ, Topě jo ĩn krēm. Hã ra Topě tũ ki rĩr tĩ to pã'i ag mẽ tóg kórég nĩ, Topě vĩ rán tĩ ag mẽ ke gé, pã'i kar ag mẽ. Hã kỹ ag tóg ti tén ke to jykrén mũ sir.

⁴⁸ Hã ra tóg ag mẽ ki króm sór tũ nĩ. Vẽnh kar mẽ tóg mẽ sér tĩ, ti vĩ ti, hã kỹ pã'i ag tỹ ti tén sór mũ ra tóg vẽnhmỹ tĩ sir ag mẽ.

20

Ũn nỹ hỹn Jesus jẽnẽ

(Mt 21.23-27; Mc 11.27-33)

¹ Kurã kar ki Jesus tóg Topě vĩ tó jẽ nĩ, vẽn h vĩ sér ẽn, Topě jo ĩn krēm. Kỹ tóg kejẽn tá jẽ nĩ. Kỹ Topě tũ ki rĩr tĩ to pã'i ag tóg ti to kãmũ mũ, Topě vĩ to professor ag ke gé, kófa ag ke gé.

² Ti mẽ ag tóg: “ẽg tỹ ã ki jẽnẽn h há tóg tĩ,” he mũ. Kỹ tóg ag mẽ: “hej,” he mũ. Kỹ ag tóg: “ã vẽn jykre

tỹ ne tỹ tag han mũ'?" he mũ. "Û nỹ ã jẽnẽ?" he ag tóg.

³ Kỹ tóg ag mỹ: "ãjag ki sóg jẽmẽnẽh ke mũ gé, vẽnẽh kato," he mũ. "Ha mẽ.

⁴ João vỹ ag kygpég tĩ ja nĩgtĩ. Kỹ ti mỹ kanhkã tá vẽnẽh jykre han mũ', ãprã jykre vó?" he tóg. "Û nỹ ti jẽnẽ?" he tóg. "Inh mỹ tó," he tóg, Jesus ti, ag mỹ.

⁵ Kỹ ag tóg jagnẽ mré to jykrén mũ sir. "Ëg tỹ ti mỹ: "Topẽ tỹ ti jẽnẽ vẽn," hen kỹ tóg ãg mỹ: "ãjag tỹ ne jé ti vĩ kri fig tũ ja nĩ nẽn?" henh ke mũ," he ag tóg jagnẽ mỹ.

⁶ "Ëg tỹ hã ra ti mỹ: "ãprã ke jykre ja vẽn," hen kỹ vẽnẽh kar vỹ ãg pin sór ke mũ, pó tỹ, ha vemnĩ. João to ag tóg: "Topẽ vĩ tó tĩ pẽn ja vẽn," he tĩ, hã kỹ ag tóg ãg to jũnh ke mũ, ãg tỹ: "hã tũ vẽn," hen kỹ," he ag tóg mũ jagnẽ mỹ.

⁷ "Topẽ jykre han ja ti nĩ," he sór tũ ag nỹtĩ, kỹ ag tóg: "ãprã ke jykre han ja ti nĩ," he sór tũ nỹtĩ gé. Hã kỹ ag tóg Jesus mỹ: "ãg pi(jé) ki kanhró nỹtĩ," he mũ, João jykre to.

⁸ Kỹ Jesus tóg ag mỹ: "kỹ sóg ãjag mỹ ù tỹ inh jẽnẽg mũ ãn tónh ke tũ nĩ gé," he mũ. ã kato tẽn mũ ag mỹ tóg ke mũ.

*Ûn camarada kórég ag to comparação
(Mt 21.33-46; Mc 12.1-12)*

⁹ Kỹ tóg vẽnẽh kar kanhrãnrãn kỹ ag mỹ: "ãg tỹ Topẽn kato tẽn kỹ tóg ge nỹnh mũ, ha mẽ," he mũ. "Kejẽn ù tóg nĩgtĩ. Uva krãn ja tóg nĩ, nẽn kanẽ tỹ vinho han jafã ãn. Kỹ tóg ù tỹ ki rĩr tĩ ag mré to jykrén kỹ ag mỹ tovãnh mũ sir. Ag mỹ tovãnh kỹ tóg ga ù ra tĩ mũ. Hã ra tóg kãtĩg vãnẽh han mũ.

10 Ti uva kanēn kŷ tóg ag mŷ ã camarada jēnēg mŷ, ũ tŷ ki rŷr tŷ ag mŷ, ag tŷ ti mŷ ti tũ nŷm jé, ěkré kanē ěn ti. Hã ra ag tóg ti mŷ vin tũg mŷ. Ti mrãnmrãn ag tóg mŷ. Kŷ ag tóg ti mŷ: “ha tŷg,” he mŷ. Nén ũ tũ ra tóg tŷ mŷ sir.

11 Kŷ tóg ã camarada ũ jēnēg mŷ gé sir. Hã ra ag tóg ti mrãnmrãn mŷ gé. Ti mŷ féfén kar kŷ ag tóg ti mŷ: “ha tŷg,” he mŷ gé sir. Nén ũ tũ ra tóg tŷg mŷ gé.

12 Kŷ tóg ag mŷ ũ jēnē mãn mŷ gé sir, hã ra ag tóg ti mrãnmrãn kŷ ti rãnh kŷ ti tŷn mŷ sir.

13 Kŷ uva kré tŷ ũn tũn mŷ tóg to jykrén mŷ. “Inh hŷn hēn ri kenh ha,” he tóg, to jykrén kŷ. “Inh kósin jēnē jé sóg ke mŷ, inh fe pē ěn, hēn ri ke mŷn ag ti kamēg mŷ,” he tóg.

14 Ti kósin tŷ ag tá jun kŷ nén kré ki rŷr tŷ ag tóg ti vég mŷ. Kŷ ag tóg ti to jykrén mŷ, jagnē mré. “Kejēn ěkré tag vŷ tŷ ti tũ nŷnh mŷ,” he ag tóg. “Mŷ nŷ, ti tén jé, ti tũ tag tŷ tŷ ěg tũ nŷnh jé,” he ag tóg.

15 Kŷ ag tóg ró mã ra ti pére mŷ kŷ tá ti tén mŷ sir. Kŷn hŷn hē ri kenh ke mŷ', ěkré tŷ ũn tũn mŷ ěn ti'?" he tóg, Jesus ti.

16 “Kãtŷg jé tóg ke mŷ, ěkré ki rŷr tŷ ag kãgtén jé. Kŷ tóg camarada ũ ag mŷ finh mŷ sir, ã jakré ti,” he tóg, Jesus ti.

Kŷ ag tóg mēg mŷ, ti vŷ ti, ti pénŷn nŷtŷ ěn ag. Kŷ tóg ag mŷ e tŷ. “Ěg jé tag venh ke tũ nŷ,” he ag tóg mŷ, ũ tŷ Jesus vŷ mēg mŷ ag.

17 Hã ra Jesus tóg ag ki ěvãnh kŷ ag mŷ: “Topē vŷ rá tag to jykrén nŷ, ha mē,” he mŷ. “Pó tŷ ĩn han jafã fón ag tóg, pó tŷ ĩn han tŷ ag. Ag mŷ tóg kórég ja nŷ, pó ěn ti. Hã ra Topē tóg pó ěn hã tŷ ĩn nũna han mŷ,” he tóg, Topē vŷ tŷ rán kŷ nŷ ki,” he tóg, Jesus ti. Ti tŷ

ã kato vãsãnsãn mũ ag mỹ vãnh kãmén hã vễ.

¹⁸ Kĩ tóg ag mỹ: “ũ tỹ hên ri ke ag vỹ pó tag kri vár ke mũ, kĩ ag tóg kri vár kĩ tũ' henh ke mũ,” he mũ. “Kĩ pó tag vỹ ù tỹ hên ri ke ag kri kutênh ke mũ gé, kĩ tóg ag tỹ nám nám ke kãn mũ sir, ag kri kutê kĩ,” he tóg, Topê vỹ tỹ rán kĩ nĩ ki,” he tóg, Jesus ti. Ti tỹ ag tỹ ti ki rã tũ tũgrĩn nũgme ki vár ke tón hã vễ.

Êg tỹ imposto kajãm

(Mt 22.15-22; Mc 12.13-17)

¹⁹ Kĩ Topê vỹ to professor ag vỹ ti vỹ mễg mũ, Topê tũ ki rĩr tĩ to pã'i ag ke gé. Ag hã to tóg kãmén ja nĩ, “êg tỹ Topê kato vãsãn tag vỹ ge nỹnh mũ,” he mũ ên ti. Kĩ ag tóg ki kanhró nỹtĩ sir, hã kĩ ag tóg ti se sór mũ. Hã ra ag tóg ùn e ên kamễg mũ. Ti vỹ vỹ vãnh kar mỹ mẽ há tũ, hã kĩ pã'i ag tóg ti ség tũ nĩ ver, ag tỹ ti se sór mũ (hã) ra.

²⁰ Kĩ ag tóg hã ra ti tũgnỹm mũ. Ti vỹ to ag tóg vãngig mũ, ag tỹ ti vỹ to fóg tỹ pã'i mỹ ti fễg jé. Ag tỹ ti vỹ tũgnĩn fóg tỹ pã'i mág mỹ: “ha ti vóg kónãn,” he sór vễ. Hã je ag tóg ùn jykre kuryj nỹ ve ag jẻgnẻg mũ, ag tỹ ón kĩ Jesus ki jẻmẻ jẻ.

²¹ Kĩ ên ag tóg sir Jesus mỹ: “Senhor’,” he mũ. “Vãnh jykre kuryj hã tó ã tóg tĩ, hã kãmén ã tóg tĩ. Hã kĩ êprã ke ag ve tóg ã mỹ tỹ nén ù tũ nĩ. Hã kĩ ã tóg Topê japry to, Topê jamĩn to êg kanhrãn há han tĩ,” he ag tóg mũ.

²² “Kỹn mỹ há nỹ, êg tỹ fóg tỹ pã'i mág tỹ imperador mỹ jãnkamỹ ên nĩm ti, imposto kajãm jẻ? Êg mỹ hỹn nĩm mũ', nĩm ke tũ nĩ vó?” he ag tóg.

²³ Hã ra Jesus tóg ki kanhró nĩ, ag jykre rẻgre ti. Hã kĩ tóg ag mỹ: “ãjag ne tóg ón kĩ inh ki jẻmẻ sór mũ',” he mũ.

24 “Inh mǎ jǎnkamy ven. Ũ jiji nǎ kǎ nǎ? Ũ kǎggrá nǎ kǎ nǎ?” he tóg. Kǎ ag tóg ti mǎ: “pǎ'i mág kǎggrá vǎ,” he mǎ.

25 Kǎ tóg ag mǎ: “kǎ pǎ'i mág mǎ ti tǎ nǎm, jo Topǎ mǎ ti tǎ nǎm gé,” he mǎ, Jesus ti.

26 Hǎ kǎ tóg ag tǎ ti vǎ to ti senh ke tóg tǎ tǎ, ti vǎ há han kǎ. Kǎ tóg ag mǎ e tǎ, ti vǎ há tǎvǎ ěn ti. Kǎ ag tóg ti mǎ vǎ mǎn tǎ nǎ sir. Hǎ ra vǎnh kar vǎ ti vǎ mǎg nǎtǎ nǎ.

*Ũn kǎgter mǎ ag tǎ rǎnrǎ mǎn ke
(Mt 22.23-33; Mc 12.18-27)*

27 Kǎ Saduceu ag tóg ti tá junjun mǎ gé, ti ki jǎmǎ jé. Hǎ ra Saduceu ag tóg: “ěg ter ja tá ěg tóg vǎn ke mǎn ke tǎ nǎ, rǎn mǎn ke tǎ ěg tóg nǎ,” he tǎ.

28 ěn ag vǎ Jesus ki jǎmǎ sór mǎ gé, ón kǎ. Kǎ ag tóg ti mǎ: “Senhor’,” he mǎ gé. “Moisés vǎ ěg mǎ vǎnh jykre tag nǎm, hǎ vǎ: ă régre tǎ ă krǎ tǎ ra ter kǎ ă tǎ ti prǎ fi tǎ prǎg ke vǎ, he mǎ. ă tǎ ă régre mǎ ă krǎ han ke vǎ, fi ki, he tóg mǎ gé. Moisés tǎ ěg mǎ tó jan hǎ vǎ,” he ag tóg mǎ, Saduceu ag.

29 “Kǎ ũ tǎ jagnǎ mré pafa ja tǎ 7 (ke) ag vǎ nǎgtǎ. Ag kǎke vǎ prǎg mǎ, hǎ ra tóg ă kósín tǎ ra ter mǎ.

30 Kǎ ti jǎvy vǎ fi tǎ prǎg mǎ sir, hǎ ra tóg ă kósín tǎ ra ter mǎ gé.

31 Kǎ ti jǎvy ũ tóg fi tǎ prǎg mǎ gé, hǎ ra tóg ter mǎ gé, ti kósín tǎ ra. Gen kǎ ag tóg kǎgter kǎn mǎ kejěn, ũ tǎ 7 (ke) ěn ag.

32 Kǎ vǎhǎ ag prǎ fi vǎ ter mǎ gé sir.

33 Kǎ fag kǎgter ja tá rǎnrǎ mǎn kǎ fi hǎn mén tǎ 7 (ke) nǎnh mǎ vǎ. Ag kar vǎ fi tǎ prǎg ja nǎtǎgtǎ. Hǎ kǎ tóg vǎnhmǎ nǎ, ag tǎ: “rǎnrǎ mǎn jé ěg tóg ke

mũ,” hen kÿ,” he ag tóg. Saduceu ag tÿ Jesus mÿ ken hã vë.

³⁴ Kÿ Jesus tóg ag mÿ kãmén mũ. “Ëprã ke ag vÿ prÿgprÿg tĩ, kÿ fag vÿ ag tÿ mén tĩ gé.

³⁵ Ag kãmĩ ù ag tóg ãjag kãgter ja tá rĩnrĩr mãn ke mũ, ti kurã tá krÿg kÿ. Ën ag vÿ prÿg mãn ke tũ nĩ sir, mén mãn ke tũ fag tóg nĩ gé sir, ãjag rĩnrĩr mãn kÿ.

³⁶ Ter mãn ke tũ ag tóg nĩ gé, mÿr, ha mẽ, hã kÿ ag prÿg mãn ke tũ nĩ, kÿ fag mén mãn ke tũ nĩ gé. Kanhkã tãn ri ke ag nÿtĩ, Topẽ tÿ jëgnë jafã ag ri ke mÿr, ùn rĩnrĩr mãn mũ ag. Topẽ krë vÿ tÿ ag nÿtĩ sir, ag tÿ ãjag kãgter tá rĩnrĩr mãn ken kÿ.

³⁷ Rĩnrĩr mãn jé ag tóg ke mũ, ùn kãgter mũ ag, ha vemnĩ. Hã kÿ Moisés tóg Topẽ to tag tó ja nĩ, ha mẽ. Ti tÿ vanh pÿr nĩ ãn tá ti mré vëmén kar kÿ tóg Topẽ to: “Abraão tÿ ùn to: Topẽ, he mũ ãn vë, Isaque tÿ ùn to: Topẽ, he mũ ãn, Jacó tÿ ùn to: Topẽ, he mũ ãn,” he ja nĩ, Moisés ti.

³⁸ Kãgter ag huri, Abraão, Isaque, Jacó, hã ra Moisés tóg Topẽ to: “Abraão tÿ ùn to: Topẽ, he mũ ãn vë,” he ja nĩ. Ti tÿ tÿ ag Topẽ nĩn kÿ ag tóg rĩnrĩr nÿtĩ, ha mẽ, ag kãgter mũ ra. Ûn kãgter kar ag vÿ Topẽ mÿ rĩnrĩr nÿtĩ,” he tóg, Jesus ti.

³⁹ Kÿ ù tÿ Topẽ vĩ rán tĩ ù ag tóg ãg Senhor tÿ Jesus mÿ: “vĩ há han ã, ãg ter ja tá vÿn kenh ke mũ tag to,” he mũ, ti mÿ.

⁴⁰ Kÿ ù tóg ti ki jëmë mãn sór tũ nĩ sir. Ti kamëgmëg ag tóg mũ, hã kÿ ag tóg ti ki jëmë mãn sór tũ nĩ ha.

*Cristo mÿ tÿ Davi kósin nĩ, Topẽ kósin mÿ vó
(Mt 22.41-46; Mc 12.35-37)*

41 Kĩ Jesus tóg ag ki jēmēg mũ gé sir. Kĩ tóg ag mũ: “Topē vĩ rán tĩ ag ne tóg: “Cristo vĩ tỹ Davi kósin nĩ,” he tĩ,” he mũ.

42 “Hã ra Davi tóg Cristo tó ja nĩ, ti tỹ Topē jé rán kỹ. Kĩ tóg: “ĕg jóg mág tỹ Topē vĩ inh Senhor mũ tag tó ja nĩ, ha mẽ: “nĩ ra ver, inh pĕgja tá,” he ja ti nĩ.

43 “Isỹ ã kato vãsãnsãn mũ ag tỹ ã krĕm vin ke vĕ, kỹ ag sigse ri ke vĕ sir. Tag jãvãnh nĩ ver,” he ja ti nĩ, Topē ti,” he ja tóg nĩgtĩ, Davi ti,” he tóg, Jesus ti.

44 “Hã kỹ Davi tóg Cristo to: “inh Senhor,” he ja nĩ. Kỹ ti kósin mũ tỹ ti kri ke nĩ?” he tóg mũ, Jesus ti.

Hã ra ag tóg ti mũ tó tũg mũ. Ag tỹ ne tónh ke tóg tũ tĩ, ti kato tĕgtĕ mũ ag mũ.

*Ón kỹ Topē vĩ to professor ag kamĕg jé ĕg ke mũ
(Mt 23.1-36; Mc 12.38-40)*

45 Vĕnh kar tóg mĕg mũ, Jesus vĩ ti. Kĩ tóg ã mré mũ tĩ ag mũ:

46 “ón kỹ Topē vĩ to professor ag kamĕg nĩ,” he mũ. “Kur téj rĩnh ka(mĕ) ag nỹtĩ,” he tóg. “Kỹ vĕnh kar tỹ ag mũ: “ã mũ há?” hen kỹ tóg ag mũ sér tĩ, ag tỹ cidade kuju kãmĩ mũn kỹ. Vĕnh kanhrãn jafã krĕm ag tóg vĕnh kãpãm kỹ nỹtĩgtĩ. Festa ki ag tóg jĕn vén tĩ, ag tỹ tỹ pã'i nỹtĩn kỹ,” he tóg.

47 “Hã ra ag tóg ùn mén ter ja fag tũ mãn kãn tĩ. Fag tũ mãn kãn kỹ ag tóg ón kỹ Topē mré vĩ mág han mũgtĩ, ĕg tỹ ag to: “ùn há vĩ tỹ ag nỹtĩ,” he jé. Hã to ag vĕsỹrĕnh mág tãvĩ han ke mũ,” he tóg, Jesus ti. Ti tỹ ù tỹ ón kỹ Topē to há nỹtĩ ag kãmén hã vĕ.

21

Ūn mén ter ja fi tỹ ã tũ vin kãn
(Mc 12.41-44)

¹ Kĩ Jesus tóg Topẽ jo ĩn tá jẽ kỹ tãmĩ ěvãnh kỹ ũn rico ag vigvég mũ. Jãnkamy vin jafã ki ag tóg ãjag tũ vin tĩ, Topẽ mỹ, jãnkamy ti. Vin mág ag tóg mũ.

² Kỹ ũn mén ter ja fi vỹ tá jun mũ gé sir. Tỹ nén ũ tũ fi tóg nĩ, hã ra fi tóg jãnkamy kãsir régre vin mũ, Topẽ mỹ.

³ Kỹ Jesus tóg fi to: “ve ra ha,” he mũ. “Ūn rico tỹ vin kãfór han fi tóg, fi tũ sĩ (hã) ra. Tỹ nén ũ tũ fi tóg nĩ, fi mén vỹ hur ter.

⁴ Kỹ fi tóg ã tũ vin kãn ja nĩ, fi jẽn mré hã. Jãvo ũn rico ag vỹ ãjag tũ ke hã tỹ Topẽ mỹ vin mág tĩ. Hã ki fi tóg ag tỹ nĩm kãfór han, fi tỹ nĩm sĩ pẽ han mũ ra. Ki hã sóg tó mũ mỹr,” he tóg, Jesus ti.

Topẽ jo ĩn kókén kỹ nĩnh ke
(Mt 24.1-2; Mc 13.1-2)

⁵ Ěn kã ũ ag tóg Topẽ jo ĩn to vĩ há han mũ. “Sĩnvĩ pẽ ti jẽ,” he ag tóg mũ. “Tĩ pó ve ra ha, mág ti nỹtĩ. Tĩ sĩnvĩ han jafã vỹ e nỹtĩ gé,” he ag tóg.

⁶ Kỹ Jesus tóg ke mũ. “Mỹ ãjag mỹ sĩ?” he tóg. “Kejẽn tóg kókén kãn kỹ nỹnh mũ, ha vemnĩ, kỹ pó vỹ jagnẽ kri nỹtĩ mãn ke tũ nĩ ha. Gũm ke kãn jé tóg ke mũ, tag ti,” he tóg, Jesus ti.

Vẽnh jagãgtar to rã
(Mt 24.3-14; Mc 13.3-13)

⁷ Kỹ ag tóg ěg Senhor ti mỹ: “kurã tỹ ne kã ke nẽ hỹn'?” he mũ. “Ěg hỹn hẽn ri ken kỹ ti kurã ki kanhró nỹtĩnh mũ hỹn'? Topẽ hỹn ne han ke mũ, ěg tỹ kurã ěn ki kanhró nỹtĩ jé?” he ag tóg.

8 Kÿ tóg ag mÿ: “ker ù vî jëmê hê’;” he mÿ. “Û tÿ hên ri ke ag vÿ inh jiji tó kãmũnh mÿ. “Cristo vÿ tÿ inh nÿ,” he jé ag tóg ke mÿ. “Inh kurã vÿ hur jun,” he jé ag tóg ke mÿ. Ag nón mÿ tÿg nÿ.

9 Vênh génh mêmê jé ãjag tóg ke mÿ, jagnê kato vãsãnsãn mÿ ag. Kamêg tÿg nÿ hã ra. Vênh génh tÿ hên ri ke han jé ag tóg ke mÿ, kurã tÿ êgno to hã. Ti kurã kã ke pijé’;” he tóg.

10 Kÿ tóg ag mÿ: “povo ag tÿ jagnê kato vãsãnsãn ke vê, pã’i krêm ke ag tÿ pã’i ù krêm ke ag to jÿnh ke vê,” he mÿ.

11 “Ga tÿ ragrag ke jagy tÿ hên ri ke han ke vê gé, ên kã. Kÿ vjêh tóg tÿ’ henh ke mÿ gé. Vênh kaga kórég (ka)mê vÿ vênh vinven ke mÿ, ên kã sir. Nén ù vênhmÿ vÿ vênh vinven ke mÿ gé, kanhkã tá, kÿ vênh kar vÿ kanê junjur ke mÿ,” he tóg, Jesus ti.

12 “Tag to hã ag tóg ãjag sigsenh ke mÿ gé, ãjag vóg kónãn jé ag tóg ke mÿ gé, vênh kanhrãn jafã krêm ag tóg ãjag jykre vigvenh ke mÿ gé, vênh se ja kãki ag tóg ãjag vin ke mÿ gé. Pã’i mág tÿ rei ag mÿ ag tóg ãjag venven ke mÿ, pã’i tÿ governador ag mÿ ke gé, ãjag tÿ inh jyjy tó ja tugnÿn.

13 ãjag tÿ inh vî tó jé, hã jé ag tóg ãjag tÿ genh ke mÿ.

14 Ên kã ãjag tÿ nén ù tónh ke to jykrén tÿg nÿ, to krÿ kufy han tÿg nÿ gé.

15 Inh hã vÿ ãjag vÿ han ke mÿ, inh jykre nÿm jé sóg ke mÿ ãjag mÿ, ãjag tÿ ag mÿ tón jé,” he tóg. “Kÿ ag tÿ ãjag vÿ kafãn sór mÿ ra tóg ag mÿ vênhmÿ tÿnh mÿ, ha vemnÿ, ãjag kato têtê mÿ ag mÿ. Ag tÿ ne tónh ke tóg tÿ tÿnh mÿ, ha vemnÿ,” he tóg, Jesus ti.

16 “Ên kã ãjag han mÿ ên vÿ ãjag senh mÿ, ãjag

mré pafa mũ ag ke gé, ãjag mré ke ag ke gé, ãjag to há kar ag mÿr,” he tóg. “Ãjag kãmĩ ù ag kãgtén jé ag tóg ke mũ gé, ha vemnĩ.

¹⁷ Vẽnh kar vÿ ãjag to kórég tâvĩ nÿtĩnh mũ, inh jiji tigrĩn.

¹⁸ Hã ra ãjag véké vêsÿrénh ke tũ nĩ, ãjag gãnh pir vÿ fagrĩnh mÿ kutênh ke tũ nĩ, ha vemnĩ.

¹⁹ To tar nÿtĩmnĩ, ãjag vêsÿrénh ke to, kÿ ãjag tóg rĩr krÿg ja tũ ên venh ke mũ,” he tóg, Jesus ti.

*Jerusalém kókén kÿ nÿnh ke
(Mt 24.15-21; Mc 13.14-19)*

²⁰ “Kejẽn ag tóg Jerusalém jy nÿtĩnh mũ, soldado ag, ag tÿ cidade ên kókén jé. ãjag tÿ tag ve kÿ ãjag tóg ki kanhró nÿtĩnh mũ. Ag tÿ ti kókén kãn ke kurã vÿ jun ke mũ, kurã ên kã.

²¹ Kÿ vẽnũ pigju mũmnĩ, pãnónh ra, ãjag tÿ Judéia ki nÿtĩn kÿ. ãjag tÿ cidade mág tá nÿtĩn kÿ pétigtẽmnĩ, vãnũ kãra. ãjag tÿ vãnũ kãmĩ êmã kãsir ki nÿtĩn kÿ cidade ra mũ tũg nĩ.

²² Topẽ tÿ ag vóg kónãn ke kurã vẽnũ sir, ag jykre kórég to, hã kÿ tóg vãsÿ rán kÿ nĩ. Vẽnũ rá ên ve jé ãjag tóg ke mũ, kurã ên kã.

²³ Kÿ ùn kufy fag vÿ vêsÿrénh mág ke mũ, kurã ên kã, gĩr pygfãm mũ fag ke gé. Êprã ke ag vêsÿrénh mág tâvĩ han ke vẽnũ, Topẽ tÿ povo tag to jũ jagy han ke vẽnũ, kurã ên kã.

²⁴ ãjag kãmĩ ùn e tâvĩ kãgter ke vẽnũ, rógro tÿ. Kÿ ãjag kãmĩ ù ag vÿ sigse kÿ mũnh mũ, povo kar kãmĩ. Kÿ Jerusalém vÿ kókén kãn kÿ nĩnh ke mũ. Fóg ag vÿ sãnsãn ke mũ, ãjag cidade mág ti. Kejẽn fóg ag tÿ tũ'

henh ke kurã vỹ jun ke mũ gé hã ra,” he tóg, Jesus ti.

Topê kósin kătĩg mãn ke

(Mt 24.29-31; Mc 13.24-27)

²⁵ “Kurã ên kã rã vẽnhmỹn ke vễ, kysã ti ke gé, krĩg ti ke gé. Kỹ ga kri mũ ag vỹ kamẽgmẽg kãn ke mũ. Kanê junjur mág jé ag tóg ke mũ, povo kar ên ag. Kỹ goj vỹ krém ke mũ, goj kafã tũ vỹ jũnh ke mũ, ti kurã jun kỹ.

²⁶ Kỹ êprã ke ag fe vỹ vo kónãn ke mũ, ag tỹ jũrũn ke vỹ ag kãgtén ke mũ, ag tỹ ãjag tỹ nén venh ke to jũrũn ken kỹ. Ëg tỹ kanhkã tá nén vég tũ kar ên vỹ ragrag ke kãn mũ mỹr, ha mẽ.

²⁷ Kỹ vãhã vẽn h kar vỹ ti kătĩg ên venh ke mũ, êprã ke fi kósin ên ti. Kanhkã góg kãmĩ sóg kătĩg ke mũ vãhã sir. Inh ve vỹ tar nĩnh mũ, inh kătĩg mãn kỹ. Kókov kătĩg jé sóg ke mũ vãhã sir,” he tóg, Jesus ti.

Ka tỹ figueira to comparação

(Mt 24.32-35; Mc 13.28-31)

²⁸ “Ãjag tỹ isỹ ãjag mỹ nén tó mũ ên ve sĩ han kỹ ãjag kanê nĩm nĩ, ãjag krĩ ti ke gé, ti tỹ ãjag mỹ sér gy tĩn kỹ. Isỹ ãjag krenkren han ken vễ ha, isỹ kurã ên hã kã jun kỹ,” he tóg.

²⁹ Kỹ tóg ag mỹ: “inh kătĩg mãn ke vỹ ge nỹnh mũ, ha mẽ,” he mũ. “Ka tỹ figueira to ki kanhrãn nĩ, ka ù to ke gé, to comparação han kỹ,” he tóg.

³⁰ “Ti pẽ tánh kỹ, ti féj tãg han kỹ tóg kakó tĩ sir, êkré tygtánh kurã ti.

³¹ Ên ri ke ti nĩ, ãjag tỹ inh kătĩg mãn ke kurã ki kanhró nỹtĩ ti. ãjag tỹ sỹ ãjag mỹ nén tó ja ên ve kỹ

tóg kakó tãví tĩ ha, inh kãtĩg ke ti,” he tóg. “Ën kã Topẽ tỹ tỹ ěg pã'i nĩ kenh ke vẽ sir.

³² Sỹ ke há vẽ, hã kỹ sóg tag tó mũ, ha mẽ. Û tỹ nén kar ěn vég mũ ag vỹ inh kãtĩg mãn ke tag venh ke mũ, ũri, ag kãgter ke to hã,” he tóg.

³³ “Kanhkã vỹ tũ' he mũ, ga ti ke gé. Jãvo inh vỹ vỹ tũ' henh ke tũ nĩ,” he tóg, Jesus ti.

Ěg tỹ vẽn ki ěmẽn ke

³⁴ “Vẽn ki ěmẽ, ãjag tỹ vějẽn e to nug kaga tũ nĩ jé, tógá nĩnh to, ãjag tỹ kronkron to krĩ vẽnhmỹ tũ nĩ jé gé. Kỹ vějẽn to krĩ kufy han tũg nĩ gé, kur to, tag ki nén ũ kar to. Ke tũ nĩ mũ ra kurã ěn vỹ ãjag vatánh tá jun ke mũ, inh kãtĩg mãn ke kurã ěn ti.

³⁵ ãjag tỹ to vẽn kãn kỹ nỹtĩ tũ nĩn kỹ tóg ãjag mỹ sēsĩ tỹ ěgje ki kutẽ ri ke nĩ. Vẽn vatánh tá tóg ki kutẽ tĩ, jēsĩ ti. Ge ti nĩnh mũ, inh kãtĩg mãn ke ti, ga kri mũ ag kar mỹ. Ag vatánh tá sóg jun ke mũ.

³⁶ Hã kỹ ãjag kanẽ nĩm nĩ, nũr sór tũg nĩ. Inh kãtĩg kã jatu to ken hã vẽ, hã vỹ: nũr, he mũ. Topẽ mrẽ vỹ tovãnh tũg nĩ, ãjag tar nỹtĩ jé, nén ũ jagy ěn ve kỹ. Kỹ ãjag tóg ěprã ke fi kósin rĩnja tá jẽn ke mũ sir, mỹ ãg tũ nĩn kỹ, isỹ vẽn kar jykre tugnym kurã ěn kã,” he tóg, Jesus ti. Ti tỹ ag mỹ kurã tỹ ěgno kãmén hã vẽ.

³⁷ Hã ki tóg kurã kar ki Topẽ jo ĩn krêm ag kanhrãnrãn tĩ, Jesus ti. Kutyg kỹ tóg cidade tá kãkutẽ kỹ pãnónh ra tĩ tĩ, tá nũr jé. To ag tóg: Oliveiras, he tĩ, pãnónh ěn to.

³⁸ Ti tỹ kusã ki Topẽ jo ĩn tá jun kỹ ag tóg tá ti vỹ jẽnẽn kãmũ tĩ, ũ tỹ hẽn ri ke ag.

22

Ag tỹ Jesus se sór

(Mt 26.1-5; Mc 14.1-2; Jo 11.45-53)

¹ Ën kã festa tóg kakó tĩ sir. Festa ãn ki ag tóg pão ã ko tĩ, hã ra tóg jãgja tũ ja nĩgtĩ. Festa ãn jijin hã vỹ: Páscoa, he mũ.

² Kỹ Topê tũ ki rĩr tĩ to pã'i ag vỹ Jesus to jykrén mũ. Ag tỹ ti tén sór vê. Topê vỹ to professor ag vỹ ti tén sór mũ gé. Hã ra ag tóg povo kamêg mũ, kỹ ag tóg to jykrén kỹ nỹtĩ nĩ.

Judas tỹ pã'i ag mỹ Jesus ven sór

(Mt 26.14-16; Mc 14.10-11)

³ Ën kã Judas ãn, ã tỹ Iscariotes he mũ ãn vỹ jagrê vég mũ sir, Satanás tỹ. Hã ra tóg tỹ ã tỹ 12 (ke) ag kã ã nĩ, Jesus tỹ ãn vin mũ ag kã ã vỹ tỹ ti nĩ.

⁴ Ti tỹ Satanás tỹ jagrê nĩn kỹ tóg Topê tũ ki rĩr tĩ to pã'i ag venh tĩ mũ sir, soldado to pã'i ag ke gé. Ti tỹ ag mỹ Jesus ven sór vê, ag tỹ ti se jé.

Kỹ tóg tá jun kỹ ag mỹ tó mũ.

⁵ Kỹ tóg ag mỹ sér pẽ tĩ sir. Kỹ ag tóg ti mỹ jãnkamy tó mũ. Ag tỹ ti mỹ vin sór vê, ti tỹ ag mỹ Jesus ven kar kỹ.

⁶ Kỹ tóg ag mỹ: “hej,” he mũ sir. Kỹ tóg to jykrén mũ, ti tỹ ã mỹ ki króm ke to, ag mỹ: “ha ti kãgmĩ ha,” he jé, Judas ti. Ag tỹ vênh kar vatánh tá ti se sór vê. Hã kỹ Judas tóg ti tó sór mũ.

Pedro tỹ João mré festa tỹ Páscoa han

(Mt 26.17-25; Mc 14.12-21; Jo 13.21-30)

⁷ Kỹ tóg pão jãgja tũ ãn konh ke kurã tá krỹg mũ sir. Kurã ãn ki ag tóg mé tãg tãnh tĩ, ovelha tãg ãn, ag tỹ kurã tỹ Páscoa kã ko tĩ ãn.

⁸ Kÿ Jesus tóg Pedro jênêg mũ sir, João mré. Kÿ tóg ag mÿ: “ha mũjêg, mé tânjé, ovelha ên, êg tÿ kon jé,” he mũ.

⁹ Kÿ ag tóg ti mÿ: “êg hê tá ti tânjé mũ hÿn'?” he mũ.

¹⁰ Kÿ tóg ag mÿ: “ha vé,” he mũ. “Êmã mág tag ra mũjêg. Tá âjag tóg ù venh mũ. Goj vyn kÿ tóg tÿ mũ. Ên nón mũmnĩ. Kÿ ti ãn tá junjun kÿ ti nón gemnĩ.

¹¹ Kÿ ãn ki rÿr tÿ mÿ: “êg Senhor vÿ ã mÿ vênjé vÿ jênêg mũ,” hemnĩ. “Inh hÿn hê tá ovelha konh ke mũ, ãn mré mũ tÿ ag mré?” he ti, êg Senhor ti,” hemnĩ. “Mÿ ki vênjé kánkán jafã tũ?” hemnĩ.

¹² Kÿ tóg âjag mÿ ven ke mũ sir, kroggrog tÿ kynhmÿ nÿ ên ti, assoalho tÿ kynhmÿ nÿ ên ti. Éhé ti nĩ, kÿ mesa to nÿtÿ jafã vÿ tá nÿtÿ gé. Ên tá ti kãn nĩ êg mÿ,” he tóg, Jesus ti.

¹³ Kÿ ag tóg mũ mũ sir. Jesus tÿ ag mÿ tó ja ên ve kãn ag tóg mũ, kÿ ag tóg mé tânjé mũ sir, tá.

Santa Ceia

(Mt 26.26-30; Mc 14.22-26; 1Co 11.23-25)

¹⁴ Kÿ tóg ag tÿ konh ke hora tá krÿg mũ sir. Kÿ Jesus tóg tá nĩ nĩ, ti tÿ ãn vin ja ag mré hã, apóstolo ên ag.

¹⁵ Kÿ tóg ag mÿ vémén mũ sir. “Sÿ ovelha tag konh ha pẽ tóg tÿ vẽ âjag mré,” he tóg. “Sÿ ãn vêsÿrénjé ke to hã âjag mré ko sór ja vẽ,” he tóg, Jesus ti, ã mré mũ tÿ ag mÿ.

¹⁶ “Ti ko mãn ke tũ ãn nĩ ha, ha vemnĩ. Topẽ tÿ tÿ êg pã'i nĩ vÿ vênjé ven ke mũ. Ti tÿ vênjé ven ja ên kã sóg ko mãn ke mũ, kejên,” he tóg.

17 Kĩ tóg copa mǎg mũ sir. To tóg Topẽ mré vĩ mũ, kĩ tóg ag mỹ: “ha kron,” he mũ. “Ha vãnh kǎpǎm,” he tóg.

18 “Tag kron mǎn ke tũ inh nĩ ha, ke gé, ha vemnĩ. Topẽ tỹ tỹ ẽg pǎ'i nĩnh ken kĩ sóg kejẽn kron mǎn ke mũ, ha vemnĩ,” he tóg.

19 Kĩ tóg ẽmĩ mǎg mũ sir. To tóg Topẽ mré vĩ mũ. Kupǎn kĩ tóg ag mỹ vãnh pipin mũ. Kĩ tóg ag mỹ: “inh hǎ vễ,” he mũ. “Ăjag jagfy sóg vãnh fẽg ke mũ. Kĩ inh mĩ ẽkrén nĩ, ăjag tỹ pǎo tag konh ken kĩ,” he tóg, Jesus ti.

20 Ag tỹ ko kar kĩ tóg copa mǎg mũ gé. Kĩ tóg ag mỹ: “copa ki jẽ tag vỹ inh kyvẻnh ri ke nĩ,” he mũ. “Ăjag jagfy tóg inh ki kǎkutẻnh mũ, inh kyvẻnh ti. Inh jykre tǎg to ken hǎ vễ, isỹ inh kyvẻnh tugrĩn ăjag mỹ vẻnh pǎte fón jé,” he tóg.

21 “Hǎ ra ăjag kǎmĩ ũ tóg inh vatẻnh tá isẻnh ke mũ, inh kato tẻ ag mỹ. Inh mrẻ tóg mesa tag to nĩ nĩ.

22 Tĩg jẻ sóg ke mũ, sỹ tỹ ẽprǎ ke fi kẻsin nĩn kĩ. Vǎsỹ Topẽ tóg to jykrẻn ja nĩ, hǎ kĩ sóg tĩ mũ. Hǎ ra ũ tỹ isẻnh ke ẻn mỹ tóg vĩ kẻnǎn tǎvĩ han ke mũ, Topẽ ti,” he tóg.

23 Kĩ ag tóg jagnẻ mỹ ke mũ. “Ễg kǎmĩ ũ tỹ hẻ nẻ hỹn'?” he ag tóg mũ sir jagnẻ mỹ, ũ tỹ ti tẻnh ke ẻn to.

Ủ tỹ hẻ nẻ tỹ ửn mǎg nĩ

24 Ễn kǎ ag tóg jagnẻ kǎfẻr nĩ sẻr mũ. Hǎ kĩ ag tóg jagnẻ to jũ mũ.

25 Kĩ Jesus tóg ag mỹ ke mũ. “Fẻg ag pǎ'i ag vỹ ăjag krẻm ke ag mỹ vĩ tar han tĩ, kĩ ag tóg ag kri ke ag mỹ: “ẻg jẻg,” he tĩ, ag tỹ ag mỹ vĩ tar han mũ ra.

²⁶ Ag ri ke han tũg nĩ. Ājag mỹ tỹ ũn mág nỹtĩ sór mũ'? Kỹ tỹ ũn kāsir ri ke nỹtĩmnĩ jagně mré," he tóg, Jesus ti. "Ũ tỹ inh jykre ki tỹ pã'i nĩn kỹ tóg ã krēm ke ag camarada ri ke nĩnh ke mũ, ag ki rĩr kỹ.

²⁷ Kejẽn ěg tóg mesa to nỹtĩ, kỹ ũ tóg mesa ki rĩr tĩgtĩ. Ũ tỹ hẽ nỹ hỹn mesa ki rĩr tĩ'? Ag patrão mỹ', ti camarada mỹ vó? Ti camarada vỹ ki rĩr tĩgtĩ. Jo sóg ãjag ki rĩr tĩgtĩ, ãjag camarada ri ke.

²⁸ Ājag hã ne inh mré mũgtĩ'. Isovãnh ja tũ pẽ ãjag tóg nỹtĩ. Isỹ nén ũ jagy vég mũ ěn ve kãn ãjag tóg tĩ, inh mré.

²⁹ Inh panh vỹ isỹ pã'i han ke mũ, kỹ sóg ãjag tỹ pã'i han ke mũ gé, ti tỹ isỹ pã'i han kóm,

³⁰ ãjag tỹ inh mré jẽn jé tá, inh mré kron jé tá, isỹ tỹ pã'i nĩn kỹ. Kỹ ãjag tóg ãjag nĩgja kri nĩgnĩ kỹ nỹtĩnh mũ, ãjag tỹ povo tỹ Israel ag jykre vigve jé, povo tỹ 12 (ke) ěn ag," he tóg, Jesus ti.

Jesus tỹ Pedro mỹ tó

(Mt 26.31-35; Mc 14.27-31; Jo 13.36-38)

³¹ Kỹ ěg Senhor vỹ Pedro mỹ: "Simão', Simão'," he mũ. "Ha vé, Satanás vỹ ãjag to vĩ, Topẽ mỹ. Ti tỹ ãjag jykre ve sór vē. Trigo tỹ ěg tóg gren ki kākag tĩ, ěg tỹ ti fár pan jé. ěn ri ke han jé tóg ke mũ, ãjag tỹ, Satanás ti.

³² Hã ra sóg hur ã jagfy vĩ, ã tỹ inh ki rã tovãnh pẽ han tũ nĩ jé. Kỹ ã tóg kejẽn ã jykre to jykrén mãn ke mũ, ã tỹ inh jykre hã han jé. ěn kã ã tóg ã mré ke ag jyvẽn kỹ ag tỹ tar' he mũ.

³³ Hã ra Pedro tóg ti mỹ: "Senhor'," he mũ. "Ā mré sóg se kỹ jěnh mũ, ã mré sóg ter ke mũ gé," he tóg.

³⁴ Hã ra Jesus tóg Pedro mÿ: “vó,” he mũ. “Ha vé, ùri ã tóg iso: “ti ki kagtĩg sóg nĩ,” he tãgtũ han ke mũ, galo kyr to hã, ha vemnĩ,” he tóg mũ, Jesus ti.

Jesus tÿ ã mré mũ tĩ ag mÿ tó

³⁵ Kÿ tóg ag kar mÿ: “ãjag jëgnë ja inh nĩ, vãsÿ,” he mũ. “Kÿ ãjag tóg nén ù ma mũ ja tũ nĩgtĩ, sacco tũ, bolsa tũ, pën né tũ, pën to ró ën. Ën kã ãjag mÿ jagãgtar ja nÿtĩgtĩ?” he tóg. Kÿ ag tóg ti mÿ: “vó,” he mũ.

³⁶ Kÿ tóg ag mÿ: “hã ra tóg ùri ke tũ nĩgtĩ,” he mũ. “Hã kÿ ãjag jãnkamy ma mũjëg, ãjag sacon ma mũjëg, ãjag bolsa ma mũjëg. ãjag tÿ nén ù tũ nÿtĩn kÿ ãjag kur vender hemnĩ, rógro kajãm jé sir.

³⁷ Nén ù tóg iso rán kÿ nĩ, hã vÿ: ag mÿ tóg tÿ ùn jykre pãno nĩ, he mũ. Sÿ vãhã tag venh ke vë ha. Isÿ iso nén rán kÿ nĩ ën ve kãn ke vë ha, vãhã,” he tóg, Jesus ti.

³⁸ Kÿ ag tóg ti mÿ: “Senhor’,” he mũ. “Rógro régre vÿ ki nÿtĩ,” he ag tóg mũ. Hã ra tóg ag mÿ: “gen kÿ,” he mũ.

Jesus tÿ ã panh mré vĩ

(Mt 26.36-46; Mc 14.32-42)

³⁹ Kÿ tóg ã tÿ tĩ jafã ra tĩ mũ sir, hã vÿ: pãnónh tÿ Oliveira, he mũ ën ra. Ti mré mũ tĩ ag vÿ ti nón mũ mũ sir.

⁴⁰ Tá jun kÿ tóg ag mÿ: “Topë mré vĩ, ãjag tÿ ti vĩ mranh tũ nĩ jé, ãjag tÿ nén ù jagy ve kÿ,” he mũ, Jesus ti, ã mré mũ tĩ ag mÿ.

⁴¹ Kÿ tóg tĩg sĩ han mũ, kÿ tóg ã jakrĩ tÿ jëg mũ. Kÿ tóg Topë mré vĩ mũ sir.

⁴² Kÿ tóg: “panh’,” he mũ. “Mÿ ã tÿ inh vësÿrenh ke tag tÿ tũ’ he mũ jãvãnh? Hã ra isÿ ã mÿ nén to vĩ

mũ tag han tũg nĩ. Æ tỹ nén han ke mũ ãn hã han nĩ,” he tóg, Jesus ti, Topẽ mỹ.

⁴³ Kĩ Topẽ tỹ jẽnẽ jafã ù vỹ ti mỹ vẽn ven mũ sir, kanhkã tá, kĩ tóg ti tar han mũ.

⁴⁴ Hã ra tóg ã ter ke to kanẽ jur mũ, kĩ tóg Topẽ mré vĩ mãn', vĩ mãn', he mũ. Kĩ ti kãrãn vỹ kyvénh nĩ sir, kĩ tóg ga kri vẽnh kugjẽg mũ.

⁴⁵ Kĩ tóg Topẽ mré vĩ kar ã mré mũ tĩ ag to kãtĩ mũ. Hã ra ag tóg nũgnũr nỹtĩ nĩ. Krónh' krónh' he ja ag tóg nĩ, ag fe kaj tigrĩn.

⁴⁶ Kĩ tóg ag mỹ: “ãjag ne tóg nũgnũr nỹtĩ nĩ,” he mũ. “Nĩgnĩ ra, Topẽ mré vĩ, ãjag tỹ ti vĩ mranh tũ nĩ jé, ãjag tỹ nén ù jagy ve kỹ,” he tóg, ti mré mũ tĩ ag mỹ.

Ag tỹ Jesus se

(Mt 26.47-56; Mc 14.43-50; Jo 18.3-11)

⁴⁷ Ti tỹ ver tỹ vémén jẽ ra ag tóg junjun mũ sir, Judas mré hã, ù tỹ 12 (ke) ag kã ù ãn ti. Ti tỹ ag tatĩn kãtĩg hã vẽ, ù tỹ ti senh ke mũ ag. Û tỹ ag jo tĩ mũ ãn tóg sir Jesus to grẽn ke kỹ ti ki nhun ke mũ.

⁴⁸ Kĩ Jesus tóg ti mỹ: “Judas,” he mũ. “Æ ne tóg inh ki nhun ke kỹ iso: “ti hã vẽ,” he mũ', inh kato tẽ ag mỹ, inh, hã vỹ: ãprã ke fi kósin, he mũ,” he tóg, Jesus ti.

⁴⁹ Kĩ ti mré mũ ag tóg ag tỹ ti senh ke vég mũ. Kĩ ag tóg ti mỹ: “Senhor’,” he mũ. “Ëg mỹ rógro tỹ ag fynh ke tũ'?” he ag tóg.

⁵⁰ Kĩ ag kã ù tóg polícia ù fynh mũ, ti nĩgrẽg tỹ rãm ke tóg mũ, ti pẽgja tá. Topẽ tũ ki rĩr tĩ to pã'i krêm ke ù vẽ, polícia ãn ti.

⁵¹ Hã ra Jesus tóg ag mỹ: “ag vóg tũg ra, há ti nĩ,” he mũ. Kĩ tóg ti nĩgrẽg mãn kỹ to tỹ grẽn ke mũ sir.

52 Kÿ Jesus vÿ pã'i ag mré vēmén mÿ, Topě tũ ki rÿr tĩ to pã'i ag mré, Topě jo ãn ki rÿr tĩ to pã'i ag mré ke gé, kófa ag mré ke gé. Ag kar vÿ ti se kãmũ mÿ. Kÿ tóg ag mÿ: “ãjag ne tóg rógro génh kÿ iso kãmũ mÿ', ka kyv génh kÿ ke gé,” he mÿ. “Inh pi(jé) tÿ bandido nĩ,” he tóg.

53 “Kurã kar ki sóg Topě jo ãn krēm ãjag mré nĩ ja nĩgtĩ, hã ra ãjag tóg tá ise sór ja tũ nĩ, ãjag tÿ ag kamēg kÿ,” he tóg. “Hã ra tóg ũri jun, ãjag kurã ti, Japo tÿ ã tÿ nén han sór tĩ ěn han jé, ãjag tÿ. Jykre ki kuty ti nĩ, Japo ti,” he tóg, Jesus ti.

Pedro tÿ Jesus to ón

(Mt 26.57-58, 69-75; Mc 14.53-54, 66-72; Jo 18.12-18, 25-27)

54 Kÿ ag tóg ti ség mÿ sir. Ag tÿ ti pére mÿ kÿ ag tóg Topě tũ ki rÿr tĩ to pã'i mág ãn tá junjun mÿ sir.

Hã ra Pedro vÿ kuvar há tá ag nón tĩ mÿ.

55 ãn vãso tá ag tóg pĩ grug mÿ, soldado ag, kÿ ag tóg tugtón nÿtĩ nĩ. Kÿ Pedro vÿ ag mré tón nĩ nĩ sir.

56 Kÿ pã'i camarada ũ fi vÿ tá ti vég mÿ, pĩ grun ki. Kÿ fi tóg ti tugnÿm mÿ. Kÿ fi tóg ag mÿ: “ti mré tĩ ũ vĕ inh mÿ,” he mÿ.

57 Hã ra Pedro tóg: “vó,” he mÿ. “Ti ki kagtĭg sóg nĩ, jÿ,” he tóg.

58 Kar kÿ ũ tóg ti tugnÿm mÿ gé, kÿ tóg ti mÿ: “ag kã ũ vÿ tÿ ã nĩ,” he mÿ. Hã ra Pedro tóg ti mÿ: “inh hã tũ vĕ, vÿ,” he mÿ gé.

59 Tag kar kÿ, hora pir tũg kÿ hĕn ri ke mÿn ũ tóg ti tugnÿm mÿ gé. Kÿ tóg tá nÿtĩ ag mÿ: “ha vé, Galiléia tá ke vÿ tÿ ti nĩ,” he mÿ. “Inh mÿ tóg tÿ ti mré ke nĩ,” he tóg mÿ gé sir.

60 Hã ra Pedro tóg ti mÿ: “inh pi(jé) ti ki kanhró nĩ, vÿ’,” he mũ. “Ă tÿ ne tó nẽ?” he tóg mũ sir. Ti tÿ ver tó nĩ ra galo vÿ kyr mũ.

61 Kÿ ãg Senhor vÿ vêsÿjãm ãvãnh kÿ Pedro tugnÿm mũ. Kÿ Pedro vÿ to jykrén mũ sir, ãg Senhor tÿ ti mÿ nén tó ja to, hã vÿ: “iso ã tóg: “ti ki kagtÿg sóg nĩ,” he tăgtũ han ke mũ, galo kyr to hã,” he ja ãn mĩ.

62 Kÿ Pedro vÿ tá kãkutẽ mũ, kÿ tóg fÿ mág han mũ sir.

Ag tÿ Jesus vóg kónãn

(Mt 26.67-68; Mc 14.65)

63 Kÿ ù tÿ Jesus ség mũ ag vÿ ti to é he mũ sir. Ti tãnh ag tóg mũ gé sir.

64 Ti kanẽ pãg kÿ ag tóg ti kakã ki tãnh kÿ ti mÿ: “ũ nÿ ã tãnh?” he mũ. “Ă tÿ nén kar ki kanhró nĩn kÿ ã hÿn ki kanhró nĩ,” he ag tóg ti mÿ.

65 Gen kÿ ag tóg ti mÿ vĩ kónãn tÿ hãn ri ke han mũ, ti to é he kÿ.

Pã'i ag tÿ Jesus ki jẽmẽ

(Mt 26.59-66; Mc 14.55-64; Jo 18.19-24)

66 Tÿ vaj kÿ kófa kar ag tóg vãnh mãn mũ, Topẽ tũ ki rĩr tĩ to pã'i ag mré hã, Topẽ vĩ to professor ag mré hã. Ag vãnh mãn kÿ ag tóg ti jé prér kÿ ag rĩnja tá ti fẽg mũ sir, ag tÿ ón kÿ ti jykre ve jé. Ag tÿ ti tén sór vẽ, hã ra ag tóg ón kÿ ti jykre ve vén sór mũ.

67 Hã kÿ ag tóg ti mÿ: “ã mÿ tÿ Cristo nĩ?” he mũ. “Ha ãg mÿ tó,” he ag tóg. Kÿ tóg ag mÿ: “ãjag pi(jé) inh vĩ kri fig tĩ', isÿ ãjag mÿ tó tĩ (hã) ra',” he mũ.

68 “Isÿ ãjag ki jẽmẽ sór mũ ra ãjag tóg inh mÿ tó tũ nĩ gé. Kÿ ãjag tóg isovãnh tũ nĩ gé,” he tóg.

69 “Hã kÿ ãprã ke fi kósin vÿ Topẽ pẽgja tá nÿnh ke mũ ha. Topẽ vÿ tar nÿ. Sÿ ti pẽgja tá nÿnh ken vẽ ha,” he tóg.

70 Kÿ ag tóg ti mÿ ke kãn mũ. “Kÿ ã mÿ tÿ Topẽ kósin nÿ?” he ag tóg mũ ti mÿ. Kÿ tóg ag mÿ: “ki hã ãjag tóg tó mũ,” he mũ. “Inh hã vẽ,” he tóg ag mÿ, Jesus ti.

71 Kÿ ag tóg: “ti kato vÿ ù jẽmẽ mãn ke tũ ãg nÿ ha,” he mũ, jagnẽ mÿ. “Ti jẽnky ki kutẽ mẽ ãg tóg huri. Topẽ to vÿ kónãn ti huri. Ti ter ke vẽ,” he ag tóg mũ sir, pã'i ag, Jesus to.

23

Pilatos tÿ Jesus ki jẽmẽ

(Mt 27.1-2, 11-14; Mc 15.1-5; Jo 18.28-38)

1 Hã ra tá ke kar ag vÿ Jesus pére mũ mũ, fóg tÿ pã'i tÿ Pilatos mÿ.

2 Tá ag tóg ti kato vÿ mũ sir, kÿ ag tóg Pilatos mÿ: “vẽnh kar krÿn kónãn han tóg tÿ, ag tÿ vẽn jykre há tovãnh jé,” he mũ. “Kÿ tóg ag mÿ: “pã'i mág tÿ imperador mÿ imposto nÿm tũg nÿ,” he tÿ gé. Kÿ tóg veso: “tÿ inh Cristo nÿ, pã'i mág tÿ rei ti,” he tÿ gé,” he ag tóg mũ, Jesus to.

3 Kÿ Pilatos tóg ti mÿ: “ã mÿ tÿ Judeu ag pã'i tÿ rei nÿ?” he mũ. Kÿ tóg ti mÿ: “ki hã ã tóg tó mũ,” he mũ, Jesus ti.

4 Kÿ Pilatos vÿ ag mÿ kãmén mũ, Topẽ tũ ki rÿr tÿ to pã'i ag mÿ, povo kar mÿ ke gé, kÿ tóg: “ti tÿ nèn ù kórég han ja vég tũ sóg nÿ, ti ki,” he mũ.

5 Hã ra ag tóg ti tovãnh jãvãnh pẽ nÿtÿ. Kÿ ag tóg ti mÿ: “hã ra tóg vẽn kar krÿ rÿg tÿgtÿ,” he mũ. “Ga tÿ Judéia kar mÿ tóg tÿg ja nÿ, ga tÿ Galiléia mÿ ke gé,

tag mĩ ke gé. Tĩg kũ tóg vėnh kar krĩn kónãn tĩ,” he ag tóg ti mĩ, pã'i ag.

Herodes tỹ Jesus ki jēmē

⁶ Kũ Pilatos vỹ ga tỹ Galilėia tag to jykrén mũ, kũ tóg: “ti mĩ tỹ Galilėia tá ke nĩ?” he mũ.

⁷ Kũ ag tóg ti mĩ: “hỹ,” he mũ. Hã ra Herodes vỹ tỹ ga tỹ Galilėia tá pã'i mág nĩ. Hã kũ Pilatos tóg ti hã mĩ ti jėnėg mũ. Ĕn kã tóg Jerusalém tá nĩ gé, Herodes ti.

⁸ Kũ tóg Herodes tá jun mũ sir. Ti tỹ ti ve kũ tóg ti mĩ sér tĩ. Ti tỹ ti ve sór ja vė. Ti kãme mē ja tóg nĩ, hã kũ tóg ti ve sór ja nĩgtĩ, Herodes ti. “Hėn ri ke mũn tóg nén ũ han vãnh han ke mũ, sỹ ve jé,” he tóg.

⁹ Jesus tỹ ti ki jun kũ Herodes tóg ti ki jēmē sór mũ, nén tỹ hėn ri ke ki, hã ra tóg ti mĩ vĩ tũg mũ.

¹⁰ Hã ra pã'i ag vỹ tá nỹtĩ nĩ, kũ ag tóg ti kato vĩ mág han mũ sir, Topē vĩ to professor ag ke gé. Hã ra Jesus tóg ag mĩ vĩ tũg mũ gé.

¹¹ Kũ Herodes vỹ ti to é he mũ gé, ti mré ke kar ag ke gé, kũ ag tóg ti nyg mũ sir. Kur kupri pē tỹ tóg ti kri fón mũ, ón kũ. Kũ tóg Pilatos mĩ ti jėnē mãn mũ sir.

¹² Kurã Ĕn kã Pilatos vỹ Herodes mĩ vĩ há han mũ. Jagnė to há' he mãn ag tóg mũ ha. Ag tỹ Jesus ve jo ag tóg jagnė kato tē ja nĩgtĩ.

Ag tỹ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kũ Pilatos vỹ Topē tũ ki rĩr tĩ to pã'i ag jé prěr mũ sir, pã'i kar ag ke gé.

¹⁴ Kar tóg ag mĩ: “ãjag ne inh mĩ ti fėg!,” he mũ, “kũ ãjag ne ti to: “vėnh kar krĩn kónãn tóg tĩ,” he mũ'.

Ājag rīnve sóg ti ki jēmē huri, hã ra sóg ve ja tũ nĩ, ājag tỹ ti to nén tó ja ti. Nén ũ kórég han ja tũ tóg nĩ.

¹⁵ Kĩ Herodes vỹ vég tũ nĩ gé. Sỹ ti mỹ ti jēnē ja vē, ājag ke gé. Hã ra tóg inh mỹ ti jēnē mãn mũ gé. Ēg hẽ ri ken kũ ti tén mũ hỹn'?' Sỹ ki kagtĩg tóg tĩ.

¹⁶ Hã kũ sóg ti mrãnmrãn kar ti tovãnh ke mũ," he tóg, Pilatos ti.

¹⁷ Festa tỹ Páscoa ki tóg ag mỹ vēse pir tovãnh tĩ, prỹg kar ki. Ti jykren hã vē. Hã kũ tóg: "Jesus tovãnh jé sóg ke mũ," he mũ.

¹⁸ Hã ra vēnh kar ag tóg vãhã prēnprēr mũ sir. "!.Ti tén ra..!" he ag tóg mũ. "!.Barrabás tovãnh ra..!" he ag tóg.

¹⁹ Barrabás vỹ vēnh génh to se kũ jẽ nĩ. Cidade tá tóg vēnh génh han ja nĩgtĩ, ěn kã tóg ũ tén ja nĩgtĩ, hã to tóg se kũ jẽ nĩ.

²⁰ Kũ Pilatos vỹ ag mỹ vĩ mãn mũ. Ti tỹ Jesus tovãnh sór vē, hã kũ tóg ag mỹ vĩ mãn mũ.

²¹ Hã ra ag tóg prēnprēr kũ: "!.cruz to ti sã, cruz to ti sã..!" he mũ.

²² Kũ tóg ag mỹ vĩ tãgtũ han mũ gé, Pilatos ti. "Ti kórég tỹ ne han ti? Sỹ vég tũ tóg tĩ. Ti tỹ ne to ter ke nē? Sỹ ki kagtĩg tóg tĩ. Hã kũ sóg ti mrãnmrãn kar kũ ti tovãnh ke mũ," he tóg.

²³ Hã ra ag tóg prēnprēr tãvĩ han mũ sir, hã kũ ag tóg ti kutãn mũ. Ti mỹ ag tóg: "!.cruz to ti sã..!" he tãvĩ han mũ. Kũ tóg ag prēnprēr to ag mỹ han sór mũ sir.

²⁴ To tóg jykren mũ, kũ tóg ag mỹ: "hej," he mũ, ag tỹ ti kutãn to.

²⁵ Kũ tóg ũ ěn tovãnh mũ sir, ũ tỹ vēnh génh to se kũ jẽ ěn ti, ũ tỹ ũ tén ja ěn ti. Ag tỹ ũ to vĩ mũ ěn

tovãnh tóg mũ sir. Kĩ tóg ag mũ Jesus ti fêg mũ sir, ag tỹ ti ki han sór mũ ên han jé.

²⁶ Kĩ ag tóg ti pére mũ mũ, cruz to ti sa jé.

Jesus tỹ cruz to sa

(Mt 27.32-44; Mc 15.21-32; Jo 19.17-27)

Ag mũn kĩ ag tóg ù kãtĩg vэг mũ. Êpỹ tá tóg kãtĩ mũ, ti jijin hã vỹ: Cirene tá Simão, he mũ. Ti kri ag tóg Jesus cruz ti fig mũ, ti tỹ ti jo va tĩg jé, ti nón.

²⁷ Kĩ ù tỹ hên ri ke ag vỹ Jesus nón mũ mũ, ùn tỹtá fag ke gé. Ên fag vỹ vêsỹrénh mũ, kygfỹ mág han fag tóg mũ sir.

²⁸ Hã ra Jesus tóg vêsỹjãm êvãnh kĩ fag mũ vĩ mũ. “Jerusalém tá ke',” he tóg. “Ijé kygfỹ tũg nĩ,” he tóg. “Vênh jé kygfỹmnĩ, ãjag krê jé kygfỹmnĩ,” he tóg fag mũ.

²⁹ “Ha vé, kurã kórég pẽ vỹ jun ke mũ ãjag mũ. Ên kã ag tóg tag tónh ke mũ, ha mẽ: “ùn kurĩ fag mỹn pãgsĩ nĩnh mũ, fag tỹ ãjag krê ter vэг tũ nĩn kĩ. ùn krê tũ fag mỹn pãgsĩ nĩnh mũ, ù tỹ gĩr pafãm tũ fag mũ ke gé,” he jé ag tóg ke mũ.

³⁰ Ên kã ag tóg pãnónh mỹ: “inh kri tỹ tam ké,” henh ke mũ gé, kĩ ag tóg sór mỹ: “inh péju ra, vênh krêm,” henh ke mũ gé.

³¹ Êg kato tẽ ag tỹ ka tánh gỹn kĩ ag hỹn ka tóg tovãnh ke tũ pẽ nĩ. Ka tánh ên ri ke sóg nĩ, jo ãjag vỹ ka tóg ri ke nỹtĩ. Hã kĩ ãjag tóg inh vêsỹrénh kãfór venh ke mũ, ha vemnĩ,” he tóg, Jesus ti. Jerusalém fĩn rãm kĩ tóg ke mũ.

³² Ag tỹ Jesus pére mũn kĩ ag tóg ùn régre ag pére mũ mũ gé, ùn jykre pãno ag. Ag tỹ ka to ag sanh ke vẽ gé.

33 Kÿ ag tóg pãnonh tá junjun mũ sir, ti jyjyn hã vỹ: Krĩ Kuka, he mũ. Tá ag tóg cruz to ti sãg mũ sir. Ûn jykre pãno tỹ ag tóg cruz to sãg mũ gé, ti kóm, kỹ ù vỹ ti pẽgja tá sa, jo ù vỹ ti jakãnh tá sa.

34 Kÿ Jesus vỹ: “panh’,” he mũ. “Ag mỹ vẽn h pãte fón nĩ,” he tóg. “Ag pi(jé) ki kanhró nỹtĩ’, ag tỹ nén han mũ tag ti’,” he tóg.

Kÿ soldado ag tóg ti kur tỹ jagnẽ mỹ tỹ vẽn ken jé to jogar he mũ sir.

35 Kÿ vẽn e ag vỹ tá vég nỹtĩ. Hã ra pã'i ag tóg ti nyg mũ. Kÿ ag tóg jagnẽ mỹ: “ũ ag krenkren han ja tóg nĩgtĩ,” he mũ. “Cristo jé vẽn kren han, Topẽ tỹ ti fẽg ja nĩn kÿ, ti tỹ ti kuprẽg ja nĩn kÿ, hã ra tóg vẽn kren han ki kagtĩg nĩ,” he ag tóg mũ, Jesus to é he kÿ.

36 Kÿ soldado ag vỹ ti nyg mũ gé. Ti rã hã nỹtĩn kÿ ag tóg ti mỹ vinagre ven mũ sir.

37 Kÿ ag tóg: “ã mỹ tỹ Judeu ag pã'i mág nĩ’?” he mũ. “Vẽn kren han ra, ã tỹ tỹ pã'i nĩn kÿ,” he ag tóg mũ ti mỹ, ti to é he kÿ.

38 Hã ra ag tóg rán ja nĩ gé, ti tỹ cruz to sa kÿ jẽ ãn ti. Ti to rán hã vẽn, hã vỹ: “Judeu ag pã'i mág tỹ rei hã vẽn,” he mũ. Ti kri tóg cruz to sa gé, ãn rá ti.

39 Kÿ ti kóm cruz to sa ù tóg ti mỹ vĩ mũ gé, ùn jykre pãno ãn. Ti to tóg é he mũ gé. Kÿ tóg ti mỹ: “ã mỹ tỹ Cristo nĩ’?” he mũ. “Vẽn kren han ra, kÿ ãg krenkren han gé,” he tóg mũ gé.

40 Hã ra ti kóm cruz to sa ù ù tóg ti mỹ vĩ jũ han mũ, ù tỹ Jesus mỹ vĩ kónãn mũ ãn mỹ. Kÿ tóg ti mỹ: “kÿ ã mỹ Topẽ kamẽg tũ’?” he mũ. “Vẽsÿrénh ã tóg mũ gé, ti kóm.

41 Ęg tỹ ěg tỹ nén han ja kajãm vĕ jãvo, ěg jykre pãno to ěg vĕsřrénh nřtĩ nĩ. Ęg jãvo tóg jykre kuryj nĩ. Ti pi(jé) nén ũ kórég han ja nĩ!” he tóg.

42 Kř tóg Jesus mř: “Senhor,” he mũ. “Inh ki ěkren nĩ, ã tỹ tỹ pã'i ki rãn kř,” he tóg mũ, Jesus mř.

43 Kř Jesus tóg ti mř: “ha mẽ, ũri ã tóg inh mré nřnh mũ, ěmã há ěn tá, Paraíso he mũ ěn tá, kanhkã tá. Ki hã sóg tó mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

44 Kejěn rã tóg ěg nĩno kã sa mũ sir. Hã ra tóg kuty' he mũ sir, ga kar mĩ hã. Kuty ěn tóg hora tãgtũ han mũ.

45 Kř rã vř nhyn ke mũ sir. Topĕ jo ĩn krĕm kur tỹ jãnkã mág pĕ vř kã sa nĩ. Ęn vř jaran ke mũ. Kuju mĩ tóg jaran ke kãtére mũ sir, řĩn rãm kãn tóg mũ.

46 Kř Jesus vř prĕr mág pĕ han mũ. Kř tóg: “!..panh'..!” he mũ. “!..Sř ã mř vĕnh řĕg vĕ, inh kupřĩg ti..!” he tóg. Tag tó kar tóg hun ke mũ sir.

47 Hã ra fóg tỹ capitão tóg ti ter vĕg mũ. Kř tóg Topĕ mř vř há han mũ. “Vĕnh vř há ja vĕ, ũn há ja vĕ,” he tóg mũ.

48 Kř vĕnh e ěn vř ti ter vĕg mũ gé. Kř ag tóg ãjag tỹ nén han ja to jykrén mũ sir. Vãhã tóg ag mř e řĩ. “Topĕ hřn ěg tỹ hĕ ri kenh mũ, ěg tỹ ti tén kř?” he ag tóg mũ sir. Tag tó kř ag tóg ãjag ĩn ra vřnvřn ke mũ.

49 Hã ra ti to há kar ag vř ti vĕg nřtĩ nĩ, kakó ki, ũn tãtã fag ke gé. Galilĕia tá ke fag tóg ti mré kãmũ ja nřgtĩ gé. Ti ter ve kãn fag tóg mũ sir.

Ag tỹ vĕnh kej tá Jesus řĩ

(Mt 27.57-61; Mc 15.42-47; Jo 19.38-42)

⁵⁰ Kÿ ù tóg tá nĩ gé, vënh jyvën tĩ ù, ha mẽ, ti jijin hã vÿ: José, he mũ. Judeu ag tÿ cidade tÿ Arimatéia tá ke ti nĩ. Jykre kuryj tóg nĩ, jykre há.

⁵¹ Ti pi(jé) ag tÿ Jesus tén ke to: “hej,” he ja nĩgtĩ', ag tÿ Jesus to jykrén kÿ. Topẽ tÿ tÿ ãg pã'i nĩnh ke ve sór tóg mũ gé.

⁵² Ën vÿ Pilatos venh tĩ mũ. Kÿ tóg ti mÿ Jesus to vĩ mũ, ti ter kar kÿ.

⁵³ Kÿ tóg cruz to ti kãtérem mũ, kÿ tóg kur há tÿ ti pãg mũ sir. Kÿ tóg pãró nor kãki vënh kej kãkã ti fig mũ. Vënh kej tãg vë, ag pi(jé) kãkã ù fi ja nĩgtĩ ver'.

⁵⁴ Hã ra sexta-feira vë sir, vënhkán ke kurã ki rã tóg nÿ ha, sábadó ki.

⁵⁵ Kÿ ùn tÿtá fag vÿ ag nón mũ mũ, ti kej ve jé, ag tÿ ti finh mũ ja tá. Ti mré Galiléia tá kãmũ ja ãn fag vë, ù tÿ ti fi han vég mũ fag.

⁵⁶ Ve kar kÿ fag tóg kyrãgrã kÿ nén ger há han mũ sir, ti tãg jafã ti, ti to tĩn jé. Hã ra fag tóg vënhkán mũ ver, vënhkán ke kurã kã, Topẽ vĩ ki króm jé.

24

Jesus rĩr mãn

(Mt 28.1-10; Mc 16.1-8; Jo 20.1-10)

¹ Kÿ semana kurã ve tóg tá krÿg mũ sir. Kÿ fag tóg kusã pẽ ki ti kej tá venh mũ mũ. Vëser ger há han jafã ãn ma fag tóg mũ mũ, fag tÿ han ja ãn ti, ti kej ra mũn kÿ.

² Hã ra pó ãn tÿ ti kej nĩfénh kã nĩ ãn vÿ kunũnh kÿ nĩ nĩ. Hã vég fag tóg mũ.

³ Kÿ fag tóg ti kej tá junjun kÿ ra ge mũ, hã ra fag tóg vég tũ nĩ, vëser ti, Jesus ti, ãg Senhor ti.

4 Kÿ tóg fag fe kaj tĩ sir, fag tÿ ti vég tũ nĩn kÿ. Kÿ vãhã ùn régre ag vÿ kãge mũ, kur kupri rĩnh kÿ, kur kókov, Topê tÿ jênê jafã ag.

5 Kÿ fag tóg kanê junjur mũ sir, kÿ fag tóg êprã êvãnh mũ. Hã ra ag tóg fag mÿ: “ãjag ne tóg vëser jãvãnh mũ', ti rĩr ja (hã) ra',” he mũ.

6 “Ki ti tũ nĩ, rĩr ti jê ha. Hã kÿ tóg ãjag mÿ tó ja nĩgtĩ, ãjag tÿ Galiléia tá nÿtĩ ên kã.

7 Kÿ tóg ãjag mÿ: “êprã ke fi kósin ên fêg jé ag tóg ke mũ, ù tÿ Topê vĩ mranh tĩ ag mÿ,” he ja nĩ. “Ka to ag ti sanh ke mũ, hã ra tóg kurã tăgtũ ki rĩr mãn ke mũ,” he ja tóg nĩgtĩ, Jesus ti, vëso,” he ag tóg mũ, Topê tÿ jênê jafã ag.

8 Kÿ fag tóg Jesus tÿ nén tó ja ên mĩ êkrén mãn mũ sir.

9 Kÿ fag vÿ ti kej tá kãpa kÿ mũ mũ sir, ù tÿ 11 (ke) ag mÿ tó jé, ti mré mũ tĩ kar ag mÿ ke gé.

10 Maria Madalena fi vë, kar kÿ Joana fi ke gé, Maria ù fi ke gé, Tiago mÿnh tag fi, ù fag ke gé, fag mré. Fag hã ne Jesus tÿ ùn vin mũ ag mÿ kãmén mũ, apóstolo ag mÿ.

11 Hã ra tóg ag mÿ tÿ vënh ó nÿ ve nĩ, hã kÿ ag tóg kri fi ja tũ nĩgtĩ, fag vĩn kri.

12 Kÿ Pedro vÿ jê kÿ ti kej ra vënh vãg tĩ mũ. Pãnh ke tóg, kÿ tóg ki êvãnh mũ, kÿ tóg ti kur tăvĩ vég mũ sir, ti pãg ja ti. Kÿ tóg ti mÿ e tĩ. Tĩ tÿ to jykrén tũ tóg tĩ sir. Kÿ tóg tĩg mãn mũ.

*Ag tÿ Emaús ra mũ
(Mc 16.12-13)*

13 Kÿ vãhã ag kã ù ag tóg mũ mũ, kurã ên kã, ùn régre ag. Êmã sĩ ra ag tóg mũ mũ. Jerusalém tán

kakó nĩ, 10 (ke) quilômetros hỹn. Ěmã ěn jyjyn hã vỹ: Emaús, he mũ.

¹⁴ Ag mũn kỹ ag tóg jagně mré vēmén mũ sir, ãjag tỹ nén ve ja kar ěn to.

¹⁵ Ag tỹ vēmén nỹtĩ ra, ag tỹ jagně mré tỹ vēmén mág han nỹtĩ ra Jesus tóg ag tá jun kỹ ag mré tĩ mũ.

¹⁶ Hã ra ag tóg ti ki kagtĩg mũ, ag tỹ ti vég mũ (hã) ra.

¹⁷ Kỹ Jesus tóg ag mỹ: “ãjag tỹ ne tó ně?” he mũ. “Vēmén mág ãjag tóg mũ nĩ,” he tóg. Kỹ ag tóg krỹg he mũ sir, ve ũ han ag tóg mũ, ãjag fe kaj tugnĩn.

¹⁸ Kỹ ũ tóg ti mỹ tó mũ. Cleopas he mũ ěn tóg ti mỹ: “kỹ ã mỹ męg tũ?” he mũ. “Ũ tỹ festa venh kãmũ ja ag vỹ mẽ kãn. Ā hã mỹ ã pir mỹ męg tũ, ěg tỹ nén ve ja ti, ã tỹ Jerusalém kã nĩ (hã) ra?” he tóg ti mỹ.

¹⁹ Kỹ tóg ag mỹ: “ne ně?” he mũ. Kỹ ag tóg ti mỹ: “Jesus ti,” he mũ. “Nazaré tá ke vě. Topě vĩ tó tĩ vě. Ěg tỹ nén han vãn hyn han ja tóg nĩgtĩ. Topě vĩ tó há han ja tóg nĩgtĩ, kỹ Topě vỹ ti mré han tĩ, milagre kar ti. Kỹ povo kar ag vỹ vég tĩ, kỹ tóg ěg kar mỹ e tĩ.

²⁰ Kỹ Topě tũ ki rĩr tĩ ag vỹ ti fěg, ěg pã'i kar ag, fóg tỹ pã'i tỹ ti tén jé, cruz to ti sa jé, hã kỹ tóg tũg mũ.

²¹ Ěg tỹ ti ve kỹ ěg tóg ti to: “ti hỹn ěg povo tỹ Israel ag krenkren han ke mũ,” he mũ vě. Hã ra tóg ter ja nĩ. Ũri tóg kurã tãgtũ han, ti ter kri,” he ag tóg, Jesus mỹ.

²² “Kỹ ěg kã ũ fag vỹ ěg mỹ nén ũ tó gé, kỹ tóg ěg mỹ e tĩ gé. Kusã pě ki fag tóg ti kej ra mũjěg.

²³ Hã ra fag ti vég tũ nĩ, ti tỹ tá nỹ tũ nĩn kỹ. Kỹ

fag tóg: “nén nē ve ěg,” he mũ gé. Topě tỹ jěně jafã něji, kỹ tóg něji fag mỹ: “rĩr ti jě nĩ,” hé.

²⁴ Kỹ ěg kã ũ ag vỹ ra mũ mũ, ti kej ra, kỹ ag tóg vég mũ gé, fag tỹ nén tó ja ti. Hã ra ag tóg ti vég tũ pě nĩ,” he ag tóg, Jesus mỹ, ag tỹ ti ki kagtĩg nỹtĩn kỹ.

²⁵ Kỹ ũ tỹ ag mré tĩ mũ ěn tóg ag mỹ: “ãjag tỹ ne jé vãsỹ Topě vĩ tó tĩ ag vĩ kri fi ja tũ nĩ nē?” he mũ. “Krĩ tũ ãjag nỹtĩ, to jykrén há han tũ ãjag tóg nỹtĩ,” he tóg.

²⁶ “Cristo vėsỹrénh ke vễ, vėsỹrénh kar kỹ tóg tỹ ũn mág nĩnh mũ vãhã,” he tóg.

²⁷ Kỹ tóg ag mỹ vễnh rá kãmén kãn mũ sir, Moisés tỹ rá ti, Topě vĩ tó tĩ ag kar tỹ rá ti, ag tỹ Jesus to rãn ja ti.

²⁸ Ag mỹ kãmén tĩ ki tóg ěmã ěn tá jun mũ sir. Ag mré tá jun kỹ tóg mã ra tĩg mũ ve nĩ.

²⁹ Kỹ ag tóg ti kógfyn mũ sir, kỹ ag tóg: “ěg mré nĩ,” he mũ. “Rãké tóg nỹ ha, kutyg ke rã tóg nỹ ha,” he ag tóg mũ sir. Kỹ tóg ag mré kãra rã mũ, ag mré nĩ jé.

³⁰ Kỹ tóg ag mré jěn ke mũ gé sir. Ag mré jěn ke kỹ tóg pão mãg mũ, ěmĩ ti. Kỹ tóg Topě mré vĩ mũ, kar tóg kupãn kỹ tỹ vễnh ken mũ.

³¹ Kỹ ag tóg ti ki kanhrãn mũ sir vãhã. Ti ve há han ag tóg mũ sir. Hã ra tóg ki tũ nĩ ha, ti ve mãn tũ ag tóg nĩ sir.

³² Kỹ ag tóg jagně mỹ: “ti tỹ ěg mré vēmén kỹ tóg ěg fe ki rã,” he mũ. “Ěg mỹ tóg ã to rãn ja ěn kãmén kãn, ěg mũn kỹ. Hã ja vễ,” he ag tóg mũ jagně mỹ.

³³ Kỹ ag tóg vėsỹmér Jerusalém ra vỹnvỹn ke mũ sir. Tá ag tóg ũ tỹ 11 (ke) ag vég mũ, ag mré ke ũ ag mré hã.

34 Hã ra ên ag tóg ag mÿ: “êg Senhor vÿ rÿr mãn,” he vén mÿ. “Simão Pedro mÿ tóg vênh ven, mÿr, ha mẽ,” he ag tóg mÿ sir.

35 Kÿ ag tóg ag mÿ: “hÿ, ti ve êg ke gé,” he mÿ gé. Kÿ ag tóg ag mÿ ãjag tÿ nén ve ja ên tó mÿ sir, ag tÿ ãjag mÿ ki ti ve ja ti, ti tÿ ag mÿ êmÿ kupãn ja ti ke gé. “Hã ki êg tóg ti ki kanhró nÿtÿ, êmÿ kupãn ja ki,” he ag tóg mÿ.

Jesus tÿ vênh kar ên mÿ vênh ven

(Mt 28.16-20; Mc 16.14-18; Jo 20.19-23; Hk 1.6-8)

36 Ag tÿ ver tÿ vémén nÿtÿ ra Jesus tóg ag mré jê mÿ vâhã, ti tÿ hê tá kãrãnh ke tũ nÿ ra. Kÿ tóg ag mÿ: “mÿ sér nÿtÿmÿnÿ,” he mÿ.

37 Hã ra ag tóg jÿrÿnrÿn ke mÿ sir. Ti kamêg ag tóg mÿ. “Vênh kuprÿg hÿn,” he ag tóg mÿ, Jesus to.

38 Kÿ tóg ag mÿ: “ãjag ne tóg jÿrÿnrÿn ke mÿ,” he mÿ. ãjag tÿ ne jé: “vênh kuprÿg hÿn,” he nê?” he tóg.

39 “Inh nÿgé ve ra, inh pên ve ra, inh hã vê,” he tóg. “Inh mẽgmẽ ra, ve há han ra. Vênh kuprÿg pi(jé) fár nÿ', ti pi(jé) kuka nÿ'. Inh fár ve ra, inh kuka ti,” he tóg.

40 Vÿ kÿ tóg ag mÿ ã nÿgé ven mÿ, ã pên ke gé.

41 Hã ra tóg ver ag mÿ e tÿ, ag fe tÿ mrin ke pẽ han kÿ, kÿ tóg ver ag tÿ ki kagtÿg tÿ. Hã kÿ tóg ag mÿ: “mÿ ki vêjên tũ?” he mÿ.

42 Kÿ ag tóg ti mÿ pirã nÿm mÿ, mÿg mré.

43 Kÿ tóg mãn kÿ ko mÿ, ag rÿnve.

44 Kÿ tóg ag mÿ: “hã tó ja inh nÿ, ãjag mÿ, iser to hã, isÿ ãjag mré nÿgnÿn kã,” he mÿ. “Vâhã sóg ve kãn ja nÿgtÿ, ag tÿ iso nén rán ja ti, Moisés ti, ti tÿ ãjag mÿ vênh jÿkre nÿm jan ki, kar kÿ Topẽ vÿ tó tÿ ag kar tÿ

nén rán ja ki ke gé, Topě to jãn ki ke gé. Sỹ nén ven jan hã vễ,” he tóg, ã mré mũ tĩ ag mỹ.

⁴⁵ Kĩ tóg ag mỹ kãmén há han mũ sir, hã kĩ ag tóg ti to nén rán ja ki kanhrãn kãn mũ sir, to jykrén há han ag tóg mũ sir; ti tỹ ag nĩgrêg róm kỹ.

⁴⁶ Kĩ tóg ag mỹ: “tag vỹ rán kĩ nĩ, ha mẽ,” he mũ. “Hã kĩ Cristo vỹ vễsýrénh, kĩ tóg rĩr mãn gé, ã ter kar kĩ, kurã tãgtũ tũg kĩ. Tag ve kãn sóg huri,” he tóg.

⁴⁷ “Kỹ tóg rán kĩ nĩ gé, ù ag tỹ vễnh kar mỹ inh kãmén ke ti. Inh jijin tó jé ag tóg ke mũ, ag tỹ vễnh kar mỹ: “ãjag jykre si tovãnh ra,” henh ken kĩ, ù tỹ inh vĩ tó tĩ ag. “Tovãnh kĩ Topě tóg ãjag mỹ vễnh pãte fón ke mũ, ãjag tỹ ti vĩ mranh ja ti,” he jé ag tóg ke gé. Povo kar mỹ ag tóg tónh ke mũ, hã ra ag tóg tag ki tó vén ke mũ, Jerusalém ki. ãjag to ken hã vễ. Inh kãmén jé ãjag tóg ke mũ.

⁴⁸ Ve kãn ãjag tóg mỹr, hã kĩ ãjag tóg tónh ke mũ.

⁴⁹ Ha mẽ, inh panh vỹ ãjag mỹ nén ù tó ja nĩ, ãjag tỹ venh ken jé. Ēn jẽnẽ jé sóg ke mũ ãjag mỹ. Hã kĩ tag ki nỹtĩmnĩ ver, cidade tỹ Jerusalém tag ki. Hẽn ra mũ tũg nĩ. Vãhã ãjag tóg venh ke mũ, inh panh tỹ ãjag mỹ ùn tó ja ti, hã vỹ: ti kuprĩg, he mũ. Kanhkã tá tóg kãtĩg ke mũ, ù tỹ ãjag tar han ke ti,” he tóg, Jesus ti.

Jesus tỹ kanhkã ra tĩg

(Mc 16.19-20; Hk 1.9-11)

⁵⁰ Kĩ tóg ag jãmĩ tĩ mũ, ěmã tỹ Betânia ra. Tá tóg ã nĩgẽ tỹ ag kri ven mũ. Kĩ tóg ag mỹ vĩ há han mũ sir.

⁵¹ Ag mỹ vĩ há han kĩ tóg ag ré kĩ tĩ mũ, kanhkã ra tãpřy tóg mũ.

⁵² Kÿ ag tóg ti to: “Topě vỹ tỹ ti nĩ,” he mũ sir. Kÿ ag tóg Jerusalém ra kãmũ mãn mũ, vēsýkã. Ag mỹ tóg sér pẽ tĩ vãhã.

⁵³ Kurã kar ki ag tóg Topě jo ãn ra mũ tĩ, tá Topě to vỹ há han jé, ti mỹ nén ã há kar tó jé, ti tỹ ag mỹ sér tĩn kÿ.

Hã vễ.

clix

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 18 Apr 2025 from source files
dated 29 Jan 2022
16af52c8-0e45-5e91-b36c-cd314d36d7fc